




UTL AT DOWNSVIEW



D RANGE BAY SHLF POS ITEM C
39 10 10 06 12 007 6

DR
509
B3S4

Seyfioğlu, 'Alī Rızā Seyfi
Bārbārōs Hayreddin

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

بازار و سرخه‌الدین



در سعادت

شمس مطبعه‌سی — باب‌عالی قارشوسنده نومرو ۷۲

۱۳۲۶—۱۳۲۸

۴

بَارْبَارُوسُ خَيْرُ الدِّينِ

Seyfioglu, Ali Rıza Seyfi
Bārbārōs Hayreddin
محرری :

علی رضا سفی

صاحب و ناشری
اقبال کتبخانه سی صاحبی


مسین

در سعادت

شمس مطبعه بی — باب عالی قارشوسنده نومرو ۷۲

۱۳۲۶ — ۱۳۲۸

DR
509
B3S4



1007196

قاره

شو او قويه جگگز صحيفه لر ماضى مليمزك اك شانلى واك
قانى بر صفحه سى و اوراده كوره جكگز بويوك سيمارك ايچنده
اك بويوكى شبهه سز بارباروس خيرالدينك سيماي شجاعتي، سيماي
حميتي و سيماي سياستيدر. تصادف صانكه عثمانليغك او دوريني
قره ده دكزده عين درجه ده مظهر احتشام وسطوت ايتمكدن
متلذذ اوليورمش و هيچ بر جهتي نقصان بر اقمغه قياميورمش
كي بارباروس خيرالدين ده قانوني سلطان سليمانك قبودان پاشاسي
ياپمش ايدى! بناءً عليه بارباروس كي حياتي اك مهيج رومانلردن
دها هييجان انكيز وقايع فوق العاده يه جلوه كاه اولمش، افعال
واجرا آتي تاريخ عمومي عصره اجراي تاثير ايتمش بر داهيه
حرب و سياستك بوتون حياتي مكمللاً يازده بيلمك بنم ايچون
ممكن اوله ميه جني كي، بنده اوداعيه ده بولمق خودپسنديسندن
يك اوزاغم؛ لكن بعض سوائق حسيه و فكريه واردركه :
انسان آنلره مقاومت ايده مز و ايشته بنده بو حالت روحيه يه
دوشدم. ماضى شوكتمز - بوتون افراد ملتله - اولان رابطه م،
استقبال ملي ايچون اميدلره صارلمق سعادت و بالخاصه مشروطيت
مبجله نك طلوع خارق ايله بحريه حربه مزك كوسترديكى هييجان

وعصبيت تجدد، توحيد قوت ايتدی؛ دیدم، که: نه اوله بیلیر؟
 نام عظمتی شو آنده ملت عثمانیه نك تقویه سطوته، تامین استقبالنه
 یتیشه بیلیمک ایچون آق دکرک جوشقون دالغه لری اوزرنده
 کیبولی بوغازینه دوغرو قوشان مهیب برزره لری یه ویرلمش مجاهد
 خیرالدینزک ترجمه حالی - ولوکه نقصان اولسون - نظرگاه
 امته قویه یم. هیچ اولمازسه بوتون قصور لر یله برابر بندن صکره
 یازه جقلاره بر (نوت) خدمت ناجیزینی ایفا ایدر.

وایشه آنجق بومطالعه ایله در، که: «بارباروس خیرالدین» ی
 دور استبدادک اک سیاه زماننده یازوب بیک مشکلات ایله
 نشر ایلدیکم «طورغود رئیس» و «کمال رئیس و بابا اوروج» نام
 اثرلر مه علاوه یه جسارتیاب اولیورم.

ذاتاً بودرت اسم ده عین زمانده وطن ایچون قلیج چلمش،
 شهید اولمش، سنه لرجه یان یانه حرب ایتمش ذوات عالییه
 منسوب دکلیدر؟

کوزتبه ۱۲ اغستوس ۳۲۶ علی رضا سیفی



مقدمه

تورک لک قهرلرده صحائف تاریخیه بی شان و شجاعت عسکر-
یه لر یله دولدوران بیکلرجه رجال و اکبری اولدیغی کبی، دکزلر
اوزرنده ده تورک اولدیغی اثبات ایتمش، قلیجک چلیکنه
«عشق اولسون!» دیدیرتمش، یوزلرجه دشمن قلملری مدح لری
اوغرنده قوللاندرمش بکیتلری واردر! دکر دیجه، بحریه
دیجه، دونما دیجه همان اک کوچوکمزدن اک اختیارمزه قدر
آغز مزدن شو اسملر دوکولیور: — بارباروس خیرالدین پاشا،
پیاله پاشا قلیج علی پاشا... لکن اعتراف ایدلمک: بو ذاتلر
برزمانلر عثمانلیق نامنی یوکسلتمش، اک چتین دشمنلره، اک
غرضکار اغیاره پس دیدیرتمش بر طاقم شانلی غازیلر اولدیغی
شویله بویله بیلدیکمز حالدده نه یابدق لری، کیمک نه سی اولدق لری
نه آلوب نه ویردک لری، حتی نه زمان کلدک لری بیلمه یورز. بو
بزم ایچون قباحته ایسه ده قباحته عیبی بزه عائد دکل. چونکه
یازما مشلر، یازیلانلری بزه اوقوتما مشلر، اوقویانلره سویلتمه-
مشلر. لکن شیمدی آرتق وقت کلدی که: اصلمزه، نسلمزه،
ملته ایلیک و فئالق ایدنلره دائرنه ممکن ایسه اوکره نه لم، اوکره نه لم

وعبرت آلهم! شیمدی او کمزده بر اسم دوریورکه: ملتک قلبنه
 ابدیاً نقش ایدلمش؛ بارباروس خیرالدین پاشا .
 کلکز سزکه برابر المزده کی صحائف تاریخیه کیرلم: بو ذات
 محترمک اورالرده براقدینی ایزلری برر برر تعقیب ایدلم. بو
 ایش ایچون شیمدیکی زماندن نه قدر کری یه کیده جکز بیلیور
 میسکز؟ تام درتیوز الی درتیوز التمش سنه. بو اثنالرده عثمانلی
 دولتک پادشاهی یدنجی پادشاه اولان فاتح سلطان محمد ایدی .
 مشار الیه اوزمان استانبولی فتح ایدلی اوج درت سنه اولمش
 ایدی و عثمانلی ملتی تام قانلی ، جانلی وقتنده ، کنجکلنک ،
 قهرمانلغنک اک آتشی بر زمانده ایدی. ایدیلجک غوغا ، فتح
 اولنه حق مملکت ، کیریلجک بلا آرایورلردی. فی الحقیقه استانبول
 یکی فتح اولنمشدی؛ لکن بو کونکی ازمیر ولایتی، انطالیه ،
 اسکندرون قییلری، بوغازلر، مرمره یالیلری، سلانیکه قدر
 روم ایلی یاقه سی چوقدن المزده ایدی؛ حتی بو آنه قدر دکر -
 جیلکده اوقدر ماهر اولیان و بکده لزوم کورمه یورمش کی
 دوران حکومت هر طرفزک صوایله قابلی اولدیغی، نرهبه اردو
 کوندرمک لازم کلسه کی لازم بولندیغی کورده رک فاتح سلطان
 محمد کی ایش بیلیر و بیلدیکی یایمقدن اصلاً چکنمز سرت،
 براتیق بر پادشاهک امری ، همتی ، شدتی آلتنده بر کوزل
 دونما صاحبی اولمغه چالیشیوردی . حتی بو دونما هر نه قدر

دول بحريه ايله اويله اساسلى صورتده چاريشما مشسدهده هيچ اولمازسه سوقيات واسفار قصيرهده كوستردىكى مهارت ملتده كيجيلىك استعدادينك موجود اولديغنى اثبات ايله جك مرتبهده ايدى. بوندن باشقه نظر دفته الهه جق برخصوص دها واردى: — فى الحقيقه سكود قصبه سنده ودومانىچ يايلاغنده مكان طوتان ارطغرل ليلر كرك مكان و كرك مقدار جهتيه سواحله يايلوب كيجيلىكى مسلك اتخاذا ايله يه جك حالده دكل ايسه لرده آنا طولى، بالخاصه آنا طولينك آيدىن سواحلى بزدن اول كمش و بوراده يرلشمش ساجوق توركلريه مسكون اولوب، بونلر ايسه كرك موقعلرى، كرك فطرتلرنده كى تحرىء وقايع خصيصة سى سببى ايله دكزله چوقدن استيناس كسب ايتمش ايديلر. آيدىن ولايتى دخى ديكر ساجوقى امارتلى كى عثمانلى تركلكنه التحاق ايدنجه دولت بووجهله بلازحمت قوه بحريه مستقبه سى ايچون غايت قوى والويريشلى بر عنصر اساسى الدهه ايتمش اولدى. ازميز نواحيسى سواحلنده، انطاليه قىيلرنده توطن ايتمش اولان توركلرك حكومت منتظمه حالنده بولندقلرى زماندن صرف نظر، ادوار تفرقهده دخى جسور و متشبث كيجيلر اولدقلرىنى اثبات ايله يه جك برچوق دلائل تاريخيه واردر؛ يالكز بوزواليلرك جهه لرىنى تشكيل ايدن اطه لر دكزى عموميتله مذهباً، جنساً كنديلرينك اك بويوك دشمنى اولان و كيجيلىكده ماهر بولنقهله برابر

قورصانلغی ده کندیلرینه عادتاً مدار معیشت اتخاذا ایلهین اقوام
ایله مسکون، خصوصیه سن ژان شوالیه‌لری، ردوس و قبرسده
بودروم و ازمیرده اسلامیتک عد و اکبری اولدقلرندن آناتولی
ساحلنده کی تورک عنصرینک تجارت و قوهٔ بحریه لرینک انکشافی
یک مشکل ایدی؛ بوندن باشقه بوتون اقوامک وقایع تاریخیه‌لری
برمناسبت، برهمته ضبط ایدلمش اولدینی حالد آناتولینک آق
دکر ساحلنده کی تورک امارت لرینک وقایع تاریخیه‌لری، بالخاصه
تاریخ بحریلری صاحبسز مال کی غائب اولوب کیتمشدر.

اهل صلیب محاربات اثناسنده تورکلرک دکزله آشنا حتی
آوروپالیره فائق سفائن حربیه انشاسنه مقتدر اولدقلرینی
میدانه قویه‌جق و ثائق قطعیه‌دن برینی بوراده بالخاصه درمیان
ایده‌جکز. اهل صلیب محارباتنه اشتراک ایچون بویوک برقوت
و بوتون انکلاتره دونماسیله بحر سفیده کچمش اولان انکلاتره
قرالی «اسلان یورکلی ریشار» روم خاندان حکمداریسندن
قبریزی غصب ایتدکدن صوکره محل مقصودینه کیدرکن غایت
جسیم برسفینه‌یه راست کلش و بوتون دونماسیله بو تکنه‌یی
مغلوب ایتمکه چالیشمش ایدی. ایشته بوتک کمی برتورک سفینه‌سی
ایدی ! فی الحقیقه سلیمان نطقی بک افندینک «محاربات بحریه
عثمانیه» نام اثرنده بوتکنه‌نک عربله منسوبیتی بیان اولنه‌رق
«امیر یعقوب محاربه‌سی» عنوانیله وشایان دقت برتصویر ایله

کتابه علاوه ایدلمش ایسه ده و نائق تاریخیه دن و بالذات انکلیز مورخلرینک بیاناتندن بوتکنه نك کرک صاحب لری کرک میجیلرله محارب لری تورک بولندیغی، حتی بیروتدن حرکتله و ائنده اهل صلیک محاصره ایله دیکی عکا قلعه سنه قوه امدادیه کوتوردیکی ثابتدر. انکلیزه مورخینندن نیقولاسک تکرار ایلدیکی وجهله بودفعه یه عائد Vinesauf « واین سوف » ، Bromton « برومتین » ، و Horeden « هوردن » طرفندن ویریلن معلومات آتیده عیناً نقل اولمشدر : —

« بو ائنده قرال ریشار دونماسی چوق یوک استیعاب ایده بیان بر چوق سفائنه علاوه ۴۰ عدد محاربه غالیسی ، ایمپراطور ایساقدن آنان ۳ دیگر سفینه حربیه ایله ینه مکمل ۶۰ قطعه سفائن سائرهدن عبارت ایدی .

« خزیرانک بشنجی چهارشنبه کونی ریشار کندی سفینه سی اولان Trench-the mer (ترنج ذی مر) ه را کبا بوتون دونماسی آلهرق شرف و شان مستقبلنک صحنه سنه حرکت ایتدی . شرقه دوغرو سیرایدوب سوریه ساحلی بولنجه ساحل بوی عکایه یول ویرمشلر ایدی . خزیرانک یدنجی کونی بیروته تقرب ایدلدیکی ائنده ایلریده جسم بر سفینه نك موجودیتی کورلدی . انکلیزلر بوآنه قدر بودرجه بویوک کمی کورمه مش اولدقلرندن مستغرق حیرت و تقدیر اولدیلر . بو حیرت و تقدیر

اوزمانكي وقعه نويسلر كمي حقنده قوللاندىقلرى كلاتدن
ا كلاشيلير ... بونلردن برى ديركه :

« خارق العاده بركى ! بركى كه : حضرت نوحك كيمسندن
صوكره بوندن بويوكى كتابلرده اوقونامشدر !.. » سفينه پك
متين و مهيب صورتده انشا ايدلمش ايدى . كيتدجه اينجهلشن
اوج ديركى موجود و بورده سنك بعض يرلرى يشيل ، بعض
يرلرى صارى بوي ايله بويامشدى . بويوا اوقدر ماهرانه اورلمش
ايدى كه : امثاله اصلا تصادف اونته ماز ايدى .

« ايجريسي اينانايه جق قدر چوق آدمله يعنى ۱۵۰۰ كيشى
ايله دولو اولوب بونلر ك ايجنده عكايى مدافعه يه كيدن ايدى امير
وسكسان مشهور تورك محاربى واردى .

بوندن باشقه اوق ، ياي ، باشقه سلاحلر و خصوصى قاپلر
ايجنده « آتش رومى » ايله ينه خرستيانلرعايهنده قوللانيله جق
اك مدهش واك زهريليرندن ۲۰۰ ييلان واردى ... »

بوخارقه بحريه كوريلنجه ريشار ، Peter de Barris
(پتر دو باريس) اسمنده بر قوماندانى غاليسى ايله ماهيتنى تحقيقه
مأمور ايتدى . پتر دو باريس كمي يه ياقلاشججه صورديغى سؤاله
كينك فرانسه قرالنه منسوب اولديغى و عكايى محاصره ايتكه
انطاكيه دن امداد كيتديكى جوابنى آلدى . انجق بونلر نه فرانسزجه
بيلورلر ، نه ده برتك خرستيان بانديره سى كوستره بيلورلردى .

استیضاح بر از اوزادیلنجه خنکایه بی دکشیدیره رک جنویز
 اولدقلرینی و صور شهرینه کیتدکلرینی سویله دیلر . بو ائاده
 انکلز کیجیارندن بری بونک اسلامره منسوب اولدیغی فرق
 ایتشدی . قرال ریشارک حضورنده دیدی که : « اکر بوکمی
 اسلام دکلسه باشمی کسرم ، یاخود آصلمغه راضی یم ! آرقه لرندن
 شیمدی بر تک غالی کوندرکز و کیدن غالیز آنلره دوستانه
 رسم سلام ایفا ایتمه سین ، اوزمان کیم اولدقلرینی کورورز . »
 بو فکر معقول کوردی . کوندریلن انکلز غالیسی کمی یه
 یاقلاشمق ایسته نجه اسلاملر اوق آتمغه و آتش رومی قوللانمغه
 باشلادیلر . بونی کورن ریشار عموم دونماسنک باشنه کچوب
 دیدی که : « هایدی ، بونلری تعقیب وضیط ایدلم ؛ اکر قور-
 نولیرلر سه الی الابد مجتمی ، حسن نظرمی سزده غائب ایدرسکز .
 اکر ضبط اولنورسه بوتون محتویاتی باشند آشاغی سزکدر . »
 ریشار کیسی ایلک اوکده اوله رق حرب ایدیور و غالیلرینه
 قوماندا ایدره رک هر کسی مشهور اولان شجاعتی ایله جانلاندیر-
 یوردی . شیمدی هراییکی طرفک اوزرنده برمرمیات صاغناغی
 اوچیوردی . تورک کیسی یولنی آغرلشدیرمش ایدی وهرنه قدر
 انکلز غالیلری اطرافنی کورکه درت دونمکده ایسه لرده
 کویشته لرینک پک یوکسک اولماسندن وغایت چوق طائفه سنک
 اوقلری عادتاً اولوم یاغدیدرینغندن رامپا ایتک غیر ممکن

کورینوردی. بناءً عليه انكيزلرك بوتون جسارتی محو اولوب
فرار ایتک حاله کلدیلر. قرال ریشار باغریوردی که :

— آه، شیمدی بو کمیی بویله صاغ و سالم قورتلغه

براقه جقمیسکز؟ اوخ اوتانک! بو قدر مظفريتلرن صوکره

قخبه لکه وقور قویه می دوشه جکسکز؟ ای بیلک که: بو کمیی کچوب

قورتولیرسه هیکزی چار میخه کره جکم، اشکنجه لره قویاجغم!

ذکی تاریخ نویسک دیدیکی کبی «اوزمان انکیز کیجیلری

مجبوریتی فضیلت یرینه قائم ایدرک دکزه اتلادیلر وتورک کیسنک

دومننه خلاطر باغلا یه رق دشمنی بویله جه ایسته دکلدی کبی

قوللانمغه باشلادیلر(!) بونک اوزرینه غایلر اطرافنه اوشوشدی

وخلاطرک اوجنه وسائر یه طیرمانارق نهایت رامپه ایتک

ممکن اولدی. بونک اوزوینه غایت قانلی بر دوکوش باشلادی.

برآرهلوق تورکلر باش طرفه دوغرو سورولدیلسه ده اشاعیده کی

ریفقلمندن امداد آله رق کری کلدیلر و شدید بر هجوم ایله

مهاجملری غایلرینه قاجیردیلر. یالکیز بر چاره قالمش ایدی؛

اوده همان قرالک عقلنه کلدی. غایلرینه سرعتله هجوم ایدوب

باش طرفلرنده کی دمیر مهموزلر ایله تورک کیسنک قابورغله رینی

پارچالامغی امر ایتدی. بوامر مهارت و موفقیت کامله ایله اجرا

ایدلدی. انکیز غایللری براز مسافه کری چکیله رک بر خط

حرب تشکیل ایتدیلر و بوتون قوتلرینی کورکلرینه ویره رک تورک

کمیسنه مجتمعاً اويله شديد بر صورتده مصادمه ايتديلرکه: بورده سی بر چوق يرلردن بردن دلینه رك ایچری یه صو هجوم ایتدی . بویله جه اوبویوک کمی باتدی .

۱۳ نجی عصر میلادینک (پیتر لانغ لوف) نامنده برانکلیر شاعری اوزمانکی لسان و تعبیرات عجیبه ایله بووقعه یی نظم ایتمش تاریخی ۱۱۹۱ اوله رق کوستر مشدر .

بو کون جهانک کمیجیلک اوسته سی اولان انکلیرلرک اوتورک کمیسی حقنده کی تقدیراتی، برتک کمینک قوجه بردونمای عادتاً مغلوب ایدوب نهایت مصادمه سایه سنده غرق ایدیله بیلمه سی تورکلرک استعداد و ترقیات بحریه سنک اک پارلاق مثاللردن ایسه ده مرور زمان ایله بو ترقیاتک دوچار انحطاط اولدیغی شبهه سزدر؛ بونکله برابر اولجه بحریه مزک روحنی تشکیل ایتمش اولان آق دکز تورکلری دولت عثمانیه نک تأسسندن چوق زمان اول دخی دکزلرده دولاشماغی بر اقامش، بالخاصه آیدین اوغللری خیلی مدت اطه لر دکزینی شوکت بحریه لری ایله چالقامشلردر .

(۱۳۴۱ - ۱۳۴۷) تاریخلری آره سنده آیدین اوغلی امیر بک (امور بک) از میر یالیلرنده تدارک ایتدیکی بویوک بر دونما ایله جوار اطه لر ایله آوروپا یالیلرینی آقینلره بوغمقده ایدی . اوزمان استانبول صندالیء حکومتی ایچون منازعات

مدیده ده بولان رقبای معلومه دن (قانتاقوزن) ، علیهنه واقع حرکات عصیانیه قارشى محافظه نفس و ناموس ایچون امدادینه امیر بکی چاغیر مقدن چکینه مش ایدی . روم تاریخلرینک روایات مؤکده سنه نظراً آیدین اوغلی پک یکت واورتبه نازک بر ذات اولوب هله (قانتاقوزن) ایله آره لرنده پک صمیمی بر محبت جایگیر ایدی . آیدین اوغلی نانکور بر سرای طاقی طرفندن تختندن وپای تختندن قوغولمش اولان دوستک حال فلاکت اشمالی خبر آلیز آماز از میر لیماندن تام اوچوز تکنه دن مرکب بر دونمیه ۲۹۰۰۰ کیشی قویه رق قره قیشده حرکت ایدوب مریچ نهری آغزینه دمیر براقشدر . بورادن یانه آلدینی ۲۰۰۰ کزیده تورک محاربیه روم ایلی به کیردی ونهر ساحلی تعقیباً حرکتله دیمتوقه ده وحشی بلغار قرالی طرفندن تحت محاصره یه آلمش اولان ایمپراطور یچه پی (یعنی محبی قانتاقوزن) ک زوجه سنی تخلیص ایتدی . بو حرکت عسکریه ائالرنده (قانتاقوزن) ک صربستانه فرار ایتش بولماسی مناسبی ایله حیات و مماندن هنوز خبر یوق ایدی . لکن نعمتشناس قرالیجه (ایرن) کندیسنی قابا ، خشین دشمنلرک ائندن قورتاران قهرمانی کورمک وبالذات تشکر ایتک ایسته دیکندن طاقیه دیمتوقه خارجنده وقارلر اوزرنده چادر قورمش اولان امیر بکی برقات مزین لباس ، یوز جنس بارگیر ایله ایچری به سرایه تشریف ایتیه سی خبرینی

کوندرمش ایدی . لکن امیر بك بدبخت بر دوستك غیوبتی
اثناسنده آنک زوجه سیله کوروشمه یه و آنی بولوب مهالک
ملحوظه دن تخلص ایله مه دجه ملاقاته حق اولدیغنی سویله یه رك
رد ایله مش ایدی . امیر بك کنديسنه تخصیص ایدیلن محفوظ
موقع ایله هدیه لری ده صورت ناز کانه ده قبول ایتمه یه رك یاننده
بولنان و هربری کنديسی درجه سنده اعزاز و شرفه مستحق
بولنان سلاح آرقه داشلرینك مشاق سفریه سنی آنلرله تقسیمه
مجبور اولدیغنی سویله مش ایدی [۱]

امیر بك ساحلده کی دونماسنك محافظه سی ایچون
۹۵۰۰ کیشيلك برقوت براقه رق متباق معیتی ایله قانتاقوز بنی
بوله یيلمك ایچون روم ایلیده اوزون حرکات عسکریه یامش
ایسه ده مومی الیهی بولمق ممکن اولما مشدر . تورکلر نهایت هوالرک
عدم مساعدده سنه ، اسرا و غنائم کثرتنه علاوتاً عسکرک سفر
مدید یوزندن خشنودسزلغنه دائر وارد اولان خبرلر اوزرینه
ساحله عودت و دونمالرینه بینه رك از میره سالم ، غانم مواصلت
ایتمشلدرد .

روم ایمپراطورلغنی صارصان بو محاربات داخلیه اثناسنده
امیر بك روم ایلی یه ایکی دفعه ده اچکمش ، اردوسنی ایمپراطورک
اردوسی ایله برلشدیره رك سلانیک شهرینی محاصره ، استانبولی

دخی تهديد ايله مشدر. انجق بواننده ممالك موروثه سنى لاتينلره قارشى مدافعه ايتمك لازم كلديكندن آناتولى يه عودت ايتمشدى. چونكه : از مير توركلرينك قسوة بحريه لرى ، تشبثات بحريه لرى اودرجه يه وارمش ايدى كه : پاپا جنابلرى ، قبريس قرالى ، ونديك جمهوريتى ، سن ژان شواليه لرى بونلرك اوزرينه بويوك بر اهل صليب تشكيل ايله مشغلايدى . آيدين ياليلرى دشمن غاليليله آبلوقه ايدلدى ؛ بواننده اميربك ده از ميرك اصل حصارينى سن ژان شواليه لرينك الندن قورتارمغه چاليشير ايكن براوق ايله شهيد اولدى . اميربك اولور ايكن دوستى ايمپراطور (قانتاقوزن) ه كندى جنسندن برذاتك دوستلغنى توصيه ايتمش ايدى ، كه ؛ بوذات بحريه جه كنديسى قدر قوتلى دكلسه ده مرمره ساحلننك ، كليولى قارشيلرينك حكمدارى اولديغندن ايمپراطوره دها بويوك معاونتلى اجراسنه موقعى مساعد ايدى . بوذات ايسه اورخان غازى ايدى .

شيمدى اكلاشيله بيلير ، كه : آيدير امارتنك ممالك عثمانيه عدادينه وضعيله تورك عنصرينك اوزرلرينه بر اهل صليب دعوت ايده جك قدر امور بحريه فتوحات بحريه ايله معروف بر قسمى ده عثمانلى توركلرينه التحاق ايتمش ويوز سنه صوكره آق دكزى جبل الطارقه قدر چالقايان لوند قبودانلرينك چوغى ايله اك جسور طائفه لرى بورالردن نشئت ايله مشدر .

بونکله برابر عثمانی دونماسنک تشکل وترکی بر چوق.
وقایع متادیه حربیه ایچنده اودرجه سریع اولماش، فاتح سلطان
محمدک دست پولادینک تماسنه قدر حکومتک شریفله، قوتیله
متناسب بر عثمانی دونماسنک دکرلر اوزونده حرکات قطعیه ده
بولندیغی کوریلهمه مشدر. مرمرده جزائر صغیره نک فتحی،
احتمال ساحله پک یقین اطه لک برایی آقینجی سفر جکنی حائر
اهمیت کوسترده مه یه جکر.

غریبدر، که: تورکلر علمینه اولان افکار عداوتکارانه
ومتعصبانه لرینه رغماً منتظم دونما مزک تشکلندن اول دخی
دولت بعض کونا سوقيات عسکریه ده بولنه ییلمک ایچون جنوه
وونديک سفائنندن پاره ایله نقایه تکنه لری بوله ییلمشدر.

سلطان مراد لادیلاس ایله هونیادک اردوسنه مقابله ایچین
آسیادن آوروپایه کچمک ایسته دیکی زمان جنوه لیلرک - اولدن
بری دشمنلری اولان ونديکلیلرک جهت مخالفده بولنمالری
یوزندن - عساکر عثمانیه یی نفر باشنه بر دوقا اجرته روم ایلی
یاقه سنه مع الممنونیه نقل ایله دکلرینی تاریخ کوستریور. ده
دوغروسی استانبول فتحندن برقاج سنه لر صوکرده قدر قلعه
سلطانیه بوغازی عثمانی حاکمیت قطعیه سی آلتنه آینه مامش ایدی.
بوانتاده ونديک و جنوه جمهوریت تجاریه لری آره سنده کی
رقابت شدید هان صوکر درجه یه واصل اولمش ایدی.

وندیکلیر جزائر بحر سفیدک اک مهملرینه و سوریه ساحلنده
 دخی خدمات تقیلهلرینه مکافاتاً اهل صلیب طرفدن کنیدیلرینه
 بخش اولنان قوتلی مواعقه صاحب ایدیلر، که : عکا قلعه سی دخی
 بوجمله دن ایدی . جنوه ایسه قره دکرده و استانبولده دها قوتلی ،
 دها نفوذلی بولنیوردی ؛ غلطه نک اوزرنده تورکلرک استانبولده
 یرلشدکلرندن سوکره یه قدر جنویز قوله سی (غلطه قوله سی)
 یوکسلمش دورویور ، قره دکر بوغازی خارجنده ، قریم یالیلرنده
 متین قلعه لر ، مستحکم تجارت ستاسیونلری بولنیوردی : حتی
 مرمره حوضه سی ییله وندیک و جنویز دونمالری آره سنده قانلی
 غوغالره صحنه اولمش ایدی .

۱۳۵۲ سنه سنده تاقسطنطنیه سورلرینک آلتنده جنویزلیلر
 وندیک ، قاتالان وروملرک متفق دونمالرینی مغلوب ایتمش
 ایدیلر ؛ لکن ایرتسی سنه وندیک ، بو دکرلرک قرالیچه سی
 آغرو آچیغنده دشمنلرندن شدتله انتقام آلمش ایدی .

۱۳۸۰ تاریخنده ینه جویزلر Cgioggia کیوجایی ضبط ایله
 وندیکی صارمشرایکن اهالی یکو جود و خروشان بر حرکتله یالکنز
 هجومی دفع ایتمکه قالمایوب مسئولیلری تسلیم نفسه مجبور
 ایله دیلر ؛ ایشه بو وقعه دن اعتباراً جنویزلیلرک شوکت و نفوذ
 بحریلری یواش یواش انحطاطه ، وندیک ایسه بالعکس کسب
 قوت ایتمکه باشلامش ایدی .

تورکلر استانبولی ضبط ایتدکدن صوکره فاتحک تشکیل
ایتدیکی دونما و کوندردیکی اردولر جنوه لیلری سرعتله طرابزون،
سینوب، کفه آزاق مواقعدن سوروب چیقاردیغندن جنوه
شرق صولرنده وندیکه نظراً مالک اولدینی مناسبت تجاریه نك
همان جمله سنی بووجهله غائب ایتمش اولدی . آرتق قره دکزایله
مرمره حوضه سی برر عثمانلی کولی دیمک ایدیلر . فاتح قلعه
سلطانیه نی تحکیم ، جسیم طویلر ایله تسلیح ایله مش ایدی ؛
فی الحقیقه چاقومودینه رو نام قوماندان بویوک بر جرأتله کیمسینی
بوغاز حصارلرینک آتشی آلتندن انجق اون برکیشی تلفات
ویره رک کچیرمش ایسه ده بومثاله باشقه کیمسه تقلید حرکت
ایتمک جسارتی کوسترمه مش ایدی .

استانبولک هر عثمانلی یه معلوم صورت مشکلکشاده فتخنی
متعاقب عثمانلیلرک بحراً تاریخده برنجی اوله رق نظر مزه چارپان
حرکتلری اینوز اوزرینه واقع اولمشدر . اېصاله اهالیسنندن
اینوز خرسیتیانلرینک تجاوزات بحریه لرینه عائد فاتحه ایدیلان
شکایات متوالیه اوزرینه بالطه اوغلی سلیمان پاشادن صوکره
امور بحریه مزک اداره سنه مأمور اولدینی کوریلان « خاص
یونس » قبودان در دولته چاغیریلوب تعلیمات مخصوصه
ویرلش و اون قطعه قدرغیه بحریه عزبلرینی ارکاب ایله
محل مقصودینی کیمسه یه آکلاتمازدن اینوزه حرکتی امر

اولمشدی. عثمانی فیلوسنک محل مذکور اوکنه وصولی متعاقب
عثمانی اردوسی ده یتیشوب کلدیکندن حصار عرض تسلیمیت
ایله مش، بورایه قدر کلینمش ایکن محل مذکور مقابلنده کی
(طاشوز) جزیره سی ده فاتح سلطان محمدک امریله ضبط اولنوب
احتمال آرشیلده برنجی جزیره اوله رق مملک عثمانیه یه الحاق
ایدلمشدر .

۸۶۴ سنه سنده یوقاریده دیدیکمز کی کسکین محمود پاشا
قومانداسنده کی دونما مزک قره دکرده کی جنویز قلاغی ومواقع
معلومه سائرده بی ضبط ایچون اجرا ایتدیکی سفردن عودتنده
عثمانی بحریه سنک جدی بر فعالیت دوره سنه کیردیکنی ،
پادشاهک ونذیکلی وروم معمارلر واسطه سیله سفائن جسیمه
انشاسنه باشلادیغنی کورپورز .

آرتق لازم اولدجه آق دکره چیقان عثمانی دونمالری قوه
بحریه دینیله بیله جک حاله یاقلاشیورلردی . ۸۶۶ ده مدلی ،
۸۷۲ ده اکریبوز فتح اولندی . تاریخلرک روایتنه نظراً
اکریبوز فتیخته کوندریلن دونما یوز قدرغه وایکیوز نقایه
سفائنندن مرکب و ۷۰ بیك کیشیک براردوی حامل ایدی .
اکریبوزک ونذیک دونماسنک ، هله اومشهور (لوره دانو) نک
کوزی اوکنده ضبط اولماسنه مقابل لوره دانونک انتقام ایچون
آناطولی سواحل غیر محفوظه سنی غارتدن باشقه برشی یاپه مامسی

قوة بحريه مزك اك بويوك دلائل ترقياتنددر . ۸۸۵ سنه سنده
عثمانيلرك (ترانده) ديدكلرى (اوترانتو) يه، ايتاليا طوپراغنه
برعثمانلى دونمسانسك ياناشه رق كدك احمد پاشانك معلومنز اولان
حركات حربيه يي اداره سى ده بوسوز مزك صحتى اثبات ايدر .
ير آوروپالى مورخ ديوركه : « فى الحقيقه ونديكليلر وسائر
آوروپا دول بحريه سى انشا واداره سفائنده عثمانيلردن ايلرى
ايسه ده عثمانيلرده كى روح عسكرى آنلرك اجر تلى عسكرلرنده
موجود دكلدى . . . »

كاتب چلمينك تحفة الكبارنده بوزجه آطه قلعه سنك سبب
بناسى اوله رق دينليور، كه :

« بوغازه قريب بوزجه آطه قلاع وبقاعدن خالى اولمقله
در ياده لوند كزن آكا التجا ايدر دى، سنه مز بوره ده (۸۸۰) فرمان
صدور ايتدى، كه : اول جزيره ده كناره قارشو برليمان ياپيله
واطرافدن توطنه رغبت ايدنلر تكاليف ديوانيه دن معاف
اوله لر . و مز بور جزيره غرييسنده لىنى آطه سى ديدكلرى
جزيره دخى اول زمان اعمار اولندى . . . »

بوجمله ده مذكور اولان لوند سوزى شايان دقتدر ، بوراده كى
لونددن مقصد على العاده عثمانلى قورصانلرى فرض اولنه بيليرسه ده
بو قورصانلر ايلريده ذكر ايده جكمز بويوك مقياسه ده كى ذوات
مشهوره دكل، دكر خرسنلرى ديمكدر .

عثمانی دوئناسنك تاریخ تكملی مباحث مفصلهیه احتیاج
کوستردیکندن بوراده درمیانسندن صرف نظر اولنیور؛ قوه
بحریه مزك فاتخ سلطان محمدك اوغلی بایزیدثانی زماننده کی باشلیجه
وقوعات حریه سی ایسه بوندن اول نشر ایدیلن «کمال رئیس
وبابا اوروج» نام اثر مزده کمال رئیسك مطلع اوله بیلدیکمز ترجمه
حالی صره سنده ممکن مرتبه ذکر اولنمشدر.

تا ازمئه قدیمه دن بری مدلی آطه سی جهانیه برچوق شیلر
تقدیم ایتمشدر؛ اسم قدیمی Lesbos لسبوس اولان مدلینك
— انکلز مورخلرندن لهین پولك دیدیکی کبی — شرابی،
مشاهیر قلمی ویدی تللی (لیر) دینیلن سازی ایله (سافو) نك
اشعارى مشهور ومستثنا ایدی. انجق اك صوك یادکارلری
هپسندن زیاده جالب دقتدر؛ چونکه بونلر (بارباروسه)
قرداشلر ایدی!

سلطان محمد ثانی ۸۶۶ سنه هجریه سنده (۱۴۶۲ سنه میلادیه سی)
افلاق سفرندن عودتله مدلینك فتیخنده بولنق ایچون
کلیبولییه کلدکلری زمان آچه اووالی یعقوب بك اسمنده بر
کنج سپاهی ده اردویه قاریشه رق برابر مدلییه کچمش ایدی.
جزیره نك فتیحنن صوکره اردو عودت ایتدی؛ لکن یعقوب
بك آچه اوواسنه دوئمه مش، تعین اولنان عساکر موظفه ایله
جزیره ده توطن ایله مشدی. صوکرلری نام شجاعترلره

تاریخ صحائفی دولدوران بارباروس قرداشلرک پدری ایشته بوذاندر .

معلوم اولدیغی اوزره آوروپالیلرده غریب براعتیاد واردر؛
 بزده هر هانکی مسلکدن اولورسه اولسون فوق العاده بر ذات
 ظهور ایتدی همان آنی بر صورتله خرستیان عنصرینه ، هیچ
 اولمازسه تورک اولمایان بر ملته منسوب کوسترمکه اولسون
 تشفیه صدر ایتک ایستلر . ایشته بو قیلدن ، لکن انسانی
 کولدیره جک قدر بوش بر ادعاده یعقوب بک حقنده در میان
 اولنمشدر ؛ کویا یعقوب بک دیدیکمز کی آچه او واسندن بر
 سپاهی اولمایوب فی الحقیقه مدلی خرستیا تلرندن بر مهتدی ایتمش !
 بونی ده ادعا ایدنلر کیملر بیلور میسکز ؟ حقیقه اک آز واقف
 اوله جق قدر یعقوب بک محیظندن ، وطنندن بعید بر موقعه
 صاحب اولان اسپانیوللر . فی الحقیقه اسلامیه ، عثمانی حکومتنه
 اک بیوک خدمتلی ایتمش ذواتک پدری مهتدی و یا خود عن
 جد اسلام بولنمسی - همزک اجدادی مهتدی اولمق حسبیه -
 بزجه هیچ بروجهله حائز اهمیت دکلسه ده یعقوب بک آچه
 اووالی و جد بجد تورک اولدیغی بلا اختلاف کندی ملتک
 بوتون تاریخلری یازار و بو حقیقت بارباروس خیرالدینک سلطان
 سلیمانہ تقدیم ایتدیکی سرگذشتنده دخی ینه کندی آغزندن

مصرح بولنور ايسه اسپانيوللرك ادعاليينه نه ديمك لازم كله چكى
يك اعلا تظاهر ايدر [۱]

يعقوب بكك اسحق ، اوروج ، حضر ، الياس اسمنده
دورت اوغلى اولمش ايدى كه بونلرك تاريخ تولدلىينه دائر المزد
اعتماده شايان معلومات يوقدر . هر حالده بونلردن اسحق ايله
اوروجك بويوك و حضر ايله الياسك كوچك اولدقلى
آكلاشيليورسده كاتب چليينك اسحق اسمنى اك اول ذكر
ايتمه سندن اك بويوكلىنك اسحق اولدينى ده ظن ايديله بيلير .
بارباروسلرك وقايع حياتيه لىنى تنوير ايدن باشليجه وثيقه
صوكرده دن خيرالدين پاشا نامنى آلان حضر رئيسك قانو
سلطان سليمان طرفدن ويريلن امر اوزرينه يازديردينى سر
گذشتى اولوب كاتب چليينك « تحفه الكبار » نده اجمال
ايدلمشدر . [۲]

[۱] كاتب چلي يعقوب بى ساده سپاهى دكل « سپاهى زاده » ديه
قيد ايدىيور .

[۲] كاتب چليينك اون يدنجى عصر ميلادينه يازدينى اثر ايله
هايدو و مارمول نام مورخلرك بارباروسه (بابا اوروج) ايله قرداشلىنك
ايلك سرگذشتلىينه عائد ويردىكى معلومات اساس جهتيله بر ايسه ده
تقرعاتجه غير قابل تاليف كورينيور . فون هامر بالطبع حاجى خليفه يه
اعتماد كوسترمشدر ؛ (ادميرال ژوريه ن دولاغراويه ر) ايله سائر مورخين
متأخرمه بويله حركت ايتملردر .

انكليز مورخى (لېن-پول) ديوركه : خيرالدينك شرقيه ، استانبولده

بودرت قرداشلرك مسلك بحرى يى قبول ايتلمى حقتده
برچوق روايتلر واردر . (لهين - پول) دييوركه : « بونكه
برابر مدلى جزيره سى اسكيدن برى قورصانلريله مشهور
اولديغندن بارباروسه قرداشلرك عنعنات تاريخيه تبعيت ومتين
جراتكار قلبرى جذب ايدن بومسلكه دخالت ايتمه لرينه تعجب
ايدلمه مك لازم كلير ... »

شوراسى محققدرد ، كه : يعقوب بك زاده لرك احتمال
يدرلرينك ثروتى معاونتيله برسفينه صااحب اولوب سواحل
متجاوره ايله تجارت ايتكمده ايدلر . اوروج برادرى الياس
ايله مصر وطرابلس شام سفرلرينى اختيار ايتمشدى . حضر
سلانيك وسيروزه كيدوب كليوردى . اسحق ايسه اكثر
زمانى جزيره ده كچيرمكه ايدى . لكن بركون بوتجار قردشلر
بويوك برفلاكت چارپدى : طرابلسه كيدرلر ايكن اسلامك
جان ومالى كنديلرينه حلال بيلان وحقلرنده هر درلو مظالمك

بولديني مدتجه واقع اولان اجرا آتى خصوصنده حاجى خليفه نك دها
موثوق ومفصل معلوماته صااحب اولماسى طبعى كورينيرده بربريه
عائد مسائلده (آبه ديه غو دو هايدو) دها شايان اعتماددر ؛ چونكه مومى
ايله اون آلتنجى عصرده برچوق سنه لر جزايرده اقامت ايتمش ، بارباروس
خيرالدينك خدام ومعيتى افرادندن برچوقلرى ايله كوروشمشدر . بزه
قاليرسه بالذات پاشانك يازديني سر كندشتك خلاصه سى اولديني ايجون
تحفة الكبارك بياناتى اك معتمددر .

اجراسنی عهد مقدسه دینه لرندن عد ایدن ردوس شوالیه لری قوتلی تکنه لریله بونلرک اوکنه چیقدی لر . بالطبع بر شدتلی غوغا باشلادی . چونکه اوزمانک سفائن تجاریه سی دخی بر نوع سفائن حربیه حالنده بولمق مجبوری ایدی ؛ ادیان مختلفه اصحابی آره سنده بر غضب و غارت متمادی عادت حالنده اولوب کړک آطه لر آره سنده وکړک آچیق صولرده هر باندیره دن ، هر دیندن وهر بویدن قورسان تکنه لری دولاشمقده ایدیلر .

بارباروسلرک تکنه لری نه قدر مسلح اولورسه اولسون سن ژان شوالیه لرینک اوشهور حرب غایلرینه مقاومت برتجار تکنه سی ایچون ممکن دکلدی ؛ بو حربده الیاس رئیس شهید اولدی ، حضر رئیس ده اسیر ایدیلرک ردوس زندانه زنجیر بند اولدینی حالده آتلدی !

حضر رئیسک شوالیه لرک النده نه قدر مدت قالدینی نه واسطه ایله قورتلدینی پکده معین اوله رق معلوم دکلسه ده اوزمان قره مان والیسی اولان سلطان قورقوددن انطالیه ده ایکن قورسانلغه سلوک ایچون مساعده ایسته مه سی واون سکن اوطوراق برکمی ایله دکزه چیقماسنه باقیلیرسه ۹۱۵ و ۹۱۹ تاریخلرک آره سنده اولمق لازم کلیور . بزه قالیرسه بارباروس برادرلرک سرکذشتلرنده کی اک مظلم نقطه لری بوراسیدر .

المزده کی و قایغنامه لر بردن بره بحر سفیدک حوضه شرقیه سندن

حوضه غریبسنه آتلاذینی جهته بزده تاریخمزنك قهرمانلرینی
 تعقیب ایتك اوزره بوجهتلره دومن دوغرلتمالی یز . آنجق
 قهرمانلرمزنك نصل برمحیط ایچنده اوغراشمقده ، نصل شرائط
 ایچنده موفق ویامغلوب اولدقلرینی آکلامادجقه وقایعك برمصال
 طرزنده تعقیندن فائده چیقمایه جفندن بزجه هرخصوصده
 مهم و صحنه فعالیت تاریخیه مزل اولان بربرستان قطعه سی ایچون
 اشاغیکی صحائف تخصیص ایدیورز .

20

بربرستان

هر نه قدر، روایات تاریخیه به نظراً : افریقا قطعه سنک اطرافى بك اسكى زمانلرده دولاشلمش ايسه ده ایچری پارچه لر بوسبوتون مجهول قالمش ، جنوب قسملری ايسه بحر محیطده سیر سفائنك مشكلاتی یوزندن هیچ نظر دقتی جلب ایتدیکندن نهایت بر زمان بوقطعه اطرافك دولاشلدىنی بیله اونوتولوب کیتمشدر . لکن افریقانك سواحل شمالیه سی بك معمور ، زنکین یونان و فنیکه مستعمراتی ایله زینتلنمشدی . بو وسیع مملکت احوال طبیعیه جه ساحل بحره و یکدیگرینه موازی ، آنجق مختلف عرضده اوج منطقه یه آریلیر .

۱ — عمومیتله بك منبت نواحیدن عبارت اولان منطقه ساحلیه که : بر زمانلر « افریقای مسکون » دینیلیر ایکن الیوم (بربرییه) ، (بربرستان) دینیلیر .

۲ — صارب ، طاغلق بر منطقه که : هر نوع حیوانات

وحشیه و خورمالقلری پك چوق اولدیغندن اسکیدن «ارسلانلر مملکتی» نامی ویریلیردی ؛ «خورما مملکتی» دیمك اولان بلدالجربد دخی تسمیه اولنور . بواراضینك اك یوکسك صرترلری (اطلاس) طاغلرینی تشکیل ایدر . رومالیر بومنطقه یی عمومیتله Gaetulia نامیله یاد ایدرلردی . [۱]

۳ — واسع و قومسال برچول که : عربلر و آوروپالیر «صحرا» «صحرای کبیر» تسمیه ایلرلر .

اطلاس طاغلرندن برقاق کوچك ایرماق شمالی و قیصه بر مجرا ایله آق دکزه منصب اولورسده داخلده بو طاغلرک جنوبنده اولیه ذکره شایان ایرماقلر و تا اشاغلیرده کی نجرنهرندن ماعدا جسم نهرلر یوقدر ، که بو «نجر» حقدنده قدمانک معلوماتی هیچ مشابه سنده عد اولنه بیلیر .

مصر سواحلندن بالاعتبار غربه دوغرو ایلریله نیر ایسه دور قدیمده افریقای شمالی تقسیمات پولتیقیه سنی شو شکلده بولورز :

[۱] شیمدیکی اطلاس سلسله جبالنك اوزونلغی ، ارتفاع معتدلی سطح مائللرینك طاتیلغی شعرای قدیمه نك دیدیکی کی یوکسکلکی بولوطلره قاریشان وسماواک استناد ایتدیکی تك بر جبل مهیب اوله بیلمکدن پك اوزاقدیر . حالبوکه : فنیکه لیلر طرفندن اکثریا زیارت ایدلدیکنه شبهه جائز اولمایان «تنه ریف» جزیره سمك زروء مشهوره یی سطح بچردن ایکی بچق میل برحد ارتفاعه واصل بولندیغندن احتمال شعرای قدیمه نك خیالات و تصوراتی اوقشایان جبل مهیب بوایدی .

۱ — Marmarica مارماريكا . قبائل بدويه نك اقا -
متكاهي اولان ريكيستان باديہ .

۲ — Cyrenaica سیرنايقہ (يعني شيمديكي بنغازي
متصرفلغى) بومنت خطہ كريد ويونانستاندن داغيلان مهاجرين
يونانيہ طرفندن اعمار ايدلمش و حدود غربيه سى بويوك «سیرت»
كورفزينہ منتہى ؛ باشليجہ بلاد معموره ومعظمہ سى Barca
بارقہ ايلہ «سیرن» Cyrène ايدى [۱]

۳ — Rigio Syrtis رجيو سیرتيس (يعني شيمديكي
طرابلس غرب ولايتى) . بو خطہ نك قسم اعظمى ده يابس
قوملىق، باشند باشه قبائل بدويه ايلہ مسكون، سياست وادارتا
«قارتاج» حكومته تابع ايدى .

[۱] بو شهر يونانستانك (ترا) جزيره سنہ منسوب (دورى) لر
طرفندن (قبل الميلا ۶۵۱) تأسيس اولنان برچوق زمانلر بالذات قارتہ -
جہ نك پارلاق بررقيي كسيلمشدر . مشهور بلدہ نك تأسيسى ده ولى معبدندہ
واقع تنسب اوزرينہ ايدى . شكل اداره ابتدا قراللق و تاج حكمدارى
مؤسس اول Battus «باتوس» عائله سنہ وراثتاً منتقل ايسده (۴۵۰) ده
بوشكل الغاء بر جمهوريت تشكيل اولندى . بونكلہ برابر «سیرن» ايلر هيچ
بر زمان بردائى قونستيتوسيون صاحي اوله مديلر . مملكت آراى مختلفہ نك
مشوشيتى ايچندہ اوزون مدت يووورالاندقدن صوكرہ نہایت بطليموس لر
Ptolemios ك دورہ حكومتلرنده مصر قراليتنہ الحاق اولندى .

كرك سجليا ، وكرك جنوبى ايتاليادهكى يونان مستعمراتنك احوال
تاريخيہ لر ينہ كلنجہ بونلر روما محاربتيلہ پك يقيندن علاقہ دار اولدقلرى
ايچين تاريخك او فصلندن تعقيب اولمق لازم كلير .

۴ — اصل قارتاج مملکتی اولوب شیمدیکی تونس حوالیسنی اشغال ایدردی.

۵ — شیمدیکی تونس و جزایر آره سنده منقسم ، ینه قارتاجلیلره تابع غایت لطیف و منبت بر پارچه که: قسم شمالیسی Byzacéna بیزاسه نا ، قسم جنوبیسی Zeugitana زوجیتانا تسمیه اولنوردی .

۶ — نومیدیا Nomidia ایله Mouritania موریتانیا قطعه سیدو ، قارتاجلیلر زماننده اقوام وحشیه ایله مسکون ایسه ده سواحله بر خیلی قارتاج مستعمراتی ، تجارت ستاسیونلری وار ایدی .

بواثر مزده مفاخر ملیه مزك اك پارلاقلرندن اولان وقایع تاریخیه مزى اوزرنده تعقیب ایده جکمز افریقای شمالی سواحلی ایلک دفعه قارتاج حکومتک موجودیت شوکتمداری ، ثروت و معموریتی ایله بر موجودیت تاریخیه اکتساب ایلش اولدیغندن مقاصد اصلیه واصل اولمادن قارتاج اوزرینه دولایسی ایله بر برستان الواح قدیمه سنه کچی بر نظر آتمالی یز؛ که قارتاجیه نك اوینادینی بویوک روللر فکر مزه موقع جغرافیئک اهمیتتی ، شیمدی بر چول حیات و مدنیته ذره قدر استعدادی یوق ظن ایتدی کمز اواقیم مبارکک استعداد فیوضنی ده ا واضح ارائه ایده بیلسین :

قارتاجك موقعی

قارتاج شهر عظیمی الیوم تونس کور فزی دینیلن، Hermoean
 هر میان شبه جزیره سی (شیمدیکی بون بورونی) ایله غربنده کی
 Apollo آپولو (شیمدیکی زبید برونی) حیقیندیسی آره سنده کی
 بویوک کور فز داخلنده بر شبه جزیره جك اوزرینه بنا ایدلمش
 ایدی. بو شبه جزیره جك تونس ابله Utica اوتیقادن همان
 عین مسافه وسطیه ده کائن اولوب قارتاج سوزلری اوزرینه
 حیقینجه صاعده و صولده ایکی موقع دخی کور یله ییلیردی .
 دها دوغروسی شبه جزیره دن اوتیقا دوقور، تونس آلتی میل
 قدر اوزاق و بو پارچه قره یه اوچ میل عرض وسطی یه مالک
 برزخله مربوط بولنیوردی . دکز طرف سنده غربیه دوغری
 اوزانمش اولان دار بر پارچه دخی آلتنده چیفته بر لیمان تشکیل
 ایتمکده و سفائن ایچون باطی ولدوسه قارشی دالغه قیران خدمتی
 کور مکده ایدی .

شهرک دکز ی قارشیلایان جهه سی تک بر سور ایله مستور
 ایسه ده سالف الذکر برزخ Byrsa بیرسا نامنده کی متین برج

وعلاوتاً سکسان قدم مرتفع ، اوتوز قدم وسیع اوج صره بر سور ایله محفوظ بولنیوردی .

قارتاج حکومتی اراضیسی غربه دوغرو هر کولستونلرینه (یعنی شیمدیکی جبل الطارق) شرقه دوغروده Phileoni فیلیه نی معبدینه قدر ممتد اولوب اشبو نام ایله یاد اولنان معبد سویله دیکمز سیرن حکومتی ایله قارتاج حدودینک حد فاصلی ایدیلر . حدود جنوبیه ایسه (تیریتونیان) کولنه (شیمدی جرید) واصل اولیورسدهده بورالردن ایلریده ساکن اقوام بدویه دن برچوقلری ده هیچ اولمازسه اسماً اولسون جمهوریتک تابعی ایدیلر .

قارتاج حکومتک چالیشقان زراع ایله مسکون اولان اراضی منبته سنه کلنجه « بون » بورونندن بالاعتبار « تیریتونیان » کولنک اک شرقی زاویه سنه قدر صورت مستقیمه ده (تقریباً اکیوز میل جغرافی) اوزانیوردی ؛ عرض وسطی دخی یوز الی میله بالغ ایدی .

جمهوریتک مستملکات و مستعمرات خارجیه سی دخی باله آر ، قورسیقه ، ساردینیا ، و بحر سفیدک جزائر صغیره سی ایله سجلیا آطه سنک ، اسپانیانک اقسام جنوبیه سندن ، افریقانک ساحل غربیسنده بعض مستعمرات ایله تاریخ قدیمده « بختیار آطه لر » دینیلن قاناریا و منبت مادرا آطه لرندن متشکل ایدی .

34

شکل حکومت

(آرستوتل) قارتاج قانون اساسیسنک حکومت قدیمه قوانینی ایچنده اک مکمل و مطلوبه موافق اولدیغنی بیان ایتشدرد. بونکله برابر قارتاج حکومتی برطاقم احوال و شرائط مخصوصه یه تبعیتاً تشکل ایتش ایدی. شکل حکومت اساساً قارتاجک ابونی دیمک اولان Tyre تیر (یعنی صور) شهرنده اولدیغنی کبی مونارشی (یعنی حکمداریت مطاقه) طرزنده ایدی. انجق دهها ابتدای تشکلنده طرز اداره بر شکل جمهوریته انقلاب علائمی ، حرکتی آلدی که: بونده ایلک صفی ارستوقراسی (یعنی صنف کبار) اشغال ایتمکه برابر حقوق و صلاحیت اداریه عوامده انکار اولنماشدی .

مثلاً: Suffedes سوفت [۱] نامیله یاد اولنان ایکی حکمدار، ایکی باش حاکم موجود اولوب سناتو طرفندن انتخاب ایدیلوب بعده تصدیق ایچون اجتماع ملویه عرض اولنوردی . سناتونک ایکی شعبه سی واردی. بونلردن بری اصل سناتوهیئت عمومیه سی،

[۱] Sophetim یعنی عبرانیلرک حاکم کلمه سندن .

دیگری بوهیئتک ایچلرندن اتجاب ایدلش برهیئت مخصوصه که :
 هپسندن عالی صلاحیته صاحب ایدی . بولردن برنجیسنه
 Synedrium سندیوم ، ایکنجیسنه جروزیا Gerusia دینلیو-
 ردی . مسائل اداریه سوفتلر ایله سناتو آره سنده اختلاف ظهور
 ایتمه دجه پارلمنتو دیه بیله جکمز مجلس ملییه عرض اولماز ، انجق
 عرض اولندقدن مجلس ملینک قراری غیر قابل التغیر عد
 اولنوردی .

بوجهتجه قارتاج شکل حکومتی کرک روما و کرک یونان
 حکومتلرینک کندن فضله مشروطیته قریب کورینور : قارتاج
 قانون اساسیسی حکومتک اداره عسکریه سی ایله امور اداریه سنی
 کلیاً آری بولندیر یوردی . رئیس الحکامک تصدیق قانونی
 اولما دجه اردونک اداره سنه مداخله سی ممکن دکلدی و بورؤسای
 حکومتدن بری بر حربک اداره سنه مأمور ایدی لیر سه ده حرکات
 عسکریه ایله برابر صلاحیت عسکریه ده ختام پذیر اولور ایدی .
 قارتاج لیلرک دینلری بابالری اولان فنیکه لیلرک دینی اولد-
 یغندن مراسمده قانلی فداکارلقلر ، انسان بوغازلامق موجود
 ایدی . بونکله برابر قارتاجه لیلر بابالری درجه سنده متعصب
 ومدنیت اجابنه دشمن دکلدیلر . سچلیالیلرک سرس معبودینی
 طانیورلر ، دلفییه زیارتجیلر کوندیریورلردی .

قارتاج لیلر کندیلری ایچون غریب بر تقدرا یج قبول

ایتمشردی: مرکباتی بر سر اوله رق صاقلانیلان معدندن دو کولمش
بر طاقم کولچهلر، ساخته کارلخی، قلبز نلکی منع ایچون مشین
کیسه لره صاریلوب اوزرلری حکومت مهریله مهور و قیمت
اعتباریسی محرر اوله رق تداول ایدردی. اتحق بوغریب اچه
طبیعی یالکز قارتاج شهرینه مخصوص ایدی. واردات حکومت
ایسه تابع شهرلر ایله تابع قبائله طرح اولنان ویرکیلردن،
لیمان رسومندن واسپانیاده کی معدنلردن جمع ایدیلوب بومعدنلرک
اک زنکینی ده اسپانیاده قارتاجه نووا (یعنی یکی قارتاجه) دینیلن
شیمدیکنی (قارتاجه) ده ایدی.

قارتاجیلر جدلری اولان فنیکه لیلر کبی امور بحریه یه
اهمیت عظیمه ویرمشلردر. بناءً علیه بر چوق عصرلر غربی
بحر سفیده حاکمیت بحریه یی اللرنده بولندیرمشلردر؛ بالخاصه
کیلرک انشاسنده مهارت عظیمه لری اولوب رومالیلر ایلک
تکنه لرنی قره یه دوشمش بر قارتاج تکنه سنی مودل اتخاذا
ایله انشا ایله مشلر ایدی.

قارتاجیلرک اک زیاده استعمال ایتدکلری تکنه لر Triremes
تریرم دینیلن بربری اوستته اوچ قات کورکلکی سفائن ایسه ده
تاریخده بعضاً بش صره، حتی بر دفعه یدی صره کورکلکی
سفینه قوللاندقلرینه ده تصادف ایله یورز. کورکچیلر حکومت
طرفندن بالخاصه صاتون آلمش اسرادن عبارت اولوب بوایشده

دائماً کسب مهارت ایتیش بولمالری ایچون وقت صالحده دخی داغیدلمازایدیلر. آمیرالارک صلاحیت ووظائفی ده جنراللرککندن بوسبوتون مستقل و سنا تونک اوامرینه تابع ایدی .

قارتاج جسیم اردولر دخی بسله یوردی ، لکن حکومت موجوده نك همان اکثریسنه مغیر اوله رق بوقوای بریه یاشلیجه اجرتلی عساکر اجنبیه ایله اسرادن مرکب ایدی . اصیل قارتاج سکنه سی دائماً مشغول بولندقلری امور تجاریه ایله کسب ثروت ایتیش ، مستغرق احتشام بولنش اولدقلرندن اسفار حربیه نك، محاربات وطنپرورانه نك مشکلات و مهلکنه عرض و جوددن محترز ایدیلر . بونکله برابر دائماً بر اصیل قارتاجلی فرقه سی موجود بولنور . بوده اردونك باعث افتخاری عد اولنوردی .

قبل المیلاد (۸۸۰) سنه سنده دیدو برادری (پیغمالیون)ك نچه ظلمندن قورتیه رق معیتی ایله کلوب قارتاج شبه جزیره - سننده کی موقعی الدهه ایتک ایچون بر اوکوز دریسی قدریر ایسته مک کی بر حیلله تشبث ایتیش اولدینی سویله نیرسه ده بز بونی بالطبع صحیح دیه قبول ایده میه جکز . آنجق شوراسی محققدر که ، بوفنیکه فراریلری یکی موقعلرینی انتخاب ایتدکاری وقت جوار قبائله معین برویر کوویرمک مجبوریتی آلتنده ایدیلر ، ولیکن مرور زمانله قوت و ثروتلری تزايد ایله نجه بوخل شرف

بویوندیرینی قالدیروب آتدیله . کندی نفوذلرینی داخلمده کی قبائل وحشیه اوزرنده ویکی مستعمره لره ساحل بوینده توسیعه باشلادیله . افریقا ساحلمده قارتاجدن اول تشکل ، تأسس ایتمش Leptis لیبدہ ، [۱] Utica اوتیقاسا کی اصلا فنیکیلی اولان مستعمرات وبلاد جسیمه وارایدی ؛ بونلر یکی کلن همشهریلرینک سرعتله حاصل اولان قوت و ثروتی قیصقا نامادقن صرف نظر، همان آنکله ی راتفاق دائمی سیاسی و حربی یه داخل اولمشلر وقارتاجی بو (فدراسیون) نک رئیس عدایله مشلردی، لکن (سیرن) ده متوطن وغایت معمور، زنکین مستعمراته صاحب یونانیله قارتاجایلره بالطبع بونظرله باقماقدلرندن آرهلرنده همان حرب ظهور ایتمش ایدی .

ایشته بو حرب تاریخک بزه اخبار ایله دیکی ایلك محاربات

[۱] الیوم لیبدہ تسمیه اولنان بوشهر عظیمک و طرابلس غربک شخص جواریلہ بنغازی متصرفنک مصر حدودینه دوغرو اوزایان سوا - حلمده کی بلاد قدیمه معموره نک بقای خرابی پک شایان حیرت صورنده آشکاردرد . شیمدی سفیل و عریان بومعظم خرابه لک یانه بیرتق چادرینی قوران یرلی اهالی بونلره برنوع حشیت و جهالتله نکهباندلرل . بورالرده حالا بر طاقم محکوک و قیمتدار زینت طاشلری بولنه رق مهر و یایوزک یاییلیر . غایت محتشم هیماکل چیقاریلیر . حتی مرحوم رجب پاشانک طرابلس غربده بولندیغی ائنده بایدردیغی قرائتخانه عسکریه نک باغچه سنی زینن ایچون کتیریلن غایت جسیم برهیکل طرف عاجزانه مزدن دیکمه لره رکز اولنشدی .

بحریه جسیمه دن برینک وقوعنی انتاج ایله دی . ایران حکومتک
 شرقده کسب قوت ایتمه سی اوزرینه ایران جنراللردن بری
 یونانیلرک اناتولی ساحلنده کی اک قوتلی مستعمراتندن اولان
 قورفو شهرینی محاصره ایتمش ایدی . قورفولیلر اوزمان
 جسارت وقوه بحریه ایله مشهور اولدقلردن مستولی یه اطاعتدن
 ایسه اولاد وعیال واموال وایشایی غایلیرینه یوکلهده رک وطنلرینی
 ترک ایتدیلر . (قبل المیلاد ۵۴۶) و اوزمان بحر سفیدک اقسام
 غریبه سنده حاکمیت بحریه بی الده ایتمش اولان قارتاجلیلرک همان
 بر قسمنی ضبط و تملک ایتدکلری قورسیقه جزیره سنه توطن
 ایچون کلدیلر . قورفولیلرک ، بالخاصه عموم یونان مستعمرلرینک
 اک قوی رقیبی و جسارت و مهارت بحریه لرینک پک ایی آشناسی
 اولان قارتاجلر بالطبع بو حالی خوش کورمه مش و توسقانه لیلرله
 بالاتفاق علیهلرینه یوز یکر می کمیدن عبارت بر متفق دو نماسوق
 ایله مشلر در . قورفولیلر بوقوتی صورت ماهرانه و جسورانه ده
 همان نصفی درجه سنده اولان کیلیرله مغلوب ایتدیلسه ده تمادی
 ایده جک محارباتده دوامه عدم قدرتلرینی حس ایله دکلرندن
 قورسیقه بی ترک ایله (غول) سواحلنه عزیمت و اورادم
 شیمدیکی (مارسیلیا) شهر جسیمنک اساسی وضع ایله دیلر .
 دوغریجه سی بوندن صوکره و اول ، رومالیلر ایله ظهور
 ایدن مشهور (پون) محاربه لرینه قدر قارتاجیه تاریخنه عائد

معین و محقق معلوماته صاحب بولنایورز . یالکز قارتاجه لیلر
 شبه سز یونان مستعمراتیه آره لرنده کی رقابت و عداوت شدیدیه سی
 سبیلله و بالخاصه جزائر شمالیه نك افریقایی محافظه ایچون لزوم
 شدیدینه بناءً بر آره لق سیراغوزه بی محاصره ایتمش لر ایدی ؛
 انجق بورانك حکمداری (آغاتوقلس) بردن بره افریقایه
 اینوب اردوسنی قره یه چیقارمش ، و عسکرینی رجعتدن مأیوس
 بر اقمق اوزره کیلیرینی احراق ایتد کدن صوکره قارتاج اردولرینی
 مغلوب و تونس ایله بر طاقم شهرده ضبط ایله مش ، حتی یرلی
 پر نساردن بر چوغنی قارتاج بویوندیرغنی آتغه مجبور ایتمش دی .
 بو محاربات اثناسنده (سیرن) حکمداری بوتون قوه عسکریه سی
 و بحریه سی ایله سیراغوزه لیلره ابدال معاونت ایله مش ایسه ده
 (آغاتوقلس) بونی چکه مه یره ك زهرلند کدن صوکره مظفریات
 واقعنه نك تعقیبی اوغلنه براقه رق سجلیایه عودت ایتمکله بك آز
 صوکره قارتاج لیلر بو تجربه سز و کنج قوماندانك اردوسنی بوز-
 مشلر ، اغلب احتمالله نظر آپدری ده سجلیاده مسموماً وفات ایتدیکندن
 تهلکه دن کلیاً تخلص کریبان ایله مشلردر (قبل المیلاد ۳۰۹) .
 بواثناده شمالده رومالیلر کسب قوت و شوکت ایدیورلردی ؛
 (۲۶۰ قبل المیلاد) تاریخلرینه دوغرو قارتاجك جهانك اك
 قوتلی بر حکومت بحریه سی اولماسنه رغماً رومالیلر کوکلرلرنده کی
 حرص فتوحات و سجلیا جزیره سنك ایجاب ایتدیردیکی احترا-

صات سببی ایله قارتاجلیلرله چارپیشمقدن چکینه دیلر. (پون)
 محارباتنک هر صفحه سی تاریخ مخصوصنده مفصلاً تعقیب ایدیه.
 بیهل جکندن بوراده اوزانمایه جغز، یالکز شونی سویله یه لم که:
 پون محاربه لرینک بدأندن براز صوکره رومالیلر حصملرینک
 باشلیجه اسباب تفوقنک قوه بحریه اولدیغنی درک ایدیه درک قریه
 دوشن بر قارتاج تکه نه سنی مودل اتخا ذیله آز زمانده (اوج درت
 هفته؟) یوز یکر می پاره تکه نه لک بر دونما وجوده کتیر مشلر،
 مانورده حصملری قدر ماهر اولما دقلرندن رامپا ایچون بر طاقم
 آلتلر ایجاد وبوسایه ده حرب بحری بی عادتاً حرب بری یه قلب
 ایدوب نهایت قارتاجلیلره صولر اوزرنده ده غایه چالمش لر در [۱]
 رومالیلرک بوموفقیاتی قورسیقه ایله ساردینیانک ضبطی
 تعقیب ایتدی؛ رومالیلر ایکنجی بر محاربه بحریه ده حصملرینک
 آلتش قطعه سفینه حریه لرینی ضبط ایله افریقانک باشدن باشه
 تسخیری ایچون ده تدارکات عظیمه ده بولمغه باشلا دیلر. آفریقایه
 رومادن سوق اولنان قوتک قوماندانی قونسول (رکولوس)
 قارتاج قاپیلرینه کلدیکی زمان دشمنک خوف وهیجانی او مرتبه ده
 ایدی، که: همان عرض استیمان ایتمک ایسته دیلر؛ انجق بواننده

[۱] هرتاریخک تأیید ایله دیکی بومعلوت شایان دقتدر، چونکه اوزمان
 رومالیلر یونان مستعمراتی ایله متفق و یونانیلرده انشاسی سفائنده و فعالیت
 بحریه ده همان قارتاجلیلره یقین ایدیلر.

همان وقتنده کلن (ا کساتی پوس) قومانداسنده کی بر مقدار یونان عسکرینک حضوریه اعاده امید وجسارت ایدوب بر هجوم مأیوسانه ایله رومالیلری مغلوب وقونسول رکولوسی اسیر ایله دیلر . انجق قارتاجه سجیلیاده کی مغلوبیات متوالیه یوزندن عقد صاحبه آرزو کش ایدی . رکولوس مذاکره صلح ایچون قارتاج سفراسنه توفیقاً و شاید صلح ممکن اولمازسه ینه اسارته عودت ایتک شرطیه رومایه کوندرلدی . لکن رکولوس حیاتی منافع وطنیه سنه فدا ایدوب رومالیلره قطعاً صلح ایدلمه مسنی ، چونکه قارتاجه نك پك ضعیف اولدیغنی سویله دیکندن روما حکومتی بو وطنپرور چوجغنک سوزینه اعتمادله صالح تکلیفاتنی رد ایله دی . روماده رکولوسه ویردیکی سوزده دورماماسی ، شاید قارتاجه عودت ایدرسه دشمنک یاپدیغنی ایشه مقابل کندیسنی مطلقاً اولدیره جکی سویله نلش ایسه ده قونسول بو دفعه ده اولومی وعدنده خلف ایتکه ترجیحاً اسارته عودت ایتش وقارتاجه ده اشکنجه ایله قتل اولنمشدر [۱].

حرب کمال شدت ایله دوامه باشلادی . قارتاجلیلرک سجلیاده اک قوتلی موقعی اولان (لیلیوم) شهری طقوز سنه لک بر محاصره دن صوکره سقوط ایتدی . برچوق غالیتلر ومغلوبیتلردن

[۱] رکولوسک عاقبتی برچوق یرلرده بویله کوستریلیورسه ده اتلاف اولندیغنی قطعی دکدر .

صوکره رومالیرک قازانقلری ایکی محاربه بحریه، حربیه خاتمه ویردی. قارتاجه بونک نتیجه سنده سجیلیاده کی بوتون مواقعی ترک ایده جک، ۳۴۰۰ تالان کوموش ویره جک و اسرایی بلافدیہ تخلیه ایدوب بعدما کرک سیراغوزیه و کرک آنک متفقلرینه قارشى تعرضاتده بولنمايه جق ایدی (قبل المیلاد ۲۴۱) بویلیک پون محاربه لری یکر می اوچ سنه قدر ممتد اولمشدر.

بواننده قارتاجک احوال داخلیه سی دهامدهش صورتده قاریشمش ایدی. خزینه بوشالمش، عسکرک مخصوصاتی ویره بیلمک ایچون الدہ برپاره قالمامش ایدی. ذاتاً احس وطنپروریدن محروم، قبائل وملل اجنبیه دن طوپلانمش اولان اجرتلی عسکر حکومتہ عصیان ایدوب تونسى محاصره ایتشلر، اورادن (اوتیقاً) بلده سی اوزرینه یورومشلردی. قبائل بدویه دن تشکیل ایدلمش خفیف افریقا سواریمی ده بوعصیان عسکرى یه اشتراک ایده رک قارتاج قاپیلرینه قدر بوتون مملکتی غارت و تخریب ایدورلردی. نهایت بو حرکات اغتشاشکارانه تسکین اولنه بیلدی، لکن اووقته قدر جمهوریتک اک منبت ولطیف آیالاتی یانیق بر چول حالنه کلش ایدی. ساردینیاده کی آیلقلی عسکرده اخیراً قارتاجه عصیان ایتمش اولدقلرندن رومالیر بر از اول عقد ایدیان مصالحه احکامنه مغایر اوله رق بورایه دست استیلاسنی اوزاتدی؛

حالبوکه: زواللی قارتاج بولندیغی ضعف و عجز ایچنده بوحرکتی پروتستویه بيله مقتدر دکلدی .

مصالحه بویهله جه یکریمی اوچ سنه تمتد اولدی . بو ائنده آمیلیقار بارقه برحس آتشین وطنپروری ایله قارتاجی تکرار قوتلندیرمکه، اسپانیا شبه جزیره سنی باشدن اشاغی ضبط ایدرهک اهاالیسندن و حزانندن وطن ایچون استفاده یه چالیشیوردی . بارقه فامیلیاسی کرک قارتاجده، کرک اسپانیاده بر نفوذ عظیمه مظهر اولدی . لکن مرکز حکومت بوجاهدات ملیتپرورانه یی آرتق انحطاط و سقوطه محکوم، اخلاقی بوزوق ملتله مخصوص بر نظر نفاق و احتراض ایله سیر ایدیوردی ؛ نته کم آمیلیقار بارقه نک یرینه قائم اولان دامادی (آسدروپال) ک اسپانیاده بر حکومت مستقله تشکیلی ایده جکندن قور قلمغه باشلادی . چونکه : آسدروپال قارتاجینایی یکی ایالتک مرکز اداره سی اوله رق تأسیس، یاننده کی غایت زنکین کوموش معدنلرینی کشاد ایتمش، هر سنه حکومت مرکزیه یه رجال مخالفه نک اینترقیه لرینی کینلرینی ، طمعلرینی تسکین و تخفیف ایچون مبالغ عظیمه کوندر مکده بولنش ایدی ؛ اسپانیالیلره پک ایی معامله ایدیور، آنلری خدمت حکومتده استخدام ایله یوردی ؛ عین زمانده شماله دوغرو توسیع ممالکدن دخی خالی دکلدی ؛ بونک اوزرینه

کندیسنه ایبروس (امبرو) نهرندن یوقاری کچمه سی، ساغونتن ولایتنه تجاوز ایتمه سی امر ایدلدی .

آسدراپال نهایت بر قاتلك خنچریله دوشدیکی زمان بارقه فاملیاسی هنوز آمیلیقارک اوغلی کنج آنیالی آنک یرینه تعین ایتدیره جک نفوذی حائز بولنیوردی (۲۲۱) . کنج جنرال اسپانیالیرله بر قاچ دفعه غلبه دن صوکره نهایت جراتکارانه (ساغاتوم) شهرینی محاصره ایتدی . ایشته بوحرکت رومالیرله ایکنجی پون محاربه لرینک سبب کشادی اولدی . ساغاتوم بلده سی یدی سنه محاصره یه تحملدن صوکره اهالی قیمتلی وطنلرینی دشمنه تسلیمدن ایسه آتسه یاقماغی ترجیح ایتدیلر . کندیلری دخی قهرمانانه آتشلر ایچنده یاندیلر . آنیالك پیره نه طاغلرینی مروری، غال اقوامندن بر طاقملرینی معیتنه آله رق روماوزرینه یورومه سی و بر چوق قانلی محاربه لر قازاندقن و رومایی دخی ضبط ایله باعث انقراضی اولمق راده سنه کلدکدن صکره نصل مدهش بر طالع حرب ایله دوچار هزیمت اولدیغی بوراده . بالطبع تفصیله حاجت یوقدر :

روما قوماندانلردن مشهور (پچیون) اسپانیایی باشند باشه استرداددن صوکره افریقاه کچمش ایدی . قارتاج قاپیلرینه قدر مملکت یانوب ییقیلیوردی . قارتاجلیر آنیالی ایتالیادن عجله افریقاه چاغیردیلر؛ قوجه محارب بو قدر مشکلات عظیمه یه

قارشى ايتاليانك لطف پارچه لرینه تام اون یدی سنه صاحب اولدقدن صوکره وطن اصلینک امدادینه قوشدی؛ بو حرب مدیدک اثنای جریاننده قارتاجک منبع عظمتی، واسطه یکنه محفوظیتی اولان قوه بحریه نك حسن اداره واستکمالی ایچون صرف همت اولمادیغی کی، قارتاج دیوارلری ایچنده پارتی نازعاتندن، فساداتندن کچلمز اولمشدی. زاما محاربه سی حربک نتیجه قطعیه سنی میدانه قویدی. آنیبال قارتاجه کیده رک برنجی دفعه مغلوبیتی، لکن اردوسنک پرشانیء کاملنی وطنداش لرینه خبر ویردی. بالطبع قارتاجه صلیحه طالب اولمشدی. شرائط صلیحیه نظرأ قارتاجلیلر اسپانیائی، سجلیایی الحاصل آوروپا ایله افریقا آره سنده کی بوتون ممالکی ترک، دونمالرینی رومالیره تسلیم و الی سنه ظرفنده ۱۰ بیگ تالان تسویه ایده جک و رومانک مساعده سی اولمادقجه کیسه ایله حرب ایده میه جک ایدی! آرتق قارتاج روملر حمایه سنده برشهر تجاری اولقدن بشقه برشی دکلدی (۲۰۲ قبل المیلاد).

آنیبال بو بویوک فلاکتلره رغماً وطنک موقع ریاستنه کچدی: خداپسندانه برغیرتله بوبنای انقراض رسید حکومتی تجدیده باشلادی؛ امور مالیه یی برباد ایدن سؤاستعمالاتی منع، امور عدلیه نك اغتشاشاتی دفع ایتدی؛ لکن فساد اخلاق چیرکین پنجه سنی قارتاجه لیلرک ناصیه مقدراتنه باصمش ایدی.

اصلاحات واقعه بوآنه قدر خلقك اكمكنی ، حق مشروعی غصب وسرقتله مألوف اولان برچوق اصلزادكانك ، اشخاص رزيله نك نهايتسر غضب و كیننی اویاندیریوردی . بارقه فامیلیاسنك اوزاق ، یقین بوتون اعداسی اصلاحاته ممانعت ، و وطنپروری محو ایچون برلشدیلر ؛ حتی وطن علیه — الان آنیبالك غیرت وشجاعتدن هراسان اولان رومالیلره — جاسوسلق ایتمكه قدر تنزل ، خیانت کوستردیلر . بوقدر آچقلغك ، اینتریقهلرك نتیجه سنده حمیتلی ، اختیار قوماندان سنهلردن بری عمرینی ، عمرینك بوتون سعادت ولذائذینی اوغرنده فدا ایلدیکی سوکیلی قارتاجایی ترك ایله ممالك شرقیهیه فراره مجبور اولدی . وکند . یسنه قارشی بتینیا یعنی شیمدیکی خداوندکار ولایتی حکمدارینك مسافر پرورلکینی منع ایتدیره جك شدتله آرقه سنی قوغالایان روما تعقیبات کیندارانه سندن قورتلق ایچون زهر ایچهرك اولدی !

تاریخ قدیمك بزه تقدیم ایله دیکی بوشانی قوماندانك ، بوبویوك وطنپرورك طوراعه قاوشدینی موقعی ارائه ایدن علامت آلآن ، مشحون تاریخ آناتولیزك ایزمیت حوالیسینه شرف ویرمکده در ...

(نومیدیا) یعنی شیمدیکی جزایر حوالیسی حکمداری اولان (ماسینیس) رومالیلرك مظاهرتندن امین اوله رق برزماندن بری

جمهوریت ممالکنه تعرضات متادیده بولنیوردی ، بناءً علیه
(۱۶۲) تاریخلرینه دوغرو بویکی حکومتک علی الدوام بربرینی
روما سناتوسنه شکایت ایتدکلرینی کوریورز . فی الحقیقه سناتو
بونلری بیطرفانه استماعه و بیطرفانه اعطای قراره مجبورایسهده
رومالیلر نه اولورسه اولسون اسکی رقیبلرینی کلیاً مضمحل
ایتمک عهده اولدقلرندن ویریلن حکملر هپ (ماسینیس) لهنده
ایدی . بوغائلر خارجاً دوام ایدرکن قارتاج داخلی کورولتورله
دخی میدان وقوع اولمشدی ؛ اهالیدن قسم اعظمی شیمدی
(آنیبال) ه یاپیلان حقسلرلک ، اصیلزادکانک کوستردیکی
حیتسزلکک کهنه واقف اولدقلرندن برقیام عمومی ایله بوکروهه
منسوب اولانلری قارتاجه الکاسندن مؤبداً طرد ایتدیلر .
مطرودلر نومیدیا قرالنه التجا ایتدی ؛ اوده تألیف بین ایچون
قارتاجیه برهیئت کوندردی ؛ لکن قارتاجه لیلر بوهیئتی قبول
ایتمکدن باشقه حدوددن سرعتله چیقماسنده اصرار ایله دکلرندن
ایکی حکومت آره سنده بر حرب ظهور ایدرک قارتاجه نک
مغلوبیتی وپک فنا شرائطه رضا کوسترمه سیله ختام بولدی .

روما ایسه آرتق قرارینک اجرایی وقتک حلول ایتدیکنی
کوریوردی . آنجق معاهداته پک زیاده رعایت ایدن قارتاجه
عالمه حرکت ایچون بهانه بولمق مشکل ایدی . قارتاجه لیلر
اک اویل کنجلرندن اوچوزینی رومایه رهین اوله رق ویرمشلر ،

مهمات حربيه لرینی ، دونمالرینی تسلیم ايله مشلردی ؛ لکن نهایت وطنلرینی ترك ایتلمی ده تکلیف اولننجه بویوز سزجه تعرض ، هر حالده بر مقرداری قلمش اولان حس آتشین وطن پروری زوالیلره مثل سز بر شجاعت مأیوسانه ویردی . اطاعتی صورت قطعی ده رد ایتدی . رومالیرك ایسته دکلری بهانه الیه ایدلمشدی . ایسته بویله اوچنچی و صوك پون محاربه سی در عقب اعلان ایدلدی . درت سنه دوام ایدن بو محاربه نك نتیجه سنده قارتاج قلنجله ضبط ایدیلر ك اهلایسی باشند اشاغی اعدام و او معمور و محتشم شهر خاك ايله یکسان ایدلدی . (قبل المیلاد ۱۴۶) . قارتاجك اثنای محاصره سنده قادینلر كده وطنی قهرمانانه مدافعه ایتدکلرینی و صاحبلرینی کسهرك یایلره کیریش یابدکلرینی تاریخلر روایت ایدر ... ایسته تاریخ قدیمك اك شعشه دار ، مفید و مؤلم بر صفحه سنی بویله جه افریقای شمالینك قوملری اوزرنده صولار ، غروب ایدر کور یورز .

قارتاجه لیلر ده سیر و سفائن و تجارت

قارتاجه لیلر ك سیاست استعماریه و تجاریه لری جدلری اولان فنیكه لیلره نظراً يك مساعده كارانه صاییه بیلیر . نفس قارتاجه شهرینك لیمانلری ملل اجنبیه سفائننه ، تجارینه آچیق ایدی ؛

ح: بارباروس خیرالدین

یا لکن ملکک سائر ایمانلرینه دخول یا قطعاً ممنوع و یا خود
غایت صیقلی، شدید معاملات متوقف بولنیوردی. صوکره دن
تشکل ایتش برچوق حکومت طرفندن ده تقلید ایدمش اولان
بو حرکت منفعتکارانه بی قارتاجه لیلر بعض مجبوریتلرله الزم عد
ایله مشلردی: بونلرک داخنده کی وحشی یرلیلر ایله ایتدکلی
تجارت اصول مبادله یه تابع ایدی؛ جاهل وحشیلر برچوق
نوع قیمتدار محصولات طبعیه یی قیمتسز، لیکن پارلاق،
کوسترشی اویونجاقلرد، قاشلره مقابل ویریورلردی. بو حالد
بو تجارتیه ملل سائرمنکده حصه دار اولماسی طبیعی رقابتی تولید
ایده جک، بوده وحشیلرک کوزینی آچهرق بازارلقد نه قدر
غائب ایتدکه اولدقلمرینی اکلاته جق ایدی. بناءً علیه قارتاجه لیلرک
سربستی تجارتی قبوللری دوغرو دن دوغرو یه کندی تجارتلرینی
محو ایتک اولوردی.

قارتاجیلرک غربی بحر سفیدده باشلیجه مشتریلری سجالیا
وجنوبی ایتالیا ده کی یونان مستعمراتی، اولوب بورالره کوندر-
کلی برنجی اسیرلره، ایچری افریقادن تدارک اولمش اجمار
نادره و آلتونه مقابل شراب ویاغ آلیورلردی. قارتاجیلر یونان
مستعمراتنه بونلردن باشقه قارتاجده و مالطه ده نسج اولنان
چوق قاشلردخی کوندریرلردی. قورسیقه ده بال، بال مومی
ساردنیاده کثیر مقدارده بغدادی حاصل اولیورلردی. باله آ

جزیره لرندۀ ایسنه اک ای نوعدن استرلر یتشمکده ایدی .
 لیپاری آطه لرندن ایسه رچینه ، کوکرد و سائر مرکبات برکنه
 اخراج ایدی لردی . جنوبی اسپانیایه کلنجه باشایجه ملل قدیمه نك
 تدارکنه خواهشکر اولدیغی معادن قیمتدارك منبعی حالنده ایدی .
 هرکول ستونلری یعنی جبل الطارق بوغازی خارچنده
 ایسه بریتانیای جنوبیدن قورشون ، قالای و سائر کتیرمکده
 قارتاجایلر جدلری فنیکه لیلری استخلاف ایله مشلر ایدی : بو
 أسفار اخذ و اعطا بالطق دکیزی مدخلنه و اوراده کی اقوام
 و سلبه قدر اوزانیوردی . قارتاجه نك انقراضندن صوکره بو
 صوک تجارت قارتاجه لیلرک ایلك رقیبلری اولان مارسسیلیا
 مستعمراتی اهایسنه انتقال ایتدی ؛ انجق بونلر طریق نقلیاتی
 دکیشدیر مشلر ایدی . غول یعنی فرانسه مالکنک برآشمانه چیقه رق
 امتعه یی قره دن رون نهری منصبه نقل و توزیع ایله مکی اختیار
 ایتدیلر ، که : اوزمانده بویو حلیق اوتوز کون سور یوردی .

افریقانک ساحل غریسنه کلنجه بوتون بوجوار ، مراکش
 وفاس یالیلری قارتاجایلرک تجارت ستاسیونلریله مملو ایدی ؛ لکن
 اک بویوک مرکز لری و دپولرک Cerne سرن جزیره سی (الیوم
 Suana دینیلوب بحر محیط اطلسیده و ۱۰ ۲۹ عرض شمالی
 ۴۰ ۱۰ طول غربیده) در اموال و امتعه تجاریه ضعیف تکنه .
 لرله بورادن قارشی ساحله نقل ایدیلوب طویلانان اهالی

وحشیۀ داخلیہ ایله مبادلہ ایدیلیردی . قارتاجلیلر داخله اوانی
 زجاجیه، بونجوق، پاموقلی، سلاح کوندروب بوکا مقابل پوست
 وفیل دیشلری الیرلردی؛ قارتاجه لیلر بالقجیلقله ده مشهور اولوب
 الیوم افریقای شمالیده بولان تون بالغی دخی خیلی معتبرایدی .
 بوجسور و متشبت تجارلرک (کینه) بی طانیدقلری وسفینه لرینک
 (سنه غامیا) منصبندن آشاغیلره قدر ایندیکی اغلب احتمالاتندره .
 انجق بواسفار بعیدۀ تجاریه بی برسر مهم حالنده صاقلامق عادی
 یوزندن بوکون بو احتمالاتک درجۀ موثوقیتنی تعیین مشکدر .
 ینه بواسابدن طولای، قارتاجه نک جنوبی نواحیسنندن افریقا
 داخلنه دوغری اجرا ایدیلن کر بان تجارتنک هانکی نقاطه قدر
 واصل اولدیغنی اصلا بیلمه یورز . بوتون بواسرار ماضیه بر زمان
 ۷۰۰۰۰۰ کیشیلک بر نفوسه مالک و افریقای شمالینک اوچیوز
 شهرینه حاکم اولان محتشم قارتاجه نک شیمدی بحر سفیدک
 امواج متهوره سی اوکنده و لاقید افریقا سماسنک آلتنده عاطل
 و مجهول اویویان خرابه لری آلتنده صاقلامش یاتیور !

رومالیلر ، وانداللر

قارتاجه ممالکی، یعنی شیمدیکی تونس ایله طرابلس غربک بر قسمی بویله جه صورت رسمیه ده رومادولتک تحت اداره سنه انتقال ایتدی . نومیدیا آلآن روما حمایه سنده وعین خاندان حکمدارینک تحت اداره سنده بولنیوردی ؛ لکن چوق کچمه دن ماسینیسا نامنده کی نومید یا قرالی وفات ایدرکن مملکتی ایکی اوغلی آرهنده تقسیم ایتمه سی یوزندن حیقان محاربه داخلیه رومالیلر عادتلری وجهله قوه عسکریه ایله مداخله ایدوب بوراسنی ده قوتلی بر نفوذ آلتنه آلدیلر . نومیدیانک جهت غریبه سنده وبخر محیط اطلاسیه ممتد، موریتانیا و شیمدیکی (طنجه) بلده سنک اوزمانکی نامنه نظراً بعضاده (موریتانیا-یتبخیتانیا) دینیان خطه حکمداری دخی نومید یالیلر ایله اولوب رومالیلره قارشى قویمش ایسه ده ایکی متفق مملکت ده مغلوب ایدلشد (۱۰۵ قبل المیلاد)

سزار وپومی محاربائی ائناسنده وپومی نک مقتولیتی اوزرینه مشهور قاتو ایله وپومی نک ایکی اوغلی افریقاده قالوب نومیدیا

قرالی جوبا ایله برلشمک ایچون غربه یورودیلر سده بر مدت
صوکره سزار بورایه چیقدی و (تاپسوس) ده دشمنلرینی
بوزوب الکبویوک دشمنی (قاتو) نک سیغندیغی (اویتقا) اوستنه
یورودی. (قاتو) معیتک کن دیسنه خیانت ایده جگنی حس
ایتدیکندن او موقعده اتخار ایدوب افریتقا ایشی ده بویله جه
یتدی (۵۰ قبل المیلاد)

شو بابتزه خاتمه ویرمه دن اول بر چوق و قایع و یبانیجی
اسملرک فکر قارئی تشویش ایتش اولماسی اندیشه سیله (قبل
امیلاد ۳۰) تارینخنده افریقای شمالینک رومالیر طرفدن تامایله
تسخیرنده کی شکل جغرافیسنی مجملا ذکر ایدلم :

مصر — آقتیوم محاربه سنی متعاقب رومایه الحاق ایدلدی.
سیره نایق (بنغازی) — مصرک فتحنی تعقیباً ضبط اولندی.
کزید جزیره سی — بنغازی یه تابع طوتلدی .

نومیدیا و افریقیه — سزار طرفندن بش آیده ضبط اولندی.
موریتانیا — قبل المیلاد ۱۱ سنه سنده قرالی خلع و مملکت
مولوقا (شیمدیکي مهابه) دره سندن بالاعتبار (سزار یانسیس)
و (تینجیتانیا) نامیاه ایکی ولایته تقسیم اولندی .

(موریتانیا سزار یانسیس) قسمک باشلیجه بلده لری :
Igilgis (ایجیل جلیس) یعنی Zezeli (جیجل)، Saldæ
(سالدیا) یعنی Delluz (دلوز)، Icmunt (یعنی جزایر) ،

Rususcucum (روسوسققوم) یعنی (قولیا)، Coesarea (سزاریه) یعنی (تونس Teunuz)، Siga سیغا یعنی (سیغاله Sigale). بورالرده ساکن اقوامک اک قوتلیسی ده ساحل بحره یقین مولوقا نهری کنارنده ساکن Massoesyli ماسه - سیلی (قبیله سی ایدی).

دیدیکمز وجهله تینجی (شیمدیکی طنجه) بلده سنک موجودیتی غربی موریتانیا یتنجیتانیا نامی ویردیرلشدیر. طنجه نك بولندیغی جبل الطارق بوغازینک رومالیرجه نامی Fretum Gaditanum ایدی. بوخطه غربیه یه Busadir بوسادیر یعنی شیمدیکی (مالیه) و آییلا (Ceuta) شهر ولیمالری وار ایدی.

بحر محیط اطلاسیده کی Zilis زیلیس یاخود - Jolia Constantina ژولیا قونسطانطینه (آرزیلو) و Bannasa Valentia باناسا و انتیا (مهه دوند) و Sala سالا (شیمدیکی سالی) شهرلری وار ایدیسه بونلر رومالیرله ایمپراطورلق دورینک چوق صکره کی زمانلرینه قدر معلوم اوله مامشدر. قبائل جبلیه یعنی بربرلرک اجدادی ایلک دفعه رومالیرلر طرفندن نومیدیا محارباتنده طائش ایسه ده قطعاً بونلره غایه ممکن اولمامشدر؛ صوکره لری افریقا والیرینه بر مقدار روی مدارا کوستر مشاردیر.

واندالرك استيلاسى

بعد الميلاذ ۴۲۹ تاريخنه دوغرو (جنسه ريق) نام قرالرينك تحت اداره سنده اولان واندال اقوام وحشيه سى اسپانيا قطعه سنى ياغمالاد قدن صوكره واقع اولان تشويقاته وحرص ثروت وامل غارته قابيله رق انجق اون ايكي ميل قدر وسعتده اولان سبته بوغازندن افرىقاي شامالي يه مروره تصدى ايله ديلر . بو واندالرك آره سنه برچوق غوتلر ايله اقوام سرسريه سائر دخی قاري شمش اولوب اسپانيا غوتلری ده بوخشین، مرحمتسز مسافرلری برآن اول باشلرندن دفع ایده بيلمک اوزره کندى سفینه لریله امر مروری تسهیل وتسريع ايله مش ایدیلر .

روما ایمپراطورلغنك تسريع انقراضنده (آله ريك) و (آتیل) یه معادل بر رول اوینامش اولان بو قرال (جنسه ريق) بوتون اردوسی - روایات مبالغه کارانه یه رغماً - انجق اللى بيك محاربندن عبارت ایدی . فى الحقیقه واندال حکمداری دشمنلرینك كوزلرینی ییلدیرمق ایچون خارجاً پك بویوك حشمت وقوت کوسترشی یاپیورسه ده اردویه قادین اختیار ، چوجق واسرا دخی داخل اولدینی حالدہ مجموع سکسان بیکه

بالغ اوله مازدی . انجق (جنسه ریق) ك مهارت عسكریه سی ،
جراآتیی ، بالخاصه افریقا آیالاتنده روما حكومتنه قارشی موجود
عدم خشنودی وسوء اداره سایه سنده مستولیلر آز زمانده
بر چوق فعال متفقلره نائل اولدیلر . موریتانیانك اقسام
معلومه سی بیلدیكمز وجهله وحتى وغیر قابل الاداره بر قوم ایله
مسكون ایدی . رومانك سلاح شوكتی او كندن ایچریلره
چكیلمش اولان بو وحشیلر تکرار ساحل بحره وواندالرك
چادرلرینه كمال احتیاطله یاقلاشدقلری وقت شبهه سز جرمانیانك
بومائی كوزلی ، صاری یوزلی ، زره پوش محاربلینك هییت
متعظمانه وانتظام عسكریسنی بویوك براندیشه وحشیت ایله سیر
ایله مشلردر . انجق بر برینك لسانی آكلایه مامقندن متولد ایلك
مواقع قالقنجه مور یعنی موریتانیالیلر نتیجه یی دوشونمكسزین
بر روما دشمنلری ایله اتفاق ایدیور مشلردر . آرتق اطلاس
جبالنك اورمانلرندن ، مغاره لرندن بوشانان بر چوق چیپلاق
محاربلیر رومالیلردن ، وطنلرینك حاكیتنی كندیلرندن نزع ایدن
بو مدنی ظلمه دن اخذ انتقام ایچون واندال اردوگاهنه
قوشوشدیلر .

روما طرفندن افریقا والیسی اولوب مقدما بعض افكار
مخصوصه سنك ترویجی ایچون واندالرك افریقایه حرکته سبب
اولمش بولسان قونت (بونیفاس) ایشك بورنكه دو كولدیکنی

کورنجه معیتده کی رومالی و طوپلایه بیلدیکی یرلی عسکر ایله
مدافعه یه شتاب ایتمش ایسه ده مختلف یرلرده مغلوب اولدی .
مملکت سکنه سنک قسم اعظمی ده ذاتاً رومالیلره آچیقجه اعلان
عصیان ایله دیکندن بو طوفان خون و اغتشاش آره سنده الده
یاکنز ایلك تخریبندن صوکره موقعی مقتضاسی سرعتله معمور
اولان قارتاج بلده سی ایله (سیرتا) و (هیپو بر جیوس) شهری
قلمش ایدی .

دها یوقاریلرده تعداد ایتدی کمز وقایع حریسه یه رغماً بو
تاریخده بحر محیط آطالسیدن مصر حدودینه قدر متمد اولان
دار افریقا خطه ساحیه سی روما آثار اعمار و مدنیتی ایله مزین
و آبادان اولوب پک غلبه لک اولان سکنه اراضی منبته دن ممکن
اولان فوایدی استحصال ایلرلر ایدی . محصولاتک بر مقدار
احتیاجات داخلیه نی تأمین ایلر و فضله سی ، فضله سی دکل قسم
اعظمی خارج مملکتلره سوق اولنور ایدی . خصوصیه اقلیمک
بغدا ی ، آره محصولی حقیقه شایان حیرت درجه ده برکتلی
اولدیغندن بورالری رومانک و بلکه بوتون عالم مدنیتک ذخیره
انباری مقامنده ایدی .

لکن استیلای اخیر و مشؤم مناسبتی ایله طنجهدن طرابلسه
قدر اوزایان یدی منبت و معمور ایالت بردن بره و اندالک
ایدی غارت و تخریبنده ازیلیو یردی . بو وحشیلر بر پارچه

مقاومت کوردکلری یرده عمومیتی قلیجدن کچیردکلری کبی کندی
 طرفلرندن مقتول اولانلرک انتقاملرینی آلمق فکریله بلاد معموره
 وجسیمه یی احراق و تخریب ایله یورلردی . ارکک ، قادین ،
 اختیار چو جق دیمه یوب اسیرلره - کویا صاقلادقلری خزائی
 اخبار ایتهلری ایچون - ائمه دش اشکنجه لرروا کوریلردی .
 روما والیسی قونت بونیفاس سبب اولدینی فلاکتک کوندن
 کونه توسعنی ، تشددینی کوره رک صو ک مغلوبیتدن صو کره
 (هیپور جیوس) شهرینه قاپانمش ایدی . مومی الیهی وانداللر
 بوراده تحت محاصره یه آلدیلر . (بعدالمیلاد ۴۳۰ مایس) . قارتاج
 شهرینک تقریباً ایکیوز میل غربنده اولان (هیو) مستعمره
 بحریه سی مقدا نومیدیا قرالترینک اقامتکاهی اولمق مناسبتیله
 (رجیوس) لقیله ملقب ایلدی . ایوم Bona بونا نام اخیری
 ایله طانیلن بلده در . مشهور (سنت اوغوشین) بورانک پسقپوسی
 اولوب شهرک وانداللر طرفندن احراقنده ۴۳۲ جلد ائردینی یی
 حاوی کتبخانه سی نصلسه قورتاریله بیلمشدر .

احتمال قونت بونیفاسک مهارتی ، احتمال وانداللرک جهالتی
 (رجیوس) محاصره سنک اونیش آیدن فضله امتدادینه
 سبب اولدی . غیر منتظم اولان عسکرلرینک تخریباتی یوزندن
 محاصرلر اکثریا آچ قالمق تهلکه سنه دوشدکلری حالد محصورین
 ایچون ذکر طرفی کاملاً آچیق ایدی .

شیمدی افریقا ولایتک ایچنده بولندیغی تهلکه عظیمه
روما حکومتی طرفندن شدتله حس ایدملکه غربی روما شرقی
رومادان استمداد ایتش، ایتالیا دن کوندریلن دونماید قسطنطنیه دن
وارد اولان برقوة عظیمه ده التحاق ایله مش ایدی. بوقوتلری
تحت اداره سنه آیرآماز (بونیفاس) وانداللز اوزرینه یورودی.
لکن بو حرب ده غائب ایدیلوب افریقانک مقدراتی تظاهر
ایله دی. یدی سنه مقاومتدن صوکره نهایت قارتاج شهری ده
واندالرزک الینه کچدی و بو وقعه قارتاجک ایلك دفعه رومالیر
طرفندن تخریبندن بش یوز سکسان بش سنه صوکره ایدی.
قدیم قارتاجک خرابه لری اوزرینه صوکره دن انشا ایدیلن
بو شهر قسطنطنیه نك شهرت حکمداران سی، اسکندریه نك
تجارتی وانطاکیه نك احتشامی ایله رقابت ایدیه بیلیر، غربی
رومانک ایکنجی بلده سی عد اولنوردی؛ اوزمانلر بورایه
افریقانک روماسی نامی ویرلشدی. آلتی افریقا ولایتک فابریقه لری،
اسلحه، مهمات دپولری، خزائن، ارباب صنعت و عرفانی
همان بوراده مدخر و مجتمع ایدی. سوقاقلر، جاده لر، بنالریغیت
منتظم، اداره داخلیه مترقی برجهو ریت حالنده اولوب (پروقو-
نسول) نامیله قدیم روما قونسوللرینک قدرت و صلاحیتی
تمثیل ایدن برذات رأس اداره ده بولنوردی. رومالی و افریقالی
کنجلك تنویر و تحصیل ایچون دارالفنونلر، جیمنازیالر،

وفلسفه، ادبیات داخل اولدنی حالدہ تمامیلہ سربست بر اصول
تحصیل قبول ایدلمش ایدی . مختشم، مزین بنالردن تشکل ایدن
شهرک تاوسطنه لطیف بر اورمان غرس اولنمشدی . یکی لیمان
دینلن مرسا ایسه کنیش و غایت امین ایدی . هر طرفده
تیا ترولر، عمومی میدانلر، سیرقلر کوریلوردی . انجق صحائف
تاریخیهده بو ایکنجی قارتاجه سکنه سنک شهرت اخلاقه لری
شهرت مدنیه لری ایله قطعاً متناسب دکلدر . کرک تجارتده، کرک
معاملات سائرۂ حیاتیهده کوستردکلری حیلہ کارلق، خلوص سزلق
ضرب مثل حاله کچدیکی کبی شهوات غیرطبیعیهده، خصوصیه
رهبانک تحقیر وترزیلنده کوستردکلری انهماک پک مشهوردر .
یولده کوریلن پایاسلر طاشلرله قوغالانیر ، هر طرفده بر
طاقم دلیقانیلرک قادین البسه لری ایچنده خرامان اولدقلری
کوریلوردی !

واندالر بورای ضبط ایتدکلری زمان سکنه یه پک زیاده
ظلم ایده رک عادتاً اسیر عد ایله مشلر . وبوتون اراضی وابنه
مظفرلر آره سننده تقسیم ایدیلوب زنکین اهالی چیر چپلاق
قالمشدر . واندا ل حکمداری کندیسنه مخصوص اوله رق شیمدیکی
تونس خطه سنک جهت جنوبیه سی اولان منبت (بزاقیوم)
طرفلری ایله شیمدیکی جزایرک ایجری پارچه لرنی انتخاب
ایله مش ایدی . انجق بوفلا کتار دخی کافی دکش کبی (جنسه ریق)

زوالی قارتاجه یلره کبار و اغشیای ملتک بوقدر سنه لک و طنلرندن
همان چیقوب کیتمه لرینی امرایدلر یکنندن دیار شرقک، مصرک،
ایتالیانک بوتون شهرلری یرسنز، یوردسنز، اکمکسنز و کیمسه سنز
قارتاج مهاجرلری ایله دولوب طاشه رق سفالت مدهشه لری
دیلره داستان و شاعرلره موضوع حکایات اولمشر ! ایشته
بویله جه آفریقاده ، دور قدیمک او معموره قیمتدارینک
خرابه لری اوزرنده و جنسه ریقک علم مظفریتی آلتده طویلاشمش
اولان (واندال) و (آلانی) قوملری (۴۳۹ - ۴۵۵ بعد المیلاد)
طنجه دن طراباسه قدر طقسان کونلک مشی ایله قطع ایدیه بیلجه ک
اولان بحر سفید یالیسی بویجه تمتد زنکین و منبت مملکته صاحب
اولمشر سده مملکت مفتوحه لرینک حدودی بر طرفدن قوم
دریاسی اولان صحرای کبیر ، دیگر طرفدن بحر سفید
آره سنده ایدی . منطقه حاره داخلنده ویا ماوراسنده ساکن
چپلاق اقوام زنجیه اوزرنده اجرای فتوحات جنسه ریتقه
او قدر شرفلی ، مشوق کورنمه دیکندن نظر حرص وطمعنی
دکر طرفنه عطف ایتمش ایدی . اطلاس داغلرنده کی اورمانلر
بی نهایه برکراسته خزینه سی اولدینی کبی یکی تبعه سی ده انشات
بحریه دن، سیر سفائن عالمندن جاهل دکلدیار . جنسه ریتی
واندالری هر زنکین مملکتی کندینه آچه حق اولان بویکی
اصول حرب واستیلانک تحصیله تشویق ایتمکده ، افریقا

اقوام وحشیه سی ده ممالك متمدنه بی غارت هوسیه جانلا نمقده
ایدیلر ونهایت آلتی عصر صوکره قارتاج لیمانندن حیقان بر
قوی دونما تکرار رومایه وبوتون دنیایه قارشى دکرلرک دعواى
حاکمیتى سورمکه باشلادی . ایشه بونقطه ده جداً « تاریخ بر
تکرزدن عبارت » اولیوردی !

واندالر طرفندن سگیلیانک فتحی ، پالمونک غارت و تخریجی ،
لوقانیا ساحلنه واقع تعرضات رومالیلری دهشته القا ایتدیکندن
اتفاقلر تشکیل ، اردولر ، دونمالر ترتیب اولمش ایسه ده
جنسه رقیقک متفقى اولان واندال قرالنک شمالدن تعرضی
وجنسه رقیقک مهارت وحیله کارلقلری یوزندن برشی یاپیله مامش ،
نهایت برکون افریقا دونماسنک (تیر) نهری منصبنه یاناشدیغی
کورلمشدر . خواب غفلت وجبانتدن او یانان روما ایمپراطوری
ساقسیموس صولک تدبیر اوله رق فراره تصدی . حتی سناتورلری
دخی تشویق ایتمش ایسه ده سوقاغه چیقنیچه خوف و غرضدن
قودورمش اهالی وعسکر طرفندن طاشلرله اولدیریلوب جسدی
تیر نهرینه فیرلا تلمشدر !

بو حادثه عبرت اندیزک اوچنچی کوفی (جنسه رقیق)
اردوسیله وکال متانتله (اوستیا) لیمانندن روما قایلرینه یورودی .
بو تاریخی قایلر آرقه سنه قدر آچیله رق بر رومانلر اولدیغی کبی
معظم رومانک قهرمان ، وطنپرور کنجلیرى دشمن اوزرینه

یورویه جکی یرده عاجز ، لرزان اختیارلردن مرکب بر هیئت
جنسه ریقك حضورینه گلش وابینه لرك تخریب اولنماسی واهالی یه
اشکنجه ایدله مسی کبی بعض مساعداته مظهر اولمش ایسه ده
طیعی بر کره دشمن ایچری یه کیرنجیه بو مواعیدك هپسی
اونوتلشدر . (بعدالمیلاد - ۴۴۵) .

رومانك تخریبی ، یاغماسی تام اون درت کون دوام ایتدی :
سانکه قارتاجه بش آلتی یوزسنه صوکره انتقام مدهشی آلیوردی !
حکومته ، اشخاصه عأدبوتون اشیاونقود ، معبدلرك ، تیاترولرك
تزیناتی ، الحاصل قیمتی وتاریخی اولان هرشی مستویلرك
کیلرینه طاشیندی . . .

برمدت صوکره روما ایمپراطوری اولان ماجوریان شمال
حدودینی تأمیندن صوکره بویوک بر قوتله واندالره حدلرینی
بیلدیرمکه تشبث ایتش و « قارتاج بر حکومت خصومتکار اولدقجه
ایتالیا سالم دکلدر . » قول مشهورینی دلیل اتخاذا یله مشدی .
[۱] جنسه ریقك روما اردوسنی یورمق ایچون نومیدیا قطعه سنی
برچول حالنه کتیرمك تشبثی فائده سنز ایدی . چونکه ایمپراطور
قارتاجناده (اسپانیا) کی دونماسیله اك مساعد نقاطه حیقاییلردی .
لکن روما رجال حکومتدن بعضا لرك خیانتلری بوتون بو
تصوراتی آلت اوست ایتدی . واندالره عظیم بر جرأتله قارتاجناده کی

[۱] عجا شیمدیکی ایتالیا نلرده حالا بویله می دوشونیورلر !

دو نیمی با صوب بر قسمی غرق و احراق بر قسمی ده ضبط
ایله دکلرندن رومالیرک اوچ سنهک غیرتی مدهش بر صورتده
هبا اولدی کیتدی! (۴۶۱).

سین متعاقبهده، یعنی روما ایمپراطورلغنک عادتاً قاریشق
بر ایتالیا قرالغی حالنه کلدیکی وقتلرده واندالر هر ایلک بهارده
(۴۶۱ - ۴۶۷) بویوک دونملری ایله قارتاجدن چیقوب ایتالیا
ویونانستان ساحلی یاقار، ییقارلردی.

جنسه ریق — شیمدی سنی پک ایلرله مش اولدینی حالد —
اک مهم سفرلره بالذات قوماندا ایدیوردی. حرکت ایچون
یلکن یادیغی زمان قلاغوزینک، هانکی جهته دومن دوغرولته-
جغنی صورماسی اوزرینه:


— سن بونی روزکارلره براق! آنلر بزی هانکی کناهکار
ساحل اهالیسی انتقام الهی بی جاب ایتمش ایسه اورایه کوتوریر!
دیرایدی. حال بوکه: جنسه ریق کوره اک کناهکار اهالی،
اک زنکین اولان اهالی ایدی!

واندالر شان و شرف عسکریدن زیاده غصب و غارتیه میال
اولدقلرندن مواقع مستحکمهیه، یاخود آچیق ساحلرده قوای
جسیمه منتظمهیه پک نادر هجوم ایدرلردی. آنلر کلی بر آرهلق
بویوک مقیاسده بر چاپو حلیق حالنه کلش ایدی.

۴۶۸ ده شرقی و غربی روما باریشوب نصل اولورسه اولسون

واندالری تأدیبات ایتک ایسته دیلر شرقی روما سر عسکری
ایراقلیوس مصر دن اردوسنی دونمایه تحمیل وسواریسنی کشفلق
ایچون قره دن سوق ایتدی . طرابلس یالیسنه اینیلوب شهرلر
وحوالی سرعتله تسخیر اولندقدن صوکره قارتاج سورلری
آلتند بکله یین ایمپراطور اردوسیه برلشوب غریبه یورودیله
بوافریقا سفری ایچون (۵,۲۰۰,۰۰۰) انکلیز لیراسی مصرف
ایدلش، قسطنطنیه دن قارتاج اوکنه کلن دونما ۱۱۱۳ تکنه دن
مرکب بولنش ایدی ! بری وبحری عسکرک (۱۰۰) بیسک
اولدیفنی مورخین سویله یور. حیفاکه ایراقلیوسک عطالتی بریه
عسکرینی بیقدرمش وجنسه ریتک حیله سنه، تکاپوسنه آلدانان
رومادونماسی برکیجه آتش کیلرینک هجومیه احراق ایدیلهرک
حرب هیچ امید ایدلمه یین بر نتیجه مؤله یه منجر اولمشدر .
جنسه ریتک بونک اوزرینه تکرار بحر سفید وجزائر موجوده نک
حاکم مستقل اولوب سن پیریده وفاتندن مقدم سجلیانی ضبط
وغربی رومانک سقوط کامانی مشاهده ایتمشدر . (۴۴۷)
جنسه ریتک وفاتندن صوکره یرینه کچن اوغلی هونه ریتک باباسنک
یالکز شدت، وحشت واخلاق سائره ردئیسه سنه وارث ایدی .
قاتولیک، آرانیزم اوغرینه برچوق قانلر دوکدن صوکره وفات
ایتمش ، متعاقباً اوچدرت برادر و همشیره زاده سی تخته کچمشدر .
(۴۹۶) ده مقام حکومه کلن (ترازی موند) واندال حکمدار لرینک

اك اييى و عالمى ايسهده بوده تعصب دينى يوزندن بر چوق
خطالر، غدرلر يابدى. نهايت (۵۳۰) تاريخلرينه دوغرو روما
جنرالى باسيليقوس وانداى حكومتى محو و افريقايى شرق
ايمپراطورلنى نامنه فتح ايله يوب بربرستانك اوچنچى دوره
تاريخيه سنى ده قايامشدر .



بربرستانده اسلام

جزيرة العربدن بر اثر اعجاز صورتنده انتشار ايدن انوار شوکت اسلام سرعت برقيه سيله شام حواليسنی ، ايرانی ومصر خطه سنی طوتد قدن صوکره خليفه حضرت عثمان زماننده (٦٤٧ ميلاد — هجرت) افريقانک فتحنه ابتدار اولندی. بوکار مشکله مأمور اولان يکرمی بيک مجاهد عبدالله بن سعد قوماندا. سنده مدينه دن حرکت و (مفيس) ده ٢٠٠٠٠ کيشی نک دها التحاقيله کسب قوت ايتديلر. عبدالله بن سعد عربلر کي شجيع وسواری بر ملت ايچنده اک شجيع محاربلردن عد اولماسنه رغماً بعض احوال اوليه سنه نظراً بعضلری طرفندن پک ده خوش نظرله کوروله يوردی. عبدالله آرقه سنده کی قرق بيک محارب ايله مغربک نواحی مجهوله سنه دالدي. احتمال بر روما فرقه سی ايچون مشکل المرور اولان (بارقه) چوللری عربلره اودرجه قورقولى دکلدی. دوه لر مشکلا تی تخفيف ايدپور،

عربلر اطرافلرنده کی چپلاقلغه برنظر آشنائی ایله باقیوردی.
 بونکله برابرچوق مشقتلی برسفردن صوکره چادرلرینی طرابلس
 شهرینک اوکنده قورمغه موفق اولدیلر. روملره کلن برامداد
 فرقه سی مجاهدینک هجومی اوکنده کاملاً محو اولدیسده طرابلس
 ایلك مهاجماته مدافعه ایده بیلمش، و آفریقا والیسی غره غورینک
 بویوک برقوتله یاقلاشدیغنی دویان عربلر دشمنله بر محاربه قطعیه
 کیریشمک ایچون ترك محاصره یی مناسب عد ایله مشلردر.
 روایات تاریخیه به نظراً روماقومانداننک معیتده کی عسکر ۱۲۰
 بیك کیشی به بالغ اولیوردی. دشمن عربلرک یا اسلام یا حراج
 تکلیفی تهورله رد ایتدیکندن محاربه ایکی طرفدن دخی بویوک
 برشجاعت شدتکارانه ایله باشلادی؛ لکن عربلرک شجاعت
 مفرطه لرینه رغماً دشمنک کثرتی هر درلوا امید مظفرتی مانع کورو.
 نیوردی. برقاچ کونلر بو محاربه صباحدن اقشاملره قدر دوام ایتدی.
 اقشاملری حرب و ضربک یورغونلغنه علاوه آفریقا کونشنک
 آلتنده بی تاب قلمش اولان ایکی طرف چادرلرینه چکیلیر،
 استراحت ایدرلردی. روما قومانداننک صوک درجه کوزل بر
 کریمه سی واردی، که: کوچوکلکندن بری آته بنمکی، برکنج
 محارب کی اوق آتمنی تعلیم ایتمشدی. بونادره حسن و حرب
 غوغانک هر صفحه سنده غایت مزین، محتشم زرهی، اسلحه سی
 ایله دشمنک ایلك صفنده نظره چارپاردی. روما قوماندانی

اردوسنه کیم عرب قومانداننک باشنی کتیریر ایسه یوز بیک درهم آلتون ایله برابر قیزینک دست ازدواجنی اکا بخش ایله یه جکنی اعلان ایتدیکندن روما اردوسنده کی هرکنج محارب بوشانلی مکافاتنه نائلیت ایچون جوش و خروشه گلش ایدی .
 بونک اوزرینه عربلر قوماندانلرینک محافظه نفس ایچون چادرنده او طور ماسنی و کندیسنی تهلکه یه آت ماسنی سویلدکلرندن عبدالله بن سعدده میدان حربدن چکیلدی . بونکه برابر اسلام اردوسی ده بونستسز مقدار لرله یاریسی نیم وحشی اولان بربرلردن مرکب بویله وطنلرندن بعید، ییالنجی برچولده اوزون اوزادیه بوغو- شمعندن عادتاً مایوس اولمش ایدی .

ایشته بویله مستثنا بر زمانده ایدی که حضرت زبیر اون ایکی رفیق مجاهداتیه دشمن صفلری آره سنندن کچهرک اردویه یتشدی . مشارالیه اخوان دینک مقدراتنه اشتراک ایچون یمک یمه دن و صو ایچمه دن اوزون بر مسافه یی شایان حیرت بر شجاعت و متانت ایله قطع ایدوب گلش ایدی !

میدان حربیه بر کره عطف نظر ایدنجه دیدی که :

— نرده در، سردار کز ؟

— چادرنده !

— چادر نصل اولورده بر اسلام سردارینه مقام اولور ؟

بوسوزله عبداللهی کورمه کیتدیکی زمان سردار یوزنده بر

حجرت حجاب اولدینی حالدہ صورت حالی ، و بویله بر موقعده وجودینک اهمیت عظیمه سنی در میان ایله اعتذار ایتک ایستدی .
حضرت زبیر ایسه :

— پک اعلا دیدی ، سن ده آنلرک بونا مردانه تکلیفلرینی
ینه آنلرک اوستنه توجیه ایت ؛ اسلام اردوسنه اعلان ایت که :
کیم غره غورینک باشنی کتیریرسه قیزی یوزبیک درهم آلتون
ایله آکا بخش ایدیه جکدر !

بوخصوص اعلان اولندقدن صوکره دشمنک کثرتنه غلبه
ایچون حضرت زبیر برتدیر تصور ایتدی . عرب عسکرندن
مهم برقسم دها صباحدن حربه اشتراک ایتدیرلمه یوب چادرلرده
براقیلدی . قسم دیگر دشمنله غیرمنتظم واوزون برچرخه حربینی
افریقا کونشی آلتنده تمید ایتمشدی . نهایت هرایکی طرف
لرزه دار خطوله لر ، یورومکه مجالسز حیوانلر ایله اردو کاهلرینه
دیکنمک ایچون چکیلدیلر . حیوانلرک طاقملری چیقارلدی .
زره لر ، سلاحلر برطرفه قونلدی ، ایکی طرف محارب آرتق
کوندوزین مشاق و بی تاییسنی تضمین ایله مک ایستوردی .
برآنده هجوم آوازه لری عکس انداز اولدی ؛ بر چوق قوی
یورولماش محارب لر عرب اردو کاهندن فیرلادیلر . پک آرزوکره
قوجه روما اردوسی یورغونلق و شاقینلق ایچنده بریشان اولوب
کیتمشدی . روما جنرالی بالذات حضرت زبیرک ایله قتل اولندی ؛

میدان حربده باباسنك انتقامنی آلق وفدای نفس ایله مك ایچون
 دوکوشن قیزی ده احاطه ایدیلرک تسلیمه اجبار ایدلدی .
 عربلرک قلعجیلرندن ، مزراقیلرندن قاجان فراریلر سوفه تولا
 شهرینه کیردکلرندن بالتعقیب اوراسی ده ضبط اولمشدی .
 [بوسوفه تولا شهری قارتاجك ۱۵۰ میل جهت جنوبیه سنده ،
 خفیف بر میل اراضی اوزرنده اولوب برنهر ایله اروا اولنور .
 اطرافی اورمانله محاطدر وبر طاق ظفر خرابه سی ، بر قاپی ،
 اوچ عدد قورینت اصولی معبد نظر حیرته رومالیرک احتشا -
 مندن نمونه نما اولور . Show شونك سیاحتلری]

بوزنکین بلده نك سقوطی اوزرینه کرک اهالی مقیمه ،
 کرک بدویلر فاتحلرک لطفنه التجا ایتدیلر . بوراده اوتاریخدن
 اعتباراً برمتین و امین مرکز عسکری تأسیس اولنه بیلمک ممکن
 ایسه ده ، احتمال چکیلن مشاق ، مجاهدین آره سنده ظهور ایدن
 برساری خسته لق ، محارباتده واقع اولان ضایعات اون بش
 آیلق برسپردن صوکره عربلرک غنائم عظیمه واسرای کثیره
 ایله برابر مصره عودت ایله مه سنده باعث اولمشدر . بعدالظفر
 هر کسك طلب مکافات ایتدیکی ائنده روما جنرالنی قتل ایدن
 وشبهه سز اك بویوک مکافاته لایق اولان بر محارب چیقما دیغندن
 هر کیم ایسه شهید اولدینی ظن ایدلمشدی . شو زمانه قدرکه :
 تانکهان غره غورینك قزینك فریاد واینی و سوزلری صامت

ولا قید دوران حضرت زبیره توجھلہ پدرینی تلف ایدن کیم اولدیغنی،
 بونکله برابر بو قهرمان عسکرک شجاعتمدن افزون تواضع
 ونزاکتی حاضر ونه اعلان ایتشدی. قرار وجهله قیز حضرت
 زبیره عرض ایدلدی، لکن مشارالیه بومکافات کمال اعتدال دملہ
 رد ایدرک قیاجنک انجق اعلائی دینہ وقف ایدلمش اولدیغنی
 وخدماتی ایچون امید ایلہ دیکی مکافاتک محاسن فانیہ دن ونقد
 وزردن دھا عالی وابدی بولندیغنی سویلہ مش ایدی !

بو قهرمان ایچون، کہ بوتون تاریخ بشریت مالکیتلہ فخر
 ایتسہ روادری، اکناسب مکافات تبشیر مظفریات ایچون حضور
 خلیفہ یہ اعزامی اولدی. مدینہ دہ خلیفہ بوتون اصحاب کرام،
 رؤسای قوم، اہالی آرہ سندہ افریقا سفر مدیدینک داستان
 خون آلودینی قهرمان مجاہدک آغزندن دیکلر ایکن او، اک
 کوچوک تفرعات حربیہ یی بسط و بیان ایتدیکی حالہ آغزندن
 کندیسنک اجرا ایتدیکی تدابیرہ، کوستردیکی مآثر شہامتہ عائد
 هیچ برکلہ صدور ایتہ مش ایدی !

بوندن صوکرہ عربلرک فتوحات غربیہ لرینی یکرمی سنہ
 قدر تأخر ایتمش کورپورز . ۶۸۹ سنہ سندہ معاویہ یہ بالذات
 افریقا اہالیسندن فریادجیلر کلیور؛ چونکہ روما ایمپراطوری
 ہرقل (ایراقلیس) افریقا اہالیسندن برقسمنک عربلرہ خراج
 ویردکلرینی دویجہ آنلری سلاجلہ تخلیص ایدہ جکنہ اودہ

بر طرفدن زواللیلری صیقیشدیریور؛ بونک اوزرینه معاویه نك
 کوندردیکی براردو اوراده بویوک بر شهری ضبط، اوتوزبیک
 یونانلیدن عبارت بر اردویی محو و حکایان بک کیشی اسیر
 ایدیور. [۱] لکن افریقا فاتحلیکی شرفی بن عقبه بن نافع ده
 لایق کوریورز. عقبه بن نافع شامدن اون بیک منتخب، بهادر
 محاربک ریاستنده یوله چیقمشدی؛ بواردو یورودجه بویودی.
 عقبه بن نافع بر بریه سفرنده طودیفی طریق استیلایی بکون
 خریطه اوزرنده چیزه بیلمک پک مشکل اولدینی کی، بر برستانک
 نواحی داخلیه سنه عائد عرب وقایع نویسلرینک ویردیکی تفصیلات
 عجیبه یی بورایه درجده بزم ایچون فائده متصور دکلدر. فی الحقیقه
 (زب) یعنی محارب نومیدیا قطعه سی ۸۰۰۰۰ یرلی محارب جمع
 ایده بیلیرسه ده اوزمانه نظراً ۳۶۰ شهر جسیمک موجودتی
 شبه لیدر؛ مع مافیه ساحل بحره یا قلاشلدینی زمان مشهور اولان
 (بجایه) و (طنجه) شهرلرینک ذکر کری عربلرک فتوحاتنه رنک
 وشکل ویریر. اسکی زمانلرده ۲۰۰۰۰ منتظم خانه دن متشکل
 اولدینی اخبار اولنان (بجایه) الیوم بیلر بر مقدار تجارتدن
 حصه داردر. طنجه ایسه عرب و یونان حکایاتیه شهرتیا بدر،

[۱] اقویلیا بسقوسی (پاولووار نفرید) ک بیاننه باقیلیرسه عربلر
 بو اثناده اسکندریه دن سجلیایه و افریقای شمالی صولرینه بر دونما کو-
 ندرمشرلر. برنجی جلد ۱۳ نجی باب De gestis Songobarid

مع مافیه عربلرک بوراسنی پرنچدن دیوارلر ، التون ، کوموش
ایله قابلی داملرله توصیفلری شهرک محضاتانت و ثروت عظیمه.
سندن کنایه اولمق لازم کلیر .

موریتانیا تینجیتانیانک ایچریلری رومالیرله بیله غیر معلوم
واهایلسی غدار، جسور، خیلکار و وحشی اولدقلری حالده
پرواسر عقبه بوججهول ومهلهک نواحینک تا باغرینه کیره رک
کندیسندن صوکره کلنلرک فس و مراکش بلده عظیمه لرینی
انشا ایتدکلری وحشتکاهلردن کچمش وسوس نهرینک اطرافنی
ریان ایلدیکی آطلانتیق ساحلنده، قاناریه آطه لری مقابله سنده
راکب اولدینی دوه سنی ، یاخود بارکیرینی کوکسینه قدر بحر
محیطه سورهرک مشهور اولان شو سوزی سویله مشدی :

— یاربی، پیشگاه عزمه شو عمان حائل اولماسهیدی اسم
جلالکی دکزلرک آرقه سنده کی ممالک مجهولهیه قدر کوتورور،
اعلا ایدردم !

برمدت صوکره افریقایلر ایله روملرک عمومی برعصیانی
مشار الیهی بحر محیط یالیرندن کری چاغیردی؛ وهر طرفدن
قوای عظیمه اعدا ایله محاط اولدینی ایچون کندیسنه شانلی بر
شهادتدن باشقه برشی قلمادیغنی حس ایتدی . مع مافیه فاتح
افریقه نک صوکره دورّه حیاتی انجق اسلامیتک ایجاد ایله یه بیله جکی
برهاله خونین جوانمردی ایله اخلافه یادکار قالمق مقدرایدی :

افریقہ حاکمکنی عقبہ یہ قارشی دست زورینہ آلق ایستہین
 ومغلوب اولدینی ایچون موقوفاً اردو ایله سوق اولنان برذات
 وار ایدی که: عاصیلر مومی الیهک فکر انتقام ایله کندیلرینه
 التحاق ایده جکنی ظن ایدہ رک معلومات ویرمشلردی؛ یوکیکت
 موقوف عربلره خاص جوانمردلکه بونی رد ایتدکن باشقه
 عقبہ یهده موقعی بیلدیرمشدی. تهلکة هلاک واضم-حلالک
 تقربنده عقبہ موقوفک باغلرینی بالذات چوزہ رک موت محققدن
 کندیسینی قورتارماسنی تکلیف ایتدیکی حالده رقیبی کندیسینک
 سنجانی آلتنده شهید اولغی ترجیح ایتدی. ایکی فدائی، ایکی
 قردش کی یکدیگرلرینی دراغوش ایتدیلر؛ قلیجلرینی چکه رک
 قینلرینی قیردیلر: واولنجیه قدر بهادرانه دوکوشدن صوکره
 صوکنجی اوریلان وطنداشلرینک اوزرینه یان یانه دوشدیلر!
 اوچنجی افریقہ قوماندانی زهیر سلفنک انتقامنی آلدقن
 صوکره رتبه شهادتی احراز ایتدی. زهیر برچوق محارباتده
 افریقالیلری مغلوب وپریشان ایتدکن صوکره قسطنطنیه دن
 کوندریلن جسم براردویه مغلوب اولمشدر. بواردو قارتاجک
 امدادینه کلش ایدی.

افریقای شمالی اھالیسینک زمان قدیمدن بری عادتلری ایدی:
 اسلاملرک ورودنده آنلرله برلشیر، آنلرله غنائمی تقسیم ایدر،
 صوکره اسلاملرک ایلك چکیلمه سنده یاخود مغلوبیتنده تکرار

پتپرستلکه عودتله اسکی دوستلرینه هجوم ایدرلردی ! عقبه بن نافع کندی زمانده بو حالاتی دوشونه رک اسلاملره بر استنادگاه، حربک احوال غیر مساعد سنه قارشى نسوان و صبیان ایچون برملجاً اولمق اوزره ایچری مملکتک کوبکنده بر مرکز تأسیسنی دوشونمش والنجی سنه هجریه ده (قروان) شهرینی تشکیل ایتمش ایدی (۶۷۰ - ۶۷۵ میلاد) . بو شهرک موقعی تونس خطه سی داخلنده و نفس تونسدن ۵۰ میل داخلده در . مؤخرأ قروان پک زیاده معموریت کسب ایدوب افریقیه نك مرکز اداره سی اولدینی کبی مرکز عرفانی دخی اولمشدر . انجق زهیرک شهادتندن صوکره شرقده حکومت اسلامیه نك اغتشاشاتی تکرار فتوحات غربیه یی سکتهدار ایتمشدی . شرقده سکونتک تأسیسنی متعاقب خلیفه عبدالملک افریقیه فتوحاتنه تکرار باشلانیماسنی امر ایدوب مصر والیمی امیر حسن معیتنه (۴۰) بیك کیشیلک بر اردو ایله مصرک وارداتی تخصیص ایتدی . بو حربک دوامی مدتجه افریقیه نك نواحی داخلیه سنده عربلر اکثریتله مظفر ایسه لرده سواحل بحر الآن روملرک النده ایدی . حسن دن اولکی قوماندانلر قارتاج شهرینک نام و شهرتنه ، استحکامات فوق العاده سنه قارشى حرکات قطعیه اجرانسی تنسیب ایتمه مشلردی . قالبس و طرابلسدن فرار ایدن محافظینده عساکر رومیه یی تزیدد ایتمش بولنیوردی ، لکن امیر حسن

دها جرأتلی چیقدی؛ بو جرأتده تأمین موفقیت ایله دی .
 (۶۹۲ - ۶۹۸) تاریخلری آردسندہ یعنی ۷۹ نجی تاریخ
 هجرتندہ ولایتک مرکزی اولان مشہور قارتاج بر دہا بر
 مظفر خارجینک سلاح شوکتہ باش آلدی و دوچار غارت
 اولدی ! انجق بوندن متولد مسرت چوق سورمہ دی .
 شرق ایمپراطورلغنک بوتون مشاہیر عسکریہ سندن مرکب
 براردوی حامل غایت جسم برروم دونمائی ساجیلیانک قوۃ
 حربیہ سنی واسپانیادہ کی غوت قرانک مجموع قوۃ بحریہ
 وعسکریہ سنی استصحاباً قارتاجہ یتیشدی؛ لیماک اغزینہ کرلمش
 زنجیری قیرہ رق ایجری کیردی . اسلاملر بوقوۃ مہیہ اوکنده
 چارہ سز قیروانہ و طرابلسہ چکیلدیلر؛ اہالی قدیمہ نک شاپاشلری،
 دعالری ایچندہ شہرہ کیرن متفقیندہ سرمست موفقیت اولوب
 قالدیلر . لکن آرتق افریقا روملرہ مؤبدأ غائب اولمق مقدر
 ایدی . امیر حسن ایرتسی سنہ بویوک بر اردو ایلہ قارتاج
 اوزرینہ تکرار یورودی ، اوتیقا جوارندہ متفقلر ایلہ قانلی بر
 حرب ایدہ رک روملری وغوتلری ساحل بحرہ قدر قلنجلہ
 تعقیب ایتدی . دشمنک صوک سفینہ سنک یلکنی دہ افقدہ غائب
 اولمادن قارتاجہ ، دیدونک ، قیصرلرک شہری آتشلرہ ویرلمش
 ایدی . . . شہر ایکوزسنہ قدر خرابیؔ مطلق ایچندہ قالمش ،
 انجق صوکرہ دن خلفای فاطمیہ طرفندن اسکی نفوسنک

انجق یکر میده برینه معادل اوله جق قدر اهالی ایله اسکان ایدلمشدر . بوراده افریقای شالینک قرالیچهسی دیمک اولان اوتاریخی قارتاجیه صوک برنظر وداع آتمق اوزره دیلمکه : اون آلتیجی عصر میلادی اوائلنده ، یعنی بوندن درت یوزسنه قدر مقدم قارتاجیهی شوخالده کور یوز : بر جامع ، طلبه سز بر مکتب ، یکر می بش ، اوتوز دکان ، وبشیوز قدر فقیر ، چپلاق کویلی طلبه سی که : اوحال ایله برابر سکانی اسکی قارتاج سناتورلرینک طور مغرور و غیر متزلانه سنه صاحبدر [۱] .

بوکون قارتاجیه تامیله محو اولمش بولنیور ، انجق تدقیق حقایق ایچون کیدن برسیاح احتمال تخریبات زماندن کری قالان برقاج صوکمری بقیه سی سایه سننده بر زمان یوز بیکلرجه آدمک عیشکاه رفاهی اولان بونقطه یی طانیه بیلیر !

روملر افریقادن قوغیلمشلردی ؛ لکن مملکت هنوز عربلرکده اولمامشدی . بربرستان داخلی اهالیسی ، مورلر (یاخود بربرلر) کندیلرندن امید اولنمایه جق بر اتفاق وانتظام ایله طوپلانیدیلر . وبالتصادف اوزمان ظهور ایدن ویغمبرلک

[۱] اسپانیوللرک عربلره کوستردکلری کین و غرضک مابعد زبونکشانه سی اولقی اوزره شارلکن زماننده (خلق الواد) ده بولن ان اسپانیول شووالیه لری (!) بوفقی کوی بیله محو و غارتدن جبر نفس قهرمانی ایله مه مشلردر .

دعواسنده بولنان بر قادینه اطاعت ایتدیلر، امیرحسن بویوک بر حریده مغلوب اولدی؛ و بونجه سنه لرك امکی محو اوله رق مصر حدودینه قدر رجعت ایدوب بش سنه مدت اوراده موعود عسکرک ورودینی بکله دی. بو ائنده افریقاده غایت غریب بر حال وقوعه کلکده ایدی:

پیغمبرک دعواسنده اولان قادین بوتون اهاالی پی، عسکرینی طوپلامش دیمش ایدی، که:

— شهرلر من و آنلرک حاوی اولدینی آلتین و کوموش دائمًا عربلری جلب ایدیور. حالبوکه: بو مشؤم معادن بزم مقصود اصلیمز دکدر: بزم محصولات بسیطه ارضیه ایله ده کچینه بیلیرز. هایدی شوشهرلری یاقالم و معادن قیمتداری، خزائنیزی آنلرک کوللری آره سنه دفن ایدلم! بلکه اوزمان دشمنلر من بزی سربست براقیرلر!»

بو تکلیف هائل آلقیشلرله قبول اولندی. وطنجه دن طرابلس غربه قدر بوتون معموره لر، مبانئ جسمیه یاقیلوب ییقیله رق اشجار مشمره کلیاً محو ایدلدی، اورته ده مدار تعیش برشی قالمامش، منبت، نفوس مسعوده ایله دولو باغچه کی بر مملکت بر چوله، بریانغین یرینه انقلاب ایله مشدی. صوک دورک سیاحینی و تاریخ نویساری بو خطه ده سیاحت ایدر ایکن صوک معموریت و خرابیتک بر چوق ایزلرینه تصادف ایدرلر. بونکله

برابر آوروپا مورخلری اهلینک، خصوصیه اهالی خرسیتانیه نك. عدالتسز لکندن، ظلمندن دولایي اسکی افسدیلری ارلان روملری سومه دکلرینه مقابل جبار ووحشی اقوام بربریه نك بویوندیر یغنه دخی کمال نفرتله باش ا کدکلرینی، بناء علیه برطرفك ظلمنه، دیگر طرفك جهل ونادانسنه قارشى احکام قرآنیه یی منتله قبول ایله دکلرینی یازمقده درلر . [۱] ایشه بو حکمته مبنیدر، که قوه عسکریه ایله اخذ انتقام ایچون یاقلاشان عرب جنرالی عادتا برمنجی روحانی کی قبول ایدلمش ولدت ومدنیت وعرفانی حس ایدن بوتون یرلی اهالی عربلرک معاوتنه قوشه رق نیئه کاذبه ایلک محاربه ده قتل وبربریلر پریشان ایدلمشدر . [۲]

[۱] روما ایمراطورلغنك انحطاط وسقوطی . اوچنجی جلد . صحیفه ۲۲۵

[۲] بربرك اصلی اولان باربار لفظی درت صورتله تصنیف ایدیله بیلیر . (۱) هومرك زماننده واحتمال یونانیلر ایله کوچك آسیالیلرک عین لسان ملایمی قوللاندقلری ائنده طرز تلفظلری خشین، قابا اولان بوتون اقوامه ویریلن لقب ایدی . (۲) هردوتك دورندن بالا اعتبار یونانیلرک لسان ، عادات واخلاقتنه یبانجی بوتون اقوامه تطبیق اولمشدر .

(۳) پلوتوسك زماننده رومالیلر آرزوی ذاتیلری ایله بوکله استحقاری قبول وکندیلرینی (باربارلر) تسمیه ایتمشلدر . انجق اکثریا بو تلقيبدن ایتالیا ایله اکا مربوط نواحی یی استثنا ایلرلردی . نهایت عزت نفسك ترقیات متوالیه سی ایله بوکله ایمراطورلق حدودعمومیه سنك خارجنده کی قبائل وممل وحشیه یه ترك اولندی .

(۴) عربجه یه افریقای شمالینك شهرلی لاتین اهلینکدن آینه رق

موسی بن نصیر زماننده بربریده بر عصیان دها چیقمش
ایسهده کمال مهارت ایله باصدیریلوب بر چوق همتلر صرف
اولنه رق اسلامیت بو اهای وحشیه صورت اساسیهده تلقین
ایدلدی ؛ کیت کیده فاتح لرینه قارشی بودرجه متغیر اولان
بربریلر عربلرک جنسیتی ، مذهبی ، لسانی ، عاداتی قبول
ایله مکی کندیلری ایچون مدار فخرعد ایله دیلر . اوصورتله که :
فرات نهرندن بحر محیط اطلاسی به قدر بوتون اهای عین جنسدن
عد اولنه بیله جک برحالت ممزوجه ومتجانسه آلدی .

امویلرله عباسیلرک قانلی محارباتی نتیجه سنده تاریخ اسلامدن
مفصلاً تعقیب اولنه جنی وجهله افریقای شالیده دخی رجال
اسلامیه اغلیون ، الموحدین ، فاطمیه ، ادریسیه کبی بر طاقم
حکومات مستقله قویه تشکیل ایله دکلری وقت بونلر دائماً غایت
قوتلی ، ومتشبت قوای بحریه نک صاحبی بولمشلر ، عاداتا دور
قدیمک قارتاجه سی مقامنه قائم اولدقلری کبی اوروپا سواحل
جنوبیه سنی ضبط وتخریبده (جنسه ریق) ه تفوق ایله مشلردر .
غریبدر ، که روما بو قدر سنه لک بر حکومت جهانگیرانه نک بوتون
شوکتیه برابر هیچ بر زمان افریقای شالینک وقت وقت

(بربر) هیئتنه قلب اولنش و افریقای شمالی قبائلنه اوصورتله تطبیق ایدلش
اولدیغندن بویله جه بوتون افریقای شمالی حوالیسی Barbary بربرستان
یاخود بربریه تسمیه قلنمیشدر .

کندیسنه کوستردیکی قهر و تغلبک بر مثالی ارائه ده اظهار اقتدار ایله مه مشدر . (۸۲۳) سنه میلادیه سنده اندلسدن طرد ایدیلن برفرقه عرب اولاسکندریه یی ضبط و تخریب ایتدکدن صوکره کریده حقیقه رق آطه یی ضبط و تملک ایتدیلر . و بورادن کوندر دکلری دونمالریله شرقی روما ایمپراطور لغنک بوتون سواحلی دهشتلره غرق ایله اوقوجه حکومتی خراجیه ربط ایتدیلر .

۸۲۷ سنه میلادیه سی ابتداسنده (بنی اغلب) دولتک یوز تکنه دن مرکب دونماسی تونس لیمانندن ۱۰۰۰۰ پیاده و ۷۰۰ سوار ی عربی سجلیایه آتدی ؛ آرقه دن یتیشن امداد ایله آطه فتح اولنوب پالرمو (عربلر بلرم دیرلر) قوه بحریه لرینک ، عرفان و مدینت لرینک مرکز معموری اولدی . (۸۷۶ میلاد) نهایت الی سنه مقاومت ایدن سیراغوزده تسلیم اولدی ؛ بوراده عربلرک الینه کچن اموال واسرانک حد و حسابی یوق ایدی . کلیسالردن النان کولچه کوموشک ۵۰۰۰ لبره یه و مجموع غنائمک ۱,۰۰۰,۰۰۰ درهم آلتونه (۵۰۰,۰۰۰ استرلین) بالغ اولدیغنی واسرانک ایسه (ترانتوم) فتحنده افریقایه کوتوریلن ۱۷۰۰۰ کیشیدن فضله بولندیغنی روایت ایدرلر .

هر آن بلرم (پالرمو) ، بیزارته ، تونس لیمانلردن جسم عرب دونمالری حقیقور ایدی . (فالایریا) و (قامپانیا) حوالیسینک ۱۵۰ شهری تخریب و غارت اولمش ایدی . معظم روما شهرینی بیله

نه قیصر لرینک شوکت ماضیه سی ، نه اعزّه نک قدرت معنویه سی
عربلرک سلاح استیلا و غارتندن محافظه ایده بیلدی . مورخ
مشهور کیون دیورکه :

« شاید محمدیلر بوزمان یکدیگر لرله متحد اولسه یدیلر ایتالیای
بر حمله ده و شانلی بر غنیمت صورتنده فتح ایله مک ایشدن بیله
دکلدی ؛ لکن آرتق بغداد خلیفه لری غربده کی نفوذ لرینی غائب
واغلیلر ایله فاطمیلر آفریقیه ولایتی غصب ایله مشلردی ؛
وسجلیا امیرلری استقلال دعواسی سوریوردی ! » [۱]

بناءً علیه ۱۰۶۰ تاریخلرینه دوغرو ایتالیانک قالا بریاساحلنه
یرلشمش اولان نورمانلر بر چوق محاربه لردن و اوتوز سنه
متماً دیاً قان دوکد کدن صوکره عربلری ایتالیا یالیرندن سوردیلر
و سجلیانک قسم اعظمه صاحب اولدیلر . ۱۱۰۰ تاریخلرنده
ایسه بر چوق اقوام سائره ایله قاریشه رق کسب شوکت ایله
بونورمانلر عربلرک بحر سفید اطه لرنده طرف طرف مغلو-
بیتلرندن جسارت آله رق مالطه یی دخی اللرندن نزع و افریقای
شمالی حکومت اسلامیه سندن خراج آله حق درجه ارانه جرات

[۱] عباسیلرک حکومت معنویه و دنیویه لرینه قارشی اسپانیا عربلرینک
عصیاننی متعاقب ایلک اختلاللر افریقیه ولایتنده باش کوسترمشدر . ابراهیم
بن اغلب (۸۰۰ — ۹۴۱ میلاد) بنی اغلب حکومتی تشکیل ایتدیکی کی
ادریسی لرده اوقیانوس اطلسیه یه یقین فاس شهرینی بنی ادریس حکومتک
مرکزی اتخاذا ایله مشلردی . (۸۲۹ — ۹۰۷ میلاد)

ایله مشلر ایدی . خلیفه فاطمیه مصرک فتحنه عزیمت ایتدیکی
 زمان تونس و جزائر خطه لرینک اداره سنی برچوق هدیه لره
 تردیفاً خدامندن (یوسف) ه حواله ایله مشدی؛ بو ذاتک احفادی
 مصر حکومتنه اولان روابط صمیمیه لرینی چوقدن اونوتمش
 اولدقلرندن شیمدی برحالت عجز و عطالتده یواریلانمقده ایدیلر.
 قره طرفندن مراکشک الموحیدین حکمدارلری دکزدن
 ایسه یونان و فرائق قوای بحریه لری بونلری صقیشدیر یورودی.
 نورمان پرئسی روجر مالطه نك ضبطدن صوکره بربری نك
 قوتلی مواقع بحریه سندن اولان طرابلس غربه هجوم ایدهرک
 ارککلردن قسم ذکوری عمومیتله قتل و اعدام و قسم نسایی
 اسیر ایله مش ایدی . و بوتون بو فاجعه لر ۱۲ عصر میلادنده
 جریان ایدیور ایدی . یوسفک احفادی طرفندن تونسده تشکیل
 اولنان بوضعیف و بدبخت حکومتک مقراداره سی اولان افریقیه
 و یاخود (مؤسسینک نامنه نیستله) (مهديه) سجلیا امیرالی طرفندن
 ۱۵۰۰ تکه ندن مرکب بر دونما ایله محاصره و ضبط اولنوب
 بوتون اموال و اشیا فرانقلرک ید غارتنه دوشدی . متعاقب سفرلر
 نتیجه سنده ده سجلیا قرالری و یاخود معیتلری تونس سفاکس ،
 قاپسیه ، بونه بلده لر یله ساحلک قسم اعظمی ضبط ایتدیلر .
 بوتون بو مواقع خرسیتیان محافظلر قونیلوب مملکت دخی خراج
 کسیدلی . بونکله برابر خرسیتیانلرک قلمچی قرال روجرک وفاتیله

قیرلمشدر، دینله بیلیر؛ چونکه روجر وفات ایدنجه عربلر بو مواعقی برر برر استرداد ایدوب اوزرینه کوندریلن بر چوق قوتلری ده پریشان ایتش ایدیلر .

تصریح ایدیله جک وقایعک دورۀ گذراننه سرعتله یاقلاشه .
 بیلیمک ایچون بعض اهمیتسز حادثات تاریخیه بی آتالار ایسه ک
 بحر محیط اطلاسیدن تونسہ قدر یوز سنہ قدر حکم ایتش
 المرابطين حکومتک یرینه قائم اولمش بولنان الموحدين حکومتی
 اراضی ء واسیعہ سی اوزرنده اوج امارت اسلامیه نک تأسس
 ایله دیکنی کوروریز . بولرنده تونس ده بنی حفص (۱۲۲۸ —
 ۱۵۳۴)، مغرب الوسطی ده بنی زیان (۱۲۳۵ — ۱۴۰۰)
 مراکش ده بنی مرین (۱۲۰۰ — ۱۵۵۰) در .

اوروپا تاریخلرینک روایاتنه نظراً ، بعض وقایع ضروریه
 مستتاً اولق شرطیه ، بوافریقای شمالی امیرلرینک صورت
 حکومتلری سربست وحایمانه ایدی . خرسیتانلر کلیسالرینه
 صاحب وایسته دکلری کبی ایفای عبادتده مأذون ایدیلر . اون
 اوچنچی عصر ظرفنده بیله فاسده برپسقیوسک موجودیت
 مصدقہ رسمیه سنی کوریورز . تونس ومراکش حکومتلرینک
 پاپالق مقامی ایله موجود مناسبتلری دخی دوستانه بولنیوردی .
 حتی افریقا اردولرینه خرسیتانلرک عسکر صفتیه داخل اولدقلری ،

امور ملکیده استخدام ایدلکلی رواتی دخی وار. انکلیر مورخیندن (لهین - پول) دیورکه :

«افریقای شمالی حکمدارلرینک دول خرستیانیه ایله اولان معاملات و مناسباتی بومدت ظرفنده - یعنی جنکور فاطمیلرک تونسی ترک ایله شرقه عزیمتلرندن بالاعتبار تورکلرک بحرسفیدک اسایشنی محو ایتک اوزره حوضه غریبه یه کلدکلی تاریخه قدر - حقیقه عاقلانه، سیاستکارانه ایدی. افریقایلر برچوق خصوصاتجه آروپا محصولات صناعیه سنه محتاج ایدیلر ؛ بالمقابله آروپا دخی افریقانک دریلرینی، پوستلرینی و سائر خام محصولات طبعیه سنی ایسته یوردی . بناءً علیه : آرده کی مناسباتی تقویه ، تجارتی تسهیل و تأمین ایله یه جک بر چوق معاهده لر یاپلیدی . انجق افریقای شمالی حکمدارلرینک قوه بحریه جه اوزمان آق دکزده اجرای تجارت ایدن وندیک، جنوه کی تجارتله مشغول جمهوریتلره نظراً همان یوق مثابه سنده اولماسی بوبادی منونیت نتایجک الده ایدلمه سنه پک زیاده یاردیم ایله مشدن . بونکله برابر افریقای شمالی حکمدارلرینک معاهدات منعقدیه حسن محافظه امرنده کوستر دکلی همت عظیمه اصلاً نظر تقدیردن دور اوله ماز. عادتاً برقاعده مخصوصه اولق اوزره سجلیا ایله تجارت بحریه ایله مشغول بحرسفید جمهوریتلری تونس و تلسان، فاس حکمدارلرینه معاهدات مفیده ایله مربوط بولنیورلردی . پیزا،

جنوه، پروانس، آراغون و ندیک جمهوریت‌لری یکدیگرلرینی متعاقب افریقا حکمدارلری ایله بویله معاهدeler عقد ایتمشلر و وقت، وقت تجدید ایلکده بولنمشلردی. جمهوریتلردن بعضلرینک تونس، چهئوتا و سائر شهرلرده کندیلرینه مخصوص محللری وار ایدی. ینه هر حکومتک قونسوللری دخی موجود اولوب بونلرک اوزمان کچیردکلری امین، مستریح حیاته یتش سنه اولکی انکلتزه قونسولی حقیقتاً غبطه ایده بیلردی، افریقا تجارتی بالخاصه جنوه و پیزا جمهوریتلرنجه حائز اهمیت ایدی. منتظم افریقا شرکتلری طرابلس، تونس، بجایه، جئوتا و ساله لیمانلرنده مشغول تجارت بولنوردی. حتی تجارت او قدر شدتله مذهبه غلبه ایتش ایدی، که: جنوه لیلر، جئوتایی اهل صلیبه قارشی مدافعه بیله ایتدیلر. ۱۵۳۰ سنه میلادیه سنه قدر تونسده خرستیانلر سربستهجه ساکن و کندی کلیسالرنده اجرای آینه مأذون بولنیورلردی. تونس تاریخنک بویله شایان غبطه بر صورتده دوامی ایسه باشلیجه اوچ عصر مدت بورایه حکم ایدن بی حفص خانداننک اثر درایتدر»

شمالی افریقا حکومتات اسلامیه سی ایله آوروپا حکومتلری آره سنده بوزمانلر عقد اولنان معاهدات تجاریه ده طرفینجه قورصانلق شدتله منع ایدمش ایدی؛ بونکله برابر بو تجارت جبریّه - خصوصیه خرستیانلر طرفندن ینه تعقیب اولنمقده

وبالذات معاهده نامه لر دن ا کلاشیدینی وجهله بوایشه ا ک چوق
یونانیلیر، ساردینیا لیلر، مالطزلر ایله جنوه لیلر مشغول اولمقده
ایدی . بواثناده حکومت ساحلیه نك منتظم دونمالره عدم
مالکیتی دخی قورصانلر ایچون میدانی بوش براقیوردی .
برحالده که: همان دائما ایکی حکومتک آره سنده حرب اکسیک
اولمادینی بو وقتلرده دکز خرسزلنی عادتاً صوکره کی رسمی
قورصانلق شکل مشروعه کیرمش ایدی . بونکله برابر جنوه لیلر
قانونلرینه کندی ملت لر دن دخی اولسه دردست ایتدکلی
قورصانلری اعدام واموال مغصوبه بی صاحبی اولان ملته اعاده
ایچون بر ماده علاوه ایله مشلردی . (۱۲۰۰) سنه میلادیه سنده
ووقت صلحه ایکی پیزا سفینه سی تونس مرسانده اوچ اسلام
سفینه سنه هجوم ایله طائفه سنی اسیر، وقادینلره اکیوز قیزارتاجق
معاملاتی اجرا ایتدکن صوکره فراره قدم باصمشلر وتونس
دونماسی طرفدن نافله یره تعقیب اولنمشلرایدی؛ لکن بوجنایاتی
اجرا ایدنلر پیزادن روی ممنونیت کورمه دیلر، چونکه تونس
حکومتی معاملهء بالمثله قالقارسه حقلرنده پک فنا اوله بیلیردی .
سجیلیا جزیره سی ده قورصانلره دولو اولوب تونس لیلر
عادتاً بونلر دن امین اوله بیامک ایچون نورمان حکومتته خراج
ویریردی . آراغونلره جنویزلرده بربرلینی و اسلاملری
صویقمده ایدیلر، مع مافیه خرستیان تاریخلری بوتون بومعاملاتک

حکومات خرسیتانیه نك رضاسی خلافتده وقوعه کلدیکی
روایت ایدیورلر !

بو وجهله اون دردنجی عصر میلادی یه قدر آق دکزک
باشلیجه خیرسزلی خرسیتانلر ایدی ؛ لکن بوندن سوکره
ایش آغر ، آغر دکیشمکه باشلادی . یعنی اک قوی و ماهر
قورسان رئیسارینک ، فیلولرینک افریقای شمالی سواحلدن
آچیله جنی دورلر تقرب ایتمش ایدی .

اسپانیاقرالی فردیناند قاتولیک اندلس عربلرینی اک مرحتسز ،
اک مدهش تضییقات ایله ، اشکنجه لرله وطنلرندن فراره اجبار
ایتدیکی زمان بر وطن جدانک ، بر وطندن منفینک آله جنی
انتقامی دوشونمه مش ایدی . غرناطه سقوط ایدرایتمز مایوس ،
کدر غریبته هرشی کوزده آلدیرمش بیکلرجه اندلس عربلری
اسپانیول بویوندوروغندن قورتولمق ایچون یدی ، سکز عصرلق
وطن معزلرینی ترک ایله افریقاه کچمشلر و (شرشل)
Sherchel ، (عوران) کبی مواقع ساحلیده - علی الخصوص
اووقته قدر همان نامی معلوم اولمایان - جزایرده تمکن ایله -
مشاردی . بو وطن منفیلری یکی ملجألرینه یرلشنجه آنلرک
یرنده اولانلرک یاپه جقلری ایشه کیریشدیلر ؛ یعنی دست خسار
وانتقاملرینی اسپانیا سواحله اوزاتدیلر ! بولندقلری آزلق ،
پریشانلق ایچنده خصملری اولان اسپانیوللره بر میدان حربده

قارشی دورمق غیر قابل ایدی؛ لکن دگزده، دشمنلرینه قارشی صاحب اوله جقلرینی بیلدکلی خفت و سرعت، خصوصیه سواحله دائر اولان معلوماتلی اخذ انتقام ایچون اک قیمتی وسائطدن ایدی...

خصوصیه اندلس منفیلری، اولجه اسپانیولر، پرووانسلر، نورمانلر ایله کیریشدکلی امتحانلرده اثبات ایله دکلی شجاعت و جرئتلرینه علاوه آتسه یاقیلان اجدادلرینک، ناموسی هتک ایدیان زوجه و همشیره لرینک، یاقیلان غارت اولنان خانه لرینک آجیسنی چیقارماغی، بر زمان کندیلرینک وطن مقدسی ایکن شیمدی سعادتلرینک، ناموسلرینک، دینلرینک مزاری اولان اسپانیاده قالمش قردشله معاوتی بر وظیفه مقدسه صورتنده تلقی ایتکده ایدیلر. او حالدده بو آدملا ایچون خفیف قیرلا- نفیچلرینی [۱] جزایرک اینجه قومی یالیسندن مائی آق دکزک صولرینه آتهرق اسپانیا قیلرنده بر جولان ایچون کورکه اوطورمقدن جوشقون، شدید بر مسرت اوله بیلیرمی ایدی؟ عربلرک الآن بیله سفائنه ویردکلی یرغاته نامیله یاد اولنان بوتکنه جکلرک ایکی بورده سندن اوزانان اوزر کورکک

[۱] قیرلانفیج اوزمان قوللانیلان و قدرغه دن دها خفیف، کوچوک بر تکنه ایدی، که هم کورکک هم یلککنله متحرکدر. فرنکلر. Brigantine بریغانتین دیرلر. تورکلرک (پرکنده) دیدیکدر.

هر برینه برر کیشی اوطورور و بوآدملر کورک چکمکی بیلد -
 کلری قدر وبلکه دها ای دوکوشمکی ده بیلرلردی ؛ چونکه
 فیرغاته لرك محدود حجم استیعیلری هرایکی ایشه ده یارامایه حق
 تڪ معرفتیلری قبوله غیرمساعده بولنیوردی . انحق قره دن
 مساعد بر هوا اسدیکی حالدہ کورک چکمکه اوقدر احتیاج
 کوروله یوب آز زمانده باله آر صولرینه کیریلیر ، اوراده بر
 اسپانیول (غالئون) ی ، یاخود بر ایتالیان (بولوقاس) ی [بحر
 سفیده مخصوص دور قدیمک کوچوک سفائن تجاریه سیدر]
 بکله نیلیردی . پک آز صو چکدکلری ایچون برطاقم بریغانتیلردن
 (قیرلانغیج) عبارت قورصان فیلوسی هر هانکی دار بر بوغازده ،
 کورفزده ، یاخود قیالر آرقه سنده اولرینک ورودینه قدر اختفا
 ایده بیلیردی . هیچ برشیدن شبهه اتمه یمن غنیمت ایسته دکلری
 نقطه یه کلنجه سریع بر هجوم باشلار ، دشمن احاطه اولنور ،
 بورده لره طیرماشان قورصانلر شدید وبوغاز بوغازه برغوغادن
 صوکره تکه نه نك صاحبی اولوب مظفر وشادان جزایره عودت
 ایدرلردی .

یاخود سفر بر زمان کندی لرینک اولان او سوکیلی اندلس
 یالیرینه اولوردی . بویالیرله کلنجه کیلر بر کورفز جکده اخفا
 ایدبلرک پک ای طانیلان حتی برچوق طرفلری حالا اسلاملره
 مسکون بولنان ایچریلره کیریلیر ، اله کچن مال ، قادین ، ارکک

کیلره طاشینیر ایدی . بورالردن عودت ایدن فیلور اکثریا برابرلرنده اندلسده قلمش دینداشلرندن دخی برچوق فراریلر کتیریر ایدیلر . یکریمی سنه قدر بو حال دوام ایتدی ؛ نهایت اسپانیولر بوقورصانلرک ازعاجاتندن صوگ درجه ده بیقدقلرندن قاردینال (اکسیمن) زماننده بونلری کتابه کتیرمک ایچون (دون پدرو ناوارو) کوندرلدی . دون پدرو ناوارو آذربزحمتله اوران و بجایه پی ضبط ایتدی ؛ جزایری ده او قدر فنا تحکیم ایدلمش بولدی ، که : جزایر لیلر مومی الیهک بوتون تکلیفاتی قبوله مجبور اولدیلر . جزایر لیلردن آرتق قورصانلق اتمه یه جکلرینه دائر قطعی سوز آلمش و بونی تأمینات فعلیه آلتنده بولندیرمق اوزره لیمانه قوتلی بر است حکام یاپوب مقدار کافی محافظ وضع ایله مشدر . فرنکلرک Penon d' alger دیدکلری بو حصار جزایر لیماننده اسلام سفائنک حرکته تماماً مانع اوله جق بر صورتده انشا اولمش ایدی جزایر لیلر [۱] ایچون بوندن عذاب انکیز برشی اوله مازدی ..

[۱] الجزایر معلوم اولدینکی کبی عربجه « آطهر » دیمکدر . بو موقعه الجزایر نامنک ، کورفزده کی آطیه نسبتله ویرلدیکی روایت اولنور . آنجق مورخ « لهین — پول » بونامک Caesarea (augusta) قهسریه نامندن محرف اولدیغنه اینانیور . چونکه رومایلرک بونامده کی شهری دخی همان عین موقعی اشغال ایتمکده ایدی . بوندن باشقه جزایر- لیلرک « الجزایر » ده کی (ج) حرفنی (ک ، ق) کبی تلفظ ایله دکلری ده

و طنداشلری الآن جزایرک قیالک سواحلنده بعض مستحکم
 نقاطه مالک ایدیلر واسپانیالیلری دالغهلر اوزرنده تعقیب ایتمه
 آیشمش بو آتشین ملت ایچون تکنه لرینک لیمانده چورودیکنی
 کورمک اولومدن بدتر اولدینی کبی ذاتاً زراعت ایله ده مشغولیتی
 استحقار ایتدکلرندن یا آج قالمق، یا جبراً آلتق تحت مجبوریتنده
 ایدیلر: بناءً علیه درت کوزله اطرافه یاردم ایچون باقیورلردی.
 و یاردمده اوزاقده دکلدی، چونکه: فردیناند قتولیک برانکلز
 مورخنک دیدیکی کبی اوبر دنیا به «حسابی ویرمه» کیتدیکی
 اثنالرده و جزایر لیلرک صبرلری آرتق توکندیکی و قتلرده مشهور
 «اوروج بارباروسه» نام دیکرله «بابا اوروج» دینیلن اوروج
 رئیس آطهلر دکزنندن حوضه غزا و جهادینی بربرستان یالیرینه،
 مغرب صولرینه نقل ایتمش ایدی !

نظر دقته آلمانلیدر . آوروپالیلر بواسمی مختلف صورتده تلفظ و تحریر
 ایتشلردر: Argel آرجل، Arger آرجر، Algél آجل، Algiers
 آلجیر، الخ.. کبی .

قورصانلر مملکتی

شیمدی، دنیانک انمنبت ومعمور بر صحنه سی صفتیله تاریخ
بشیریتده متعاقباً عرض وجود ایدن بربرستانک تاریخ اخیرده
آلدینی «قورصان یوواسی، قورصان مملکتی» شهرته وضعیت
جغرافیة واحوال طبعیه جه درجه لیاقتی تدقیق ایله یلم :
معلوم اولدینی وجهله بحر محیط اطلاسیدن فرانسه نك
ایتالیانك، یاخود سائر بحر سفید حکوماتندن هرهانکی برینك
لیمانلرینه عازم اولان سفائن هر حالده یا جبل الطارق بوغازندن
یاخود شمالی افریقا ایله مالطه آطه لری بیننده قالان کچیددن
مروره مجبور بولنور . شوراسی ده در خاطر اولمالیدر، که :
بربرستانده قورصانلرک (تورک قورصانلرینک) توره دیکی ائنده
امریقا قطعه سی یکی کشف اولمش ، آنک آلتونلری اسکندریه
و از میرک متاعنه مقابل اولمق اوزره بورالردن کچمکه باشلامش
ایدی . فی الحقیقه آوروپا تجارتنک قسم اعظمی حدود جنوبیه سی
بربرستان اولان بحر سفیدک غرب حوضه سندن مرور ایتک

مجبوریتند ایدی. شرق کوشه‌سند تونسی، وسطه جزایری،
یاخود غربده جئوتا یاخود طنجه‌یی طوتمش اولان ماهر،
متشبت برآدمک بورالردن کچن اشیای قیمتداری، نقوذ
کثیره‌یی حاوی اولان سفائن جسیمه و متعددہ‌یی توقیف ایدہ.
بیلمہ‌سی پک سهیل ایدی. الحاصل صحنہ صانکہ بالخاصہ قور-
صانلغہ مقام اولمق اوزره تشکیل اولمش کورینیوردی! علاوتاً
ساحلک طبیعتی دخی تام قورصان خرجی ایدی. خریطہ‌یہ
باقنجه کوریرزکە: بورادہ آرقہ‌لری صیغ، بطاق کوللرلہ
چورلمش و بووجهلہ قورصانہ تعقیباتدن قورتلق ایچون ہر درلو
تسہیلاتی بخش ایلہین بر چوق طبیعی لیمانلر واردر. (جربہ)
آطہ‌سنگ آرقہ‌سندہ قرون وسطی‌دہ مدخلی بر حصار ایلہ مدافعہ
اولنان کنیش بر حوضہ اولوب نیجہ دفعہ‌لر قورصانلر قوتلی
معقبارندن بورایہ صیغینمشلر ایدی. بویوک (سیرت) کورفرزندہ
کی قوتلی آقنتیلر، متعدد قوم بانقلری یوزندن سفائن تجاریہ
سیرو سفردن تحاشی ایلدیکی کبی (وندیک) و (اسپانیا) نک حرب
غالبلری بیلہ بورالردہ احوال محلہ‌یی قاریش قاریش بیان
قورصانلرہ قارشى موفقیتلہ مانورہ اجراسندن عاجز ایدیلر.
غربہ‌دوغری کیدیلر ایکن «مہدیہ» دہ یعنی تاریخنویسانک
(آفریقہ) موقعندہ بومشہور بلدہ نک حصارلری ولیمان بقایاسی
مشہود اولور ایدی.

صوکره بوتون بربریه سواحلنک اک کوزل لیمانی اولان
تونس کلیوردی . بولیمانک خرسیتانلر طرفندن Goletta یعنی
(بوغاز) و عربلر طرفندن حلق الواد دینیلن آغزندن داخل
اولان برتکنه بوتون روزکارلردن مصون قالیردی . قدیم قارتاج
و پورتوقارینه لیمانلری ده قورصانلر زمانده شیمدیکی درجه قوم
ایله دولمامشدی . شیمدیکی جزایر حدودینه یقین Tabarka
(تبارکه) موقعی دخی تجارت و حرکات ایچون بر مرکز عد
اولنه ییلوب جنوملی (لومه لینی) فامیلیاسی بوراده واسع بر تجارتی
اداره ایله مکده ایدیلر .

بر وقتلر قورصان یوواسی اولمقله اشتهار ایدن Lacalle
(لاقال) بلده سنک اوزمانلر پک کوزل بر لیمانه مالک اولدینی
اخیراً فرانسه لی اینجی تاجرلری طرفندن کشف اولنمشدر .
براز یوقاریده کی (بونه) دخی درین بر لیمانه صاحب ایدی .
غیر قابل ضبط بر عسکری ستاسیون عد ایدیان (جیجل)
متعاقباً فنیکه لیلرک ، نورمانلرک ، رومانلرک ، پیزا و جنوه لیلرک
واک صوکره بارباروس قردش لک الینه کچه رک بودفعه قورصانلر
ایچون برملجاً حالنه کتیرلمش ایدی . جیجل قلعه سی ساحله
دار بر قوم برزخی ایله برلشمش ، قیالق بر شبه جزیره اوزرینه
بنا اولنش و اوکنده طبعی مندرکلی بر لیمانی موجود ایدی .
برازدها ایلریده کی Bougie دخی دینیلن Buyaya بجابه لیمانی

دخی بوتون فورطنه لره قارشى تماميله محفوظ بولئوردى .
 جزاير اوزمانلر ليمان دكلسه ده براز صوكره ليمان حالنه كله جك
 ايدى . (شرشل) ليمانى شمالدن كلن بويوك دكرلر ائناسنده
 راحتسز اولقله برابر خواص سائره سى قورصانلرك آمالنه مطابق
 ايدى . (تنيس) ليمانه هر زمان قولايجه يتشه بيلمك مشكل
 ايسه ده بركره قباغى اورايه آتجه هر وجهه راحت بوليله بيليردى .
 عوران بلده سى ده روماليلرك Portus Divinus (پورتوس
 ديوينوس) ديدكلرى مهم (مرسى الكبير) ليمانيله متمايز ايدى .
 دهها يوقاریده « جامع الغزوات » موقعنده دخی قورصانلر
 (قردش قیالری) آره سنده صیقیشمش برماجأ بوله بیلیر ایدیلر .
 Ceuta چئوتا یعنی Septa سپته وطنجه کچیلوبده بحر
 محیط اطلاسی ساحنه دونلیدیکی زمان اك مشهورلری Sale
 ساله اولق اوزره برچوق ماجالر موجود ایدی . بالخاصه ساله
 لیمانی آغزنده قوم بانقلرینه رغماً دائماً آمریقادن عودت ایدن
 سفائن جسیمه یی آولایان قورصان تکنه لرینی اطرافه
 کوندیریدی .

سواحلك قورصان آمالنه بودرجه مطابقتنه علاوتاً اراضیء
 داخلیه دخی مطلوبه موافق ایدی . فی الحقیقه سیرسفائنه مساعد
 بردانه بيله نهر یوقسه ده واراضی بردن بره کسب ارتفاع ايله .
 یورسه ده بوکا مقابل باشقه براستفاده تأمین اولنوردی : بو اراضیء

مرتفعه ساحلیه دن قورسانلر کرک هجوم ایدیه جک، کرک هجوم اولونه جق سفاغنی سهولته فرق و مشاهده ایلرلرایدی . اراضی انسانک بوتون آرزولرینی تطمین ایله یه جک موادی احتوا ایدیوردی دامن جبالده بربریلر ساکن اولور، یا یالارده عرب قبیالری رعای حیوانات ایله متعیش بولنیوردی ، سواحل بحرہ قدر منبت ، لطیف وادیلر امتداد ایدیوردی . (جربہ) ایسه غایت لذت میوه لر، حبوبات ، اوزوم ، زیتون ، شفتالی واینجیر حاصل ایدیوردی . تونس یشیل صحرائلک اورتہ سنہ یرلشمش ، «مغربک عروس بیاض و عطر آلودی» عنوانی بحق قازانمشدی . قورسانلر کندیلرینه ملجأ اوله بیله جک بویله بر اقلیمی نرہده بوله بیله جکلردی ؟

واشته اوروج بارباروسه ، خیرالدین بارباروسه نک استادی و آغاسی دیار مغربہ دومن دوغرولتدینی وقت کندینی بو محیط مساعد ایچنده و دامارلرنده کی خون حمیتی بوسه بوتون غلیان ایتدیره جک احوال خصوصیه مواجہه سنده بولمش ایدی .

بارباروس قردش لک عائله لرینه ، وطن لرینه ، اوائل حیاتیه لرینه عائد دسترس اوله بیلدیکمز معلوماتی کتایمیزک باشنده درمیان ایتمش وردوس شوالیه لريله ایتدکلری بر محاربه ده یلاسک شهید ، حضر رئیسک (خیرالدین پاشا) بر چوق سنه لر ردوس زنداننده اسیر اولدیغنی بو وسیله ایلہ سویله مش ایدک . کاتب چلبی تحفة الکبارنده دیور، که :

«حضر اسیر اولوب نیجه زمان جزیره ده قالدی؛ بعد الحلاص سلطان قورقود انطالیه ده ایکن استیدان ایدوب اون سکر اوتراق برکمی ایله قورسانلغه چیقدی...»

حضر رئیس (بارباروس خیرالدین پاشا) اوزمان پرکنده تعیر اولنان بوکوچوک تکنه ایله ومنتخب یوز اللی قدر تورک محاریله کنديسني آق دکرک جوشقون دالغله لی اوزرنده سربست کورنجه ایلک انتقام ضربه لرینی قردشنک قاتلی، کنديسنيک سنه لرجه زندانچیسی، اشکنجه مأموری اولان ردوس شوالیه لرینه اورمغه باشلامش ایدی؛ اوصورتله که : پک آز صوکره نامی شوالیه لر طرفندن، تورکلر طرفندن ایجه طانمش بولنیوردی. حضر رئیس بر آرهلق سواحل شرقیه یی جولاننه دار بوله رق پولیه یاقاسنه یعنی ایتالیانک جنوب شرقی سواحلنه آتلامش اوراده غایت جرئتکارانه مصادمه لر ایله بر طاقم خرستیان پارچه لری ضبط ایله مشلردر. [۱] حضر رئیسک

[۱] بو پارچه کله سنه کرک تواریخ قدیمه بحریه مزده، کرک شمیدی کتابلر مزده صیق، صیق راست کله جکز و بواسمک اوزمانلر صرف حرب ایچون یاپیلمایوب ممالک بعیده دن اشیای تجاریه نقل ایدن یلکنلی سفائن جسیمه تجاریه یه ویریلن اسم اولدیغنی اوکر نه جکز. پارچه نامنک بو تجارت قالیونلرینه سبب تسمیه سی بزی چوق دوشوندرمشدی. ظن عاجزی یه کوره بواسم (بارقو، بارق، بارج) یعنی بویوک کمی کله اجنبیه سندن اولا (بارچه) دیه نقل ایدمش و صوکره (پارچه) اولمشدر.

بو وقتلر بر چوق غنائمه نائل اولدینی شبهه سزدر؛ چونکه بر قیشی اسکندریه ده امر ایدوب سوکره جربه یه کلدیکنی و آغرلغنی - که اشیا و غنائم دیمکدر. - بوراده براقدیغنی اوقویورز. یوقاریده دیدیکمزکی بو وقایعک هانکی تاریخه مصادف اولدینی تامامیه اوکره نه بیلمک قابل اولمادی؛ انجق المنزده کی نقصان و نائق ایله بوراده بعض استدالات تاریخیه ده بولنمقدن دخی بزی کیمسه منع ایده مز: شویله که: بزم تاریخلرده بارباروس قردش لرك بر برستان سواحلنه حرکتلرینک سببی اوله رق سلطان سلیم اولک جلوسنده آوروپا حکوماتنک همان جمله سیله تجدید صلح اولندیغنی ایچون تورک قورصانلرینک دول مذکوره علیهنه اجرای حرکتدن منع اولنملاری کوستریلیور . . . بوسبب احتمال، روش حاله نظراً سلطان قورقود طرفندن مظهر حمایه اولان بارباروس خیرالدین حقننده دوغرو اوله بیلیر. نته کیم یینه تخففة الکبارده:

«سلطان سلیم خان جلوسنده برادری قورقود خان اختفا ایتمکله خیرالدین رئیس دخی مدلی جزیره سنده کمیسنی آلوب مغربه صالیدی. . . برادری اوروج ایسه جربه آطه سنه کلشیدی. مزبور ایله آنده ملاقات ایدوب ایکی برادر غزایه بل باغلادیلر. . .»

دینیلیور. بوسوزدن بارباروس خیرالدین پاشانک تمللی

اوله رق مغربه حرکتنده ياننده برادری اوروج اولماديغي وتاريخ حرکتک جلوس سلطان سليم اوله يعنى ۹۱۹ تاريخلرينه مصادف بولنديغي آکلاشيلير. بارباروس خيرالدين پاشانک (مات رئيس البحر) تاريخندن آکلاشيله جغى وجهله ۹۵۳ ده وسکسان ياشنى متجاوز اوله رق وفات ايتمش اولماسنه نظراً تاريخ تولدينک ۸۷۲ اولماسى لازم کليور. بو حالده مشاراليه بربريه يه عزيتمنده تمام ۴۷ ياشنده اولق ضروريدر. ايمدى ، بوراده قطعياً حل ايدنک لازم کلن بر نقطه ده وار : حضر يعنى بارباروس خيرالدينک آغاسى اوروج رئيس بربرستان سواحلنه خيرالدين دن چوق اول ، واحتمال خيرالدين رئيس ردوس زنداننده اسير ايکن کيتمش ، اوراده يرلشمش ايدى . عثمانلى تاريخلرينک بو خصوصده بر کونا معلوماتى يوقسه ده کرک اجنبى تاريخلرى ، کرک پيرى رئيسک مشهور « کتاب البحريه » سى بونى بزه پک واضح اوله رق کوستريور . « کتاب البحريه » ايله محررات اجنييه آره سنده کى اختلافات ايسه وقايعک بش آلتى سنه مقدم ، ويا موخر اولماسندن عبارت بولنيور بونکله برابر بو ايکى جهتک بياناتى بوراده قارئارمزک نظر محاکمه سنه وضع ايليه جکز : بوندن مقدم نشر ايتديکمز « کمال رئيس وبابا اوروج » نام اثرک مطالعه سندن وخصوصيله پيرى رئيسک بالذات يازديغي « کتاب البحريه » يه مراجعتدن اکلاشيله جغى اوزره کمال رئيس

ایله پیری رئیس هنوز امرای رسمیه دولت عدادینه کچمه دن، اسپانیا صولرینه واقع اولان سفر غازیانه لری ائناسنده - یعنی (۸۸۰ الی ۹۰۰) تواریخ هجریه سی مابینده اوروج رئیسک بربرستانده بولندیغنی خبر ویریورلر؛ عقالمده قالدیغنه کوره پیری رئیسک مال بیاناتی شو طرزده در: «افریقا حکومت اسلامیة سنک اسکی شوکت وسطوت بحریه لری قالماش اولدیغندن دائماً کفارک خسارینه معروضدرلر، بناءً علیه سرحد بحریلرنده دیار رومدن ککش اوروج رئیسک بکله دیرلر.»

حالبوکه: اجنبی تاریخلری اوروجک ۹۱۰ سنه هجریه سی ابتدالرنده یعنی ۱۵۰۴ تاریخ میلادیسنده تونس سلطاننه مراجعتله یرایسته دیکنی یازیورلر. بزایسه بالطبع پیری رئیسک «کتاب البحریه» سنه دهاز یاده اعتماد ایله جکز. دیگر جهندن کرک «کتاب البحریه» نک کرک تواریخ اجنبیه نک اخباراتی اوروج رئیسک تاسلطان بایزید ثانی دوره سلطنتی واسطنه دوغرو مغربه عزیمت ایله مش اولدیغنی اعلام ایتمه یورمی؟ اوروج رئیس بارباروس خیرالدینک بویوک قردشی اولدیغنی قطعاً، بزجه ده، اجانبجه ده محقق بولندیغنه کوره وشویله جه اوچ یاش بویوک فرض ایدلسه تاریخ تولدینک ۸۶۹ اولماسی موافق کوریله بیلیر؛ بربرییه هنوز یکر می بش ایله اوتوز آره سنده و صرف هوای سرگذشت وجهاده بادبان کشا اوله رق کیتدیگی آکلاشیلیر. شونی ده علاوه ایدلم، که: اوروج رئیسک شهادت شان آورینه قدر بارباروس خیرالدین

مشاریهك معیتده ، هر درلو او امرینه مطیع بر قوماندان
 صورتنده خدمت ایله مش وهر مهم غزاده ، وقعه ده همان برابر
 بولمش اولوب موخرأ خیرالدین پاشایه انتقال ایدن بارباروس
 لقبی آوروپالیرجه دوغرودن دوغرویه اکا ویرلش ایدی .
 دقت اولنورسه کوریلیرکه : کرک خیرالدین پاشانک کندی
 ترجمه حانده ، کرک توارنج اجنیه ده برادرینک شهادتندن
 اولکی وقایعی باشلیجه بابا اوروجک حضورینه ربطاً یازلمشدر .
 مورخ (لهین - پول) بارباروسه لرك مغربه عریتملرندن
 بحث ایدرکن دیورکه : « برمدتن بری شرق صولرینه اندلس
 قورصانلرینک موفقیاتنه دائر خبرلر کلیوردی . آمریقان
 آلتون وکوموش یوکلکی کلن وبحر سفیدک غرب صولرنده هر
 کون تصادف اولنان جسم وزنکین اسپانیول سفائی حقنده ده
 برچوق شایعات مبالغه کارانه نشر اولمشدی . بناءً علیه [۱۵۰۴]
 تاریخلرینه دوغرو اوروج بارباروسه ایکی قیرلانقیچ (غالیوت)
 یعنی (قالیه) ایله بو صولره کلوب کندینه الویریشلی بر موقع
 وماجأ بولمق اوزره سواحلی تفتیشه باشلامش ایدی . . . »
 تاریخ عزیمت ایچون یوقاریده محاکمیزی سویله دک ؛ سبب
 عزیمت ایسه احتمال پک دوغرو تصریح اولمشدر .
 بورایه قدر المزده کی وثائق پریشان ووسائط ناقصه ایله
 شوقیه محاکمه بی یوروتدک ؛ شیمدی : بارباروسلرك ده معین ،

دها منور بردورۃ تاریخیہ سنہ کیریورز، کہ بوده اوروجک تونس سلطانه مراجعتیله باشلار.

۸۹۰ تاریخلرندہ تونس خطہ سندنہ بنی حفص سلالہ سندن سلطان عثمان حکمران ایدی . بو ذات اللی درت سنہ متمادیاً اجرای حکومت ایتمش، وبرآراق عرناطہ لیلرہ امداد ایدہ بیلمک ایچون اسپانیولرہ قارشى اعلان حرب دخی ایله مش ایسه ده (فردیناندو) نك تشویقاتی ایله فاس حکمداری بویله مهم بر وقتده تونس دینداسی اولان عثماندن ضبط وغصب ایله مک سوداسنه قابلیش اولدیغندن تونسلیلر ده کندیلرینی محافظه قیغوسنه دوشمشلردر . سلطان عثمانک مقصد اصلیمی مصر حکمداریله برلشوب متفقاً فاسلیلرہ غلبه وبعده عرناطہ یه امداد اولدیغندن سلطان بایزید ثانی ایله مصر ممالککسی بیننده متکون اختلافات وعداوتی حل ایچون توسط ایدوب حتی بوغائله نك اندفاعنه ده برچوق همتی اولدیسده مقصد اصلیسینی قوه دن فعله کتیره مه دی . [۱] سلطان عثمان عادل ، دیندار ، رعایایه قارشى رحیم و پرهیزکار

[۱] سلطان عثمانک کوندردیکی سفیر در سعاده و رودنده مصر لیلرہ وظیفه توسطی ایفایه چالشمغه باشلادی . لکن اکثر امرای عسکریه مصر لیلرہ قارشى ناموس عسکری عثمانینک اکالی غیرتیه سفیرک افکار ومطالعانه کلیاً مخالف ایدیلر . برکت ویرسین شیخ الاسلامک اجتہاداً زمرة عسکریه دن آیرماسی ایشی دوزلتدی . مثلا عرب لقبیله مشهور شیخ الاسلام زین الدین علی اباحت دم مسلمینه جواز ویرنلری تقبیح

ملوکی آرتق او اسکی وماهرانه ، صلاح پرورانه سیاستی ترک ایتمش ایدیلر . »

بزده بوکا مقابل دیرزکه : مسئله هیچ ده اویله دکدر ؛ اندلسده خرستیان باربارلرینک الندن اسلامیتک چکمه دیکی اذا، کورمه دیکی ذلت، دوچار اولما دقلری رزالت قالمازوهر کون بویوندوروغک افریقایه دوغرو رحم وشفقت بیلمه یین ، عهده وفا طانیایان ، مقدساتدن هیچ برینه رعایت ایتمین اللر ایله اوزا دلدینی کوریلیر ایکن عاقبت طرابلس غرب کی نامردجه اسپانیا دونماسی طرفندن ضبط اولنماق ایچون افریقای شمالی ملوکی نه یاپسه لر حقلی ایدی . [۱]

یکی مسافر لر نه قیراطده آدم لر اولدینی تونس سلطاننه آکلاتمق ایچون چوق وقته محتاج اولما دیلر؛ برر ایکیشر اوروج

[۱] طرابلس غرب شهری سنه لجه سورن تجارت صلح پرورانه نتیجه سننده پک زیاده معمور، زنکین اولمش ایدی ؛ برچوق خرستیان سفائن تجاریه سی لیانه کلوب هفته لجه، آیلرجه آمناً یاتار، اجرای تجارت ایدر، اسلامدن فتوت، مسافر پرورلک کورپرلردی؛ حتی برضیافتده بویوک برعرب تاجری اسپانیول مسافر زینه رعایتاً غایت مکلف اولان طعام ماصه سنک اوزرینه صوگ درجه قیمتدار برالماسپاره یی سحق ایدوب سر بمشدی؛ مسافر لر سفرده پچاق بولمیدیغنه تعجبله سببی صورت دقلرنده خانه صاحبی « اوقدر صلح پرورز وجنکدن اویله متنفرزکه : سفرده بیله سلاحک وجودینه تحملز یوقدر . . » جوابی ویرمشدیر . بو حال کورن اسپانیولر برآز صوکره کلوب بوراسنی قولایچه ضبط ایتدیله .

رئیس قیمتدار غنیمت‌لرینی تونس لیماننه چکوب کتیرمکه باشلادی. بارباروس قردش‌لرک تونسه یرلشد کدن صوکره اجرا ایتدکلری ایلک بر سفر شجیعانه او قدر شایان حیرت اولدینی حالدہ متأسف، که : بزم تاریخلر مژده تمامیلہ مسکوت عنه کچلمش ؛ دهادوغروسی قوجه اوروجک کیم بیلیر نیجه مدھش واقعہلری، مہیج تصادفات مجاهدانہسی آق دکرک شرق یالیرلرندہ برچوق وقایع حربیہ ایلہ اوغراشان وطنداش‌لرینک قولاغنه واصل اولہ مامش. بناءً علیہ: مورخ (ہایدو) نک نقل و (لہین - پول) نک تحسین و حیرتله تکرار ایتمکدن کندینی آلہ مادینی شو حادثہینی بوصیفہ لره صیقیشدیره جغز :

« بابا اوروج برکون ، عصرلرجه صوکرہ بویوک ناپولیونہ منفا اولغله اشتہار ایدن (آلہ) اطہسی جوارندہ قسمت بکلہ مکدہ ایکن پاپا ایکنجی (ژولیوس) جنابلرینک معیت باندرہ سنی حامل و Galley-Royal دینیلن باشترده یغنی ایکی قدرغہ یہ بدل نوغندن ایکی سفینہ حربیہ اموال قیمتدار ایلہ یوکللی اولدقلری افقدہ کوروندیلر .

بو سیار قلعهلر جنوہدن قالمش‌لر ، رومانک اسکلهسی اولان (جیویتا - وکیا) لیمانہ کیدیورلردی . هوا یوق درجه - سندہ خفیف ایدی ؛ اوتاریخہ قدر بو صولردہ اصلا نشانہلری کورلمہ مش اولدیغندن تورکلری عقلرینہ بیله کتیرمہین ایتالیانلر

آهسته، لا قید کورک چکمکده ایدیلر. بوراده پک نادراً بر عرب
(فیرغاته) سنه راست کلنسه ییله پایاکیجیلری بونلری قهر و اتلاف
ایله اکتساب فخر ایله یه بیلیرلردی. ایشته بو حالت روحیه
ایچنده ایکی حرب کمیزی بر برندن اون لیغه قدر بر فاصله ایله
سیر ایدرلر ایکن اوروج رئیس آوینه اشارت قومشدی.
حالبوکه: بویله اون سکز اوطور اقلی بر قیرلانغیچ ایله و یا خود
چکدیرمه ایله کندیسنک ایکی مثلی جسماتده اولان و ایچریسنده
کیم بیلیر نه قدر عظیم بر قوه مسلحه بولنان بر معیت قدر غه سنه
هجوم قولای بر ایش دکلدی. تورکلر بو درجه کور کورینه
بر جسارتی پروتستوایتمک ایسته دیلر و رئیس لرینه کندی حمله رنده
بر شکار بولمق ایچون رجایه باشلا دیلر. بوکا قارشی دمیر آرزولی
اوروجک یکانه جوابی چکدیرمه سنک کورکلرندن بر چوغنی
دکزه آتمق اولدی. بو وجهله تورکلر ایچون فرار فرصتی
غائب اولمش، دشمنه هجوم ایله غلبه دن باشقه چاره قالمامش
ایدی. شیمدی تورکلر کورکسز و عاجز تکنه لری ایچنده متین
و متوکل دوریور واک اوکده کی قلعه سیاره نک تقریبی بکله یور-
لردی. غالی- رویال بر روش احتشام و اغترارله و تهلکه قریبه دن
کلیاً غافل اوزر لرینه دوغرو اینمکده ایدی. نا کهان ایتالیانک
نوبتیسی اوکنده کی تورک صاریق لرینی کوردی؛ بو صولرده
بو منظره حقیقتاً غیر مأمول ایدی. بویوک بر تلاش ایچنده سلاح

باشنه اورولدى. ايكي تكنه بوانئاده بورده بورده يه كمشلردى. توركلرك بريايلىم آتشي خرستيانلرك تلاش وپريشانيسنى مزداد ايتدى؛ توركلر رامپه اولديلر؛ اك باشلرنده اوروج رئيس اولدينى حالده بك آز صوكره قورسانلر قيقچ قصاره سى اوزرنده ايديلر وهمان حشمتلو پاپا جنابلرينك خدامى انبارلره طيقيلىدى .

« بو آنه قدر تاريخ محاربات بحريه ده بر (غالى - رويال) ك بويله عاجز وحقير بر چكدير مه يه بانديره ايندير مه سى ، يعنى مغلوباً تسليم اولماسى واقع اولمامشىدى ؛ لكن ايشك اك فنا سى دها بو دكلدى ؛ اوروج رئيس نه اولورسه اولسون ايكنجى سفينه حربه يي ده ضبط ايده جكنى سويله دى . معيتى كنديسنه بونك نه قدر مهلك ، محال برايش اولديغى آكلاتمق ، آلدقلى غنيمت عظيمه يه شكر ايله صيويشوب كيتمه نك لزومنى اثبات ايتك ايچون نافله يره يالوارديلر ، اوغراشديلر . قورسانك قرارى غير قابل التحول ايدى ؛ موفقيت سابقه نك شوقيله سرمست اولان طائفه ده نهايت رئيسلرينك جوشانى جراتندن حصه دار اولديلر .

« اوروج همان معيته خرستيان اسراسنك ، ضابطان و افرادينك البسه سنى كيديردى و كويا اصل غالى - رويال طائفه لرندن ايمش كى اورايه آتلاديلر ! آرقه ده كى غالى دخى وقعه دن تماميله بى خبر وارقه داشنك كيچيلرينى البسه لرينه

نظراً و طنداشلری ظن ایدرک لاقیدانه، مستریحانه یا قلاشدی. لکن مخوف بر آلابانده آتشی، بر قورشون، اوق صاغناغنی متعاقب بوکاده رامپه ایدلدی و بر از صوکره ضبط ایدلمش ایدی. اوروج رئیس غنیمتلینی تونس، حلق الواده کتیردی. بر بریه ساحلنده شیمدی یه قدر بویله بر منظره کورلمه مش ایدی!

مورخ هایدو دیرکه (بووقعه قهرمانانه کک تونسده، کک بوتون عالم خرسیتانیتده حاصل ایتدیکی تقدیرات و حیرت، اوروج رئیس اسمنک قازانداغنی دهشت و شهرت حقیقتاً غیر قابل تصویردر. بوآندن اعتباراً بارباروسه (بابا اوروج) بوتون جهانک اک شجیع، اک متشبث و جرئتکار قبودانی طانمشدر.»

[لهین - پول: بر بریه قورصانلری تاریخی: صفیه ۳۵، ۳۶]

پاپا قالیونلرینک ضبط اولماسی بارباروس قردشله اک محتاج اولدقلری بر شیئی، یعنی کورکچیلری تدارک ایتمش اولدی. اوزمانک قاعده سنجه همان ایتالیا نلری کورکه چاقارق شجیع تورکلرینی یالکز حرب ایشنه مأمور ایتدی. لهین - پول بارباروسلرک ایرتنی سنه دخی ایچریسینده سفینه مرتباتندن باشقه ۵۰۰ بریه سلاح اندازی بولنان برجسیم اسپانیول سفینه سنی ضبط ایله دیکنی بیلدیریور. آوروپالیره کوره کویا بوقره عسکرلرینی دکز طوتمش اولدیغندن مدافعه لازمهده بولنه مامشله! تحفة الکبارده دینیلورکه:

«چون هنکام شتا کچوب سفر زمانی کلدی. مزبورلر

(خیرالدین بارباروس و اوروج بارباروس) ایکی کمی دونادوب
 حلق الواددن چیقدیله. جنويزدن بغدادی یوکلّی بویوک برکمی یه
 ملاقی اولوب بی تکلف آلوب بر ازدن [براز صوکره] قلعه
 مثال برقالیون کوردیلرکه: چوقه یوکلنمش بر تاجر کمسی ایدی،
 کوز آچدیرمایوب آنی دخی آلدیلر . و تونسّه دونوب مال
 غنائمک پنجکنی [خمنی] چیقاردقندن صوکره باقیسنی اولشوب
 بوکره اوچ کمی ایله تکرار کفار یاقه سنه صالدیلر . اسپانیادن
 برپارچه [جسیم نقلیه سفینه سی] یلکن آچوب کلیرکن صاریلوب
 [یعنی رامپه اولوب] یدکه چکدیلر [ضبط ایدوب آرقه لرینه
 باغلا دیلر]: ایچنده برکافر بکی وار ایدی. چوق جنک ایدوب
 بالاخره کرفتار اولدی و بوندن صوکره مزبورلرک نامی آفاقه
 منتشر اولوب آق دکز یالیرینه ولوله ویردی .

ایشته اوروپا تاریخلرینک ایچنده کی بشیوز بریه عسکری
 دکز طوتدینی ایچون ضبط اولندی دیدکلری اسپانیا سفینه سی
 جمله منقولده صوک ذکر اولنان سفینه اولق لازم کلیر ،
 مقاومتک شدتدن و ایچریسنده بر «کافر بکی» یعنی خرستیان
 بریه قوماندانی اولماسی دخی بونی مؤید اولدینی کبی تاریخلرده
 دخی توافق وار .

بووقایع متقدمه دن صوکره تحفة الکبارده بجایه هجومندن

بحث اولنیور ، لکن آوروپا تاریخلری (بحایه) دن اول جریبه
سفرینی ذکر ایدیورلر و بزه دها موثوق کورینیور :

بارباروسلرک حلق الواده تمکنلرندن بش سنه کچمه دن
بارباروس قردشلر سکز کوزل سفینه یه مالک اولمشلردی بونلردن
باشقه (لهین - پول) بارباروس خیرالدینک نفسنه مخصوص ایکی
کیسینکده بونلرله برابر اولدیغنی اخبار ایدیور، که مجموعی اون
تکنه دن عبارت بر فیلو دیمک اولور .

شیمدی حلق الواد موقعی ایکی قردشه دار کلمکده اولد -
یغندن صورت موقته ده منبت جریبه آطه سنه یرلشدیلر و بو آطه نیک
غایت راحت لیماندن چیقان کیلری ایبتالیاسوا حلتی قاریشدیرمغه
باشلامشدی .

بونکله برابر جریبه حاکمکی عنوانی بارباروسه قردشلر
وبالخاصه اوروج بارباروسه ایچون پک حقیر و ناکافی کورینیوردی -
بوفوق العاده آدملر فوق العاده سرگذشلره ، دکز لرک احوال
بیقرارینه ، حرب و ضربک ولوله و مهالکنه عاشق اولدقلری
قدر بوراده اساسلی ، منتظم بر موضع حکومت تدارکنه ده منهمک
ایدیلر . اسپانیالیرک اطوار ظالمانه سی ، افریقا حکوماتنک احوال
پریشانی ، حاکملرک مفاسد اخلاقیه سی ، الحاصل بودار سیاه بخت
مغربده اسلامیتک تهاکه لری ، اضطراباتی بویکیت و حیتلی قلیلری
آزیور ، آنلره بویالیلرده برسدسیدد حمایه تأسیس ایله مک ،

شرقه کې ضعيفت اسلاميه يې ستر وحمایه ايدن صاف وجوانمرد
تورك قومك قوتلی قوللرندن، كسكين قلنجلرندن غربه دخي
برهيئت قويه، بر حصار مدافعه بنا ايتك شوق وعطشني احساس
ايله يوردی. ۱۵۱۲ تاريخ ميلادي سنده - كه ۹۱۸ سنه هجريه سنه
مصادفدر - املرينه مطابق برفرصت ظهور ايتدی: اوچ سنه
مقدم بجايه شهرينك اسلام حاكمي اسپانيوللر طرفندن مملكتندن
طرد ايدلمش ایدی. بودفعه حاكم مومي ايله بارباروس قردشله
عراجعتله اسپانيوللری طرد ايچون كنديسنه معاونت ايتمه لرینی
وشايد شهرى اسپانيوللردن قورتاریرلرسه بحرسفيدك غرب
حوضه سنه حاكم اولان بولماني كنديلرينه آچه جغنی سويله مش
اولديغندن اوروج ايله حضر بومسئله يې كمال اهميتله پيش مطالعه يه
آلدیلر. [۱]

آز قوتله چوق ايش يامغه آليشمش وهركون مشكلات
هائله يه غلبه ایده ایدله ایلرله مش اولان بو آدميرال لرنده كی قوتی
نائل مقصد اولمق ايچون کافی عد ايله يورلردی. كنديلرينه
كورده طوب قالدیره بيله جك اون ايكي چكديرمه لری، قيرلا -
نغچلری واردی؛ اطرافلرنده ايسه اون بيك یرلی يه معادل

[۱] تکرار ایدیور؛ ۹۱۸ تاريخی بايزيد ثانی دورينه مصادف
اولديغندن، خيرالدين پاشانك ياوز سلطان سليمك جلوسندن اول برادريله
مغربه اولديغی اكلاشيليور. عجا خيرالدين رئيس اكثرثيا حوضه
شرقيه ده دخي بولديغی ايچونميدر، كه تاريخلرده بو تناقض وار.

طوتدقلىرى و بر اشارتلىرىنه قارشى كندىلرىنى آتسه آتغه حاضر تام بيك منتخب تورك محاربى دورويوردى . حين حاجتده معاونتلىرىنه قوشه جق بر چوق اندلس ملتجىلىرى دىخى موجود ايدى . شهرتلىرى جهانى طوتمشدى ، بر كره « بابا اوروج جهاد يولنه كيردى ! غزا بايراغنى آچدى ! » دىنيانجه شرقدن ، آناطولى ياليلردن دىخى بر چوق تورك لوندلرينك معيته قوشه جنى معلوم ايدى . بوايكى قردشك عادتدن خارج شجاعتلىرى ، جرئتلىرى بوتون معيتلىرىنى مقناطيسله مش ، ايكىسى ده بو نوعدن بوتون بويوك قوماندانلر كى سلاح آرقه داشلىرى طرفندن مستشا بر محبت و حرمتله سويلمكده بولنمش ايدى .

ايسته بواحوال نتيجهسى اوله رق بارباروسه قردشلىرى ۱۵۱۲ سنه ميلاديهسى آغستوس سنده بجايه قاعهسى اوكنه معيتلىرىله چيقدقلىرى زمان زواللى حاكم مطرودى اوچ بيك بربرينك رياستنده ساحلده كندىلرىنه منتظر بولدىلر [بوبرنجى بجايه سفرى حقنده كاتب چاپى بك مختصر معلومات ويره رك اوروج ايله حضرك معيتنده انجق درت تكنه اولديغنى ذكر ايله يور] .
مخاصمات باشلادى . اسپانيول محافظلر (قونت دون پدرو آوارو) طرفندن انشا ايتدىرلمش اولان بويوك حصاره تحشد ايتمشلىرى ايدى ؛ سكز كون طوبه طوتلديغى حالده مقاومت كوسترن ديوارلرده هجومه مساعد بر كديك آچيلمش ايدى ، كه : قلعهدن

آتیلان برکولله اوروج رئیسك صول قولنه اصابته خرده خاش
 ایتدیکندن ، رئیسلرینك قهرمانلق مثاللرندن محروم قالان
 تورکلرك آتش شوقی صوغودی ؛ و یارملی قپودانلرینی آلوب
 تونسسه برای تداوی کوتورمکی بوراده قان دوکمه مرجع
 کوردیلر. انجق اثنای عودتلرنده جنوملی (لومه لینی) عائله سنك
 (تبارکه) دهکی تجارت ستاسیونندن کلن جسم و امتعه کرابنها
 ایله یوکللی بر پارچه سنی ضبط ایتمه لری بو عدم موفقیته مقابل
 بردرجه بادی تسلیت اولمش ایدی .

تقصیلات سابقه آوروپا تاریخلرینك خلاصه بیانایدیر .
 تحفة الکبارده ایسه اوروج ایله بارباروسك ده قلعه جوارینه
 کلیرکلز بر اسپانیول فیلوسی طرفندن باصیلدقلرینی انجق تورکلرك
 مظهر غلبه اولوب ایکی کمی ضبط و متباقیسنی فراره مجبور
 ایله دکلری محرردر . بو کیلردن برینی اوروج رئیس طوبله
 باطیرمش ایدی . تبارکه دن کلن پارچه نك ضبطنی کاتب چلبی
 دخی ذکر ایدیور :

« بارباروس خیرالدین اوروجك کسیان قولنی تداوی
 ایتدیرمك ایچون مومی الیهی تونسسه کوندردکن صوکره بر
 پارچه ایله برقچده خرده حرامی کیسنی آلوب تونسسه کوندردی . »
 خیرالدین رئیس دوغرودن دوغرویه تونسسه دوئمیه یوب
 دکزه آچیلدی . باله آراطه لرینك کوچوکی اولان مینورقه یی

باصدی ؛ بر قاچ قوله سنی فتح ، قریه لرینی غارت ایله بر چوق اسرا و غنائم آلدی . انجق عودت ائناسنده قورسیقه آدمیرالی سکز قطعه سفینه حربیه ایله اوزر لرینه هجوم ایتدیکندن تورکلر آمران کمیسنه رامپا اولوب ضبط ایتدیلر . بو محاربه پک عنودانه واوزون اولمش ، ایکی طرفدن دخی بر چوق آدم تلف و مجروح دوشمش ایسه ده نهایت تورکلر غلبه ایدوب خیرالدین رئیس دشمنه اولجه آلدینی ایکی سفینه بی دخی بر اقادیره رق تونسہ عودت ایله مشدر . [۱]

[۱] لهین - پول دیورکه : « اوروج رئیس تونسده تداوی اولنور ایکن حضر رئیس (خیرالدین) حلق الوادک محافظه سنده قالمش وچکدیرمه لر ایله غنیمتلی لیماک بوغازندن ایجرییه صوققله مشغول بولمش ایدی ، لکن بوخصوصده کچ قالمش ایدی ، چونکه : احوال جاریه دن پک زیاده متأثر اولان جنوه حکومتک مشهور آندریا - دوریا قومانداسنده کوندردیکی بردونما بوچکدیرمه لر نا کھانی باصدیردی و حلق الواد اوکنه عسکر چیقاروب خیرالدین رئیس تونسہ چکلمکه مجبور ایتدی . حلق الواد قلعه سی یاغما اولنوب بارباروسه لک کیلرندن یاریسی بر آلائی ظفر انما ایله جنویه کتیرلدی ؛ ایشته بارباروس خیرالدین ایله آندریانک ایلک مصادمه سی . مع التأسف صوکره کیلر جنوه آمرالی ایچون پک بدبختانه اولمشدر . برادری اوروجک شدت طبعندن خبردار اولان خیرالدین رئیس برادرینی فراش بیماریده حدتله چیرپتغه بر اقوب جربه یه کیتدی و اوراده کیجه کوندوز چالیشوب برخیلی سفینه انشا ایتدی . ایلک بهارده اوروج دخی بوراده انکله برلشدی وهمان اخذانتقام ایتمکه باشلادیلر « حالبوکه بووقایع بزم تاریخلرده هیچ یوقدر .

بابا اور وچ یارہ سنک اتیا مڈیر اولماسنی بکھ یرک تک قول
ایله یاتارکن حضر رئیس (خیرالدین) بوش دور مق ایستہ مہ -
یوردی . موسم قیش ، دکز فورطنہ لی اولقلہ برابر بوکی شیلر
رئیس ایچون حائز اہمیت کورونمہ دی ؛ طویلایہ بیلدیکی بر
قوتلہ قسمت آرامق ایچون انکینہ آچلدی و بر آی کچمہ مش
ایدی کہ : اوج بیك سکزیوز اسیر المش ویکرمی پارہ سفینہ
ضبط ایلہ رک تونسہ گمشدی . اسیرلری بارباروسلر کندیلری
ایچون آلیقویدیلر و متباقی اموال غنائی تمامیلہ معیتلرندہ کی
غازیلرہ بخش ایتدیلر . بہار ، حضر رئیس تکرار آق دکزک
بالغہ لری اوزرندہ بولمش ایدی : معیتندہ یدی پارچہ کوکللی
(لوندیغنی قورصان) تکنہ سی واردی . کفار یاقہ سندہ (آوروپا
ساحلندہ) بر شہر باصیلدی و آلتان بیك سکزیوز اسیر اون
ایکی بیك آلتونہ فدیہ نجاتہ باغلانوب کری دونلدی . اثنای
عودتدہ معیتندہ کی سفائن ایستہ دکلری کی اولانمق ایچون
اطرافہ داغیلمشلر ایدی . خیرالدین رئیس ، قدرغہ سندہ
قوماندان فناری اولہرق ، لیلًا سیر ایدرکن درت پارچہ پشنہ
دوشمشدی . هوا آچیلنجہ بونلری کورن رئیس بلا تردد
اوستلرینہ چویردی ورامپا اولوب دردینی دہ ضبط ایتدی ؟
بوکیلر چوقہ یوکللی ایدیلر . تونسہ کتیردیکی زمان ایچلرندہ
چوقہ دن ماعدا سکزی بیك (پختہ) لک بر مبلغہ ظہور ایتش

ايدى. حضر رئيس بوسفرنده برکيجه باشقه بر پارچه يه دهه
تصادف ايتمش ايسه ده ظلمت ليل ايجنده الندن قاچيرمش ايدى؛
اطرافه داغليشم اولان رفقای جهادی بو فراری يه تصادف
ايدوب ضبط ايله ديالر. بوتکنه فرانسه باندیره سنی حامل وتخته
يوکلی ايدى .

تحفة الکبارده بارباروس خيرالدينک بوفرانسه سفينه سنی
کمال رئيس همشيره زاده سی محی الدين رئيسه ترفیقاً بر چوق
هدايا ايله در سعادته تقديم ايتديکنی يازيور . بونی بزده حيقته
موافق کور مکده يز؛ چونکه بجايه وقعه سنک ۹۱۸ سنه هجريه
سنده حدوشنه نظراً وسـلطان سليم اولک جلوسی دخی ۹۱۹
تاريخنه مصادف اولديغندن بارباروس قردش لک تبدل سلطنت
مناسبتی ايله حکمدار جديد لرینه بويله بر تقدمه ده بولمالری اغلب
احتمالدر. بارباروس خيرالدين ايله اوروج رئيسک بوتقدمه لرینه
مقابل مقام سلطنتدن ايکی قدرغه وايکی خلعت احسان ايدلمش
ايدى .

بارباروسلر دکرده هر آن ايکی موفقيتلر نائل اولمقده ايديلر،
لکن بيا اوروج بجايه بي اسپانيولار الندن نزع ايتک فکرندن
اصلاً واز کچمه مش ايدى. (۱۵۱۴) سنه ميلاديه سنه مصادف
اولان (۹۲۰) سنه هجريه سنده ايکی قردش اون پاره کمی دونادوب
ايکنجی دفعه اوله رق بجايه سفرينه چيقديلر . اولایول

اوزرنده کی جیجل نام غایت مستحکم کوچوک حصارى محاصره
 وایچنده کی یوزاسپانیولی در زنجیر ایدوب بر مقدار محافظ وضع
 ایله دیلر . [۱] بوندن باشقه اوچ قطعه ده چکدیرمه براق دیلر .
 بجایه اوکنه وارلدی ، قره یه عسکر و طوپ چیقارلدی .
 طیش حصار شدید بر صورتده دوچار هجوم اولوب درت کون
 ظرفنده ضبط اولندی؛ بو حصارک فتحی ایله حربده تلف اولان
 اسپانیولردن ماعدا ۵۰۰ کیشی ده اسیر النمش ایدی ؛ اوروج
 رئیس ایله حضر امداده کلمش اولان یکریمی بیک قدر عرب
 عسکرینه قلعه نك بوتون اموالی یاغما ایتدیر دیلر . اصل ایچ قلعه
 اولان ایکنجی حصارده تحت محاصره یه آلمیش ایدی . یکریمی
 کون قدر بلافاصله بومباردمان ایدلدی؛ برچوق زحمت چکیلمش ،
 باروت دخی بیتمک اوزره بولنش ایدی . تونس سلطانندن
 جیخانه ایچون واقع اولان طلبه عادتاً جواب رد ویرلدی .

[۱] جیجل قلعه سنک کوچوک اولقله برابر نصل صعب التسخیر بر
 قیاق شبه جزیره اوزرینه بنا ایدلمش اولدینی یوقاریده تعریف اولمشدر .
 بو جیجل فتحی خصوصنده دخی آوروپا تاریخلری ایله بزمکیلر آره سنده
 مخالفت وار : آوروپالیلره نظراً : اوزمان جیجل اسپانیولر لنده دکل ،
 او آنه قدر کیمسه یه باش اکمه ین اهالی اصلیه سی یدنده ایدی . اهالی
 کمال افتخارله اوروج رئیس حکمدارلری طانیدیلر .

برده کاتب چلبی شرشل ایله جیجل بربرینه قارشیدیرمش ظننده یه ،
 چونکه شرشل باشقه جیجل باشقه در؛ جیجل بجایه یه یقین ، شرشل ایسه
 تاجزایر جوارنده کائدر .

احتمال سلطانده آرتق اوزمانکی فساد اخلاق سسبی ایله اوروجی استرقاب ایدیور، یاخود باشقه درلو بر منفعت کوریوردی. مع مافیله اوروجک اوکنه کچمک وقلعه نك محاصره سندن صرف نظر ایتدیرمک ممکن دکلدی. او، عسکرک ایچنده دیوردی، که :

— بن بوراده برقولی براقدم، کله می ده براقیرمده آلمان دوئم !

انجق هر غیرتک برحدی، هر موفقیتک بر نهایتی واردر. تام آن مظفریتده اکیوز پارچه دن مرکب بر مهیب اسپاتیول دونماسی قلعه اوکنده کوروندی وحصاره اون بیک کیشلیک بر قوه امدادیله آتدی. بر برلردن متشکل قوه امدادیله ذاتاً استدکری قدرمال غنیمته صاحب اولدقلرتدن بومضیق وقتده نامردجه سنه داغیلوب کیتمشلردی. اوروج رئیس اوروپا مورخلرینک دیدیکی وجهله « برتهور مجنونانه ایچنده قیرمزی صقالنی دلیلرکی محترصانه یوله رق » محاصره بی رفعه مجبور اولدی؛ ایشک فناسی بر دره ایچنه صوقدقلری کیلرینک صولرک چکیلمه سیله قرده قالمش اولماسی ویوز دیرلمه لرینه امکان بولنه ماماسی ایدی؛ دشمن اینه کچمه مک ایچون بونلرک هپسنه بالمجبوریله آتش ویرلدی. تورکلر غنائمی واسیرلرینی بر اقایه رق قرده دن آلتش میل مسافه قطع ایلهدیلر. وجیجیل حصارینه

واصل اولدیله . خیرالدین رئیس یکر می درت اوطوراق قدرغەسی ایله اوروج رئیس کیسی اوراده ایدی . اوروج بوراده قالدی . بارباروس خیرالدین تونسە واروب دورت کمی صاتین آلمش ، بونلره یدی قطعەده تورک کوکلی سفائی التحاق ایتمش ایدی . خیرالدین رئیس بووجهله اون درت سفینه نك ریاستنده دریاه چیقدی ؛ مشهور قورد اوغلی فامیلیاسندن و آق دکرک الک مشهور لوندر سر کرده لرندن مصلح الدین رئیس ده اون درت پاره تکنه ایله خضر رئیسە (بارباروس خیرالدین) رفاقت ایله دیکندن مجموع قوتلری یکر می سکز پارچه یه بالغ اولمش ایدی . ایتالیا صولرینه کیرلدی ؛ جنوه قربنده راست کلدکلری سکز قطعە بغدادی یوکل ی پارچه قارشیلرنده کیلرک کیملر اولدیغی اوکرتجه بلا مقاومت تسلیم اولیور دیلر . بوجولان لوندانه دن انئی عودتده دخی چوقه یوکل ی اون ایکی بارچه ضبط اولمش ایدی . خضر رئیس بوغنائمدن یکر می پارچه یی صاتلق اوزره قورد اوغلی مصلح الدین رئیس ایله تونسە کوندردی . وکندیسی (جیجل) ه برادرینک یاننه کلدی . آق دکر ، آروپا ایکی قردشلرک شهرتلیله چالقالانیور ، پالاسنه کوکهن ، یلکننه یدیرن بوتون تورک قورصانلری ، شرکک لوندر قپودانلری ، بونلرک معیتته شتاب ایدیور ایدی !

جزایرک ضبطی . — (۱۵۱۶ - ۱۵۱۸ میلاد ۹۲۲ - ۹۲۴)

هجریه) شیمدی بارباروس قردشله پک مهم بروطفه توجه
 ایتمش ایدی : یوقاریده بالناسبه سویله نلدیکی وجهله اندلسدن
 هجرت ایدن بیکلرجه عربلر اوزمانلره قدر نامی مجهول اولان
 جزایرده تمکن ایدوب بر قورصانلق استاسیونی تشکیل ایله مش
 ودائما اسپانیوللری، ملل سائره ممالکی سواحلی و سفائنی غارتله
 کندیلرینه ایدیلن ظلمک انتقامی آلمغه باشلامش ایدیلر .
 اسپانیولر بونلره اولاهمیت ویرمه مشلر ایسه ده موخرأ ایشک
 کسب اهمیت ایتدیکنی کورنجه بویوک بر قوتله قورصانلری
 تأدیباتیمکه کلشلردی. ایشته بواثانده جزایره دخی اوغرایوب
 سکنه سندن بردها غارتکرلکده بولنمایه جقلرینه دائر سوز
 آملش، و شهر اهالیسنی سنوی اسپانیا قرانته معین بر مبلغ اعطاسنه
 اجبار ایله مشلردر. کچن صحیفه لرده بحث ایله دیکمز واسپانیوللرک
 Penon d'alger دیدکلری جزیره اوزرنده کی حصارده اسپانیوللر
 طرفندن او وقت یاپیلوب ایجریسنه مقدار کافی طوپ و محافظ
 قونمش، بووجهله شهر دائمی بر آبلوقه آلتیه آلدیغنی کبی جزایر
 تکنه لرینکده لیاندن حیقماسی قطعاً محال حاله کتیرلمش ایدی.
 جزایر لیلر ذاتاً صرف قورصانلقله کچنمکه آلیشمش بر ملت
 اولدیغندن (فیرغاته) لری بویله قوملر اوزرنده چورودکجه
 آچاغک ، فقر ضرورتک تضییقات مؤله سنی حس ایتمکده
 ایدیلر. ۱۵۱۶ تاریخ میلادیسنده فردیناندونک وفاتی جزایر لیلر

ایچون عصیان پاروله سنی تشکیل ایتدی. اسپانیاه اعطاسی مشروط اولان خراج رد اولندی. ومنسوب اولدینی قبیله نك شهرک مدافعه سنه معاونت عظیمه سی دوقونه جنی امیدیه جوار قبائل شیخلرندن «سالم بن نئی» شهرک مقام حا کیتنه دعوت ایدلدی.

لکن بو عرب شیخی شوراده، شهرک قارشیسنده کی آطه اوزرنده یوکسلمش مدهش حصارده بولنان واک اوافق بهانه لرایله شهری طوب دانه لرینه هدف ایدن اسپانیول عسکرلرینه قارشی نه یاپه بیلیردی؟ شجیع عرب سواریلرینک بربرستان قیصر اقلری، قابل الانخنا، اوزون مزراقلری، امثالی بولماز. بر مهارتله صوویرلمش قلنجلری اسپانیوللرایله آرهلرینی تفریق ایدن دکره واسپانیوللرک طویلرینک ویکانه بورالرده آنلره مخصوص قالمش نوایجاد آغر تفنکلرینک یایلم آتشارینه قارشی غیر مقتدر قالمایه جقمی ایدیلر؟ بو محاذیردوشونیلیر دوشونیلمز جزایرلیرک خاطرینه اوروج رئیس کلدی. انلرک یارملرینی صاره بیله جک، ییلماز ویورولماز بارباروس دن باشقه بری متصور دکلدی؛ ایکی دفعه بجایه یه، بجایه حاکمه جاندن معاونت ایتش، حتی بو اوغورده برقولی ده غائب ایله مش دکلی ایدی؟

بناء علیه: بلاتردد شیخ سالم جیجله بر هیئت کوندروب کندیسنک وتبعه سنک انحق اونا کوکندکلرینی وسرعت ممکنه ایله

جزایری کفار الندن استخلاص و محافظه یه قوشمانی استرحام
ایتدی .

اوروج بارباروسك حقنده لایق اولدینی مدایحی ابدالن
کری دورمایان بعض آوروپا مورخلری بیله بوجزایر مسئله سنده
مجاهد غیوری - خرسیتیانلغ اوکنه برسد آهین کبی دورماسندن
متولد حدت لرینه محسوباً - اللرندن کلدیکی قدر خقسز چیقارمغه،
غدار و غاصب کوسترمکه چالیشیرلر؛ نته کیم؛ (لهین - پول) ،
مورغانك « جزایر تاریخی » ندن شو سطرلری نقل ایدیور :
« هیچ برمر اجعت طول امل صاحبی ، حریص بارباروس
ایچون بوندن خوش و مسرتجنش اولمایه جقدی . چونکه یکی
صاحب اولدینی خطه، خزینه سنه پك آز پاره کتیر یور ایدی؛
خصوصیله طرز حکومتده دخی مداخله دن بری بولنمایوردی .
بجایه ده پك فنا موفقیت سز لکله اوغرامش ایدی، لکن جزایر ده
دها ای برطالعہ مصادف اوله جغنی امید ایدیور، دیگر جهتدن
جزایری نخبه آمالنه - که اولجه سویله دیکمز کبی دیار مغربده بر
حکومت مستقله تشکیل ایتک ایدی - قات قات فضله موافق
بولیور ایدی . . . »

شیمدی بوراده برقاچ سوز سویله مك ایسته یورز: اوروج
بارباروسه نك دیار مغربده بر حکومت مستقله تشکیل ایتمه سنه
اوراده کی عنصر اسلامی ذوق و کیف لرینه فدا ایدن، هر کسك

کوزل زوجه سنی ، باکره قزینی ، کنج اوغلارینی جبراً مجلس عیش ونوشنه سوقان اخلاقسز ، یرلی حکمدارلرک شبهه سز قیزمغه حق اولور . بونلرله برابر ، خرسیتیانلره باب غارت واستیلایی قاپایه حق واسلام ناموسنی خرسیتیان آغوشندن قورتاراجق بر حکومت جدیدّه آهنینه قارشى خرسیتیانلرک ده منهور اولمغه حقلرینی یردن کوکه قدر تسلیم ایدرز . کچن صحیفه لر مزده آوروپا مورخلرینک افریقای شمالی حکمدارلرینک اسکی صلحچورور ، تجارتپناه پولتیقه لرینی ترک ایلهمش اولمالرندن نصل بر لسان شکایت خیرخواهانه ایله بحث ایلهدکلرینی نقل ایتشدک . چوق ایی، لکن : بز صلحچورورلکی، تجارت اجنبیه یه مساعده کار بولمنی بر شرط اساسی ایله تقدیر ایدرز . بومسلکی اختیار ایدن عنصره ، ملته ، حکومته مفید اولق شرطیله ! یوقسه بو، جیبنده کی پاره یی داغیتان میراث یدیلرک ، نهایت فامیلیاسنی قوماره قویمغه قرار ویرن حیثیتلرک کاریدر . صوریورز ، او آوروپا مورخلرینه ، که : تقدیر وتحسین ایتدکلری بوصیمیت سیاسیه دن، بومساعده کاریء مناسباتدن افریقای شمالی حکومتلری نه قزانمشلردر ؟ برذلت مدیده ! بر محکومیت ملیه وعصیت قومیه ودینیته نک ضیاع الیم وملوثی ! بزجه ، آسیای وسطادن کلهرک ، بر چکا چاکئی احتراض وتفرقه ایچنده بوغولان ، یاره واغیاره (ایوالله) ایدن عنصر

اسلامی شان و شرفہ بوغمش و حالا برسپر صاعقہ کی احتراصات
ملیہ نك اوكنہ دیکیلوب دورمش تورکلر جہ اوروج رئیسك
او دیار بعیدہ ویتیمہ اسلامیہ دہ قوی و مقاوم بر حکومت
تأسیس ایتمکہ چالیشماسی تقدیس اولنور بر حرکتدر . چونکہ
بزطوائف ملوک سلاجقہ یی بلع و تمثیل ایتسمہ یدك اوتامیت
شوکتی بولہ مازدق . صلاح الدین ایوبی سوریدہ کسب حاکمیت
ایتسمہ یدی اهل صلیب سیلابہ سی اسلامیتی کوکندن سوپوروردی ؛
نتہ کیم : او افریقای شمالی ملوک اسلامیہ سی دہ تغلب نتیجہ سندہ
اورالرہ صاحب اولدیلر . قوینك ضعیفی بلع و تمثیلی قاعدہ در ؛
یترکہ : او قوی ، ضعیفك مستقبلانی تقویہ ایلہ یہ ! کاتب چلبی
دیور، کہ :

« مکتوب واروب مفہومی معلوم اولدقده اوروج غزانیتہ
قالقوب جیجیل حصارینی برادرینہ سپارش ایلہ یوب جزایرہ
کیتدی و معین برحاکمی اولما مقلہ شہرہ کیروب تمکن ایتدی... »
اوت ، بن فکر مجہ بو طرز افادہ یی ماقعہ پك موافق ،
حتی نقصان بولیورم . سالم بن ثمی کیم ایدی ؟ جوار قبائلدن
یرینك رئیس ، دینلہ بیلیر : ولکن جزایر اہالیسی آنی قبول
ایتملردی . پك اعلا ، او حالہ بابا اوروجہ نیچون مراجعت
واقع اولدی ؟ چونکہ « سالم بن ثمی » کبی بر صحرا ، بادیه شیخی
او وقتکی احوال حربیہ و سیاسیہ کورہ جزایری اوچ کون

مدافعه دن عاجز اولدیغی کبی ، اوروج بر دفعه لق معاونت ایتسه بیله ، صوکره خرسیتانلرک غلبه سی محقق کورینیوردی . ومسئله اساسیه جزایرک ، جزایر عنصر اسلامک غلبه سی ، محافظه سی اولدیغنه کوره اوروجک حرکتی منافع اسلامیه ایاک موافقدر . منافع اسلامیه اوغرنده ایسه منافع شیخصیه هیچ قالمق لازم کلیر . عجبا اوروج کندینی مدافعه دن عاجز اولدیغی بالفعل اثبات ایدن جزائری اسپانیول دوستلرمزه می پیشکش بر اقالی ایدی؟ بز، دم فرصته کندی ایشلرینی نصل کوردکلرینی صحائف تاریخیه ایله اثبات ممکن اولان خرسیتان دوستلرمزدن سفلیت وتدنی اسلامیتک آوقاتلغنی بودرجه واضح تعقیب ایتمک نقصانی محاکمه سنی هیچده او نماز ایدک ! کچهلم :

اوروج جزایر لیلرک استمدادینی کورنجه جیجیل محافظه سنه حضر رئیس (خیرالدین) براقدی و آلتی بیک محارب ، اون آلتی چکدیرمه [۱] ایله جزائر امدادینه شتاب ایتدی .

بارباروس جزایره کیرر ایکن Cherchel حصارینی دخی فتح ایله مش ایدی . « له یں - پول ؛ دیرکه : بوراسی مستحکم بر موقع اولوب قره حسن نامنده برتورک قورصانی بورایه ، اوروجدن مثال آله رق کندینی حکمدار نصب ایتدیرمش ایدی .

[۱] قدرغله یعنی غالیلر عمومیتله ۲۷ چفته ایدیلر ، ۱۸ الی ۲۰ چفته لره دها زیاده « پرکنده » دینیلردی .

اوروج ایسه بر خطه ده ایکی حکمدارک بولماسنی موافق کورمه دیکندن - بر احتیاط دوستانه اوله رق - جزایره عزیمت ایتمه دن مومی الیهی قتل ایتدی . . . »

بومسئله نك حقایق اشاعیده کوستریله جکدر [۱]. اوروج رئیسک عزیمتنی متعاقب بارباروس خیرالدین تونسسه - جیجله اوچیوزدها محافظ قویدقدن صوکره - عزیمت ایتمش وقورد اوغلی مصلح الدین رئیس ایله تقسیم غنائم ایشیله مشغول ایکن طرف پادشاهیدن کوندریلن ایکی قدرغه ومدلیدن برکمی ایله برادری اسحق رئیس کلوب ملاقی اولمشدر. [بو حادته یوقاریده تبیین اولئانك تاریخچه مؤخر، تفصیلاًجه مقدم اولانیدر.]

خیرالدین رئیسک بر قیدشان وشرفی دها واردرکه : آنی کچه مه یه لم : خیرالدین رئیسک (حضر) و (اوروج بارباروسه) نك حرکات لوندانه سی بو کبی سرگذشت بهادرانه ایله ذاتاً مسهور اولان فرانسه یه بر تشویق دیکردیمك اولدیغندن فرانسه اوتوز اوچ Galeases (غاله آس) یعنی ماعونه سیله دونماسنی تونسسه کوندرمشدی : دونما بیزارته یه کلدی . او ائاده قورد اوغلی مصلح الدین رئیس اوراده ایدی. کلن دونمانك قوتنه مقاومت.

[۱] وقایع تاریخیه نك تحکیمه سی صره سنده بومعجز محاکمه صایلا - تمقلغمزی قارئین معذور کورسین . فی الحقیقه شاعرانه بسط وقایع هر خصوصجه خوش ایسه ده حقیقه وصول ایچون باشقه چاره یوقدر .

ایده میه جگنی آکلاینجیه کمیلرینی لیمانده ترک ایله حصاره کیردی. فرانسلر قلعه یی ده ضبط ایله مک اوزره قره یه ده عسکر سوق ایتدیلسه ده تونسده کی تورکلر بونلره قارشى چیقارق قانلی بر حرب ایله کمیلرینه فراره اجبار ایله دیلر. فرانسلرک آلتی کمیسنک لیمانده قالدینی تحفة الکبارده محرر ایسه ده نه صورتیه واقع اولدینی بر درجه یه قدر مهمدر.

فرانسلر تونسى متعاقب خلق الواده هجوم ایتدیلر، لکن مذکور حصاره تحصن ایتمش اولان خیرالدین بکک (حضر) متین و بهادرانه بر مدافعه سنه قارشى دشمن قلعه یی محاصره یه دکل، حتی قره یه چیمغه حسرت قالمشدى. الحاصل بو تعرض هیئت عمومیه سی ایله قورصانلری بر ایکی آئی قدر دکزلرده ایسته دکلری کبی آلیش ویریشدن منع ایله مکدن باشقه بر شیئه یارامامشدر. آلتی بیک کیشیک بر قوت واون آلتی چکدیرمه ایله جزایره کلن بابا اوروج بورایه یرلشدیکی زمان دوستلرینی، دشمنلرینی کوز اوکنه کتیرمش، قوتی ایجه طارتمش ایدی. جزایر لیلره قالسه آنلر ایچون همان Penon d'alger دینیلان اسپانیول آطه قلعه سنه هجوم ایتک و ضبط ایله ییویرمک قورصان ایچون سهیل ایدی؛ لکن اوروج بویله بر حربک قاچه مال اوله جغنی بیلیردی؛ یوقسه ینه دشمنلرینک بیله دیدیکی کبی اوروج ایچون بیکده بر موفقیت مأمول اولان ایشلره کیرشمه مک عادتاکفر صاییلیردی.

رئیس جزایره کلنجه : آطه قلعه سنک اسپانیول قومانداننه
 حیقوب کیتمک ایچون خبر کوندرلمشسه ده مومی الیه «کندیسنی
 نه معامله خصمانه نك، نه ده تشبثات دوستانه نك بویله بر ایشه
 اقناع ایده میه جکی» جوابی ویرمش، حتی برباروسه یه بر تحقیر
 اولمق اوزره: قولانی غائب ایتدیکی بجایه یی در خاطر ایله مه سنی ده
 علاوه ایتشدی. اکر قلعه نك ضبطی قولای اولسه یدی بالطبع
 اوروج کبی بر آدم بوسوز سبیلله بیله فتحنه تشبث ایتمک لازم
 کلیردی. یالکیز تاریخ بزه، قلعه نك اوروجک سکنز پارچه دن
 عبارت بطاریه سیله یکر می کون قدر بومباردمان ایدلدیکنی
 انجق قلعه ده بومباردمانک هیچ بر تاثیر مشهودی بیله حاصل
 اولمادیغنی بیلدیریور؛ حتی دیورکه: «احتمال بونی ده رئیس
 جزایر لیلرک اصرارینه منی یامشدر.»

شیمدی برباروسه لرک جزایرجه صورت تلقیلری باشقه
 بر شکل آلیوردی. روایاته نظر آجزایره کلن اندلس مهاجرلری
 - قسم کلیجه - اسیلزادکندن ایدیلر؛ اندلس اسیلزادکاننک
 اخلاق و مشواری ایسه صحائف تاریخیه ده کوریه بیلیر... بونلر
 تورکلری دعوت ایتشلردی؛ لکن قورصانلرک عصیت قومیه یی،
 پرهیزکار، خشین بر غیرت دینه یی تمثیل ایدن وریا وخلو-
 صلو وریدن عاری اولان اشکال ماده و تأثیرات معنویه لری
 جزایر متحیزاننک اومیدان حربده بش پاره ایتمه مش حیثیت

اصیلانلرینه آغز باصمش ایدی . آنلر اوروچ رئیس، باربارو-
 سلمی باغچه لرنده پاره ایله چالیشان رنجبر صورتنده طوته بیله جکر
 ظن ایدیورلردی؛ حالبوکه: تورکلر بربریه اهالی اسلامیه سنک
 غیرتسزلکلرینه باشدن بری مغبر واونلردن کندیلرینه بیله منفعت
 تأمین ایتهمش بر معاونه ذاتاً غیر مظهر اولدقلرندن، الی یاتاغانک
 قبضه سنده اولدقه بو طوپراقلری کزه بیله جکنه اینانان تورک
 ایچون اهالی اصلیه حرمت وریا کارلق قابل اوله مازدی .
 احتمال بونک ایچوندر، که : لهین - پول شویله دیور :

«اوروج رئیس ومعیتی کندیلرینی سوه سوه استقبال ایتمش
 اولانلره اودرجه خشین و متکبر معامله کوس-تردیلر که : (ابن
 سراج) لک و سائر عرناطه اصیل عائله لرینک بو حاله تحملی
 ممکن دکلدی .. »

ایشک دوغروسى قورصانک دمیرالی بو اخلاقسز اهالی یه
 ترس کلیوردی ؛ شیخ سالمده عین طریق طوتسه اکا دخی
 مرور و قتله عین معامله استقالیه کوستریله جکدی؛ لکن شیخ
 سالم برجهتله ساحلی بر شهرده مقام ریاستی قازانمقله سرمست و دیگر
 جهتدن نفوذ داران اهالی یه بویوزدن مربوط ومنتدار اولدینی
 ایچون «نه ویرسه لر اکا شا کر، نه قیلسه لر اکا شاد!» فلسفه
 اداریسنی طوتمش ایدی ویالکز، شیمدی شاد اوله مادینی بر
 نقطه وارسه اوده بارباروس قردش لک کندیلرینی اولاد و عیا-

لارینی اسپانیول دست شهوتندن قورتارمالرینه رغماً جزایرده کی
تحکم لری ایدی .

حالبوکه: زمان و مکان آنلرک ذاتی و سفیل احتراصلرندن
مبرا بردست تشبث ایچون چیرپینیور، منافع اسلامیه فیلسوف
داروینک دیدیکی کبی « یاشامغه مقدر اولانلر یاشار ، حیات
قویلر ایچوندر. » دیه باغیر یور ایدی . اسپانیاده یاقیلان اسلاملرک
دومانی هنوز توتتمکده ، کسیلن معصوملرک قانی دها صیجاق
صیجاق آققده ایدی . اکر فردیناند قتولیک ، بوجلاد دینی
وفات ایتمشه یرینه مشهور و جهانگیر دیدکلری شارلکن
کچمش ایدی ! مع القسم اسلام دشمنی ، مع الفخر اسلام قاتلی
اولان والنده هر درلو اسباب حرب و ضرب ایله اقوام محاربه
یولنان بوذات ایسه ایکی کوزینی مغربده کی عنصر اسلامک
محویتنه چویرمش دور یوردی ؛ قسم شرقی اسلامیت یاوزلرک ،
سلیمانلرک دست مشیتنده بش درهم طاشنه وارنجیه قدر مصون
التعرض و حمایت اسلام فرانسه قرالرینه قدر متوسع اولدینی
ایچون شارلکنک بوتون قوای انفعالیه و عامله سی شو بر آوج
مغربیلرک ، بربریلرک علیهنه چورلمش دی . بوکا قارشیده ،
صانکه : تصادف و طالع شرقده اسلامیتی اهل صلیدن قوروین
قوجه تورکلرک بر آوجنی شیمدی غرب اهل صلیبنه ممانعت
ایچون مغربه یوللامشدی ! اوروج رئیسک یکانه قباحتی

— دشمنلرينك ديدىكى كېي — شيخ سالمك قتلى ايسه ، امين اولديغىمىز وجهله، منافع اسلاميه يى هر صورتله مدافعه دن عاجز بر مختصر بدوينك سلامت عموميه نامنه و محضا فساد داخلى يى منع ايچون ازاله سى ياوزلرك يكرمى يى متجاوز قردشلىنى قتلنه معرض اولان تاريخمىزده پك قىرمىزى بر سطر طوماسه كى كدر. ديدىكمىز كېي جزاير متفندانى بارباروسلرى دعوت ايتدىكلرىنه پشيمان اولمش ايدىلر؛ اودرجه ده كه: مال و ناموسلرىنك دشمنى اولان و جزاير ليمانك عاداتا طپاسى كېي دوران اطه قلعه سى اسپانيوللرى ايله خفيا بارباروسلرى محو و ازاله ايچون عهد ايتدىلر. توركلرك طورى نه قدر خشين اولورسه اولسون ، عجباً اسپانيول قلنجندن دهامى سرت ايدى ! يوقسه توركلرك ايچنده ، بر كون كلوب قارى يه ، قىزه صاتاشه حق اسپانيول دلقانلىلرى قدر ياقيشيقلىمى اكسىكدى ؟

مع مافيه: اوروجك شاهين كوزى سطح رياكارىنك آلتنده دالغى لانان بو فتنه و خيانت كردانى كورمه مش دكلدى ... بر جمعه كونى ايدى، هر كس جامعه كلدىلر، بوتون وجوه واعيان موجود ايدى و هپسى توركلرى حالا غافل صانيورلردى. نماز ختام بولور بولماز بارباروسه نك ترتيبى وجهله قورصانلر ايلرى فيرلايه رق قايللىرى قابانمش اولان جامعه ده رؤساي فسادى ، وديعه اسلاف اولان ممالكى كيفلىرى حسابنه دشمنله پايلاشمى

کوزه آلمش بوسفلیتپروران سفاهتی یاقالادیلر ، بزه ، تورکلره هر زمان برغرابت ، تحفلق عطف ایتک مراقنده اولان اوروپا مورخلرینک سوزینه باقیلیرسه «همان باشلرندن چوزدکلری صارقلریله باغلادیلر !» خیاتی و اسلام علیهنده بلاحق کفارله اتحادی ثابت اونلر جامعک اولیسنده سیاست اولندی وبوکورلتی برمدت فانیه ایچون کچدی .. حالبوکه : خیرالدین بارباروسه نیک بیاتنه نظراً مسئله بویله قیصه جه یتیمه مش ایدی ؛ و جزایر لیلرک (جزایر لیلرک دکل) بربرستانی او درکء ذلت و خرابی به آتان آچاق رؤسای حکومت و متنفذان اغنیانک فسادی یالکز آطه قلعه سنده کی اسپانیول شردمه قلیله سیله اتحاد و اتفاق ایله بتمش دکلدی ؛ بو معامله خصمانه نیک اجراسی وتورکلرک ، « بونردن کلدیکی ، هانکی دلیکدن چیقدیغی غریبلیره مجهول بلانک » دیار مغربدن کلیا طردی مسئله سی اسپانیا حکومتیله قونوشولش حتی اسپانیاده براهل صلیب صورتنده تلقی ایدلمشدی نه غریبدر ، که : جزایر خطه سنک اقوام اسلامیه سی ده رئیساری تحت تشویقنده وعین زمانده دشمن عمومی (؟) یه قارش بولش مق اوزره جزایر اوزرینه یورودیلر . یالکز برخطا وار ایدی ، عربلر ، جزایره متفقلری اسپانیوللردن اول واصل اولمشردی ؛ بالطبع بوخصوص بارباروسه یی آنلره تطبیق لازم کلن معامله جزائیه نیک اجرا سندن کری قویمادی . رئیس حربک سمندری وصنعت اوله رق

عهدایله حربی قبول ایتمش بر قاج بیك تورك اری و همشیره سنی،
 بیاض صاحلی پدرینی اسپانیول قوجاغنده، دشمن اوجاغنده
 ترك ایله مش بر آوج فلاکتزده اندلس مهاجری ایله بونلرك
 اوسته هجوم ایتمدی؛ حقیقه قانی وجداً شانی بر غوغانك داستان
 شرفی توركلرك کینیش آغزلی یتاغلرینه یازیلیرکن دشمن منفعتنه
 دینداشنه هجوم ایدن بر برستان اردوسی توركلره - کویا کفارت
 ذنوب کبی - اون ایکی بیك دوه یی ده غنیمت حرب براقه رق
 قاقچقده ایدیلر!.. توركلر هنوز سلاخلرینی سیلمه مش واللرینك
 قاتی بیقامامش ایدیلرکه: متفقدردن اكمدهشی اولان اسپانیوللر
 کلوب چاتدی! بوقوت قرق پاره چکدیریر (یعنی قدرغه و امثالی
 کورك قوللانان سفائن حربیه) ایله یوز قرق عدد پارچه (بارقو
 یعنی شیمدیکی نقلیه) (ترانسپورت) دن عبارت و اون بش بیك
 منتخب اسپانیول محاربینی حامل ایدی. نه اولورسه اولسون
 و نه قدر چوق بولنورسه بولسون بو عسکرله بوغوشمق
 یورغون توركلره ده ها خوش کلیوردی. چونکه دوکیله جك
 قردش قانی، قیریله جق اسلام قانتچی دکلدی؛ و بونك ایچون
 ایدی، که: بویکیتلر آناطولینك جنت قییلردن و آنا، بابانك،
 قردش و نشانلینك صیجاق قانندن و انسانی هر تشبیدن کری
 براقان کری کله مک دوشونجه سندن آریلوب ککشلردی!
 بواسپانیا قوه استیلائییه سنك سوقنه باشینجه اسلاملرك عهدلی

دشمنی اولان قاردینال «اکسیمن» Ximenes سبب اولمش
 و قوماندان اوله رقده دون «دیه‌غو - ده - ورا» Diego de
 vera تعیین ایدلمشدی. شوراسی ده نظردن بعید اولما لیدرکه:
 بوقوتی بزی هر خصوصده کوچوک دوشورمکه چالیشان اجنبی
 مورخلری بیه Great Armada یعنی غایت جسم بر دونما
 قیدیه ذکر ایله یورلر.

اسپانیوللر کلدیلر. وقلعه دن بر مقدار اوزاق محله عسکر
 و طوپ چیقارارق جزایری کرک هجوم و کرک محاصره ایله
 ضبطه اوغراشمغه باشلادیلر. عسکر صوک حرب ایله یورغون
 جزایر قلعه سی ایسه اولکی صاحب لری نك بنای حمیت وایمانی کبی
 خراب ایدی. اوروجك دست اعجاز کستری هنوز بو برجلره
 سورولمه مش، مفاصد داخلیه نك تسکینی ایله اوغراشمق بلاسندن
 خارجه قارشى تأمین سلامته ید غیرت ایریشمه مشدی. اوروج
 عربلرک صوک فرقه فراریسنى تعقیبه قوشمش یولداش لری نه قاوشادن
 اوزمان عالم خرس تیانی نك حقیقه اک بهادر عنصر محاربى اولان
 مغرور و قهرمان اسپانیوللر قلعه یه هجوم ایتدیلر، و مظفریت
 باندیرالری برجه دیکدیلر. بارباروس اوکنده کی اسلام دشمنندن
 دو تنجه آردینده بو حالى کوردی؛ و «تحفة الکبار» ک دیدیکی
 کبی «غازیلری کفار اوزرینه سوروب عظیم جنک ایله دی.
 بعون الله غالب کلوب کفارک بایراغنى ایندیردی ...»

دشمن شیمدی نامردجه قاجیوردی ، تورکلر حسن
 نیتلرینه رغماً برفاتحه غفرانه نائل اوله مایه حق شهیدلرینی یاقیجی
 کونش آلتنده هنوز ترك ایلدکلی بومشئوم طوپراق اوزرنده
 اسپانیولاری حرص و شادانی احتراص ایله کیلرینه قدر قوغلا
 لادیلر. کلبانک مظفریت دیلده و عثمانلیغک اومهیب یتاغانی الده !
 اواقشام اسپانیانک قرهیه چیقان اونیش بیک متکبر، مشبوع
 آمال ، زرهبوش محاربندن انحق بیک قدری کیلرینه جان
 آتیه یلمش و بونلر ناموسلرینی دکسه ده ، هیچ اولمازسه جانلرینی
 قورتارمش ایدیلر !

انکلیز مورخی (لهین - پول) دیورکه :

« کویا فلاکتی اتمام ایتمک ایسترکی ، اواننده ظهور ایدن
 شدید برفوطنه بوتون کیلری ده قرهیه آتدی. و بو وجهله اسپا
 نیانک کوندردیکی بوتون اردو و دونما محو اولوب کیتدی. »
 بووقعه یی تعریفی متعاقب بارباروس قردشلرک آوروپاچه
 طرز تلقیلرینی کوز اوکنه کتیره لم ؛ و بونک ایچون تکرار
 (لهین - پول) ه مراجعت ایدلم ،

« آرقه سنده کی قوت تعلیمات منتظمه عسکریه کورمه مش
 بر طاقم حیدودلردن عبارت اولان اوروچ کبی برسر سرینک
 اوزمان جهانک اک منتظم و مکمل اردوسی اولان اسپانیا
 عسکرینی بویله پریشان ایدیویرمه سی بوتون حکومات خرسیتلا

نيه نك اندیشه سنی موجب اولمش ایدی ... و بر زمان یگانه
مالکانه سی ساحلده بر قوتلی حصار اولان قورصان شیمدی
عادتا مغرب الوسطی سلطانی بولنیوردی .

بو مظفریت دن صکره اوروج رئیس قردشی خضر بکه
(خیرالدین) - که بو کورولتیلر ائناسنده تونس جهتده اداره
و محافظه حکومتله اوغراشیوردی - خبر کوندره رک (جیجیل)ک
بودفعه جداً جزیه کذار بر مملکت اولماسنی و اسپانیوللره
ویردکلی مقدار خراجک کندیلرینه ویرلمه سی لازم کله جکنی
اعلام ایتمش ، بارباروس خیرالدین ده قردشنک و قومانداننک
امرینه تبعیتله شیخ البلدی طوتوب بواشی بجرمشدر .

[جیجیل ایچون بو بیاناتمزدن جزایردن صوکره ضبط
اولنش حکمی چیقار ، آروپا تاریخلری ایسه ایکنجی بحایه
سفرندن صوکره جیجیل اهالیسنک بارباروسه یی حکمدار قبول
ایله دکلیری یازیور ، بزاکی قول تاریخی یی درمیان ایتمکه برابر
اصل حقیقته مطلع اوله مادیق .]

محاربه سابقه یی متعاقب (تنس) حکمداری بوتون جوار
بربرستان اهالیسنی بارباروسه لرک علینه قالدیرمش ایدی .
ومهیّب ومعظم بر قوت جزایر اوزرینه ییقیلوب کلیوردی .
اوروج بوقوه مهیه یی قلعه ده بکه مکه تنزل ایتهدی . کوکنه
بیلدیکی یالکز بیک تورک قورصانی وبشیوز انداس ملتجیسی

ایله چیقوب اوزرلرینه یورودی . یانلرنده تڭ بر طوپ دخی
یوقایدی . لکن دشمنک برباشندن کیروب اوبرباشندن چیقدیله ،
حتی (تنس) شهرینه قدر تعقیب ایتدیله [۱] .

تحفة الکبارده بو وقعنه تڭ تنس حکمدارینک برادری
اسپانیاه عزیمت و اورادن آلدیغی امدادایله کلوب اسپانیوللر
ایله شهری تسخیر ایله می و اهالینک بارباروسلردن واقع
اولان استمدادی اوزرینه ظهور ایله دیکی یازلمشدر ؛ حتی
بو استمدادینه مبنی بارباروس خیرالدین (تنس) ه کیتمش
کندیسنی کورن اسپانیوللر کیلرینی براقوب قلعه یه کیرمش
اولدقلمردن بارباروس خیرالدین بوتون کیلری ضبط
ایله دکدن صوکره ساحله عسکر دوکوب حصاوی ده تحت
محاصره یه آلمشدر . حصار بارباروسه یه انجق ایکی اوچ
کون دایانه ییلوب استیمان ایله مش واسپانیوللر شرائط تسلیمیه
موجبنجه چیقوب مملکتلرینه کیتمشلردی . بنی حفص اوغلی
(تنس پرنسی) ایسه خیرالدین بک ایله بولوشمغه جسارتی
اولمادیغندن داخله دوغرو چکیلش ایدی . خیرالدین رئیس
فتوحات جدیدنه تڭ بخش ایله دیکی بر چوق غنیمتله ایله یوکللی
اوله رق آرتق جزایره کلدی . اجنبی تاریخلری بوتنس حادثه سنی
(۱۵۱۷) ده کوستریورلر . اوروج ایله خضر (خیرالدین)

شیمدی جدی برمذا کره ایچون برلشمش ایدیلر؛ حال حاضرده کندیلرینه غلبه ایده جک دشمن قلامش ایدی؛ مع مافیہ الہ بولنان ممالک حسن محافظہ یه احتیاج کوستره جک مرتبه وسعت بولمش، عادتامهم برحکومت ترتیبائی قبول ایله مک لازم کلشدی. حال شانلی؛ لکن استقبال اوشان ایله متناسب برغیرتی، تیقطی، دور اندیشلکی داعی ایدی. یوقاریده اسپانیولرک [دون دیه غو - دو - وار] قومانداسنده کی اردو ودونمالرینک اضمحلانندن بحث ایتمش ایدک، بونک مقابله بالثلث اولمق اوزره قورداوغلی مصلح الدین وسائره کی رئیس لر آق دکزی چالقالایورلر، آوروپا سواحلی یاقوب یقیورلردی. لهین - پول بو خالدن بحث ایدرکن دیورکه: «چوق وندیک، جنوه وناپولی تجارلری اصلا کله یه جک کمیلرینی بکله یه بکلیه کوز قارارتمش لردی.» اوروج بو وجهله دال بوداق صالیویرن امور حکومتی بارباروس خیرالدین ایله پایلاشدی، بو حسابه کوره بارباروس خیرالدین جزایرک جهت شرقیه سنه واوروج بارباروسه جهت غربیه سنه حکم ایله یه جک ایدی. ایکی قردش حقیقه تبعه پرورانه دینیه جک بر همتله تحت اداره لرینه کچن مواقعک نفوسنی، محتویات معموریتنی، عدد قرا وقصباتی یازدی لر، اجرای حکومته باشلا دیلر.

« تلمسان » نك فتیحي

ساحلدن ایجه ایچرده اولان تلمسان شهرى بویوک برخطه نك
 وتعییر جائز ایسه تلمسان سلطانلغنى مقرى اولمقله برابر [۱]
 اسکله سی اولان اوران بلده سنك [۲] صاحبی وفاتحی اسپانیوللره
 عادتاً تابع بولئیور . واسپانیا قرالیتنه سنوی معین بر ویرکی
 ویریوردی ؛ باشقه بریرده دیدیکمز کی بوسلطان فخامت عنوان
 فردینانده ، شارلکنه ویردیکی خراجی نفسنه کران کورمه مش
 ایکن بارباروسه لرك جزایرده تحکم واستقرارینی کویا برات
 ازلی وابدیله کندیسنه ویرلش شان سلطنته ، اندیشه جانه
 منافی عدایله مش ایدی . بوکا علاوه تاً بارباروس خیرالدین ایله
 اوروج رئیس جزایر خطه سندن اسپانیوللری سوروب چیقار مشلر
 واسلام چوجقلری اسپانیول طفره فروشلغندن بشیکنده راحت
 اویویاماز ایکن آنلر شیمدی اسپانیا دکزلرینی ده اسپانیوللره
 دارایله مش بولند قتلرندن (عوران - هران) ، بجایه وجزایرک

[۱] کل رئیس و بابا اوروج نام اثر عاجزی به مراجعت .

[۲] اليوم آوروپالیرک Oran (اوران - عوران) صورتنده
 یازدقلری ویزمه یلمه یلرک اویله ترجمه ایتدی کمز بوشهرک اصل نای
 (هران) در .

اطه قلعه سی Penon D'alger قوماندانلری هر آن مرکز
حکومتلرینه یارین ویا اوبرکون کندیلرینک ده قوغوله جقلرینی
ونه اولورسه اولسون بوبلالی تورکلرک دیار مغربدن سورولمه سی
لازم کلدیکنی اعلامده مصر قالمشایدی. بویکی منفعت متقابله
تلسان بکی ایله اسپانیایی بر معاهده عقدینه سوق ایتدی. اسپانیا
قوتلی بردونمایه ترفیقاً بویوک بر اردو کوندرده جک ، تلسان
حاکمی ایله سائر غیر ممنون رؤسای قبائل دخی برأ بارباروسلر
علیهنه یورویه جک ایدیلر . بو ترتیباتک قوه دن فعله چبقماسنه
الکزیاده خدمت ایدن؛ چالیشانده هنوز اسپانیوللر النده بولنان
(هران) قلعه سی قوماندانی مارکی ده غومار اولوب نفوذ
محاکماتی بالذات شارلکنه قدر احساس واسماع ایله مش ایدی.
دیگر جهتدن بو درجه شموللی وبویوک بر حرکت
خصمانه نک اماراتی بارباروس قردش لرجه محسوس ومشهود
اولماق همان غیر ممکن ایدی . بالعکس : اوروج ایله خیرالدین
بو وقایعه ده اولدن منتظر ایدیلر وبو اخلاقمنز، تفسخ ایتش
بر بریه سلسله حکمدارانندن سلامت وعظمت اسلامیه یه
موافق ، خادم اولماق شرطیله هرشی بکله نیله بیلیردی .

اوروج رئیس ، اسحق رئیس خیرالدین رئیس بو اوج
قردش قونوشدیلر. اوروج کندینه خاص بر حرکت کوسترمک
ایسته دی ؛ اوموقعنده تحفظ ایتک وار ایکن دشمنی قلمندن

اورمق ایسته یور، وطالعی دائما کندیمه رام ایدرم خلیاسنده
 کزیوردی . . . تلسان خلقی چوقدن بری اسلامیتک چکیدی
 ربقه ذلتن یورغون، اندلس مظالمی حکایاتی، شواهدیله
 مشبوع تأثروبر اسلام امیرینک مجاور خرسیان حکومتیله
 اتفاقنک زمان ومکانجه معناسندن بوتون نکاتیه خیراولدقلری
 ایچون سلطانلرندن اک درین برنفرته آیرلمشله، حتی علمای
 اسلام قتلنک لازم کلدیکنه قتوی ویرمشلردی. اوروج رئیس
 معیتنه آلدینی، لکن کوکندیکی کوچوک برتورک قوتیله تلسان
 اوزرینه یورودیکی وقت تلسان سلطانی قاجش، اهالی کمال
 خواهش وسرور ایله قورصانه بیعت ایله مش ایدی. تلسان
 سلطانی بالطبع اسپانیانک معاونت دوستانه سنه (!) ملتجی اولمش
 ایدی: بو ائنده سلطانک زمان حکومتنده محبوس اولان
 برادری ده آزاد ایدیلوب فاس جهتنه دوغرو یول آلدی . . .
 لکن کرک اسپانیوللر، کرک سلطان طرفدارلری بارباروسه نیک
 بو جسورانه ضربه سنه قارشى همتی دوبالا ایتشلردی .

هران قوماندانی تجربه لی «مارکی دوغومار» شارلکنه
 باغیریوردی: وقت بووقت !

بو اثرمزده بارباروسه لک سرگذشتنک اک شانلی وقائی
 صحائفندن اولان شو صحنه یی تصویره احتیاج کورمه یورز ؛
 چونکه باشقه بر اثرمزده - که اوروج نامه محرردر - اوتفصیلات

خونین کوریلہ بیلیر۔ اسحق رئیس «قلعة القلاع» ده شهید اولدقن واوروج، او قهرمان اوروج تلسانی عادتاً اینانیلما یه جق یکتیلکلر ایله قرق بیك عرب و اسپانیوله قارشى مدافعه ایدرك نهایت الكشانلى اولومله رحمت رحمانه کوچد کدن صوکره یغنى بودرت قردشدن اوچی شهید اولنجه خیرالدین بارباروسه ایله یوز یوزمه قالپورز. قولاقلمزده ایسه خیرالدین بارباروسه نك شونداى مهیى چینلایور :

«آه، بوتون فرنکستانى قلنجدن کچیرسه م قردشلمله یولداشلمك انتقامنى آله مام !» .

بن اولوحه غرای قهرمانى اوزرنده، (که برقاچ لسانده مصادقم اولمشدر) چوق دفعه لر دوردم و بوتون موجودیت مردانه و ملیه مى صارصان برهیجان ایله کوزمدن یاش دوکدم: شیمدی بوراده، رجا ایدرم که، راجنبی محررینک کیمسه نك حتی ماتنک طانیادیغی بوقورصانک، تورک اوروجک حقنده کی سطرلرینی نقل ایتمک لکم معیوب اولماسین :

لهین - پول اک موثوق تاریخنویسلردن نقل ایله و شهه سز اوروجک اولومنک هر مرد و جسور انسانه بخش ایتدیکی، بخش ایتمه سی لازم کلدیکی جوشانیء حسیات، عطشانیء اشتراك ایله دیورکه :

«اوروج اثنای رجعتنده یاننده کی اموال قیمتدارى، یاغما کر

و حریص اسپانیوللرک قابشمنغه، پایلاشمغه باشلا یه رق تعقیبلرنده
 تاخرلری ایچون، ترک ایله یوردی. لکن ایشی بیلان مارکی
 دوغومار هر شیئی آیاق آلتنه آلدی و قورصانه یتشدی. تورکلر
 ایکی ساحلی دیک و صارپ اولان برنهره یتشمشاردی و اورای
 کچسهر قورتیلمش ایدیلر. حتی اوروج بارباروسه معیتک
 نصفی ایله سلامت یاقه سنه کچمش ایدی. لکن دیکر ساحلده
 قالان وطنداشلرینک کلوب چاتمش دشمن عمر مرمه مقابل
 اولمالری اثناسنده آتدقلری نعره لر اوروجک قولاغنه کلدی.
 قورصان، بویله وقتده یولداشلرینی براقه حق آدم دکلدی و بلا
 تردد اومشئوم نهری تکرار کچدی، کندینی غوغانک ایچنه
 آتدی. بوخون آلود میدان حربدن احتمال تک برتورک بیه
 قورتیلما مشدر! درت طرفه، کندیلرینی احاطه ایدن دشمنلرینه
 قارشى صره ایله دونه رک بویکیتلر یاره لرله حالسز قالوب ییقینجه یه
 قدر دوکوشدیلر؛ و بوتون بونلرک آره سنده بارباروسه نك
 قوتلی وجودینک، اک نهایته قدر، تک قولیله بر آرسلان کبی
 اوغراشدینی وهپ اطرافنده کیلری یره سر دیکی کوریلیرنی..»
 قاره، بوقهرمانک مزارى شیمدی یوق؛ لکن اونى وقهرمان
 معیتى عثمانلى کوکلک، تورک قلبک بر مقبره احترام بنیاد صور-
 تنده مؤبدأ استیعاب ایتسین!

خرستیانلره ایراث ایله دیکي ضرر سوزایله تعریف اولنه مایه حق
قدر چو قدر ...» [۱]

عثمانلی دوئلماسنده بارباروس خیرالدین

کمال بک «خداوندکار اولدی، لکن یلدریم پادشاه اولدی.»
دیدیکي کبی اوروج بارباروسه شهید اولمش، لکن : بارباروس
خیرالدین صاغ قالمش ایدی ! اوروج ، طالع حربک (معرکه)
چکاچاکک بوجانی قانی حلال، پرواسز، جوشدینی ایشه قوشان
چوجنی، هر ملتک سودیکي بو قیدسز عسکر) اولمش و اولور
اولمز، کندی وجودینک تأسیس ایلیدیکي بوتون قوت و حکومت
محو اولیوریه جک ظن ایدلمشدی. هر کسک فکرینه نظراً اسپانیا
اردوسی و بربریه اقوامی مارکی دوغومار ایله تلسان سلطانک
تحت قومانداسنده جزایره یورویه جک، باربارس خیرالدین ایله
بوتون بوبلا تورکلری مغرب زمیندن سیلوب سوپوره جکدی.

[۱] اوروجک کرک قرق درت یاشنده وفات ایتش اولماسی، کرک
بربرستانده اون درت سنه بولماسی خطادر. اوروج الی یاشنی متجاوز
شهید اولدینی کبی مغربده نخچی پیری رئیسک بیاناتندن مستبان اوله جفی
وجهله یکریمی بش سنه قدر بولنمشد. بوخصوصه عائد مطالعات متفنده
موجوددر.

حالبوکه: یاغماجی قبائل برطرف، جداً بجد عسکر اولان مارکی
دوغوماریله بیگ قدر تورکی احما یولنده باشنه کلن مغلوبیتلردن،
اردوسنه ماتم طوتدیران تلفاتدن او درجه ییلمش ایدی، که
اوروجی محو ایتدکدن صوکره باقی قالان قواسی ایله جزایر
اوزرینه یورومه نیک دلیلک اولدیغنه قانع اولدی. جزایر اسپانیولر
ایچون ارسلان یواسی ایدی؛ همده یولداشنی غائب ایتمش
برارسلانک!

بارباروس خیرالدین مهیجانه یوقاریده سویله دیکمز کبی
باغیریرکن، معیتده کی تورکلر سلاحرینه یمین ایدهرک صانکه
سیدعلی رئیسک دیدیکی کبی:

«دکز اوستنده یوروروز.

دشمنی آرار بولوروز

أوجمز قوماز، آلیرز

بزه خیرالدینی دیرلر!..»

تورکیسنی چاغریور و آق دکز کبی حدت وانتقام فورطنه سیاه
دالغه لانان آسلان یورکلری برنشیده تاریخیه مز، برونیقه شعر
انکیز ملیتمز اولان:

«اوکونسون دشمن اوکونسون اکر قالیرسه یاننه!»

مصراعيله اورو یوردی!

اوت، قهرمان اوروج هرعضوی دشمن چلیکله یوز

پارچه ارلهرق اولمشدی ، لکن آنک کسوة ریاست و حتی
دها آز بلند براوموزه قونامشدی . . . خیرالدین مغربده کی
قورصانلرک رئیس و صاحبی اولدی . فی الحقیقه مرحوم
آغاسی شجاعت و بهادرلقده ، کیمسه نك باشه چیقارده مایه جفی
ایشلره باشی صومقده عصرینک فریدی ایدی . خصوصیه
برفدائی فرقه سنک باشه یالین قلنج کچوب هجومه سوق ایتمکده ،
کوچوک برتکنه ایله داغ کی برقالیونه آبورده اولوب بریا ناغانه
کوکرته سنه آتلامقده و یاخود سز : « ایشته شیمدی یاقالادم ! »
دیه جک قدر مظفريتکزه امین ایکن او سزى یاقالامقده مثلی
یوق ایدی [۱]

لکن شیمدی باشلی باشه اسلامک جهان اعتلاسنی ادامه یه
مأموراً قالمش اولان خضر رئیس (خیرالدین) عین شجاعته ،
عین متانت قرار و افکاره صاحب اولقله برابر بردهای سیاسی
برسیاست دور اندیشی ایله ده موهبه دار اولمش ایدی . ایشته
بومزیات مشارالیهی آغاسنک یابدقارندن ده جسونانه دکسه ده
نتیجتاً ده شموللی روللر ایفاسنه سوق ایله مشدر . براوروپالی
دیور ، که « بارباروس خیرالدین کندیسنى ، قازانیله جق مقصدک
اهمیتی نسبتده تهلکه یه عرض ایدردی . بوتون حیاتنده لزومسز
اولهرق کندیسنى اصلاً مغلوبیت تهلکه سنه آتمامشدر ؛ لکن

اوکنده کی یولی کندیسسی ایچون سالم کورنجه جهانده هیچ
بر کیمسه انک قدر شدید و یاخود یرینه معطوف بر ضربه
اورده مازدی ...»

بارباروس خیرالدینک یالکز قالنجه ایلک مهم اجرا آتی
در سعادتہ بر سفیر کوندروب فتح ایله دکلری ممالکک انختارلرینی
خاکبای خلافتہ عرض ایله مک اولمشدر.

بو معروضات بالطبع لازم کلدیکی صورتده قبول اولندی؛
ذاتاً بارباروس قردش لک آوازہ شان و شرفی، داستان مفاخری
عثمانلی حکومتجه، عثمانلی پادشاهلرنجه مجهول دکلدی. هر
غزای مهمدن صوکره اوروج رئیس مقام خلافتہ نشانه ظفرینی
کوندیر و اوزمانکی سیاست حکومتک مساعدده سی نسبتده
التفات کوروردی. حتی سلطان سلیمک مصری تمامیه فتح
ایتمه سنی متعاقب قورد اوغلی مصلح الدین رئیس اسکندریه
ویاوزه احوال مغربی، تورکلرک اورالرده کی مجاهداتی اکلاته رق
فتح میننی تبریک ایله مش ایدی.

سلطان سلیمده صوک سنه حیاتنده آلدینی بوتحفه جهاده
مقابل - بالخاصه مصر فتحنه بر مابعد خیر اولدیغندن - ملتفتانه
جواب ویرمش ایدی.

مع مافیه خیرالدین رئیسک عثمانلی تاریخی ایله دوغروندن
دوغرویه علاقه دار اوله بیلمه سی ایچون برقاج سنه لردها، خصوص

صیله حرب و ضرب ایله ملو برقاق اوزون سنه لر ده کچیرمکه
مجبور اولورز.

اوروج رئیسك شهادتی متعاقب دون آوارو و تلسان
حکمداری جزایره هجومه اسباب مسروده یوزندن جسارتیاب
اوله مامش ایدی؛ لکن ایلک بهارک حلولنده بوتورک قورصانلری
ایشنی سرعتله بیترمک اوزره اسپانیالیرله عربلر متفقاً حرکت
ابتدار ایتدیلر.

مع مافیہ بوتون عمری بر جهاد متہادیدن عبارت اولان
خیرالدین رئیس کچن سنه اسپانیوللرک و متفقلرینک ایراث
ایلدکلری خساری تضمیندن کری دورمامش ایدی. بتون
سواحل بوینده کی شرشل، ملیانه، تنس کبی قلعه لره محافظ
آتش، حتی ایجری قبائل ایله اتفاقلر عقد اولنش ایدی.
(۱۵۱۹ میلاد).

اسپانیول آرماداسی یوز یتمش بش کمی ویکرمی بیك
مغرب اسپانیول محاربنی حاملاً بالخاصه تلسان بکنک موجودیت
متفقہ سنه کوکنه رک (هران) یعنی عوران اوزرینه ییقیلوب
کلدی و بوراده کی دوت بیك خرسستیانی ده آله رق جزایره
یورودیلر.

بارباروس خیرالدین شیمدی مشکل بر موقعده بولنیوردی،
عادتاً بر اغل صلیب دیمک اولان بوقوه واردۀ مہیہ یه قارشی

بارباروس غلبه ايله جهنگندن امين دكلدى ، بو محاربلىكى ، شواليه لى وعهده وفاسى ، ناموسه اعتبارى (!) ذاتاً معلوم اولان آوروپا عسكرينك نتيجه حرب اوله رق شهره دخوللرى تقديرنده زواللى عرب قادينلرى سرخوش ومغرور مظفرلك برينك قوجا غندن ديكرينك قوجا غنه دولاشديريله جقدى . بوندن باشقه جزاير اهاليسندن ، بو ذوق وسفاهت يولنده ذاتاً استقلال ميليرينى ، عزت دينه لرينى محافظه يي اونوتمش غلبه لكدن فدا ئيلك ايسته مك وبويله بر مهم آنده يارديم بكه مك كار عاقل عد اولنه مازدى ؛ بناءً عليه : جوانمرد كوكللى ، تورك طبيعتلى خيرالدين رئيس اهالى يي جمع ايتدى ، آچيق برلسان ، آچيق برقاب ايله تهلكه يي آكلاتدى .

ديوردى كه : نصرت الله ندر ، مع مافيه اهل صليب چوق قوتلى ، بورايه حرباً ويا صالحاً كيررلرسه چولوق چوجق پايمال اولور ؛ اهل صليب ايله متفق اولان تلسان سلطانى ايسه ، نه اولسه اسلامدر ، سزه آجير ، آنك ايچون شيمدى چيقوب كنديسنه مراجعت ايدك ، متفقلرندن سزى قوروسون . بزه (يعنى توركلره) كلنجه اولونجه يه قدر قلعه يي مدافعه ايده جكز قسمت نه ايسه او ، اولور . .»

فى الحقيقه اهالى چولوق چوجق شهردن چيقوب مهاجرل اردو كا هنده تلسان حكمدارينه مراجعت ايتدكلرى زمان احتمال

عمر نده بر کره جک ارلسون حس ایتدیکی حجاب سوقیه مومی الیه اسپانیا قوماندانه بوزوالیلره دو قونما سنی استرحام ایتش و مقصدینه نائل اولمشدی. دیگر طرفدن بارباروس خیرالدین انجق آلتیوز قدر یاننده قالمش تورکلر [۱] ه علاوه بو بهادرلق امتحاننده کندیسنه یاردم ایله یه جک یکر می بیکه یقین داخلی عرب قباثلندن متفقلره مالک ایدی.

خرستیان و اسلام متفقلر کیمی قره دن، کیمی دکزدن جزیره یاقلاشدیلر، اسپانیول دونماسی اوچان باندیرالری، پارلایان زرهلر، مظفریته دعاچی، اسلاملره، بالخاصه تورکلره لغتخوان رهبان و محاربی ایله مالامال کلوب ساحله دمیرله دی. طوب و عسکر چیقارلدی. قوماندان خیرالدین رئیسسه اولان قلعه نك تسلیمینی تکلیف ایتدی؛ بالطبع آلدیغی جوابی تکراره حاجت یوق. تورک، ایاغی برقلعه یه کیردیکی وقت ویالین بیجاغه دایانجه آنجق تابوتله چیقاییلیدی! آلتیوز تورک آلتیوز اردو حالنده سلسله سنک صوک قلیجدن آرته قالانی اولان حضر رئیسک (خیرالدین) اطرافنده قورد کبی دورویور، و اهالی ساحلیه کبی اخلاقی بوزولمه مش و براسلام، عرب حکمدارینک اسپانیولر ایله اتفاقدن صوک درجه انفعال ایله مش اولان

قبائل داخلیه نك كوندردیكى قوه امدادیه بونلره منضم بولنیوردی .

اهل صلیب قلعه یه هجوم ایدنجه ، دوروب مدافعه یه تنزل ایتمین بارباروس برتهور جنکوران ایله مهاجملر اوزرینه آتدی . ضایعات عظیمه ایله کونك اسپانیولار ایچون برهزیمته منجر اولماسنی تأمین ایتدی . بوايلك کونكى حرب تورکلرجه اودرجه قطعی برمقیاسده یورودلش ایدی که :

قوه مهاجمه ساحلده کی مواضعنی بیله محافظه و مدافعه ایدمه مش ، کاتب چلینك دیدیکی کبی کیلرینه قدر تورك چلینك کسکین و آغر آغزینی صیرتنده ، اکسه سنده حس ایله یه رك قاقچشدی . آمیرال Don Hugo de Moncada (دون هوغو دو مونقادا) بودرسدن متنبه اولمادی . فی الحقیقه بوجانم جزایرده اویله اون بیکلرجه عسکرله آلفه کلندکدن صکره بریورغونلق بهاسنه براقیلماز ایدی و بالخاصه خضر رئیسده اوروج مرحومك یاننه کوندرمك ایچون عهد ایله ین خرستیان سلاحشورلری آوروپایه نه یوزله دونه ییلرلردی ؟ ایکنجی و اوچنچی کون تجربه تکرار اولندی ، لکن مهاجملرده آرتق ییچاق کیمکه دایانمش ایدی . اقشام اوستی بقیه السیوف اولان بش آلتی بیک خرستیان کیلرینه بینه رك و کتیردکلری محاصره طوپلرینك برقسمنی بیک مشکلات ایله چکه رك طریق فراری طوتدیلر .

عثمانی تاریخ‌نویس تفسیلات بومرتبه‌ده قلمش ؛ مع مافیه
(له‌ین - بول) دیورکه :

« بوسوا حله خاص اولان اومدهش فورظنه‌لردن بری
فراری دونمائی یاقالادی و تورک چلیکنک باشلادیغی ایشی
آتام ایتدی ! »

بارباروس اوردیغی ضربه‌نک نتیجه‌سنی استحصالدن کری
دوران برآدم دکلدی ، همان حسن بك اسمنده‌کی سردارینه
ایکی بیک بشیوز کیشیک بر قوت ویره‌رک تلمسان اوزرینه
کوندردی . بوقوت تلمسانه واصل اولنجه‌یه قدر التحاق ایدن
عربان ایله یکریمی بیکه بالغ اولمش ایدی . تلمسان امیری بو حاله
قارشلی فراردن بشقه چاره بوله‌مادی ؛ حسن بك تلمسانی ضبط
ایتدی . قلعه داخلنده‌کی اوچ بیک یدی یوز اسپانیول محاربندن
آنحقی یدی یوزی قورتیلوب اوچ بیکی قلنجدن کچدی ؛
بویدی یوز کیشی ده « قاجانک آناسی آغلاماش » ترانه‌سیله
نفس توکته‌رک (تنس) قلعه‌سنه التجا ایله مش‌لردی . قیش
حلول ایتشدی ؛ بهارده خیرالدین بك اسپانیوللری (تنس) دن
دخی سوروب چیقارمغه تشبث ایتدی ؛ حالبوکه : تنسک -
اسپانیول قوماندانی چوقدن بری مملکتندن استمداد ایدوب
دورو یوردی ؛ عسکر آلات حرب ایله مالی اولان اون پارچه
(جسیم نقلیه سفائی) بو استمداده جواب اوله‌رق تنسه یتشدی

ایسه‌ده اون سکز چکدیرمه ایله کلن باربارس خیرالدین هم
 حصاری حرباً فتح ایله مش، هم‌ده بوپارچه‌لردن بشنی ضبط
 ایدوب بشی کوچ حال ایله قورتلشیدی. بوایش بیتدکن
 صوکره خیرالدین رئیس جزایره عودت ایله مش ایدی؛
 بوسنه جهادک نامه و قایعنده ده‌ا چوق قانی شیلر بولنق مقرر
 ایدی. تنس فتحی متعاقب امیرال (فردیناند) ک تحت قوماند-
 سنده اولان یوز اون قطعه‌لق بر اسپانیول دونم‌اسی بغته
 ودوغرودن دوغرویه جزایره هجوم ایتدی. بارباروس
 خیرالدین قانی و شانلی بر Couter-attack یعنی مقابل هجوم
 ایله بونلری فنا حالد بوزدی. بواننده آمیرال سفینه‌سی قوم‌ساله
 اوطورمش و ایچنده کی ضابطان ایله آلتیوز مرتبی قره‌یه
 دوکیلمشیدی. تورکلر بونلری ده اسیر ایتدیلر، اسرای سائر
 ایله مجموعلری اوچ بیکه بالغ اولیور و ایچلرنده اوتوز آلتی
 قپودان و اصیلزاده بولنیوردی. جزایرده آوروپالیلرک
 Bagnio (باغنیو) دیدکلری زیر زمین زندانلری آرتق اسرای
 موجوده بی استیباب ایده‌میور. اهالی‌یه داغ‌تیلان اسرا ده عادتاً
 جزایر شهرینی دولدورویوردی! ذاتاً اهالی‌یه بیله اعتماد ایدیله‌مین
 بو حال و موقع ایچنده بو قدر اسیری حسن محافظه ایده‌بیلمک
 غیر ممکن ایدی. خصوصیه تورکلرک قوت و عددی اسرادن
 بلکه اوچ دوت قات آذربولنیوردی. بناءً علیه تورکلر بو حوله

مهیکی نصل باشندن آتہ جقلرنده متحیر ایدیلر . فی الحقیقه بونلری اسلام اسراسی ایله دکیشمک ، یاخود فدیہ نجات مقابلنده آزاد ایتمک طریقلری وارایدی ؛ خصوصیه اسپانیا حکومتی اسیر بولنان اوتوز قپودان ، قوماندان واصلزادگان ایچون یوزبیک آلتون فدیہ نجات ویریوردی . وبوقورصانلرک ایشنه پک اعلا کلیردی . لکن امید ایدلمه یں بر مانع ظهور ایتدی . علما طوپلانهرق بودشمن قوماندانلرینک جدأ مقتدر وهربری اسلامیه بروجهله رخته آچغه قابیلیتی ذواتدن اولدیغنی طوتدیره رق تسلیملرینه ممانعت ایده بیلیمک اوزره فدیہ نجاتی ایکیوز بیک لیرایه ابلاغ ایتدیلر ... دیگر جهتدن دخی اسرا هرکون فرار واختلال داعیه سیله ایقاع فتنه ایدیو . رلردی . بواحوال نهایت اسرانک قتللرینی انتاج ایتدی . ادمیرال فردیناندک جسدینه اسپانیوللر طرفندن یدی بیک آلتون عرض ایدلمش ایسه ده ینه علمانک نتیجه قراری اوله رق «أولو صاتمق» غیر مشروعدر سوزیله رد ایدلمش و جسد بر قویویه آتیشدر !

خیرالدین بکک امارتی

بارباروس خیرالدین تعداد ایتدی کمز غلبات متعدده سی ایله جدأ بر مغرب حکومت مجاهده سنک اساسنی وضع ایتمش

ایدی . مغرب الوسطی لیمانلری ، شهرلری بربرینی متعاقب
 بارباروسك الله دوشمشدی . و قول Col ، بونا Bona ،
 قسطنطین Constantine بوجله دن بولنیوردی . خیرالدین
 بكك برأ بوفتوحاتی اثناسنده بحرأ آق دكزده کی اجرا آتی ده
 تأخر ایتیموردی . هر دریا موسمنده ایکی اوچ دفعه ، اون سکر
 پارچه یه بالغ اولان قوتلی قالیته لرینك [قدرغه دن دها خفیف
 سفائن حربیه - Galleot] ریاسته کچر و نام و شهرت مجاهد-
 نه سنك شرق صولرندن باشنه طویلادیغی جسور و ماجرا پرست
 تورك قورصانلری ده - هربری کندیلرینك سریع تکه نه لریله -
 بوقوته منضم اولوردی ؛ قوتلی قوللر و چلیك قلیلر ایله سوق
 ایدیلن بوتکه نه لرده تورك ملتک اک جوشقون ، اک هرچه باد آباد
 ترانه سنی کویان کنجلیری دولو ایدی . [۱] و رئیسك باشنه
 طویلانمش بتون بوقپودانلر يك آرزمان صوکره تاریخده برر
 نام مؤبدده صاحب اوله جققلر ایدی . بونلرک ایچنده بالخاصه
 Dragut طورغودرئیس و ارتفاع آلق صنعتنه وقوف کلیسندن
 دولایی دشمنلرینك « سحر باز » دیدیکی سنان رئیس و صالح
 رئیس فرق اولنه بیلیوردی . صوکره اومدهش و مهیب قورصان
 آیدین رئیس کلیوردی ، که : الندن الامان چکن آوروپالیر ،
 بالخاصه اسپانیوللر بوکا Cacha-Diablo یعنی «شیطانی دوکن»

لقبى ويرمشلردى . حالوکه : لهین - پول ك دیدیکی کبی
 « اسپانیول دوکن » دیسهلر بوجاهد ایچون دها دوغری اولور
 ایدی . بربرستانك دریا موسمی مایسده بدأ ایلر و صوك بهار
 فورطنه لرینك دیرکلری اکمه سی آرتق لیانه چکیلماک ایچون
 برخبر اولوردی؛ اکثیا تورکلر قیشین ده حرکات بحریه اجرا
 ایدرلر سده بوحرکتلر هر حالده اوزون اولمازایدی . یازین
 قورصان چکدیرمه لری غربی بحر سفیدك دلیکنی دشیکنی
 آلت اوست ایدرلر، (باله آر) آطه لرینی ، اسپانیا ایتالیا یالیرینی
 بیکلرجه اسیرلر، خزینه لر مقابلنده خواجه کسرلردی . حتی
 آرتق جبل الطارق بوغازندن دخی چیقارق بحر محیط اطلاسیده
 اوزمان یکی کشف اولمش آمریقاندن آلتین ، قیمتدار امتعه
 ایله یوکللی کلن سفائن جسیمه یی آولایورلرایدی . لهین - پول
 دیورکه :

« بونلرک اللرندن هیچ برشی قورتیه مازدی : هیچ بر
 سفینه یوق ایدی که : اسپانیادن ایتالیا یه کچر ایکن ایچنده کی
 کوکلار بیک خوف و تلاش ایله چیرینماسین ! آوروپا لیلرک
 Scurge of Cristandom دیدکلری حالت مدهشه آرتق
 باشلامش ایدی وبتون آوروپا آرتق اوچ عصر بر اسارت
 مدهشه خوف ایله تیره یه جک ایدی .. آرتق دکزلرک
 حاکمی جزایر قورصانلری ایدی، بونلر یوللرینه آیقیری دوشن

هر دولته و هر ملتہ کندیلرینک کیم اولدیغنی اوکر تمکده ، یالکز
سفائن تجاریہ دکل ، پایا حضر تلرینک Galley-royal یعنی
باشترده (اڪ مکمل حرب قدر غلری) لرنده کی محارب لر بیله
تورک قیر باچنک اندیشه سیله تتره مکده ایدیلر .

بالخاصه آیدیر رئیس (Chacha diablo) حقیقه قورصا
نارک کوزلرینی آیدین ایدنلردن ، دشمن نظرینی قارارتانلردن
ایدی . بارباروس خیرالدینہ کوسـتردیکی بویوک معاونت لری ،
فدا کارجه یولداشلغنی ذاتاً شهید بهادر اوروجندن ده صاقلای
مامشدی . بارباروسه لرك کوتدکلری پولتیقه نك باشلیجه سلامت
اسلام غایه سنه معطوف اولدیغنی معلومدر ؛ كرك اوروج بارباروسه
و كرك خیرالدین بك آیدین رئیسى جدی برسیف مسلول اسلام
حالنده اللرینه کچیرنجه بوغایه یی استحصال اوغرنده قوللانمشلر
وحیت و ذکالریله پادشاهلره ایوالله ایتمین قوجه دکر قوردینی
علمدار فدائیلری و مجلوب اداره لری ایله مشلردی .

دیدیکمز کبی اسپانیا یانیور ، اسلام ، یهودی کسلیور ،
آسیلیور ، انکیزیسیون اوجاغنه اودون تشکیل ایدیوردی .
وبونک ایچون اسلام ، یهودی بو باربارلرك عادت ایتدکلری افعال
ملوئنه دن جانلرینی و عرضلرینی قورتاره بیلمک ایچون اندلسدن
افریقایه ، حتی استانبولہ شتاب ایتکده ، انجق فرار ایچون
مساعده ، کیتمک ایچون واسطه بولہ مامقده ایدیلر .

غریبدر، که: بربرستان حکمدارلری بیله بوزواللی ملتجیلره
روی لاقیدی کوستریور، بالعکس اسپانیالیلرله اتحاد و اتفاق
ایله یوردی. کړک اوروج، کړک خیرالدین ایسه پک دوغرو
ومفید دوشونجه لریله بویچارکان امتی تورک مجاهدلرینک قانی
بهاسنه اسپانیول قلیجنک آلتدن آلوب بربرستانه کوتورمکده
واوراده اسکان ایله یهرک کندی قوتلرینده بو وجهله تزید
ایله مکده ایدیلر، ایشته ینه بویله برملاحظه ایله و آرده مایورقه
جزیره سیله جوار ساحله آقین ایچون خیرالدین رئیس آیدین
رئیس کوندرمش ایدی و بو قوتک مجموعی اون درت قالیته یه
بالغ اولویوردی. هیچ بروطفه آیدین رئیس قفاسنده بر آدمی
بواش قدر ممنون ایده مزدی؛ برابر کیده جک اولان صالح
رئیس ده عین فیکرده ایدی. بو بربرینه تام او یغون بر چفت
قورسان ایشه معتاد وجهله آحیق دکزده برقاج غنیمت آله رق
باشلادیلر و آطه لره، اسپانیا سواحله هجوم ایده رک بیکلرجه
اسیر آلدیلر. بواثاده اسپانیوللرک ظلمندن بربرستانه فرار
ایتمک ایسته یین بر طاقم اندلس اسلاملرینک موجودیتی خبری
آیدین رئیس واصل اولنجه هیچ تردد ایتمه دی: همان اسپانیا
ساحلنده کی Oliva (اولیوا) موقعنه یولداش لریله چیقدی و قلیجنک
سپری آتنده ایکی یوز عائله خلقنی و بونلره عائد عظیم المقدار
نقود و اموالی کیلرینه یوکلده رک بربرستانه کیتمک اوزره

Formentara فورمته را آطه جغنگ آلتنه دمیر براقدی .
 لکن آیدین رئیس ایله صالح رئیس ایچون بودفعه یاتاغانلرینک
 دمیرینی ایچه دنه یه جک برایش واردی : بر تصادف معکوس
 اوله رق اسپانیا امیرالی پورتوندو Portundo بونلری اوراده
 باصمش ایدی و معیتند غایت قوتلی و قورصانلرک قالیته لریله
 غیر قابل قیاس صورتده حربه الیریشلی سکز جسیم حرب
 سفینه سی واردی . بوندن باشقه اسپانیا حکومتی طرفندن فراری
 عربلر ایله اموالی استرداد ایده بیلدیکی حالدده کندیسنه اون
 بیک دوقه آلتونی مکافات وعد ایدلمشدی . امیرال پورتوندو
 براز اول بشنجی شارلی پاپا طرفندن بولونیاده ایمپراطورلق
 تاجیله تتویج ابدلک ایچون جنویه کوتورمش وائناى عودتنده
 بوایشه مأمور ایدلمشدی .

بووقعه قارشیسنده آیدین رئیس پلاتنی شاشیرمادی؛ ایش
 آغر، لکن یاپه جقلرده اوایشه لایق ایدی؛ رئیسلرایسته دکلری
 کبی حرب ایده بیلیمک وچولوق چوجغک محاربه ده مقتولیتنی
 منع ایله مک فکر مردانه سیله مهاجرینی قره یه چیقاردیلر .
 بومناسبتله (لهین - پول) دیورکه «چونکه بوکلن دشمن آیدین
 رئیسک بازارلق ایتدیکندن چوق فضله ایدی!» آیدین رئیس
 ایشک تورکجه سنی اختیارایتدی؛ شدید وفداکار برهجومله کند-
 یلرینی منظره لرندن قاجاقق ظن ایدن اسپانیوللرک جسیم وغلبه لک

سفائنه کيرديلر و بوغاز بوغازه، بچاق بچاغه بر دوکوشدن
 صوکره اميرالي قتل ویدی بويوک غالي ني ضبط ايتديلر! ديکرلری
 «کيسنی قورتاران قپوداندر!» آوازه سیله وروزکاره منديللری
 ییله یلکن ديه آچهرق İviça (ایویسا) یه متوجها قاچديلر!
 بوضربه قهرمانانه ائناسنده زواللی اندلس ملتجیلری ساحلدن
 صحنه حربی یاشلی واندیشه لی کوزلرله سیرایتمکده ایدیلر. مظفریت
 قازانیلجه بونلر تکرار سفائنه ارکاب اولندی؛ وخرستیان
 کورکندن، زنجیرندن، قیرپاچندن قورتاریلان یوزلرجه اسلام
 اسراسی ویکلرجه اسپانیول اویلزادکانی ایله جزایره کتیرلدی [۱]
 آیدین رئیس جزایرده پک پارلاق بر استقباله مظهر اولمش
 یدی پارچه داغ کبی Galley - Royal (غالی - رویال) یعنی
 سفائن جسیمه ایمپراطورینک لیمان اغزنده دمیرلنمه سی جزایر-
 لیلرک کوزلرینی جداً نورلاندیرمشدی!

اولجه جزایر شهرینک اوکنده کی آطه یه اسپانیوللرک غایت
 متین برقلعه یابدقلرینی سویله مش ایدک؛ بو قدر مظفریاته رغماً
 قلعه آلآن دوریوردی. بارباروس خيرالدين بو انکلی آرتق
 قالدیرمق ایسته دی. بو قلعه نك طویلری یوزندن قالیته لر
 (چکدیرمه) بر میل قدر غرب طرفنه دمیرلیور، سفائن
 تجاریه ایسه شهرک شرق طرفنه اینوب بو محافظه سز محله

[۱] مورغان نام مؤلنک بربرستان تاریخی صحیفه (۲۶۴ - ۶).

سلامتتری تأمین اولنه مایوردی. بارباروس خیرالدین قلعه‌نک
محافظی اولان Don martain de Vargos (دون مارتین دو
وارغه) یه تسلیم اولماسی ایچون خبر کوندردی و جواب رد
آلنجه موقع مذکوری اونش کون متادیا طوبه طوتدی. بو
بومباردمانده قوللانیلان آغر طویلردن بر قسمنک ضبط ایدلمش
برفرانسز قالیونندن آلتدیغی و قسم دیکرینک جزایرده دوکیلدیکنی
اوکرنیورز، که آز زمانده بارباروس قردش لک بوهمتی نظر دقتی
جلبه سزادر [۱] بو مباردمان نتیجه سنده آچیلان کدکن
تورکلر بر هجوم ایله قلعه‌نی ضبط ایتدیلر و بومنحوس موقعک
طاشنی طاش اوزرنده بر اقامدیلر آوروپا تاریخلری بو مناسبتله
غریب بروقه نقل ایدرلر: قلعه‌نک ضبطله هدمندن اونش کون
قدر صکراهیدی: که هم آجینه جق، هم کولنه جک بروقه‌نک،
جزایرا هالیسی شاهی اولدیلر: اسپانیول قلعه‌می ایچون قوّه امدادیه
ومهمات حرییه ایله دولو سکرز جسیم اسپانیول سفینه‌سی لیمانک
آچینده کوروندی؛ لکن او قدرایی بیلدکلری و امدادینه کلدکلری
قوجه penon d'alger آطه قلعه‌سنی بردرلو بوله مایورلردی.
اسپانیوللرک غرور معلومنه بیک غرور قاتان بوداغ کبی داراخر
بلرینک یرنده یلرر اسیوردی. کلنلر، یا کلشیمی کوریورز دیه

[۱] (ژوریان دولاغراویه ر) ک Doria et Barbarous

دوریا و بارباروس نام اثری.

کوزلرینی سیلرلر ایکن قورصانلر خفیف قالیتهلری ایله لیاندن اوغرا دیلر و رامپه ایدهرک بوتون کیملری ضبط ایتدیلر. بووجهله بارباروسه نك الینه ایکی بیك یدی یوز اسیر و بی نهاییه اسلحه و مهمات کچمش ایدی. [تخریب ایدیلن قلعه نك طاشلری ایله بارباروس خیرالدین تام ایکی سنه مدت اوتوز بیك خرسیان اسیری چالیشدیره رق جزایر مندرکنی انشا ایتدیرمشدر. جزایر لیانی بو آطه ایله ساحلک آره سی برلشدیریلهرک وجوده کلمش و بقیه السیوف اوله رق قلعه دن چیقان بشیوز اسپانیول اسپرینه آطه قلعه سنک طوپلرله تخریب ایتدکلری بدنلر و برجلر یایدیرنشدیر. اسپانیولر بو آطه ده بولندجه جزایرک منار دلرندن اذان او قونمانسی منع ایتمکی، اذان سسی ایشیدلدجه منار دلری، جامعلری طوبه طوتخی عادت ایتمش اولدقلرندن اهالی اسلامیه ایچون بو مظفریت پک بویوک مسرتله تلقی اولنمشدر.]

شیمدی بارباروس خیرالدین ایچون قطعی برقرار زمانی کلمشدی؛ جزایر بر زمان تک اسپانیول شوالیه سنک طین سنانه قارشى کوزینی قیرپارکن بر اسلان یوواسی حالنه کیرمش، سواحل استحکام آلتنه آلمش، قلعه لر زمانه کوره اک مؤثر و آغر طوپلرله تحکیم ایدلمش، الحاصل هرشی بر هاله ظفر و معموریتله محاط اولمشدی، لکن ینه اک بویوک بر نقصان وار ایدی : اتحاد و اتفاق !

بارباروس خیرالدین اهالی به حالا کوکنه مه یور و غریبه
 خرسیتیانیک آلدینی شکل مهیب تهدیدکاره نظراً و بوقدرسنه لك
 تجاربه كوره مغربك ساده همتله محافظه سی مشكل اولدیغنی
 حس ایله یوردی . دیگر جهتن بارباروسه نك كوكلنده آنا، بابا
 مملکتنه قارشى بی پایان بر محبت و مجلوییت واردی . بناءً علیه :
 بر تجربه قطعی قییلندن برکون بوتون جزایر اهالیسنی، معتبراتی
 طوپلادی . دیدی که : « بیلورسکز، کور یورسکز، سزى دین
 دشمنلر كرك الندن قورتاردم ، خراب مملکتکزی معمور ،
 ضعیف قوللر كزی قوی قیلدم ! وساده قاعه كزه درتیوز پارچه
 طوپ قویدم . بعض احوال بوندن صوكره بنده بوراده
 اكلنمه مك ایجاب ایتدیور؛ بن مملکت اولان کیلیری آلوب
 اللهمك قسمت ایتدیکی بر دیاره کیدرم . آرتق خوشجه قالکز ! »
 بو آچیق و قطعی سوزلره قارشى اهالی خیرالدینك اومرد
 الینی طوتدیله و بویوك بر طوفان احترام و اندیشه ایچنده کندیلرینی
 بر اقاماسنی و هر سوزینه اطاعته حاضر بولندقلرینی رجا و تأمین
 ایتدیله، ایشك بو حاله منجر اولماسنه ممنون اولان رئیس شرط
 اوله رق دیدی که : « پك ای، سزكله قاله جقم؛ لکن بیلورسکز که :
 عقلی ایرمه ین جهلای اهالیدن صرف نظر برر اسلام امیری
 اولان تونس و تلسان حاکمیری بیه بکا دشمن، خرسیتیانلرله متفق !
 بن بوراده قالدقجه بونلر اوزر كزه دائما خرسیتیانلری تسلیط

ایلیه جکگر ؛ بنم سبیمه سرزده یانه جقسکز . بونک یکانه چاره سی
آل عثمان پادشاهی نامنه خطبه مزی او قوتق و سکه مزی کسمکدر .
انجق بو شرط ایله بوراده او طوره بیلیرم .

جزایر لیلر بو شرطی قبول ایتدیلر ، خیرالدین بك همان
درت کی دوناده رق برچوق قیمتدار هدایا ایله اسرادن درت
صاحب اعتبار قپودانی ، قرق قدر اسیری ایچریسنه قویدی
واسه تر حام تابعیت ایله استانبوله کوندردی . عثمانلیغک تحت
شوکتده اوزمان یاوز سلطان سلیم او طور یوردی ! ذاتاً شان
مجاهدانه سندن خبردار ، یکیتلکنه تقدیرکار اولدینی بارباروسلرک
صاغقالاندن وارد آوازه مراجعتی بوتون قیمتیه تلقی ایتدی .
ومر صعب برقیلج ، برخاعت و جزایر امارتنه طرف دولتیجه قبول
ایدلدیکنی معان برسنجاق ارسال ایله دی ؛ تصادفاتدن درکه : بو
هدایای شاهانه بی ارساله مأمور ایدلمش اولان درگاه معلا
قوللرندن حاجی حسن نام ذاتک را کب اولدینی سفینه اثنای
راهنده سکز وندیک سفینه حربه سینه مصادف اولوب محاربه یه
طوتوشلمش ، و جزایر کیلری ضبط ، برابر بولنان بارباروس
خیرالدین آدمیری شهید ، حاجی حسین ده اسیر ایدلمش ایدی .
موخرأ حاجی حسین اوچ نفر معیتی ایله قورتیلوب مستون
(Modon) ه کلدی و بو حادثه خونینی پادشاهه عرض ایتدی .
بالطبع حکومت سنیه همان وندیک بالیوزی واسطه سیله وندیکه

مراجعت شديده ده بولنديغندن آلان سفائن اعاده اولمش
وبونلرله حاجي حسين تڪرار جزايره دوغرولمشدى . ليمانه
وصولده خيرالدين بك طرفندن بويوك بر احتشام واحترام
ايچنده استقبال ايدلدى وپاشا كوندريلىن آي، سنجاغى، فرمانى
مراسم مخصوصه ايله قبول ايدوب اعيان و اشراف طوپلاندى
بعدهما جزاير الكاسنك ممالك عثمانيه دن اولديغنى دالالر اهالى يه
اخبار واعلام ايتديلر .

بو حال كرك تونس ، كرك تلسان حاكملىرىنى صوك درجه
اوركوتمش ايدى ؛ همان چاره لرينه باقغه قرار ويره رك عقد
اتفاق ايتديلر ؛ حتى جزاير ليلردن و خيرالدين بارباروسه نك
مقتدر امر اسندن اولان محمد بك ايله قاضى اوغلى نام ذاتلى ده
اضلال ايدوب اتفاق لرينه ادخال ايله ديلر . قبائل متجاوزده
بيك درلو حيل و بهتان ايله قانديرلمش و بارباروسه نك اوزرينه
سوق اولمشدى . لىكن خيرالدين رئيس اويله كورولتى يه پاوج
براقان طاقمن اولمادىغى ايچون بونلرى بوزدى ؛ وبو حادثه
(مستغنام) شيرينك ده خيرالدين اينه كچمه سنه سبب اولدى .
تلسانك اوروج بارباروسه طرفندن ضبطنده اميرينك محبوسى
اولان ايكي برادرى حبس دن قورتمش وفاس سلطانك دركاهنه
التجا ايتمش ايديلر . فاس سلطانى بونلر ايسته دكلىرى عسكرى
ويهره رك تلسانى قردش لردن ضبط ايتك اوزره كوندردى ؛

انجق قبائل متجاوره بونلر علپنه حرکتله ایشلرینه مانع اولدقلرندن بوسردارلردن مسعود اسمنده کی خیرالدین بکه مراجعت ایتمش، دیکری هرا (عوران) ه چکیلمش ایدی . مسعودک بومراجعتی اوزرینه خیرالدین بک عربانه خبر کوندره رک مسعوده معاونه تیرینی تأمین ایله دیکندن معیتله مسعود کیدوب تلسانی ضبط وامیری اولان بویوک برادرینی فراره اجبار ایله دی . تلسان سلطانغنی بووجهله رئیسک سایه جوانمردانه سنده قازانمش اولان مسعود موقعنک حقیقه اهلی دکل ایدی ! بک آز صوکره خیرالدین رئیس قارشی قامتی دراز ایتمش ، حتی آلچاغنی اسپانیوللر ایله اتفاق درجه سنه ایصال ایله مشدی . بونک اوزرینه خیرالدین بک اولجه هرا نه کیتمش اولان برادرینه معین اوله رق ایسته دیکی عسکری کوندردی و یکر می سکز پارچه تورک تکنه سی ده هرا ن قربنده اولان (مستغانم) لیمانی ضبط ایله دیلر . بوقوه بحریه مستغانمک ضبطندن صوکره بوش دورمایه رق دشمن یاقاسنه اوردی وبر چوق غنائم و بیکارجه اندلس ملتجیلرینی آلوب جزایره کتیردی .

تلسانک ایکنجی دفعه فتحی . — اوروج بارباروسه نک قانیله رنکلنمش اولان بو قلعه نک آرتق ایکنجی دفعه فتحی زمانی حلول ایتمش ایدی . خیرالدین بارباروسه نک کندیسنه معاونت ایدن قوتنی تلسان بکنک برادر ی عبدالله استصحاباً

تلسانه یورودی . سلطان مسعود فرقه مهاجمه قارشی قوت
 موجوده سیله قارشی چیقدی ، لکن تورکلر بر غیرت منتقمانه
 ایله تلسان سلطانک عسکرینی مغلوب ایتدیلر و تعبیر جائز ایسه
 «تلسان سلطان» نى شهره قاجیردیلر . انجق تلسانی فتح ایتک ،
 سلطاننی مغلوب ایله مک قدر قولای دکلدی ؛ تورکلر و متفقلری
 عرب عسکرى یکر می کون قدر مقام محاصره ده قالدیلر .
 قورصانلر بویله وعده لی ایشه تحمل ایده بیله جک فطرتده دکل
 ایدیلر ؛ یکر منجی کیجه اکیوز جانندن کچمش یکیت سیچیلدی
 وکویا آرمایه چیقار کبی مردیونلرله ایچ حصاره کیره رک
 قلعه قبولرینی یولداشلره و دینداشلره آچدی ! سلطان مسعود
 اکیوز قدر معیت بدبختیسیله قلعه دن چیقوب بو هنکامه ده
 قاجش ایدی . اها لیک اندیشه مقاومتی «ولایت سلطان سلیم کدر !»
 دیه باغیران و عثمانلیغک غالبیت مؤبده سنی آکلاتمغه باشلایان
 منادیلرک آوازه سیله تسکین اولندی . کار آشنا خیرالدین رئیس
 تلسانه عبداللهی والی و حاکم نصب ایتمکه واقعه یی مسکی الحتام
 ایتمش ایدی . عثمانلیغک حقیقی قهرمانلرندن اولان و بو کون ،
 بوتون طعنه متعصبانه اغیاره رغماً ، فطرت عثمانیه یی تمثیل
 ایله ین یاوزک نامنه مملکتده خطبه او قوندی و سکه قبول ایدلدی ؛
 قوه محلیه یه علاوتاً قلعه یه ده یوز اللی کیشی خالص تورک وضع
 ایدلمش ایدی . بو وقعه دن سو کره مسعود هوادارلری ایله عودت

والاتی کوزلجه سفائننه یوکیه بیلمکده متردد ایدی . بواشاده
عصیان ایدن قلعه لر و بالخاصه تونس حاکمی طرفدن عاصی
قره حسنی خیرالدین رئیسه تسلیم ایتک سوزلری اولدیغندن
آنک اوزرینه بر حرکت عسکریه اجرایی شکلی آلتنده سرایی
تخلیه ایتدی و اموال و اشیاسنی، اولاد و عیالنی دوقوز پارچه
سفینه یه تحمیل ایدرک شهر اشرافی و تونس حاکمنک طاب
صلح ایچون کلش سفیرینی بریره طوپلادی بارباروس بواشاده
برتأثر مهیباله مشبوع و متهیج ایدی. النده قلعه نك آختارلرینی
بو حیتمز اشراف اوکنه ، سلامت ملیه یی ذوق و شخصلرینه
دکیشن بوسر امدان اهالی نك آیاقلری دینه آدی، بواشاده یالکز:
— اهل اسلامک و بالی بوینکزه اولسون، ای مفسدلر !
دیمش و بکلین آتنه آتلا یوب ساحل بحره مواصلتله کیسنه
کیرمشدی . احتراصات معلومه یه تابع متفذان النده بازیچه
اولان، کاه دینداشلی، کاه آنلرک متفق اسپانیولر النده ازیان
زوالی اهالی رئیسک بویله جدی صورته مفاقتی آکلانجه
دردلرینه دوشدیلر و رئیسه مراجعتلره باشلادیلر. قورسانلر
اوکیجه لیانده یاتمش اولدیغندن فوج فوج اهالی وداعه کلش ،
برچوق متین کوزلردن اشک تأثر دوکیله رک رئیسدن کندییی
آرتق یوق ایکن اهالینک نه یاپه جغه عائد نصیحتلر ایسته نلشدی.
بارباروس خیرالدین بو قدر مال و جان ضیاعیله ملجأ اسلامیت

حاله کتیردیکی جزایر اهایسنه اسباب مجبره بی ایضاح ایله دی و اوج سنه یکی حاکم لرینه اطاعت ایدرک نافله ازیله مه لرینی و بومدت انقضا سنده آرزو لرینه کوره حرکت ایتمه لرینی تنیه ایتدی . قوجه قورصان ، عجیا اوئانده نه لر دوشونیوردی ! علی الصباح باربارس خیرالدینک قوتلی قدرغه لرینک سنجاقلری افقده دالغالانیور و جیجیل حصارینه دوغرو یول آلیوردی . جیجیل اهایسی اسکی بیلدکلرینی منتله قبول ایتدیلر ، زواللی جیجیل اهایسنک اوئانده دوچار اولدینی قحطه رغماً هر طرفده مسرت و امید واردی . خیرالدین رئیس بورایه یرلشنجه بوش قالمادی . یدی تکنه ایله دکره چیقوب آوروپا ساحلنه کچدی و دوقوز قطعه بغدادی ، ذخیره یوکللی سفینه ضبط ایدرک جیجیله کتیردی و حمله لرینی اهاییه تقسیم ایتدیکندن حکمفرما اولان قحط بر درجه یه قدر تسکین اولمش ، قورصانک قلنجی بر چوق دعالره مظهر اولمشدی .

بارباروسه یکریمی یدی اوطور اقلق کندیسنه مخصوص بر باشرده یعنی بویوک قدرغه یاپدیرمغه باشلامشدی ؛ بتیرنجه پیشنه طقوز چکدیرمه سنی ده طاقه رق اطرافنی اورمغه باشلادی ، تونس ساحلنده دشمنلرینک کمیلرینی یاقمش ، دشمن یاقه سنده آلتی بغدادی یوکللی پارچه اوزرینه وارهرق برسلاح آتمقسزین

تسلیم آتش ایدی؛ بو کیلرده جربه یه کوتورولوب ذخیره خلقه توزیع اولمش ایدی. آیدین رئیس، شعبان رئیس، اون ایکی مشهور رئیس ده ها هپ اطرافنه طوپلانش، قرق پارچه یه واران قوتلری بوتون یاز آق دکزی یاقوب ییقمش ایدی؛ بورؤسادن قسم اعظمی موسم شتاده مقتدر رئیسلرینک یاننده یغنی جیجیلده قیشلادیلر. بو اجراءات و حرکت بارباروس خیرالدینک دشمنلرینی صوکه درجه قورقوتمش ایدی؛ عدوقدیم وقوی اولان تونس حاکمی باشنک اوستنده بر بویوک فورطنه بولوطنک دونوب دوردیغنی حس ایدیور، حتی اوزاقدن او فورطنه نك ییلدیرملری، شمشکلی کورونیوردی. بناءً علیه متعدد کره لر خیرالدین رئیسه سفرا وهدیه کوندرمش، لکن صوکه درجه قیرغین اولان رئیسدن روی التفات کورمه مش ایدی. جزایر اهالیسیده برطرفدن رئیسه کری کلمه سی ایچون رجا ایدیورلردی. بواثاده تونس حاکمه نفرت عمومیه بی احضار ایدن بروقه ده حاصل اولدی. «لوند قپودانلری» نامیله بوکون تاریخده حقیقهً بر موقعلری، خصوصیه تاریخ اسلامده شرف حقیقیء مجاهدانه لری اولان تورک رئیسلریینه اسپانیانک اسلامیت ایچون بلا و اشکنجه دوغوران یالیرندن کوزلری یاشلی اسانلری لامارتینک ابن سراجنده دیدیکی کبی:

«چکدی ایواه غرناطه یله اندلس یادایلرله؛» نشیده الم اکیننی

کویان برچوق عرب ملتجیسی آلهرق جزایره کلدکلی زمان
 قاضی زاده یعنی تونس حاکی بوراده کی نفوذندن بالاستفاده بو
 بچاره دینداشلی شهره قبول ایتمه مش، حتی کیملرک بیله فضله
 یاتماسنی مانع حرکات ابراز ایله مشدی . بونلر — بارباروس
 خیرالدینک غریبه یکانه ملجأ اسلام اولدیغنی بیلدکلی
 ایچون — جزایردن (جیجل) ه کیتدیله و برلسان سوزان ایله
 کوردکلی معامله دناشتکارانه دن اشتکا ایتدیله . بارباروس
 خیرالدینک صبر و سامانی ذاتاً توکنمک اوزره ایدی؛ بو حرکت
 بوتون دوشونجه لرینه بر نتیجه قطعیه اولدی . قوتی همان جمع
 ایله جیجیلدن چیقدی و بوتون جزایر شیخلرینه آجی ، وظیفه
 حیتک ایفاسنه هر فردی داعی بیاننامه لر کوندره رک هپسینی
 یانسه طویلادی . تونس حاکی قاضی زاده بوکا قارشی یکرمی
 بیك کیشیلک بر قوتله مقابله یه حاضر لاشدی . طوتدقلی
 موقعک رصاتی، مساعده سی اردوسنی برانهمزام قطعیدن و درت
 بیك کیشی تلفات ویره رک فراردن قورتارامادی . بارباروس
 خیرالدین کندیسنی شیطانک دلیکنه کیره جک اولسه طوتمغه
 عهدلی بر شدتله تعقیب ایدره رک اله کچیردی و صوک حرب مایوسانه ده
 مقتول دوشدی؛ بومهم بر مظفریت ایدی، چونکه قاضی زاده نک
 یکرمی بیك کیشیلک قوتی آره سنده اوزمان پک مهم نادر اولان
 بیك سکزیوز قدر تفنک انداز بولنیوردی . قبائل عاصیه رئیس

عرض پشیمانی و تابعیت ایتمش، بوتون ممالك مغصوبه تکرار آینمش
بواحوالی کورن و یولداشنه خیانتله نامنی لکله یین «قره حسن»
بشیوز نفرله (شرشل) قلعه سنه قاقچش ایدی. خیرالدین رئیس
شرشل اوزرینه یورودی، حربه حاجت قالمادن معیتی کندی
الریله قره حسنک کله سنی کسوب تقدیم ایتدیلر.

جزایره عودت. — بارباروس خیرالدین ایچون آرتق جزایره
عودت وقتی حلول ایتمش، بر تصادف غریب اوله رق چیقارکن
سویله دیکی کبی جزایر اوچ سنه رقبایه تابع قلمش ایدی و بو
عودت پک شرفلی اولدی؛ جزایر ایچون شوکت و حاکمیت یولی
تکرار آچیلمش، اهالی مقتدر بر حکومتک جناح حمایه سنه
صیغینمش ایدی؛ لکن حیاتی وقایع عظیمه ایله دولق مقرر
اولان خیرالدین رئیس ایچون غائله اکسیک دکلدی. بودفعه ده
بیگ تبصبله و رئیسک قلنجیله تلسان حاکمیتی قازانمش اولان
مسعودک برادری عبدالله موعود ویرکیسنی ویرمکدن امتناعه
باشلامش ایدی؛ اصل تحمل اولنه مایه جق جهت ایسه خطبه دن
آل عثمان پادشاهلرینک نامنی قالدیرماسی و خطبه یی کندی نامه
چویره رک اسپانیولرله اتفاق ایتمه سی ایدی! بارباروس خیرالدین
مغر بیلرک بواسکی خسته لقلری و باشلیجه سبب خرابیلری اولان
اسپانیول اتفاقنه قارشى متعجب اولمادی، بالعکس طوتدیفی
طریقک حمیت اسلامیه نه درجه مغایر بولندیغندن و بواحوالک

نیه منجر اوله جغدن باحث نصایح مردانه و معقوله یی حاوی
مفصل برکاغد یازهرق عبداللهه کوندرمشدی ؛ انجق عبدالله
بیانات واقعه یه استخفاف واستحقار ایله معامله ایدنجه ایکی
طرفدن حرب حاضرلقلری باشلادی ؛ عبدالله مغریلری
وخیرالدین رئیس تورکلری، اندلسلیری ایله جزایر خارجنده
چارپشدیلر، عبدالله طاقی هرشیئی یوزاوستی براقهرق فرار
ایتدی ؛ مال غنائم ایچنده کی دوه لر سکز بیکه بالغ اولیوردی.
عبداللهک سفراسی رجای صلح ونجات ایله کمشلردی. خیرالدین
رئیس خطبه نك عثمانلی پادشاهی نامنه قرائت اولماسی و اولجه
مقطوع اون بیک التون سنوی ویرکونک یکریمی بیکه ابلاغی
شرطیه مصالحه یی قبول ایتدی ؛ عبداللهک آلتی سنه دورایله دیکی
اونبریك لیرادن آلتش بیک لیرانک ده ویرله سی شرائط جمله سندن
ایدی ! یونی متعاقب مقتول ابن قاضی برادرلرینک اوزرلرینه ده
واریلهرق دائرة اطاعته ادخال اولمش وکاتب چلیننک دیدیکی
«اوتوز یوک کوموش». خراجیه کیلمشدر. و بوتون بو وقایع
عظیمه درسعادته یازلمش و مقام خلافتدن تلطفلره مظهریت
میسر اولمشدی.

شیمدی بربرییه قورصانلرینک بالخاصه بارباروس خیرالدینک
نجم شوکت و اقبالی جداً سمت الراسه واصل اولمشدی ؛ آق
دکنده برخرستیان تکنه سی کره مز، خرستیانیتک اک مغرور

حکمدارلری بارباروسه نك برضربه سنی حس ایله مکسزین کون
چکیر مزیدی .

اسپانیا قرالی بو بویوک داهییه یی کوکندن قلع ایچون بویوک
بر مجلس حرب تشکیل ایتدی و تداییر مستقبله نك ، نه اوله جغنی
صوردی خرسیتیان عالمک اک مشهور قپودانی اولان (آندریا
- دوریا) بومجلسده آیاغه قالمش ینه (حاجی خلیفه نك) خوش
لسانیله حکایه ایله دیدیکی وجهله (شایقه سنی الله الوب) شاید فرانسه
حکومتک یکر می قدرغه سنی ده قوه مؤجوده یه ضم ایده بیلمک
ممکنسه بواشی در عهده ایده بیله جکنی بیان ایتمشدی . اوئانده یکی
مصالحه اولمش اولان فرانسه واسپانیا حکومتلری آره سنده قورصانلر
علیهنده بواتفاقه عائد محاربات باشلادی و فرانسه نك موافقت
اضطراریه سیله نتیجه لندی . بر مدت صوکره (آندر - دوریا)
بویوک بردونما ، اکمنتخب بر اردوايله جزایره دومنی دوغرولتمش
ایدی . بو حادثات مهمه نك هیج بر نقطه سی بارباروسه نك نظر
دورینندن قاچه مامشدی . بارباروسه جزایره اوتوز بش کمی
یاپوب دوناتمش ، و حربده تمکن ایتمش اولان سنان رئیس
ورؤسای سائر یه غزا قلنجلرینی بیله مک ایچون خبر کوندرمش
ایدی . سنان رئیس یدی کمی وبرچوق پرواسز دکر قوردلریله
کلوب یتیشدی .

بارباروس خیرالدین رقیب دائمیسی اوله حق آندریا دوریای

آجیق دکزده ، (باله آر) آطه لرنده قارشیلایمق ایسته یوردی
 واوراده مصادف اوله جغنی ده ظن ایتمش ایدی ؛ لکن (اندریا -
 دوریا) شهرتیه متناسب برسرعت ایله اولجه بارباروسه نك قره
 حسنك الندن آلهرق تحکیم و اسپانیا ملتجیلری (مدجلر)
 ایله اسکان ومعمور ایتدیکی (شرشل) قلعه سی اوزرینه ایندی .
 اندریا برکون علی الصباح بورایه قرق یوروک قدیرغه ایله واصل
 اولمش همان قرده عسکر چیقاروب تخریب و غارته باشلامش ایسه ده
 قوتنه فضله کوکنمیشدی . اندلس عربلری تورکلر ایله برابر
 بوفرقة متجاوزه اوزرینه آتیلدیلر . پك خونریزانه برجنك ایله
 بیك درتیوز زرهبوش اسپانیولی بربرستان قییلرنده چاقالدره
 یم بر اقدقدن صوکره کیلرینه قاجیردیلر . بو تلفاتدن ماعدا
 اسلاملرک الینه آلتیوز قرق کیشی ده اسیر دوشمش ایدی .
 بارباروس خیرالدین وقعهی دویجه بوتون قوتیهلر شیمدی
 دشمنك ترك ایله فرار ایتدیکی شرشل اوزرینه ییقیدردی .
 و آلتان اسرانی قدرغه لرینك کورکلرینه زنجیرله یوب - شیمدی
 صره کنديسنه کلدیکی ایچون - ایتالیا یاقه سنه دومنی دوغرلندی .
 اسرا ایچنده اندریا دوریانك اوزمانه کوره کتخداسی یعنی
 معاونی ده بولندیغندن بوآدمدن آمیرالك قوه کافیه آلمق اوزره
 جنویه کیده جکی اوکرنلش واورالرده یاقالایمق تصمیم ایدلمشدی .
 اولای پرووانس ساحانه اینیلوب مارسلیا جوارندن (دیل) آندی .

یعنی دشمنك حرکات حربیہ سندن خبر ویرہ جك برقاچ اسیر
طوتلدی . بونلرك بیانہ نظرأ : دوریا اورالردن براز اول
کچوب جنوہ طرفنہ کیتمش ایدی . خیرالدین رئیس فرصتی
قاجیرمش ایدی؛ بناءً علیہ مارسیلیا لیمانہ اوتوز میل مسافہدہ
براطہنك آلتندہ دمیرلہ یوب اون کون قالدیلر؛ بواننادہ غریب
بروقہ اولدی . تورک سفائنندن کوریلہ جك قدر بر مسافہدن
چکن برخرستیان سفینہ سی تعقیب اولنوب ضبط ایدلمش ومایور-
قہدن کلن بو سفینہ پینیر یوکللی بولنمشدی . فرانسهنك اوزمان
دخی بر مرکز بحرئیسی ، (بندر) ی اولقلہ مشہور طولون ،
اوزمانك تعبیرنجہ (طولوم) لیماندن پینیر کیسنك ضبط اولندیغی
کورلمش ، طولون قوماندانی همان درت پارچہ تکنہ ایلہ بویلہ
کوز اوکنده عاصیلق ایدن اشقیایی تربیہ یہ شتاب ایلہ مشدی .
ای برتصادف قوماندانی محوبتدن قورتاردی :

شویلہ کہ : اوزمانلر اکثریا واقع اولدیغی اوزرہ بارباروس
خیرالدینك فیلوسندن برسفینہدہ کی اوچیوزقدر (فورسہ) یعنی
کورک چکن خرستیان اسیری (بونلرہ پایزن دہ دینیایر .)
بر فرصت بولوب کمی مرتباتی باصمش و کمی یی آلوب قاقچقدہ
بولنشلردی . بویوک برحدت واشتا ایلہ لیماندن چیقمش اولان
فرانسز قوماندانہ راست کلدیلر و آطہدہ یاتانلرك بارباروس
خیرالدین فیلوسی اولدیغی آ کلاندیلر . آرتق بونلرك اوزرینہ

کیتمک بالطبع دلیلک ایدی؛ برآز صوکره طولون قوماندانی
 حدندن فضله ایشه قارشماق قرار عاقلانه سیله لیمانه کیریوردی!
 بارباروس جزیره دن حرکتیه دوغروجه «ویرالی جنوه
 یالیر!» نیشدی. شهر جوارنده برقلعه یی علی السحر باصدی
 و بوتون خلقی اسیر ایتدی. پک قصیر مدته قلعه یرله برابر
 ییقلمش اولدینی کبی، لیمانه یاقالانان یکر می ایکی پارچه تجار
 و حرب تکنه سی برنمایش مخصوص صورتنده آتشه ویریلوب
 یاقیلمش ایدی. بورادن جنویه کیدیله جک ایدی، لکن ناکهانی
 چیقان بر فورطنه نک اوکنه دوشه رک شدید بر حرص ایچنده
 تورکلر تکرار قالدقلری آطه یه پوچالامغه مجبور اولدیلر.
 حالبوکه: حساب ذاتا یا کلش ایدی. قورناز اندریا شرشل
 فلاکتندن صوکره جنویه حرکت ایتیه یوب اسپانیا ساحلنده
 بر لیمانه التجا ایتیش و جنویه اوچ بیك کیشیلک بر فرقه بریه ایله
 باروت و آلات حرب ارسالی ایچون خبر کوندرمش ایدی.
 تورکلری راه مقصودندن چویرن عین فورطنه بوقوه امدادیه یی
 حامل اولان ایکی (قراقه) یی [غایت جسم واک قوی حرب
 و نقلیه سفائی] دخی تورکلرک پوچالادینی جزیره اوکندن
 مروره مجبور ایتدی. علی الصباح بونلردن دها سریع السیر
 اولانی افقده کوریننجه تورکلردن برقاچ تکنه دمیر قوپاره رق
 تقرینه مترصد اولدیلر. وهمان هجوم ایده رک امید ایدلر درجه ده

شدید بر مقاومتی کسرایتدکدن صوکره ضبط و لیانه جرایتدیلر .
 اوچ درت ساعت صوکره دیکری ده کوروندی . اقشام تقرب
 ایتمش ، هوا قالمش ایدی . بارباروس قراقه نك نصل اولسه
 قورتیه مایه جغنی ، انجق کیجه وقتی کور کورینه بر حربی بویله
 بر قلعه سیار ایله اختیاردن ایسه صباحی بکله مکی مناسب
 کورمشدی ، علی الصباح برفرقه الآن سکونت هوا ایله آچیقده
 بکله ین کوه سیار اوزرینه واردی . خیرالدین رئیس هر بری
 ایکی بیکه یقین منتخب محاربی حامل اولان و برچوق طوپلرله
 مجهز بولنان بوتکنه لرك اوزرینه کندی کوچوک تکنه لرله
 آچیقجه هجومك لزومسز بر چوق تلفاته سببیت ویره جگنی
 بیلدیکندن قیودانلره نافله فداکارلقدن توقی ایدلمه سنی وتکنه
 اولجه اوزاقدن طوپله ایجه دوکولدکن صوکره هجومی توصیه
 ایتمش ایدی ؛ لکن سنان رئیس عمرنده بوکی تدابیر تحفظیه ایله
 مجبول بولنماش اولدینی ایچون چکدیرمه سیله اولو اورته اوستنه
 ییقدیروب رامپا اولدی ؛ و بونک جزاسی اوله رق کوزینه
 تصادف ایدن بر تفنک قورشوننک تأثیریه کری یه چکیلوب
 لیانه کیردی . بارباروس وقعه یی کورنجه هان فیلامش قراقه یی
 قیچ طرفندن مدید بر بومباردمانه هدف قیلمش ایدی .
 اوصورتله که : براز صوکره تکنه قعر بحره اینمکه باشلادی .
 وجداً بر مدافعه بهادرانه کوسترمش اولان مرتباتی دکره

کندیله‌ری آتہ رق اسیر اولدیله ؛ انجق تورکلر تکنه‌ی حامل اولدینی عظیم مقدارده مهمات واسلحه و دونانم ایله باتمغه بر اقاموب ایجریسنه کیردیله ؛ ساحله قدر چکوب بوئانده بوتون حموله‌سنی و آلاتی تخلیه ایتدکدن صوکره ترک ایله دیله ؛ بو جبل سیارک پک آز صوکره اعماق بحره ایندیکی کورلدی . آلمان و کورکه قونیلان اسرادن آندریا - دوریانک اسپانیا یالیرنده اولدینی اوکرنش ایدی ؛ مشکل الاداره اولماسنه بناءً ایلک ضبط اولنان قراقده اوراده احراق ایدیلوب و شهدانک نمازی قیلنه رق دفن ایدلدکدن صوکره جزایره عودت اولندی . وقعده دن خبر اولان اندریا ایسه حدندن فضله بر احتراز ایله جبل الطارق بوغازندن چیقمش ایدی .

خیرالدین پک جزایره عودت ایتدیکی زمان کندیسنی بر وظیفه سیاسیله ایله موظف بولدی . کندیسنک فرانسه و جنوه ساحلنه عزیمتدن مقدم سلطان سلیمان طرفندن درگاه عالی چاوشلرندن مصطفی نام ذات واسطه سیله جزایره بر تعلیماتنامه پادشاهی واصل اولمش ، و بونده فرانسه حکومتک دولت علیه ایله عقد ایله دیکی اتفاقه و قرار و یردیکی صلحه نه درجه رعایتکار اولدیغنک و بحر سفید حوضه‌سی بولتیقه سنک نه مرکزده بولندیغنک تدقیق و تشریحی امر ایدلمشدر ؛ خیرالدین پک بو خصوصه عائد مشاهدات و محاکمات مخصوصه‌سنی مفصلاً یازهرق در خلافته کوندردی .

آندریانک قورون قلعه سنی استیلاسی

۹۳۸ تاریخنده سلطان سلیمان ینه اوستریا (اوزمانک تعمیرنجہ آلمانیا) سفرینه توجه و حرکت ایتش اولدیغندن شارلکنک برادری و المانیا ایمپراطوری اولان فردیناندو او ائشاده جنوده بولنان شارلکنه خبر کوندرمش و « غران سینیور دو تورک » علیه استمداد ایتشدی .

بشنجی قارلوس (یعنی شارلکن) او امدادی ، پادشاه سفرده ایکن روم ایلی سواحلی یاغما و تخریب صورتیه اجرا ایتک ایسته مشدی ، لکن ایمپراطور فردیناند دیور ایدی ، که « قوه بحریه ایله برایی ساحل قلعه سی یاغمالامق اهمیتسنز و طالع حربہ مداخله سزدر ؛ بکا بو کون قوه بریه ایله امداد ایتک لازمدر . . . »

بناء علیه ، شارلکن او طرفه توجه ایتدیکی ائشاده آندریانی ده روم ایلی سواحله صاتاشمغه مأمور ایله دیکندن امیرال ایچون متون (Modon) قلعه سنه دومن دوغرتیق لازم کلدی . لیکن دیگر جهتدن بو ائنالرده بارباروس خیرالدینک پادشاهه ملاقی اولق اوزره دکره چیقماسی و شرق - ولرینه کله سی

تہلکہ سی وار ایدی ؛ بوندن امین اولہ بیلمک ایچون اسپانیولر
 اومعهود چارہ لرینہ ، یعنی بربرستانک اوحیتسز حکمدار لرلر
 اسلام علیہندہ عقد اتفاقہ مراجعت ایتدیلر ؛ اون درت کمیدن
 عبارت بردونما ہران (عوران) ساحنہ کیتدیلر . وتلسان
 حکمدارینی بارباروسہ بی اشغال ایچون جزایر علیہنہ حرکت
 ایتدیردیلر . فی الحقیقہ خیرالدین رئیس دہ درسعادتہ کلمک ایچون
 حاضر لانیوردی ؛ اسپانیولرک امیدایلہ دکلری کبی بویکی غائلہ حرکتہ
 مانع قطعی اولدی ؛ حاضر لانان تورک دونماسی دریایہ آچلدی .
 وخیرالدین بک طوپلایہ بیلدیکی ہودار مجاہد اتی تلسان سلطانک
 حرکات متجاوزانہ سنی عقیم براق ایچون شہردن چیقاردی ؛
 بر صحرائہ واقع اولان حرب علی المعتاد بربریلرک ہزیمت
 قطعہ لری ایلہ نتیجہ لندی ! وعبدالله کمال رزالتلہ تلسانہ قدر
 قاجدی . شیمدی ینہ چارہ جوی عفو و صلح ایدی . آرمہ
 کیرن رجاجیلر رئیس مجاہدی کوچ حال ایلہ اوتوز بیک آلتونہ
 صالح ایتمکہ ارضا ایدہ بیلدیلر . انجق بواننادہ اندریا مقصدینہ
 قسماً نائل اولمش ومورہ ساحنہ راحتجہ کچوب (قرون)
 حصارینی تحت محاصرہ یہ آلہرق ضبط ایتمشدی . فی الحقیقہ
 قپودان دریا احمد پاشا اوبہاردہ سکسان پارہ سفینہ دن عبارت
 برعثمانی دونماسی ایلہ آق دکزہ چیقمشدی . کاتب چلبی احمد
 پاشا ایچون قرون مدافعہ سنہ «یتیشہ مہدی» دیور ، مع مافیہ

اعتراف ايتلدير ، كه احمد پاشانك شوكت عثمانينهك تعاليسنه چاليشديغي عصيت بهادرانه غير منكر اولمغله برابر ، اندريا دوريانك دكز جيلكيكه رقابته اقتداري يوق ايدى . پاشانك قومانداسندهكى دونمانك بش كونده قطع ايدى جكي يولى اندريا كيجيلرى هر حالده اوچ كونده كيدردي وبونك ايچون ايدى كه : قوجه قانونى سلطان سليمان بيله اكا مقابل اوله جق ذاتك انجق بارباروس خيرالدين اوله بيله جكنى دوشونوب قناعت كامله كتيرمش ومشاراليه عثمانلى قوه بحريه سنك قوماندانلغنه دعوت ايله مشدى .

يوقا ريده سويله ديكمز كى اندريا دوريا بوموسملك اولسون درسعاده كيتمكدن بارباروسه ي آليقويه بيلمش وقرونك ضبطى رولى اوينا مشدى . لكن بارباروسه اوچنى براقانلردن دكلدى . فصل كه : اوزمانك قورصانلى سيد على رئيس محترمك مرآت الممالكنده چوق شكر كه : ضياعدن وقايه ايتديكى :

« دكز يوزنده يورورز ، »

« دشمنى آرار ، بولورز ، »

« اوجمز قوماز آلورز ، »

« بزه خيرالدينلى ديرلر ! » [ۛ]

[ۛ] عنعنات مليه مزى محافظه ، مفاخر جليله مزى تبين و تثبيت ايچون كوكل ايسترايدى ، كه بوتوركيلر بحريه مارشلى حالنده بسته لمش اولسون !

نعمه مجاهدانه سنده دیدکری کبی اونبش تکنه و خیرالدین
رئیسک امریله اسپانیول یاقه سنه کچمشلر، باشدن باشه یاقوب
بیقمشاردی .

مدجلرک افریقایه نقلی . — بربرستان تارینخک صحائف
خون آلودی ایله آشنا اولمایان ذواتک یبانجی عد ایله یه جکری
بو « مدجل » کله سی اسپانیاده انقراض شوکت اسلامیه ایله
متعصبانینه دوشمش اسلامارک اندلسدن افریقایه فرار والتجا
ایدنلرینه ویریلان نام مخصوصدر ؛ شارلکن افکار متعصبانه سنی
صوک درجه یه کتیره رک اسلاماری آتسه یاقق بیله مجازات
کافیه عد اولنه مایجه بر قسم بقیه السیوف بر جسارت مأیوسانه
ایله طوپلان دیلر و صارپ بر موقعه تحصن ایله رک مدافعه نفسه
قرار ویردیلر .

مع مافیه اسپانیانک بتون قوتنه بو قرار یأس ایله مقاومت
ممکن اوله میه جتنی بیلیورلردی . و بربرستان حکومات اسلامیه
سندن استمداد دخی بهوده ایدی . چونکه ذاتاً بو حکمدارلر
حمیت اسلامیه بی منفعت ذاتیه یه فدا ایله مش ایدیلر . بناءً علیه
مجاهد شهرت شعار بارباروس خیرالدینه فریاد جیلر قوشدی .
مشارالیهده کندندن مأمول برسرعت ایله اک مقندر رئیسارک
اداره سنده اوتوز آلتی پارچه قالته (Galleot) بی قوه کافیه
ایله اندلس یالیرینه کوندردی . بو قوتلی فرقه اسپانیا قیسینه

چیقدی. اسلاملر اوزرینه هجوم ایدن قوّه حربیه یی بوزدقدن
صوکره ملتجیلری کیلره یوکلهدی ؛ لکن موجود ملتجیلری
استیعاب و نقله سفائن موجوده کافی اولمادیغندن تورکلر قره یه
چیقاردقلری بیك کیشیلک بر منتخب قوّه مدافعه یی مهاجمین
اوکنه سد ایتیش، و بو وجهله یدی سفراجرا ایله مشلردی. بو
یدی سفر ایله اسپانیادن بودفعه ده جزایر قیلرینه تام ۷۰۰۰۰
مدجل کچیرلش، بو وجهله کرک جزایر شهرینک و کرک جوارک
قوتی تزید، اصحاب صنایعی تقویه اولمش ایدی .
لهین - پول دیورکه :

« بارباروس خیرالدینک ال آتدینی هرایش موفقیتله نتیجه
لنیوردی . نقل اولنان یتیش بیك Moriscoe یعنی مدجل
(اندلس اسلامی) ایله سواحلك بوش محللری معمور ایدلش
واندلس عرب مدنیتک یتیشدیردیکی ماهر زراع و اسپانیا
حکومتک نصل قوللانیله جغندن غافل بولندیفی مقتدر صنعتکارلر
سوویه مدینه و ثروت محلیه یی یوکسولتمش ایدی . جزایرک
دوکیخانه لری، فابریقه لری و ترسانه دستکاهلرنده بیکلرجه عمله
قایناشیوردی . یدی بیك خرستیان اسپیری قلعه لری تحکیمه
ولیمانی تحت محافظه یه آلمغه کیجه کوندوز چالیشیر ایکن ایمپرا-
طورک بونلری قورتارمق ایچون اختیار ایله دیکی هر درلو
حرکات ضایعات مؤله و عظیمه ایله کری یوسکور تلمکده ایدی.»

خیرالدین بکک در سعادت دعوت اولماسی. — سلطان سلیمان قانونی آلمانیا سفرندن شان مظفریتله عودت ایتدیکی زمان شارلکنه قارشی آرتق مهیب و اساسگیر بر حرب پولتیقه سنک تطبیقنی قرار لاشدیرمش و سنان چاوش واسطه سیله بارباروس خیرالدینه : « اسپانیا اوزرینه سفر مرادمدر ، بر یارار آدمکی یرینه قویوب کله سک ، اکر سنک یرینه کچه جک آدمک یوقسه بیلدیره سک که آکا کوره تدبیر ایلیم ؛ » دیمشدی . حالبوکه : حضر رئیسک (چونکه خیرالدین نامیله ذکر ایلهدیکمز محضاعوام ناسیجه اونامله طانیلماسنددر . یوقسه : بتون بو حکایه ایلهدیکمز کونلرده حضر رئیس نامیله بنام ایدی ...) در سعاته کله رک قوه عثمانیه نیک باشنه کچه مه مسی اک بیوک آمال خرسیتیانیه دن معدود اولمق لازم کله جکنی ملاحظه یه بیله حاجت یوقدر . ایشته بوجهله دن درکه : آندریا — دوریا ایله حضر رئیسک (بارباروس خیرالدین) تواریخ اجنیه ده کی نامتناهی حکایه لرینه حاجی خلیفه یعنی کاتب چاپی شو کولنج حکایه یی ده ضم ایدر : « آندریا — دوریا سویله دن (سویل — Sevil) چیقوب جنویزه کلمشدی . خیرالدینی رومه کیتمکدن منع ایچون حیلله سلوک ایدوب وبر پارچه یه آلتی بیک آلتونلق متاع قویوب ویتمش اسیر ایله برابر ، (اسپانیا قرالی جزایره کله جکدر ...)

دیمکی تعلیم ایدوب جزایره کوندردی [۱] ، او یله ایتدیلر ؛
خیرالدین بک حیلله ایدوکنی بیلوب کیمیری بوزار و متریسینی
یاپار کبی ایدوب پارچه اسبابن [یعنی دوریا سفینه سنک محتویاتنی]
آلوب دستور ویردی . وارد قیلرنده « بارباروسه رومه کیتمکدن
فارغ اولدی ! » دیو آندریا - دوریا سوینوب قورون جانبه
کیتدی ... »

بش آلتی صحیفه یوقاریده صورت ضبطنی حکایه ایتدیکمز
ایکی جسیم قاراقده یکریمی کیشی معتبر اصیلزادکان وقپودانلر
ایله هریری بارون ، قونت ، ویتونت وشوالیه رتبه سنی حائز
بزمکیلرک تعییرنجه « یوز یکریمی کیشی بوینی آلتون زنجیرلی
یارار کافرلر » اسیر ایدلمش اولوب حتی ردوسک فتحی اثناسنده
(سنت ژان) طریقک سرداری وردوس (غران متری) اولان ویلیه نیک
اوغلی ده بومیانده بونوردی . بو قدر اکبر وقهرمانان خرسیتیا-
نیه نیک فدیة نجاته ربطاً اعاده سی ایچون همان حکومات خرسیتیا
مراجعت ایتمش وهپسنه یکریمی بیگ لیرا عرض ایله مشاردی ؛
رئیس لیرا سیرایی اعاده ایله مک اوزره ایکن ایشه ینه علما
مداخله ایلیه رک وثائق دینه بولمق داعیه سی ایله اعاده لرینه مانع
اولدیلر ؛ مسئله نیک بوصورتله جریانی کاتب چلبینک « بکیر

[۱] بالطبع « جزایره کوندردی » دیمک « جزایر صولرینه »
دیمکدر ، یوقسه بک آچیق برقورنازلیق اولوردی .

دخی [یعنی رئیس] ویرمه اقدام ایتدیلر .. « صورتندگی
 قیدندن آکلاشیلور . شیمدی دارالخلافه مدعو بولندقلری
 وکیتمک سیاستاً سلامت اسلامیة نامنه لزوم قطعی تحتند
 بولندینی حالد بوقدر اسرایی، بالخاصه ایچلرنده بونجه مقتدر
 وبهادر رؤسای خرستیانیه وار ایکن براقغه جسارتیاب اوله ما-
 یورلردی . اوزمانک عادتجه صوئوق قان ایله قتل ایتمک هیچ
 براهمیتی حائز دکلسهده بارباروس خیرالدین مرحمت قلبیه سی
 سبیلله ، خصوصیه او دورده خرستیانلرک اسلام اسراسنه
 کوستردکلری مظالم مدهشه نک عالیجناب قلبنده حاصل ایتدیکی
 تأثرات و اندیشه یوزندن خرستیانلره قارشی رسمی دینیله
 بیله جک وعادتا تمامیه حال حاضرک « بین الدول حقوق حرب »
 قوانیننه موافق بر اصول حرکت اتخاذا ایله مش و بونی قطعی
 برعزم ایله آنلرده قبول ایتدیرمش ایدی . بناءً علیه اعدام
 فکرینی قبول ایله میوردی .

اووقته قدر خرستیانلر اللرینه کچردکلری اسرای اسلامیة نک
 بورتی، قولاغنی کسرلر و سیکیرینی پارچه لایه رق خاطر و خیاله
 کلز اشکنجه لرله اعدام ایلرلردی . بارباروس خیرالدین جنوه،
 ونديک واسپانیا حکوماتنه رسماً خبر کوندیرمش وشاید بومغایر
 انسانیت احواله دوام ایدیله جک اولورسه کنديسنک ده مقابله
 باشلده بولنه جغنی وبالخاصه دائماً الینه بیکلرجه اسرا کچدیکنندن

وکندیسنک ده خرستیانلر قدر اشکنجه ایجادنده مقتدر
بولندیغندن ایکی طرفجه ده بر قاعده مخصوصه اوله رق الندن
قلنجی دوشن دشمنک اعدام و اشکنجه دن محفوظیتی
طلب ایتدی. آوروپالیلر بالطبع اولو بو خبره اهمیت ویر -
مه دیلر سده بارباروس خیرالدین تطبیقات مقابله یه باشلا نجه
هر طرفدن فریاد استمداد دیولوش، آوروپالیلرک النده کی
اسرای اسلامییه بر حده قدر اولسون اشکنجه دن قورتلش
ایدی. بوتون مشکلات موجودیه رغماً در سعادته حرکتدن
اول بورؤسای خرستیانییه سلامت مملکت ایچون ده قتل ایدلسه
بیك مؤلم مجبوریتله تأسس ایدن قاعده سالفه نقض ایدلش
وخرستیان النده کی بیکلرجه اسرا نك اعدامنه سببیت ویرلش
اوله جقدی. بو ائنده ایسه اسرای اصیلزادکان کندی خرابیتلرینی
حاضر لامقده ایدیلر. بونلر بویوک بر عصیان و فرار پلانی
ترتیب ایتمشلر و بجایه یه کوندردکلری مکاتب خفییه ده جزا یرده
یدی بیك قوتلی خرستیان اسیری بولندیغنی واکر وقت معینه
بر قوه امدادیه ایله مناسب بر موقعه بر سفینه کوندریله جک
اولورسه مجتمعا زندان قاپیلرینی کیجه قیروب چیقه جقلرینی
و شهر ی ضبط ایله یه مه سه لر بیله هیچ اولما زسه تخلیص نفس
ایتمش اوله جقلرینی بیلدیر مشلردی. بومکتوب بارباروسک الینه
چکش ایسه ده واقف اسرار اولدیغنی اکلا تمامق اوزره بجایه

قوماندانك اليه وصوله ممانعت ائتمه مش ایدی. بجایه قوماندانی اسرانك طلبی وجهله کیجه جزایره واصل اولمق اوزره برفرقته کوندرمش ایسه ده کندیسینی کوزله یین جزایر قدرغه سی طرفندن یاقالامش وزندانن اوغرایان قیودانلرده امدادلرینه کلن یوز یکرمی کیشی ایله تهمت فراره مجازاتاً قتل ایدلمشلردر. بارباروس خیرالدین مقتولینك فرار ایتك وشهری باصمق ، اسلاملی قتل ایله مك اوزره مرتب پلانلرینی تفصیل ایله یین ضبط دستلری ایله محرر مکتوبلری صورت مخصوصه ده (جنوه) جمهورینه کوندره رك بو خصوصه ده ، — مشاهیرك ال یازیلری آوروپاچه طانیلدیغندن — تبریه ایله مشدر. بارباروس خیرالدین بو مشکل مسئلهیه ختام ویرنجه جزایر قوماندانلغنه و امور حكومتك تدویرینه اك كوکندیکی یولداشلرنندن خادم حسن آغانی نصب ایله یه رك ترتیب ایتدیکی مکمل بردونما واك منتخب برمعیت ایله درسعاده متوجهاً یوله حیقمشدر .

خیرالدین بك قوتنك اندریا — دوریا دونماسنه نظراً غایت كوچوك اولدیغی معلوم ایسه ده رئیسك یوله کندیسینی آریوب طارادیغنی کوریورز. آندریا — دوریا بو عصرده خرسیتانیت عالمنك جداً بویوك واك مقتدر سیالرندن ایدی. شهرتی دکزلی، قرملری طوتیور، آنی هر حكمدار كندی معاونتنه چاغیرمقده مسابقه ایله یورلردی . بارباروس خیرالدینك درسعاده عزیمتی

تاریخ‌نحده، که ۹۴۰ تاریخ هجری‌سنه و ۱۵۳۳ تاریخ میلادی‌سنه
 مصادف‌در، کړك دوریا وکړك بارباروس خیرالدین آرتق اختیار
 قوماندانلر ایدیلر وهرایکسی‌ده حرب میداننده، زره و سلاح
 ایچنده قوجامش ایدیلر. اندیریا ۱۴۶۸ سنه میلادی‌سنده جنوه‌نك
 پراسیل عائله‌سندن تولد ایتمش، شیمدی آلتمش بش یاشنه کلش
 اولدینی حالدو بو آلتمش سنه‌دن همان الی سنه‌سی حرب
 ایچنده مرور ایلهمشدی. کنج‌لکنده پاپانك محافظلری
 سلکنه داخل اوله‌رق دوق دورینو Urbnis ایله آلفونس‌دی
 ناپولی معیتنده حرب ایتدی. قرق یاشنه دوغرو مسلك
 بحریه‌یه دخول و پك آز صوکره یعنی ۱۵۱۳ تاریخ‌نحده
 جنوه دونماسنك باش قوماندانلغی احراز ایلهدی. دوریانك
 استعداد فوق‌العاده‌سی، فطری مزیات عسکریه‌سی، غیرت
 و فعالیتی آز زمانده امور بحریه‌ده وقوف وسیع صاحبی اولماسنه
 یاردیم ایتمش ایدی. ۱۵۲۲ تاریخ‌نحده جنوه‌ده واقع اولان
 بر اختلال آندریا - دوریانك طرفدارلرینی مغلوب ایله‌نجه
 آمیرال قلنجی فرانسه خدمته وقف ایلهدی؛ و بو خدمته
 بولندینی مدتجه فرانسه‌دونماسی شارلکنه قارشى دائماً اسپانیول
 دونماسنه غالب کچینمش ایدی. آمیرال برآره‌لق وطن معززی
 اولان جنوه‌یی ایادی ظلمه و مستبدیندن تخلص ایتمش و واقع
 اولان طایفه قارشى حکومتك قرالی اولغنی رد ایدهرک اسمنی

جنوه لیلرک خاطرۀ اعزازنده مؤبد قیلمشدر . دوریا رسماً بر حکومت قبودان پاشاسی اولمغله برابر اوزمانک احوال مساعدہ سی ایله کندی حسابجهده بر قورسان ایدی . وقدرغہ لرینی اسلام اموالی یاغما ایدہرک تزید ثروتہ خادم ایدیوردی .

خیرالدین بارباروسہ ساردینیا سواحلی ، آلبہ جزیرہ سنی اوردقدن صوکرہ کیکیلجه یعنی سیجلیایہ کچدی . جنوه قربندہ دخی بر حصاری باصمش و غارت ، تخریب ایله مشدی ؛ بورادن (مسینہ) بوغازینہ اینرکن اون سکز پارچہ یہ تصادفلہ جملہ سنی ضبط ، آدملرینی اسیر ایله یہرک بر نمایش آتشین اولمق اوزرہ شہرک قارشیسندہ بوش سفائی تامیلہ آتشی ویرمشدی . آلمان اسیرلردن آندریا دوریانک یکرمی آلتی پارچہ قوتلی قدرغہ و قالیون ایله قورونہ کیتدیکی اوکرنلش ، بناء علیہ پروزہ یالیرینہ دوغرو یتیشیلیمک اوزرہ شتاب اولنمشدی . حالبوکہ : دیکر طرفدن بارباروسک اجرا آتی دہ جنوه حکومتی طرفندن تام وقتندہ آمیرالہ اخبار ایدلمش اولدیغندن سرعتلہ عودت و برندیزی لیمانسہ التجا ایله دی . بارباروس بونی اوکرتجه آرقہ سندن یکرمی بش پاره سفینہ دن مرکب بر فیلو کوندرمشدی . قورسانلر اصل دشمن دونماسنہ تیشہ مہ دیلر ، لکن دونمادن کری قالمش ناپولی حکومتہ عائد

یدی سفینه‌یه چاته‌رق بشی بادبانکشای فرار اوله‌بیلدیلر سده‌ده
ایکی قطعه‌سنی ضبط ایله عودت ایله‌دیلر .

بو ائشاده عثمانلی دونماسیله قپودان دریا احمد بک‌ده آوارونه
Navarino مواصات ایله‌مش ایدی . ایکی قپودان مراسم
مخصوصه‌ایله ملاقات ایتدیلر؛ بعده قورون اوکنده بعض حرکات
حریه اجرا سندن سوکره دارالحلافته دومن دوغرولتدیلر .
کلیمولی معبرندن مرور مساعده‌نامه‌سی ورودیله بودیار مغربک
پولاد قوللی مجاهدلرینی، اسلامیتک بودست یسار شوکتتی حامل
اولان جزایر دونماسی مرمره‌نک ، بریه‌نک خائن ساحل‌لرینه
هیچ‌ده بکزه‌مین فورطنه‌سز، یشیل کنارلری ایله حوضه‌ماییتک
مائی صولرینه داخل اولدی؛ بوکلنلر ایچنده برچوقلری وطنی
آتشی برکنج قلبی ایله ترک‌ایدوب کیتمش و سنه‌لرجه طرابلسک،
تونسک، جزایرک یاقیچی کونشی آلتنده، چپلاق یالیلری، مخوف
فورطنه‌لری آره‌سنده، زرهلر، سلاحلر، مهیکل دشمنلر ایچنده
بوغوشه بوغوشه صاچلری بیاضلانمش، قلبلری سردلشمش،
طونج رنگلی ناصیه‌لرنده فورطنه‌لره، دشمن قدرغه‌لرنده
سنه‌لرجه کورک چکمه‌لره، کیجه باصقینلرینه و مقابل باصلمالره
عائد برچوق چیزکیلر ترسم ایله‌مشدی !

.....

بارباروسه‌نک منتظم دونماسی جداً عظیم واستانبول خلقنی

حیرت، مسرت و افتخار ایله چالقایان برانتظام و احتشام ایله سرای
بوروننده قانونی سلطان سلیمانک انظار تماشاسی اوکنده لیانه
کیردی آتیلان طوپلرک دومانلری، آلقیش آوازه لری دکزلری
سواحلی طوتیور، هر طرف فیلاندره لر، آلی، یشیلی، صاریلی
سنجاقلر ایچنده یوزو یوردی .

کیمیلر غلطه طرفه پالامار بند اولوب بارباروس خیرالدین
معیتک اقامتی ایچون آت میداننده کی قپودان دریا احمد پاشا
قونانی تعیین اولندی .

دیوان کونی خیرالدین رئیسک بوتون یولداشلی و رئیسلی
ایله حضور شاهانه یه قبوللری مراسمی مصمم ایدی . خیرالدینک
اون سکر مجاهددن عبارت اولان قپودانلری ایله حضوره
داخل اولنجه صره ایله ایملره دیلر، کندیلری ایچون اکبویوک
معامله تعظیمیه اولق اوزره قانونی سلطان سلیمانک آلی اوپه رک
کری چکیلدیله .

مرکز خلافتک، جهانک اکبویوک و شانلی دولتنک بوتون
اعظم محتشمه و مشهوره سی، علماسی، رجال عسکریه و سیاسیه سی
دیوانده موجود ایدی . آنلر ایسه کونشدن یانمش چهره لری
ناصرلی لاری، و بارباروس کی هپسنک ساده جه (رئیس)
عنوانلریله بواحتشامک اورته سنده دورویورلردی لکن پک آز
زمان صوکره بو رئیسلی عثمانلیلغک مقدراتی اللرینه آله جقلر

طور غودلر، اوروجلر، مرادلر عثمانلی تاریخنک و آوروپا تاریخنک
حکائفده مؤید برر محل بوله جقلردی .

ایشته بوجمله دن اوله رق مؤلف (لهین - پول) دیورکه :
« دیوان غلبه لک ایدی؛ عثمانلی ایمپراطورلرندن اک بیوکنک
مجر ب جنراللری و سیاسیلری یابدقلری بهادرانه ایشلری آوروپاده
دیبلره داستان اولمش بواسکی دکر قوردلریخی سیر ایچون
طوپلامش ایدی و بونلرک هپسندن زیاده ، برزمان قومرال
ایکن سرت هوایه ، طالعک تبدلات متادیه سنه مدت مدیده
معروضیتله قیرلاشمش صیق صقاللی و چاتیق کمره قاشلی
اختیارک بلند و موزون اندامنه منجذب اولمش ایدیلر . ایری
ونافذ، آرایجی نظرلی کوزلرنده - که : وقت وقت شدید بر
آتش صاچاردی - بتون دیوان خلقی، کندیلریخی دکرلر اوزرنده
اردولرینک میدان محاربه ده قازاندقلری درجه پارلاق موفقیتلره
مظفریتلره سوق ایده جک فکرک تظاهرات و لمعاتی فرق
ایله دیلر .. »

نیجه قهرمانلر کورمش سلطان سلیمان بارباروسه ایله
رفقاسنک اطوار مردانه لرینه عادتاً مقتون اولمش و بارباروسدن
اوزمان غرب سواحل عثمانیه مزه ایراث خسار ایله یین آندریا
دوریا به عائد ایضاحات ایسته نیجه :

کوزلری پارلایان مدلیلی خضر رئیس :

— پادشاهم ، ديمشدى ، او ۛريفك لاقيرديسمى اولور ،
امر ايديكز كيلرني هوايه اوچورورز . هر طرفده آرايورم ،
بن ياقلاشدقچه اوقاچيور !

سلطان سليمان قورصانك بوشديد و شـجيعانه جوابندن
يك ممنون اولمش ، اك بيوك برطور التفات ايله :
— ۛضر بك ، ديمشدى ، سن بودينك اك ۛيرلى اوغلو سـك ،
بوندن صوكره اسمكى « ۛيرالدين » تسميه ايتدم !

ايشته ۛضر رئيسك ۛيرالدين پاشا اولماسى بو محتشم ملاقات
نتيجه سيدر .

لكن نه اولورسه اولسون و تاريخ بوندن صكره ۛيرالدين
پاشاسنى نصل براحتشام ايله صارارسه صارسين عثمانلى ملتى اوچ
قدر غه سيله تونس ياليلرنده قسمت بلكه ين اوروج و ۛضر قردشلى
نامنى اونو تمايه جقدر .

ۛيرالدين پاشانك حلبه عزيمتى

پادشاه ۛيرالدين پاشايى عثمانلى بحريه سى اوزرينه تعيين
ايتمش وبتون معيته ده معاشلىر باغلامشدى . لكن اويله بر
پادشاهك بيله اصول مشورت و مشروطيته درجه رعايتنى
كوسترن مهم و شايان دقت مثاللردندر ، كه : اوائنده حلب

قیشلاغنده اولان صدر اعظم پادشاهه یازدینی بر تقرر ایله
 خیرالدین پاشانک حلبه اعزامی طلب ایله مش و مجاهد عالیشان
 بیله مراسم حکومتدن مستثنا طوتماق ایسته مشدر . مع مافیه
 پادشاه بو خصوصی خیرالدین پاشایه پک نازکانه تبلیغ ایتش
 و « بروجہ قانون بحر و بر اموری اورایه مفوض اولدیغندن
 کندیسیله ملاقات و مذاکره ایچون طرفزدن استرحامده
 بولمش ؛ کیدوب کیتمه مک ینه کندی اللرنده در .. » دیمش
 ایدی . خیرالدین پاشا ایسه سلامت ملت و تعالیٰ اسلام اوغرندہ
 اویله قیود سفیلہء حسیه ایله باغلامقدن قطعاً عالی بر طبیعتله
 مفطور اولدینی ایچون همان قره طریقیله حلبه عزیمت ایتدی .
 حین ملاقاتده وزیر ابراهیم پاشا بیوک بر دیوان ترتیب ایله مش
 واوزرینه مرتب مراسم استقبالیه و تعظیمیه یی ایفا ایتش ایدی .
 خیرالدین پاشا ابراهیم پاشانک الینی آلوب اوپدی . لکن
 بوحرکتله بیله مراسم تمام اولماشدی . مجاهد عالیشانہ کوستبریلن
 موقع دولتک بتون پاشالرینک و بکلرینک آلت طرفندن ایدی !
 لکن ایرتسی کونی ایکنجی و دهها محتشم یر دیوان ترتیب
 ایدیلهرک دعوت ایدیلوب « طرز عثمانیان اوزره » یعنی کندیسنه
 تفویض اولنه حق رتبہء رسمیه نک مراسم مخصوصه سیله کلنجه
 جزایر بکلربکلکی خلعتی کیدیریلوب آنجق اوزمان پاشالرک
 آلتنه و دیگر بکلربکلرینک اوست طرفنه اقعاد اولندی .

خیرالدین پاشا حلبده آز زمان قالمش امور لازمه یه عائد
ابراهیم پاشا ایله مشاوره دن صوکره یکریمی ایکی کونده استا-
نبوله عودتله ترسانه امورینی درعهده ایله مشدر .

شیمدی عثمانلی ترسانه لرنده فوق العاده بر فعالیت واردی ؛
خیرالدین پاشا هیچ دورمایور ، متمادیا تشویقاتده ، اصلاحاتده
بولنیور و صانکه کنجلمش کورینیوردی !

اسکی قورصانک نافذ نظری ، وسیع و معلوماتلی فکری
هرایشده بر نقصان کوریوردی . عثمانیلر کیلرینی انشاده ،
آنلری اداره ده ، تسلیحده خرسیتانلردن پک کری ایدیلر .
بر نظام مخصوص تحتنده ملت حاکمه دن کیچی یتشدیر یله جکنه
موره نك چوبان رعایاسی طوپلانیور ، قره عسکریله دولدیریلان
سرعتسز کیلر تجربه سز ، امور دریایه غیر واقف قپودانلره ؛
قوماندانلره تسلیم اولئیوردی . پاشا بتون بوشیلری تبدیل
ایله دی ؛ کراسته ، لوازم ، عمله چوقدی . قیش ائناسنده آلمش
بر پارچه قدرغه قوریلهرق بهارده صویه آتلدی ، دونادلدی ،
بو قوته کندیسنک جزایردن کتیردیکی اون سکز پارچه تکنه
دخی ماحق اولوب دولت عثمانیه نك قپودان پاشاسی صفتیه
برنجی دفعه اوله رق سکسان درت کمیدن مرکب بردونما ایله
آق دکزه چیقدی : (۹۴۱ هجری) . ایتالیا یالیلری در عقب
تورک سلاحنک آغرلغی دویدی . خیرالدین پاشا دوغرودن

دوغرویه (مسینا) بوغازینه کیروب (ریجه) یعنی (رجیو Regio) شهرینی باصهرق ذاتاً آوازه و رودی دیولنجه تخلیه ایدلمش اولان قلعه‌یی تخریب ایتدی و برچوق سفائن ایله اسرا آلدی. ایرتسی کونی S. Lucida (سن لوسیدا) حصاری هجوم ایله ضبط و احراق اولمش سکز یوز کیشی اسیر ایدلمشدر. پاشا اسلاملرک اک بیوک دشمنلری اولان مالطه‌لیلره کچرکن بر خفیف درس ویرمک فیکرنده ایدی. بناءً علیه اوطرفه توجه ایتدی.

اسرانک مقداری یدی بیک سکز یوزه بالغ اولمشدی. چترارو Cetraro اوکنده بولنان اون سکز پاره قدیرغه‌دخی کاملاً عثمانلیلرک الینه دوشدی. اسپرلونغه حصاری ده تخریب و مدافعلری اعدام ایدلمشدی. ساده اسپرلونغه‌دن ارکک، قادین اونیک اسیر آلدیغی محرردر. سادینیا جزیره‌سی بوخوف تخریب‌اتدن قورتیله‌مادی؛ کیملر غنائم و اسرا ایله مالامال اولدیغندن جزایره‌کیدیلیرکن هوانک عدم مساعدده‌سی اوزرینه تونسسه تابع بکزت (بزارته) حصاری اوکنه اینمکه مجبور اولمشلردی.

[بوراده آوروپا تاریخلرینک تفصیل ایلهدکلری بر وقعه‌یی نقل ایتمه‌دن منع نفس ایده‌میورز، بارباروسک بوایلک سفری اناسنده ایتالیا‌نک فوندی Fondi قلعه‌سنک ضبط و تخریبی ایچون

اولدجه شاعرانه بر سبب کوستریلیر . بارباروس خیرالدینک
 قورصانلری لیلاً و کیزلیجه ساحله چیقوب بر خیلی مسافه
 ایچریده کائن اولان شهره یتیشمشلردی . چونکه (و سپاسیو
 قولونا) Vespasio Colona نك كنچ و کوزل زوجہ سی ،
 (دوشس ده تراجتو) و (قونتس دی فوندی) اولان Giulia
 Gonzaga جولیا قونزاغای بارباروس خیرالدین هر حالده
 اله کچیرمک ایسته مش ایدی . قونتس جولیا مشهور و «سماوی»
 لقبی (جواننا دو آراغون) ك همشیره سی اولوب بونلرك تصوير
 حسن و آنی اوغرنده ایکیوز سکسان ایتالیا شاعری بهوده یره
 بر قاق لسانك خزائن بلاغتی صرف ایله مشلردی . جولیا ده
 همشیره سی درجه سنده کوزل اولوب «شکوفه عشق» لقبیله شهرت یاب
 ایدی . آوروپا تاریخلرینك بیاناته نظرأ بارباروس بونادره
 جهانی عثمانلی پادشاهنه کتیرمک ایسته یوردی . بارباروسك
 حرکاتی اوقدر سریع ، خفی و نا کھانی ایدی که : قورصانلر
 کوزل جولیا یی همان یتاغنده صویونمش حالیه یا قالایه حق ایدیلر .
 لکن مقتون حسنی اولان بر اسیلزاده آرقه قپودن او کوراتی ده
 اوطه سنه کیره رك مومی الھایی کیجه لك کوملکی ایله بر بار کیره
 بیندیروب قاجیرمغه موفق اولدی . مؤخرأ قونت جولیا
 بومنچیسینی قتل ایتدیرمش ؛ بوده احتمال دلیقانی یه قونتسك

اوکیجه کی حال لطیف پریشانینک حدندن فضله بر جسارت ویرمش اولماسندن ایلری کلشدر . [۱]

تونسه حرکت . — بونی متعاقب تورکلر تونس اوزرینه دوغرودن دوغرویه حرکتی مناسب عد ایلهدیلر .

اوچیوز سنه مقدم الموحدین سلطنتک انقراضندن بری تونس خطه سی (اسکی قارتاج ممالکی) بنی حفص سلاله سنه انتقال ایتمش ایدی . بو تاریخه قدر یکرمی کیشی مقام سلطنتی اشغال ایلشدی ، مرور زمان بوسلاله نک عصیت اسلامیه و اخلاقیه سنی بوسبتون کیدرمش ، حتی صوکنجی حکمدار اولان سلطان حسن تحت سلطنته قرق درت برادرینک قانی جسدینی چیکنه یه رک کچمش ایدی . غدر و ظلمنه علاوه بو آدمک برچوق ده اخلاقسزلقلری واردی . سلطان حسنک برادری رشید اولجه بارباروس خیرالدین ايله درسعاده کلش ، کندیسنه معاش باغلانه رق آلیقونلشدی . بارباروس خیرالدین تونسک بو حالی و سیاست اسلامیه و اهمیت عسکریه سنی پادشاهه عریض و عمیق تشریح ايله خصوصیه حلق الواد قلعه سنک سواحل مغربده دونمانک قیشلایه بیلمسی ایچون اک الؤیریشلی موقع بولندیغنی سویله مش وفتچی ایچون مساعده المشدی .

عثمانلی دونماسی یاقلاشدیغنی زمان ذاتاً سلطان حسندن قطعاً خشنود اولمایان اهالی بارباروس خیرالدینک استقباله

چیقیدیلر ، لکن تونسلیلر حسنک برادری رشیدی ، پاشا ایله برابر ظن ایدیور و موقع حکمداری یه آنی قبوله حاضر لانیور ایدی . پاشا بو وجهله حلق الواده کیردی . سلطان حسن ، پاشانک آوازه ورودیله فرار ایتمش ایسه ده مؤخرأ طقوز میل قدر ایچریده اولان تونس شهرینه کیرلده اهالی بارباروسک یاننده رشیدی کوره مه یجه ایشی آکلادیلر و مدافعه صد دنده اولدیلر . خیرالدین پاشا بونک اوزرینه شهرده بولدیغی بنی حفص طرفدا . رلرینی جبرأ بر قوله یه حبس ایدوب مدافعه ایله ینلری قتل ایتدی . عقانی شیمدی براز باشنه طوپلایه بیلمش اولان سلطان حسن بعض قبائلک ده معاونتی ایله خارجدن قلعه یه هجوم ایتمش ایدی . خیرالدین پاشا همان قلعه قابولرینی آچوب اوزرلرینه اوغرادی . تونسلیلر او چیوز قدر مقتول ویریر ویرمز حاکم لری ایله برابر راه فراری طوتدیلر . بر طرفدن فرار یلرک تعقیبینه چالیشیر ایکن بر طرفدن ده مملکتی رسماً خطه عثمانیه یه ربط و تحریر نفوس ایشلریله اوغراشیوردی . رشیدک برادری عبدالمؤمن طرابلسه چکیلمش ایدی . قیروانده سلطان حسنک طوپلادیغی عسکر اوزرینه ده خیرالدین پاشا اون بیك کشیک بر قوتله و طوپلرینی ییغدیردیغی عربله راوزرینه یلکینلر آچوب صحرا ده یوروده رک هجوم و تکرار پریشان ایله مشدی . آرتق سلطان حسن ایچون معتادلری اوزره شارلکنک خاکاینه ، سلاح

شوکتته التجادن بشقه چاره قالمشدی؛ بوانئاده سلطان سلیمان دخی عجم سفرینه عزیمت ایتمش اولدیغندن پاپا «فرصت زمانیدر!» دیه ایمپراطور شارلکنی اسلامیت اوزرینه حرکته تشویق ایله یوردی. ذاتاً شارلکن ایچون بارباروسک تونسده موجودیتی جنوبی آوروپاده کی نفوذ حکومتی ایچون اک بیوک تهدید تشکیل ایله یوردی؛ فی الحقیقه قورصانلرک اولدن بری جزایرک ساحل قیالری اوزرنده مکان طوتمش اولمالری بر فلاکت ایسه ده دیگر جهتن تونس، موقع جغرافیسنه کوره، بحر سفیدک غرب و شرق حوضه لری آره سنده کی کچیدک عادتاً اختاری اولدیغندن بوموقعی تورکلرک انده براقق صوک درجه موجب تهلیکه ایدی. بتون بومطالعات شارلکنی پورتکیز حکومتک دخی معاونتیه اختیار سفره و سلطان حسنک رجاسنی قبوله اجبار ایله مش ایدی.

۱۵۳۵ سنه میلادیه سی مایسنده اوچیوزی بارچه و قالیون و قدرغه دن مرکب آلتیوز تکنه یه یکریمی درت بیک تفنک انداز ارکاب اولنه رق تونس اوزرینه حرکت اولندی؛ ذاتاً سلطان حسنک اثنای حرکتده آدمی کلوب «بارباروسه یی تونسده عرب عسکری ایله محاصره ایتدم؛ سرعتله یتیشکز!» خبرینی کتیرمش ایدی. شارلکن، ذاتاً کندیسندک ده کوریه جک آیری حسابی اولان آندریا - دوریای بومدهش دونمانک قوماندانلغنه

تعیین ایتمش، دونمانک حامل اولدینی عسکر ایسه آوروپالیرک دیدیکی کبی :

Tlower of Empirial troopes یعنی عسا کر ایمپرا -
طوریه نك اسپانیا، ایتالیا و جرمانیادن تحشیدایدیلن اك جسور،
اك منتظم ومنتخبیرندن عبارت بولمشدی .

مستولیرلر حزیران ابتدا سنده تونس ساحلنه مواصلتله
حاق الواده یقین صولی برج اوکنده قرهیه چیقدیلمر، براز صوکره
آوروپالیرک (غوله تا) دیدکلی و تونس لیمانك آغزینی قاپایان
ایکی متفرق برجدن مرکب بو قلعه تحت محاصرهیه آلدی .
غایت جسیم (سنت آن) نام قاراقه مالطه شوالیه لرینه منسوب
درت جسیم غالی ایله بدنلره یاقلاشدی و کیجه کوندوز کولله
آتمغه باشلادی ، بو حال اوتوز کون دوام ایتمش و غایت قانی
هجوملر، خروج حرکتلی اجرا اولمشدی. تورکلر قوماندانلار
نلری سنان رئیس اوکلرنده اولدینی حالده اوچ دفعه مأیوسانه،
قهرمانانه دشمنك طوپلری و متریسلی اوستنه آتشلر و آلتی
بیك تلفات ویردیرمشلر سده محاصرلرک امدادی علی الدوام
وارد اولدیغندن و قلعه بدنلری انسان بدنلرینه سپر اوله بیله جک
شکلدن چیقدیغندن نهایت تورکلر اصل تونس قلعه سنه رجعت
ایدوب (سنت ژان) شووالیه لری باشلرنده شوایه (قوسییه) اولدینی
حالده خراب برجلره ایمپراطورلق سنجاغنی دیکدیلمر؛ سنان

رئیسك هجوم مخوفی دفع ایدنجه به قدر - واقع اولان یاقه یاقه به
معركة ده - خرسیتیانلر بك چوق مشاهیر و اوج ایتالیان
جنرالی غائب ایتیش ایدیلر . بوئانده تونس سلطانی حسن ده
مهم بر قوتله کلوب خرسیتیانلره ملحق اولمشدی . سلطان حسن
بر چوق مکتوبلر یازهرق شهره کوندروب اهالی بی بارباروس
علیه اغفال و نصیانه تشویق ایله دیکندن مشارالیه کندی
معینده کی تورکلردن باشقه کوکنه جک بر شیئی قالمامشدی .
مع مافیسه بر کره حیت اسلامیه لرینی تجربه ایچون اهالی بی
طویلایه رق دیدی که :

— سزه دشمندن مکتوب کلش ؛ سزه دشمنك فکرینه
اویشسکز ، بونی صاقلامغه حاجت یوق . او حالده سز قلعه ده
اوطورکز ، بن حیقوب شهید اولنجه به قدر دوکوشورم !
بو سوز بردن بره ارباب فسادی محجوب ایتدیکندن
«حاشا، حاشا!» دیمشلر و برابر حرب ایده جکلرینی وعد ایله -
مشلردی . خیرالدین پاشا مجموع قوتی اولان ۹۷۰۰ کیشی ایله
حصاردن چیقدی ؛ متفق دشمن حصاره یوریش ایدنجه راه
هجوملرینه دیکیلدی دوردی ؛ قانلی بر مبارزه میدان آلدی ؛
بوئانده بر مقدار جزایر امدادی یتیشدیکندن ذاتاً مظفریتدن
مأیوس اولان خرسیتیانلر یوز چویرمش ، حتی تورکلرک قلیجی
آلتنده خیلیده تعقیب ایدلمش ایکن تونس اهالیسی مقتضای

مفسدتلری بوان مهمده میدان حربی براقوب حصاره شتاب ایله دیلر. خیرالدین پاشا دشمنک بوزولدیغنی و فرار ایده جک سبب اولمادیغنی اکلاتیق وفراریلری چویرمک ایچون آدمیر کوندردی ایسهده هیچ برفأدهسی اولمادی. اوکون خیرالدین پاشا طوپلرینی قلعهیه چکمهک و حصار داخلنده تحفظه مجبور قالدی. بوغیرمنتظر حالی کورن دشمن متحیرانه موقع هجومه عودت ایتشلردی. ایرتسی صباح پاشا قلعهیه مترسلر علاوه ایتش و بر خروج حرکتی اجرا ایچون چیقاردیغنی جزایر فرقه سینه امداد قصدیه کندیده آرقلرندن چیقمشدی، که برخبر موخش کلدی: تونسایلر شهری براقوب خارجه فرار ایتش، ایچریده محبوس بولان درت ییک فورسدهده قورتاریلوب تورکلره قارشى شهر قاپیلرینی سد ایله مشلردی!

روایات تاریخییه نظراً بو وجهله فورسهلرک سربست براقیلمالری خیانتنی بارباروسک معیتی ضابطانندن اولوب قلعهده محافظ براقدیغنی مهتدی جعفر آغا ارتکاب ایتشدر. مسئله نصل جریان ایتش اولورسه اولسون فلاکت تمام و مکمل ایدی. قوجه بارباروس معیتنده کی قوه جزئییه ایله موقعی ارساللر کی برخیلی زمان مدافعهدن صوکره آیدین رئیس و سنان رئیس وایکی یوز قدر معیتی ایله قره دن (بون) قصبه سینه یوروددی؛ بوراده کندیسینی بکلهین اون بش قدرغه سینه

ملاقا اولدی. لهین - پول دیورکه: «تونس کولنی بحرسفیددن
آیران دیل اوزرنده بارباروس خیرالدینک اثر انشاسی اولان
اوچ قاتلی دیوار آلآن فرق اولنه بیلیر؛ اون بش، یکر می
سنه مقدم بوموقع قازیلیر ایکن اکیوز قدر اسکلت ایله برخیلی
اسپانیا پاره سی، کولله لر، وقیرلمش اسلحه بولمشدن..»

شیمدی تاریخک قاتلی مثاللرندن، امثال عبرت آمیزندن
برینک زمان تظاهری کلش ایدی. دنی سلطان حسن یابدیغی
حرکتله، وتونس اهل فسادی ایسه وطنلرینی بر حکمدار ظالم
وبی حمیتک کیفه قربان ایتمکله ارتکاب ایتدکری خطانک جزای
مدهشنی، همده اک دمیر وجدانلری صیزلاده حق قدر مؤلم
جزاسنی چکه جکوردی: بز تورک، اسلام اولدیغمز ایچون بو
جزانک نصل ترتیب ایدلیدیکنی تعریفده بلسکه هوس مبالغه یه
طوتولور، فضله تهیج ایله رز؛ آنک ایچون تعریفاتی ینه
خرستیان اولان بر مؤلفه، (لهین - پول) ه براقیورز:

«ایمپراطور شارل تمام اوچ کون تونس شهرینی عسکرینک
مظالم حیوانیه سنه ترک ایتدی. بو کونلر شایان نفرت و توکلر
اور پر تیجی شهوات نفسانیه وقان دو که کونلری ایدی. ارکک،
قادین، چوجق بیکرله قتل عام اولندی و بر چوقلری قتلدن
اشنع معاملات ه هدف قالدی. کوزلری دونمش اولان عسکر
غنیمت واسر آنک تقسیمی ائناسنده بر بر یله مقاتله و مجادله ایتدیلر،

بومظالمدن تونسه متمکن خرسیتانلر بيله آزاده قالمادی .
 سوقاقلر مذبحه ومیخانه، خانهلر مقتل ومشتهیاتخانه اولدی! اک
 متعصب، غرضکار محررلربيله ایمپراطور عسکرینک بواجرا آتی
 کال نفرتله یازیور.. غریبدر، که : بویوک ایمپراطورک ایتالیان ،
 اسپانیول ، جرمان عساکر منتظمه سی ، شوالیهلری تونس
 سوقاقلرنده سلاحسز ومعصوم اهاالییه قارشى اک حجاب انکیز
 تعرضلرده بولنور، قتل عام ایدرکن سلطان سلیمانک صدراعظمی
 ابراهیم پاشا وحشی دیدیکمز آسیای صغری اهاالیسندن مرکب
 اردوسیله وبر مظفر صفتیله بغداد وتبریزه کیریور ، حالبوکه :
 بوتون بوائئاده تک بر کیشینک قتل ایدلدیکی، تک بر خانهک
 دوچار تعرض اولدیغی کورونمه یوردی !..»

تونس قلعه سنک ضبطی مستئنا اولمق اوزره شارلکنک
 او قدر مفتخر اولدیغی سفر تاممیله نیجه سز قالمشدر . اغستوس
 افرنجی ایچنده تونسدن کیسنه بینمه دن اول سلطان حسن ایله
 بر معاهده یامش سلطان حسنک کندیسنه سنوی ویرکی ویرمه سی،
 حلق الواد قلعه سنک اسپانیایه ترکی، خرسیتان اسراسنک تخلیه سی،
 تونسلیلر طرفندن قورصانلغک الغاسی ، هر سنه بر طاقم هدایا
 تقدیمی شرائط اساسیه یی تشکیل ایتکده بولمشدی . لهین -
 پول ، دیرکه :

«لکن بومعاهده یه کاغد اسرافندن باشقه بر نام ویردمه یه -

جکز . تخت حکمداری به عودتی ایچون حسنک قوللاندیغی
 وسائطه مراجعتہ تنزل ایدن ، خرستیان سلاحیہ اسلام قاتی
 دوکن ، اسلام عصمتخانہ لرینی اسپانیول عسکرلرینک مشتیاتنه
 کشاده قیلان و پترست اسپانیایہ خراج ویرن براسلام حکمدار
 رینک مقام حکومتی محافظہ ایدہ بیلمه سی ممکن دکلدی . شیمدی
 متبوعی بولندیغی اہالی ا کا توکلری اورپہرہ رک باقیور ، درین بر
 کین و غرض حس ایدیوردی و بو وطنداش ، دینداش دشمننه
 قارشی اولان بوکین و تہور اودرجہ بی بولمشدر ، کہ : سرخوش
 اسپانیول نفرلرندن برینک چکوب کوتورمکہ چالیشدیغی برکنج
 عرب قیزیغی حسن قورتارمق ایچون مداخلہ ایتدیگی زمان
 بدبخت چوجق بوتون تہوری ایلہ و کوزلرندن یاشلر آقہرق خائن
 وطنک یوزینہ توکورمش و جهانده ہر فلاکتک کندیس ایچون
 آنک حمایہ سنہ عرض افتقار ذلتندن خفیف اولدیغی باغیرمشدی !
 حسن اسپانیوللرک حمایہ سیلہ بش سنہ قدر تحتندہ اوطورمغہ
 اوغراشمش ایسہدہ بومدت اثناسندہ بوتون مملکت سلاح بدست
 عصیان ایدی . عساکر ایمپراطوریہ نافلہ یرہ اوغراشیور ،
 آندریا - دوریا سواحدہ برشی یاپہمایوردی . نہایت ۱۵۴۰
 تاریخ میلادیسنده اوغلی حمید طرفندن خلع ایدیلوب کوزلرینہ
 میل چکیلدی ؛ و بوفلاکت ، نفرت عمومیہ ایچندہ ا کا جزای
 کافی کورولمہ دی بیلہ .

سواحل حالا قورصانلرک یدشوکتده اولوب پک آز
صوکره غوله تا (حلق الواد) دن دخی اسپانیوللرک سورومله لری
مقرر ایدی .

بونکله برابر شارلکن بوقانی موفقیتک مسرت و فیخرینی
انجق برقاچ زمان طاشیه بیلدی . خیرالدین پاشا (بونه) ده بولدیغی
اونبش کیسی ایله جزایره موصلت ایدوب شهر اهالیسنک حار
وصمیمی براستقبانه مظهر اوله رق اولاد و عیالیه کوروشدی .
لیانده و مراد رئیس قومانداسنده کی دو قوز سفینه یی سرعتله
دوناتدی ؛ بونلره جزائر تکنه لرندن سکز قطعه سنی دها علاوه
ایده رک اوتوز ایکی سفینه دن مرکب بردونما وجوده کتیردی .
شارلکن تونس محارباتی ایله مشغول ایکن براز اول اکیوز
کیشی ایله میدان حربدن آریلان قورصانک بویه عادتاً قوتلی
بر فیلو ایله کوکدن اینمش کبی دکزه چیقاجغنی قطعاً امید
ایتمزدی ؛ او ذاتاً آرووپایه «بربریه یی باشند باشه فتح ایتدم ،
بارباروسه یی اولدیردم !» دیه مغرورانه خبرلر کوندیریور ، کلیسالرده
اینلر اجرا اولئیور ، بویوک شاعرلر ظفرنامه لر یازارکن مشهور
رساملرده مظفریات واقعنه نک صفحاتی ترسیم ایچون اوغرا -
شیوردی !

تونسدن حرکتک اون بشنجی کونی بارباروس خیرالدین
بوتون تکنه لریله دکزده ایدی . مایورقه اطه سنه اوتوز میل قدر

مسافه ده دمیرلی ایکن قلعه سندن بر چوق طوپلر آتلیوردی :
 واحتمال بورایه واصل اولان مظفریت خبرلرینک شنلکی ایدی .
 بونی بارباروس خیرالدین آکلاماش دکلدی؛ چونکه «آتک»
 اتک دیشدی، بو طوپلرک سسنی اصل صوکره دویارسکز! . پاشا
 دمیر یرندن حرکت ایتدیکی صروده تصادف ایتدیکی ایکی
 اسپانیول پارچه سنی ضبط ایتش وایچندن چیقان برطاقم تونس
 اسرای اسلامیه سنی تخلص ایله مشدر . بالمقابل پارچه لر مرتباتی
 زنجیره اورولمش . وپارچه لر احراق اولمشدی .

صوکره مینورقه جزیره سنک Mahon (ماونه) قلعه لیمانه
 توجه اولندی؛ لکن یولده سنجاقلر باندیره لره تبدیل اولمش ،
 قورصانلر خرسیان قیافته کیرمش، وعادتا هر کورنک شارلکن
 دونماسدن برفرقه ظن ایده جکی اشکال و ترتیبات آلمش ایدی .
 بو حال ایله قلعه یه یاقلاشینجه (ماونه) قوماندانی تورکلری تونسدن
 عودت ایدن مظفر دونمانک برفرقه سی ظن قویسیله و مسرت
 طوپلریله سلاملادی . براز اول ایکی پورتکیز قالیونی بونلری
 کورمش و مساعد برهوا اولدینی ایچون فرار ایده بیلمشلردی .
 قلعه نک سلام دوستانه سندن قپودانلر فیلوی نافله قورصانلره
 بکرتدکلرینی ظن ایله یهرک تکرار لیمانه یاقلاشوب دمیرله دیلر .
 رسم خوش آمیدی یی ایضا ایتک وایمراطور جنابلرندن خبر
 صورمق ایچون قلعه دن کوندریلن برهیئت، بی خبرانه کیلره

کنجه توقیف اولندیگی کبی همان او آنده پورتکیز قالونلرینه
کوندریلن ایکی قدرغه :

— کلک سزی بارباروس ایسته یور !

دیجه حریفلر شاشیروب قالدیلر. ایکیسی ده ضبط ایدلدی،
ایچندن طقسان نفر اسرای اسلامییه قورتارلدی. قلعه تخریب اهالی
اسیر، اموال غارت اولندی. بعده مایورقه قلعه سی و سواحلی ده
باشدن باشه یاقیله رق و آلتی بیک اسیر آلنه رق جزایره عودت
اولندی .

ایمپراطور شارلکنک آوروپایه اسکی مصالیر قهرمانلرینه
یاقیشه حق حشمت ودارات ایچنده مواصلتیه برابر مایورقه
ومینورقه فلاکتلری خبرینک واصل اولماسی ایمپراطوری
صوک درجه اغضاب ایتمش وبارباروس خیرالدینی اولو، دیری
طوتمق ایچون آندریا - دورویایه اوامر لازمه ویرمشدی .
بومشهور آمیرالکده قرق پارچه قوتلی قدرغه ایله دائمی بر حرکت
متحریرانه ده بولندیگی تاریخده کوریلورسه ده بیلم نصل
اولیور، او اتاده خیرالدین پاشا فریح و فیخور جربه یه اوغرایه رق
در سعاده مواصلت ایدیور !

پولیا سفری . — خیرالدین پاشانک در سعاده مواصلتنده
پادشاه ده هنوز بغداددن کمش ایدی ، حضوره چیقوب مظهر
التفات اولدی . سلطان سلیمان همان ایکی یوز پارچه تکنه

قوردیرماسنی و اینلک بهارده پولیا سواخانه عزیمتک مقرر اولدیغنی امر و اخطار بیوردیلر . عثمانلی ترسانه‌لری ایکوز پارچه تکنه‌نک شامت انشاسی ایله چالقالاندیغنی ائنده پاشا اوتوز پاره غایت سریع السیر قالیه و قدرغه ایله دکره چیقمش ، پولیا یاقه‌سنه کچهرک برطاقم قلعه‌لری تخریب و غارتدن صوکره سالم و غانم استانبول لیمانه کیره‌رک سفائنک انشاسنه نظارته باشلامشدی . شیمدی بوتون دونما حاضر لائمشدی . لطفی پاشا دونما سرداری نصب اولوب خیرالدين پاشانک تحت قومانداسنده یوز اوتوز بش پاره قدرغه ، باشرده سائر نقایه سفائنی ایله ایکی یوز سکسان پاره‌یه بالغ اولان غایت جسم دونما طقوز یوز قرق اوچ ذی الحجه سنک غره‌سنده بر جمعه ایرتسی کونی درسعادتدن آق دکره متوجهاً حرکت ایله‌دی . بو آنه قدر کلیولی بوغازندن بودرجه قوتلی برعثمانلی دونماسی چیقمامش ، بودونما ایچون ممالک شاهانه محال مختلفه‌سندن ساده اوتوزبیک کورکچی کلشیدی . طقوز یوز قرق درت صفرینک بشنجی کونی قانونی سلطان سلیمان اردوسیله برآ اولونیه صحراسنه ایندیکی زمان دونمائی اوراده بولدی . انجق بو ائنده مصردن کله‌جک ذخیره‌کیلرینی سالماً کتیرمک ایچون آلتمش پارچه قدرغه ایله خیرالدين پاشا او طرفه عزیمت ایله‌مش ، لطفی پاشاده بوش دورمش اولماق ایچون پولیه یعنی ایتالیا یاقه‌سنه کچوب بر قاج

قاعه باصممش وقاعه لری تخریب ، اموالی غارت ، اهاالیسنی اسیر
ایتمشدی . وندیکک قرق قدرغه سی کورفزه [یعنی قورفو
جزیره سی لیمانده] یاتمقده اولدیغندن بارباروسک بو وجهله
غیوبتندن بالاستفاده ادریاتیقده و مسینه ده یاتان فرقه لره ملاقی
اولق اوزره چیقوب کیدرکن لطفی پاشا دونماسنه مصادف
اولدیلر ؛ واقع اولان مصادمه ده ایکی کیملری غرق وایکیسی
ضبط اولندی . باقیسی تکرار کورفزه کیردیلر .

وندیکیلر برمدتدر دوات عثمانیه ایله باریشیق بولنور ؛
حتی هر معامله لری منزله و واقع اولورسه ده بعض اسباب
علیهلرنده غضب پادشاهینک فورانه باعث اولمشدی . مقدا
کلیبولی ترسانه کتخداسی علی رئیس اون ایکی سفینه ایله دونمایه
التحاقه کیدرکن کورفز (قورفو) اوکندن مروری ائناسنده
اوراده بولنان آندریا - دوریا فرقه سی طرفدن دوچار هجوم
اولمشایدی . [آوروپا تاریخلری نام یاقسوس جزیره سی اوکنده
واقع اولدی دیرلر] . حرب باشلادی . ایکی طرفک قوتلری
آردسنده کی نسبت تصور ایدیله مه یه جک قدر آز ایسه ده تورکلر
بوخبرسنز باصقینه قارشى صباحدن اقشامه قدر غایت شدید
وقهر مانجه بر مقاومت کوستردیلر .

لکن نهایت کلیبولی قدرغه لرینک اکثریسی یاندی ، ایچنده کیلرده
یا اسیر ویا شهید دوشدی . بومدید صاواشده حربی بالذات

اداره ایدن آندريا - دور ياده ديزندن يارالانمش ايدى .
 ينه بو جمله دن اوله رق موخرأ كليولى كتيخدا سى اولان
 بوستان رئيس لطفى پاشا طرفندن وظيفه سفارتله قورفويه
 كيتمكده ايكن درت جسيم ونديك سفينه سى اوستلرينه كلوب
 تسليم اولمالريني تكليف ايتدى . بوستان كتيخدا ونديك
 قپودانلرينه « بزالچى يز، الچى به بويه حركت هيچ بر ملتده
 واقع دكلدر. » ديمشسه ده قپودانلر اصرار لر نده دوام ايتدكلرندن
 مجلسده حاضر بولان بر كنچ تورك يردن فيرلايوب « لاف
 آكلاماق ايسته ينلره نه ايجون آكلاتمغه چاليشورسكنر ؛
 آنلرك مقصدلرى بللى، بويه نامردلره تسليم اولمقدنسه جمله شهيد
 اولنجه يه قدر دو كوشه لم! » ديه هر كسى غليانه كتىروب بوتك كى
 درت بويوك دشمنيله محاربه يه باشلامش ونهايت ضبط اولندقده
 بوتون افراد وضابطانى غدارانه قتل، كى ايسه اوراده غرق
 اولمشدر ؛ انحق افراددن صاغ قالان و بر تخته اوزرنده دالغهلر
 آره سنده چالقانان بر كنچ بر مدت صوكره عثمانلى سفائنندن
 برى طرفندن قورتاريله رق لطفى پاشايه كوتورلدى . پاشاده
 وقعهي ركاب هايونه عرض ايدنجه آرتق ونديكليره عائد اولان
 قورفونك محاصره سى فرمان اولمشدى . بناءً عليه دونمانك
 بويه ياقه سنه امرارندن دخى صرف نظر ايدملك لازم كلىدى .
 قورفو آطه سنك يوز قرق پارچه قريه سى خاك ايله يكسان

ایدیلوب اصل قلعه سی بر محاصره شدیدہ آلتہ آلتش ایسہدہ ہنکام
 شتاک ودریا موسمنک مروری و بعض اسباب سائرہ دن دولای
 سلطان سلیمان محاصره نک ترکیلہ باشقہ بر زمانہ تعلیقنی فرمان
 ایتدیلر . سردار لطفی پاشا ایلہ خیرالدین پاشا حتی فرمان
 پادشاہی یہ اعتراض ایلہ « بو قدر مصرف و بو قدر زحمت
 چکیلمشدر . بویلہ بلا فتح ترک اولنق جائز دکلدر . . »
 صورتندہ ممکن اولہ بیلن اصرار دہ بولندیلر سہدہ پادشاہ فکرنندہ
 ثابت قالمش بونکہ برابر بوتون قہودانلری ورؤسای عساکری
 مکافاتہ مستغرق ایلہ مشدر . لطفی پاشا ایلہ خیرالدین پاشا دونوشدہ
 کفالونیہ آطہ سنہ عسکر چیقاروب باشند باشہ غارت ایتدیلر .
 فی الحقیقہ قیش بورالری ، یا غمورلری ایلہ کلشیدی ؛ دکر دہ
 دونما ایچون بارنق ممکن دکلدی ؛ لکن بارباروس خیرالدین دہ
 بویلہ قولای ، قولای دشمنک یاقہ سنی براقہ حق آدملرہ
 بکرہ مزدی . قور فوعدم موفیقیتک آجیسنی ہر حالہ چیقارمق
 ایستہ یوردی . بناءً علیہ دونمادن متون دہ آلتش قطعہ قدر غہ
 انتخاب ایدوب قیشین دیشاریدہ قالدی . لطفی پاشا دونمای
 در سعادت لیمانہ صوقار ایکن خیرالدین پاشا چوقہ آطہ لرینی
 اورمش ، اکنہ (اجینا) آطہ سنک متین حصارینی درت کوندہ
 ضبط ایلہ درت بیگ سکز یوز اسیر آلوب بولدیغی اموالی غارت
 ایتمشدی . اوچنجی اولہ رق ضبط ایدیلن مرتد جزیرہ سنندن

دخی ایکی بیک اسیر ایدینلمشدی . شیرا ، اشکیروز ، ستوس
دخی عین حاله دوچار اولدیلر؛ الحاصل بارباروس قسم اعظمی
وندیکک Venieri ونیهری ، Gripsi غریپسی ، Pisani
پیزانی ، Quirini کیرینی کبی اک اصیل فامیلیالرینک حکم
ایتدیکی بوتون آرشیپلی عثمانلی حکومتنه ربط ایلمه مشدی . کاتب
چلبی دیرکه :

« بیک قیزویک بشیوز اوغلان ودرت کره درتیوز بیک
آلتون جمع اولدی . سائر اموال غنائم بوقیاس اوزره ایدی . »
بارباروس خیرالدین بوخزائن ایله در سعاده عودتنده بک
بویوک التفات ایله قارشیلانمشدر . پاشانک ورودینک ایرتسی کونی
پادشاهک الینی اوپمکه کلهسی رسمی بک محتشم اولمشدر :
اوکده کی آل کیمش ایکیوز کنج ارکک اسیرک اللرنده
آلتون ، کوموش صراحیلر و قدحلر و آنلری تعقیب ایله ین دیگر
اوتوز اسیرک صیرتنده برر طور به آلتون دها صوکره کلن
ایکیوز کیشینک هر برینک اوموزنده برر کیسه اچقه اولوب اک
صوکره کلن بیک بوینی باغلی اسیر دخی برر طوپ چوخه
طاشیورلردی ! . . .

بوسنه سلطان سلیمان وزیرایه یوزاللی سفینه حریبه انشاسنی
امر ایلمه مشدی . قیش هان بیتمش اولدینی حالده سفائن مذکوره
اتمام ایدیله مه دی . پادشاه ایسه بارباروس خیرالدینه هان دکره

چیقما سنی امر ایله مشدی. لزوم مجبر اولمادقجه نقصان قوتله دکره
 قالقمقلغک محاذیرینه بالطبع هر کسدن فضله آشنا اولان و چار-
 پیشه جنی قوتی درهمنه قدر بیان بارباروس بویله سرن پرن
 چیقماغی ایسته مه یوردی؛ وزرا ایسه مشکل بر موقعه ایدیلر.
 بارباروسک قیشین دکرده بولماسی حسیه کندی لرینه احاله
 ایدیلن انشای سفائن ایشنک لازم کلدیکی سرعتله کوریه مه دیکنی
 پادشاهه افهامدن صوگ درجه قورقورلردی. بناءً علیه: پاشانک
 فطرت فداکارانه وحیت بهادرانه سنی جوشدیرد حق بر یالان
 اویدرمقدن چکینمه دیلر. اولجه صالح رئیس یکریمی خفیف
 قالته ایله دکره چیقوب مصردن کله جک هندوستان امتعه سنی
 حامل سفائنی سالما استانبوله ایصاله مأمور اولمشدی. وزرا
 خیرالدین پاشایه آندریا - دوریانک قرق پارچه سفینه ایله بوندن
 خبردار اولوب کریده عثمانیلری چویرمک ایچون انتظار
 ایتدیکنی سویله دیلر. بوخیرالدین پاشایی جان آوندن اورمق
 ایدی. اک وفاکار، اک قهرمان، اک اسکی برارقه داشی اولان
 صالح رئیس آز بر قوتله اک بویوک دشمنک بوصوسنه یاقلاشمغه
 براقق! ممکن دکل؛ پاشا کیسنه آتلادی، حاضر لانه بیلمش
 اولان قرق پارچه قدرغه یی استصحاباً آق دکره چیقدی. باقی
 طقسان پاره کمی ده ایلك بهارده اتمام ایدیلوب کوندریله جک
 ایدی. [۹۴۵ سنه هجریه محرمک طقوزنجی کونی] اوج بیك

یکچری، قوجه ایلی بکی علی بک، تکه بکی حرم بک، صیدابکی
 علی بک، علائیه بکی مصطفی بک معیتلریله برابر ایدیلر.
 امروز جزیره سنده اولجه باتمش اولان کئی داخنده کی اون
 یدی طوپ چیقاریلوب (اشکاتوز) جزیره سنه مواصلت اولندی.
 اشکاتوزک قلعه سی بر قیا اوزرنده غایت متین و لیانی محفوظ
 اولدیغندن چوقدن بری خرستیان قورسانلرینه ملجأ اولیوردی.
 موقعک مساعدده سزلکنه منی قلعه نی دوکمک ایچون طوپلریدی
 میل مسافه قره دن نقل ایدیلرک آلتی کون آلتی کیجه بومباردمان
 ویدنچی کونی هجوم ایله فتیج اولندی. شاربده تلف اولان لردن
 باشقه بورادن اوچ بیک سکز یوز اسیر آلدی. بو ایشلرله
 اوغراشیایر ایکن در سعادتن طقسان کئی واصل اولمش، دیکر
 جهتدن صالح رئیس ده یکر می کیدن عبارت فیلوسی ایله یتیشمشدی.
 مجموع سفائن یوز اللی یه بالغ اولیور سده استانبول ینه قصور
 ایتمکدن بری اوله مامش، کلن سفائنک مهماتی و کورکیلری
 نقصان بولنشدی. خیرالدین پاشا بزه بر چوق مظفریتلر غائب
 ایتدیرن بواعتیاد سقیمه تهورله وغالیئتک عددده کی کثرت دکل
 عددده کی مکملیت ایله قازانیله جغنه قانع بولندیغندن بونلردن
 اون ایکی قطعه سنی بوشالدوب بونکله دیکر لرینک نقصانی اکمال
 ایدرک بوش سفائی کلیبولی یه اعاده ایتدی. بوتون جزائر
 صغیره و کبیره دولاشیلهرق جمله سی اداره عثمانیه یه ربط ایدلدکن

واستانبوله یدی کمی مال غنائم کوندردلکدن صوکره کریده
توجه اولنمش ایدی . یولده غایت جسمیم پارچهیه تصادفله طوپه
طوته رق بر مدافعه شدیده دن صوکره یدکه آلدیلر .

کریده مواصلت اولندقدده محاصره آلاتک عدم موجودیتی
حصون جسمیمه تعرضه مساعد اولمادیغندن بر هفته ظرفنده
جزیره نك اوچیوز پاره قریه سی وغیر محفوظ واقعی تخریب،
غارت اولندی . وبو مدتده دونما بو جزیره جسمیمه سواحلی
بر بویوک دوار فورطنه کی دور ایتمش واون بش بیك اسیر
آلمش ایدی! هوالر صوکره درجه کسب حرارت ایتشدی؛ بحر
سفیدک بوجهاتنه مخصوص برنوع سام ایلی اسیور وکورکیلری
پک زیاده زبون ایله یوردی؛ بناءً علیه ایلیکی (هلیکه - هالکی)
آطه سنه واریلوب براز استراحتدن صوکره استانکویه اینلدی؛
بوراده آق دکر قورصانلرینک کوچوک تکنه لری بوزولوب
قورصانلر سفائن سائره یه توزیع اولندیلر. آطه لردن وآناتولی
قییسندن کورکچی اتمام اولندی، آغریبوزدن زخیره آلدی؛
آغری کیلرده یاغلانندی .

ایشته بوئانده اسپانیا ، پاپا ، ونديک ودول سائره قوای
متحدہ سنک پروزه یه هجوم ایتدکلی خبر آلدیغندن
هان اوطرفه دومن دوغرولتدیلر . خیرالدین پاشانک مقدا
کشف ایچون کوندرمش اولدیغی یکریمی خفیف پرکنده دن

عبارت کوکلی فیلوسی عودت ایدوب دشمنك زانطهده قرق
پاره چکدیریر قره غوللرینی کورمکه دوندکلرینی سویله دیلر .
سرعتله حرکت اولندی؛ دشمن قره غولی ده آندریا - دوریا
تورك کشف فیلوسنك ظهورینی بیلدیرمش، بوندن بارباروسك
یقینده اولدینی آکلاشیله رق برخیلی اوغراشدقلری حالدده ضبط
ایدهمه دکلری پرهوزه یی ترك ایدوب قورفویه کیتمش ایدی .
بارباروس بلا پروا شماله چیقدی وزحتسزجه پرهوزه لیمانه
کیردی؛ محاصره اخیره دن خراب اولمش قلعه یی تعمیر ایتدیردی .
بو ائنده دشمن ده کندی ترتیباتیله مشغول ایدی . متفقین
قوماندان عمومییسی آندریا - دوریا اولوب قاپللو ایله عزیمانی
نامنده کی ایکی مشهور قوماندان ده پایاوندیک دونمالرینك آمیرالی
ایدیلر .

پرهوزه اوکنده حرب ایده جك ایکی دونمانك قوه حربه .
لرینی نظر مقایسه یه آلیر ایسه ك کوریرزكه : عثمانلی دونماسنه
نظراً دول متفقه دونماسی برقاچ مثلی قوتلی ایدی .
بحریه تاریخلری متفق دونمای آلتیوز پارچه دن عبارت
اوله رق کوسترمکده وبروجه آتی تعداد ایله مکده در .

قدرغه	قالیون	
۵۲	۱	جنوه حکومتك
۷۰	۱۰	وندیک حکومتك

۳۰	۰۰	پایا حکومتک
۱۰	۰۰	سن ژان شوالیه لرینک
۰۰	۸۰	اسپانیه و پورتیکز حکومتلرینک
۰۰	۴۹	حکومات سائرہ خرستیانیہ نک
۱۶۲	۱۴۰	مجموعی

بونلر التمش بیک کیشی یی وایکی بیک بشیوز طوبی حامل
ایدیلر [لهین - پول] .

بو ۱۴۰ قالیونک وندیک باندیره سنی طاشیان ۱۰ قطعہ سی
قرون وسطادہ (قاراقا) نامیلہ مشہور اولان سفائندن اولوب
ہر برینک داخلندہ ایکیدیک محارب موجود بولندیفی درخاطر
اولنورسہ دشمنک کثرتی حقتدہ بر فکر حاصل ایدیلہ بیلیر .

خصوصیلہ ۱۶۲ پارہ یہ بالغ اولان قدرغہ لردہ عثمانلی قدرغہ
لرینہ نظراً بویوک ، متین وندیکیلرہ خاص برطرز معماریدہ
بنا اولمشلردی . بوجسیم سفائن حربیہ یی آلتی یوزہ ابلاغ ایلہ یین
دیگر کوکلو و قورصان ، نقلیہ و سائرہ کبی سفائن صغیرہ یی داخل
حساب ایتمکہ حاجت مس ایتمز .

بو قوۃ مہییہ نک قارشیدسنہ دورمغہ مجبور اولان خیرالدین
پاشا قوماندہ سندہ کی عثمانلی دونماسی ایسہ چکدیری و بوکا مائل
سفائن خفیفہ دن مرکب اولمق اوزرہ انحق ۱۲۲ قطعہ یہ بالغ
اولہ بیلیوردی . عددجہ اولان بو تفاوت عظیمدن صرف نظر

اوانسه بیله عثمانلیلرک کیملری متانت و جسامتجه ده دشمنلرینک
مادوننده ایدی. معلوم اولدینی اوزره عثمانلیلرک ایلک اسفار
بحریه لری انکلتزه، پورتکیز، اسپانیالیرکی ابجار محیطه سوا حلقده
وقوعه کله یوب مرمره و آطه لر دگری کبی کیرینتی و حیقیندیی
چوق و دائما متحول روزکارلره معروض تهله کیلی مواعده
وقوعه کلش اولدیغندن غایت خفیف و اکثریا کورکله متحرک
اولوب بوکی مواعده سیروسفره صوک درجه ده الویریشلی
بولنان چکدیری و عثمانلی لره مخصوص خفیف قدرغه لری انتخاب
ایله مشلر بواسفار بحر محیطلره قدر اوزادینی و قتلرده ده یوکسک
قالیونلرک اغیر آرمالریله اوغراشمی هر وقت مألوف اولدقلری
حرکات سریعه بحریه ایله توفیق ایده میوب سنجاقلرینی ینه او
خفیف قدرغه لرک کوندرلرنده طاشیمشلردی. بناء علیه کندیلر-
ینک اغیر کیلردن متشکل دونمالره غلبه ایچون طوبخیلقده
مهارتلرندن، مناسب مواعده سرعتله مانوره حرییه اجرا سندن
ورامپه وقوعنده — دائما دشمن کیسی کندیلرندن فضله
افراده مالک اولدینی ایچون — اوشهرتکیر عالم اولان صولت
وشجاعت بهادرانه لرندن باشقه کوکنه جک شیلری یوقدی .
تاریخ عالم باشند باشه قاریشدیریلیر ووقایع مشهوره حرییه تدقیق
ایدیلیرسه چوق دفعه ایکی اردودن ایکی دونمادن فضله قوته
مالک اولانک قوماندانی طرفندن ایدیلن خطالرک قوتک مقدا.

رنده فضله لق یاردميله تصصیح اولندیغی کوریلور. لکن عثمانلیلر — خصوصيله محاربات بحریه ده — هیچ بر زمان عثمانلی دونماسی دشمن دونماسيله قارشیشمش ایسه مقداری دشمنککندن پک آز بولمشدر. بوکا علاوه دشمن دخی اک ماهر قوماندانلره مالک ایدی. بناء علیه پرهوزه محاربه سنده عثمانلیلرک مهارت حربیه، جسارت قلبیه دن باشقه کوکنه جک برشیلری یوقدی؛ بوخصوصلرده وقوع بوله جق اک کوچوک بر نقصان یاییله جق اک اهمیتسز بر خطا بر نتیجه فاجعه حاصل ایده بیلیلر ایدی. بو دونمانک کنديسنى ماکنه کبی سرعت وانتظام ایله وبرعزم قوی وشجاعت وسرعت انتقال ومهارتله قوللانہ جق دست قوی به احتیاجی واردی؛ شکر که قوجه بارباروس بومزیاتی مع زیاده جامع ایدی. الحاصل پرهوزه محاربه سی شجاعتک کثرته، مهارتک قوته قارشی آچدیغی قانلی بر مبارزه اوله جقدی.

۹۴۵ سنه هجریه سی جمادی الاولاسی غره سنده دونمای هایون پروهزه لیماننده یاتمقده ایکن متفقین دونماسی کثرت وقوتلرینک ویردیکی غرور بی نهایه ایچنده غالبیت مستقبه لرندن امین اوله رق لیمان خارجه ایکی میل مسافه یه کلوب دونمای تضییق ایتمک تشبث ایتدیلر. فی الحقیقه بو غروری حس ایتمه لرنده حقلری ظاهر ایدی؛ چونکه هیئت ظاهره لری، نسبتندن خارج قوتلری عثمانلیلره بيله یکنظرده درونی براندیشه ایراث

ایله مشدی. کوچوک برچوجغک بش مثلی برپهلوانله دوکوشمکه
باشلامازدن اول اندیشه ناک اولماسی طبعی ایدی !

خیرالدین پاشایه کلهجه انک ایچون بوفرکک اهمیت یوقدی،
اودو کوشه جکی دشمنی چوق کره لر دنه مش ، بوتون ماهیتی
و مهارت حربیه سنی اوکرنمش . بونک ایچون حربه ایلک
کورشدده قرار ویرمشدی. مع مافیه : بر مجلس حرب تشکیل
ایدرک اجرای مذاکراتی لزوم سنر عدایمه دی . بو مجلسده
فی الاصل امرای بحریه دن اولمه دقلری حالده لونددینلن سنجاق
عسکرلرینه ریاست وظیفه سیله کیلرده بولنان بریه قوماندانلرندن
بعضیسی دشمنک نسبتدن بوسبتون خارج اولان کثرتی، بوندن
باشقه قلعه کبی قالیونلر قارشیسندنه خفیف عثمانلی کیلرینک
صندال کبی قالدیغنی ایلری سورهرک نتیجه سی مشکوک اولان
بر محاربه یه کیرشمکدن ایسه لیان مدخلنه استیجکامات انشاسنی
وطوپ وضعیله تحفظ اولماسنی تنسیب ایتدیله . یالکز صالح
وطورغود رئیس لر کبی دکر قوردلری، سیدعلی رئیس کبی حرب
سمندرلری بارباروس خیرالدینه، کندیلرینه و عثمانلی دلاورلرینه
امین و دفعاتله مغلوب ایتدکلری دشمنلرینک ماهیت حربیه سندن
خبردار اولدقلری ایچون سکوت ایتدیله و قپودان پاشانک رأینه
متابعته حاضر بولندقلرینی کوستردیلر .

بارباروس لیانده تحفظ صورتی احوال شدیدۀ روحیه سنه

تبعیتله قطعاً ردایدهرك چیقمنه قرار ویردی. بومجلس حربك اتخاذ ایتدیکی مقررات باشلیجه آتیدهکی مواددن عبارت بولنیوردی :

۱ — دونمای تشکیل ایدن سفائن دوت فرقه یه آیرلمشدر. قلیکاه ، صاغ جناه، صول جناح، احتیاط.

۲ — قلیکاهه بالذات قبودان پاشا ؛ صاغ جناحه « صالح رئیس » صول جناحه « سیدعلی رئیس » احتیاط فرقه سنه ده « طورغود رئیس » قوماندا ایده جکدر .

۳ — بودرت فرقه دن اصل فعال خط حربی اولکی اوج فرقه تشکیل ایده جک، احتیاط فیلوسی بوایلک هجوم خطنه توفیق حرکت ایتیه جکدر .

۴ — طورغود رئیس قومانده سنه ده کی دردنجی احتیاط فیلوسنک (بونلر کوکلایلردن متشکلدی) حرکتی بروجه آتیدر. (۱) خط حربك شدتلی هجومه دوچار اوله جق ضعیف نقطه سنه سرعتله امداد ایتک (ب) وقت لازمی کلنجه دشمنی جناحلردن وخط رجعتی اوزرندن تضییق ایتک (ت) الحاصل دشمن خط حربی یارمغه چالیشان عثمانلی خط حربنه اک مهم نقطه لرده معاونت ایله دشمنی ایکی آتش آراسنده برامق .

۵ — بوتون سفائنک دیرکلری اشاغی آلنه جقدر. (یوقاریده سویله نلیدیکی وجهله عثمانلی سفائنی اکثریتله خفیف و کورکله

متحرک تکه لر دن متشکل اولدیغندن دیرکلرک فضلہ غلبہ لک ایتہ مه لری و دشمنک آتدینی یاغلی پچاوره لرله طوتشه رق یاخود مرمیاتک تأثیراتیلہ دوکیه رک افراد ی دوچار تلفات و تلاش ایله مه مه لری ایچون اشاغی آلتامسی تنسیب اولنشدیر. عثمانیلرک بووجهله دیرکلرینی آشاغی آله رق حرب حاضرلنی کورمه لری هجومک صوک درجده قطعی و قاتلی اوله جغه دلالت ایدوب عادتاً عثمانی قره عسکرینک قدیماً هجومدن اول کفنلرینی بوینه طاقالرینه مشابه ایدی .

۶ — هیچ بر سفینه قیچ سنجاقلرندن باشقه سنجاق کوسترمیه جکدر. یعنی دشمن، هانکی سفینه لرک امیرال و یاخود قومودور سفینه سی اولدیغنی اکلامامایدیر .

۷ — هر سفینه خط حرب اوزرنده کی موقع و وضعیت نسبیہ سنی دائماً محافظیه غیرت ایلیه جکدر .

۸ — بوتون قوماندانلر و قپودانلر امیرالک اشارتنه و حرکاتنه توفیق حرکته هر فرصتدن استفاده ایلیه جکلر و دائماً معیتلرینی تشجیع و تشویق ایده جکلردر .

۹ — انای حربده بوتون سفائن منسوب اولدقلر غروب لری، غروب لرده فرقه لری غائب ایتہ مکہ و طویلی بولمغه غیرت ایلیه جکلردر .

۱۰ — بدایت هجومده باش طویلر حاضر بولندیریلہ حق

وهجومك هيئت عموميه سيله برابر دشمنك خط حربى بوزمق
ايچون بلا فاصله وسرعت فوق العاده ايله استعمال ايديله جكدور.

۱۱ — بونكه برابر ايجه منزل داخلنه كيريله دن وصحيح
اوله رق نشان آلمه دن طوب آتليه جكدور.

۱۲ — حين حاجتده اك يقين اولان سفائن رفقاسنه
معاونته شتاب ايله جكدور.

مقررات حريه نك اتخاذه دن براز صوكره متفقين دونما.
سندن بر فيلو قره يه عسكر دوكمك ايچون ليان مدخلنه
ياقلاشديلر. چونكه : دشمن عثمانليرك آزغنى، كندى قوت
فوق العاده لرني بيلدكلرندن عثمانليرك هيچ بر زمان ليانندن
چيقارق — كنديلرني دوچار خرابي ايدده جك — بر حربه
تثبت ايتيه جكلرينه امنيت ايتمش، صوك آمريكا — اسپانيا
محاربه سنده آمرىقاليرك ساتياغو لياننده كي ادميرال (سروده را)
فيلوسنه ياپدقلىرى كبي عثمانليلى ليانده ياقه له مق ايچون ليان
مدخلنى اله كچيرمه كقرار ويرمشلردى.

بونك اوزرينه خيرالدین پاشا دونما قوماندانلرندن « مراد
آغا » [مشهور مراد رئيس] ايله كوكللى فيلوسى امراسندن
« طورغود » « كوزلجه محمد » و « صادق » رئيسلىرى دشمنك
بوحر كتنه مانع اولمق ايچون مأمور ايتدى. مشار اليهمده
بلا پروا ليانندن چيقره رق تعرض فيلوسنى فراره اجبار ايتديلر.

بو حرکت تعرضیه دن ایکی کون صوکره دشمنک بش آلتی
 قطعه کندیسنه کوکنن قپودانلری قومانداسنده کی سریع السیر
 قدرغه سی تکرار لیمان آغزینه پک زیاده یاقلاشوب دونمای
 هایون طرفنه طوپ آتمق کبی بعض حرکات طفره فروشانده
 بولند قلرندن بارباروس بر آتشپاره غضب کسپله رک او آنده
 «ویراد میر!» و «حربه حاضر اول» قوماندالرینی ویردی.
 بعضاری احتمال؛ قپودان پاشا طرفندن حرب ایدلمکه قرار
 ویرلمش اولدیغی حالده ایکی کون قدر لیماندن چیقلمامسنى
 عثمانیلرک یاترددلرینه، یاخود حرکات حربیه ده تکاسل کوستر-
 دکلرینه عطف ایدر. لکن بوفکر تمامیه مردوددر. فی الحقیقه
 حرب ایدیه جکی محقق ایسمه ده او یله قوی بردشمنله حرب
 قرار ویریر ویرمز حرکات حربیه تشبث اوزمانکی احوال
 وشرائط حربیه نظرأ ملاحظه سزلق شائبه سندن قورتيله ماز.
 چونکه: معلوم اولمیلدر؛ اووقت عثمانلی کمیجیلری مسلک لرنده
 ماهر اولمقله برابر، حرب ایدن سفائنک عنصر مهمنی تشکیل
 ایدن لوندلر بر درجه یه قدر قره عسکرندن معدود و شیمدیکی
 منتظم بحریه سلاح اندازلری کبی دکزلرله انسیتلری مفقود
 وباشایجه مزیتلری اللرنده کی اسلحه خفیفه یی صوکه درجه
 مهارت و شجاعته استعماللرندن عبارت اولدیغندن بونلرک
 تنظیمی ایچون ایکی کون لیمانده توقف چوق عد ایدیه مز.

خصوصیله یوقاریده بیان اولندینی وجهله عثمانلیلر بو مدھش دونما قارشیسینده باشلیجه قول، کورک قوتیله اجرا ایدہ جکلری سریع و نا کھانی مانورہ لرہ کوکنمکده اولدقلرندن هجوم ایچون اوقوجه دشمن قالیونلرینک یلکن قوللانه مایوب معطل قالمالری طبعی اولان روزکارسز برهوا انتخاب ایتک ایسترلردی؛ شدید روزکارلی هوالرده اسپانیا و پورتیکیز قالیونلریله وندیک قاراقالرینک داغ کی ساحه حربده دولاشمه لری خفیف و کورکله مجهز عثمانلی قدرغه لری ایچون مشئوم بر نتیجه یی وجوده کتیرمک احتمالی حتی مطلقتی واردی . نته کیم : اشاغیکی وقعه خیرالدین پاشانک فکرندہ کی اصابتی اثبات ایله مشدر .

دشمنک حرکات طفره فروشانه سی اوزرینه دونما لیاندن چیقدی . و آلتی میل قدر آچیلدقدن صوکره بورده نظامی یعنی خط مصادمه یی آ کدیران شبه نصف دائره هیئتندہ بر خط حربی تشکیل ایتدی .

بوتشکیلات ایله عثمانلیلر اوکلرندہ دمیرلی بولنان و عثمانلیلرک بودرجه سرعت و جسارت کوستره جکنه امین اولمادقلری ایچون خط حرب تشکیل ایتکه حاجت کورمه مش اولان دشمن دونماسنه یاقلاشوب طوپ منزله کیرنجه پرووه لرندہ موضوع اولان اوچر طوپه بر آنده آتش ویردیلر . وغایت سرعت و صحتله کولله یاغدیرمغه باشلادیلر . بو هجوم و شدت نا کھانیدن

شاشيرمش اولان دشمن هر نه قدر عددجه عثمانيلردن فضله
ايسه ده بر فرقه لری هنوز قور فوده بولنديغندن بوضورتله تکليف
اولنان حربى قبوله جسارتياب اوله مايه رق سرعتله عثمانيلرك
آتشى آلتنده دمير قالديرديلر وقور فويه دومن دوغرولتديلر.
يوكسك آرمه لرینك معاوتى واسن روزكارك شدتى سبيله
قدرغه لرله کندیلرینه يتشمك ممكن اولمايغندن واقشامده تقرب
ايتديکندن تعقيبيلردن صرف نظر اولمغه مجبوريت کورلدى .
ايشته پروزه لياننده حرب قرارى ويرلدکن صوکره
خيرالدين پاشانك ايکي کون توقف ايتمه سنك حکمتى بووقعه
ميدانه قور . مشاراليه اسن شديد روزكارك دشمن ايچون اك
بويوك فوائد تأمین ايله جکنى بيلديکندن تبدل هوايه انتظار
ايله يوردى . اگر دونمانك خروجى ائناسنده روزکار اولماسه
ايدى . دشمنك عرض ايديلن حربى قبوله مجبور قاله جنى
وحالبوکه فکرى ، فرار ايدهرک قور فوده کى فرقه يه التحاق ايله
صوکره حرب ايتک اولديغندن قوه معنويه لرینك آشکار اولان
مفقوديتى يوزندن تماميله وقوتك انقسامى سبيله قولايقله
مغلوب اوله جقلرى طبعى ايدى .

قوه معنويه ديمش ايکن بوراده بر قاج سوز سويله مک
ايسته يورز : قوه معنويه نك اهميتى خصوصات حربيه نقطه
نظرندن نه اعصار مديده نك مرورى ، نه قواعد حربيه نك تبدلى

تتقيص ايدەمز. قوۋە مغويە يى - ماهيە - بر قاج قسمه آيرمقله برابر على الاطلاق « حرب دينلن قانلى اويونده بررول ايفسا ايدەجك اولان اشخاصك نتيجه نك موافق ظهور ايدەجكى خصوصندە كنديلرينه وقوماندانلرى ايله اللرندهكى وسائطه اعتماد واميتلريدنر » ديمكلكه مجملتا تعريف ايدە بيليرز. قوۋە مغويە فرد واحدهكى اعتماد نفسك بر اردونك ، بر دونمانك هيئت مجموعە سنه هر جهتجه تعمم ايتمش برشكل مخصوص كې دە تلقى اولنە بيلير. بر قوماندان، بر آميرال نه قدر مقتدر، جسور اولورسه اولسون والندهكى وسائط حربيە نه قدر مكمل، مفيد بولنورسه بولسون معيتك بو خاصه مهمه يه مالكيته احتياج كو سترمكدن وارسته قالەمز .

بوندن وارسته اولديغنى ظن ايدەرك يالكز كثر واسايحه دهكى مكملية ونفسندهكى اقتداره كوكنن بر چوق قوماندانلرك، آميراللرك نه فنا احواله دوچار اولدقلىرى تاريخ حرب اك بليغ بر لسان ايله ميدانه قويقمدهدر . خصوصيله قوۋە مغويە نك اسلامدهكى حس ديندارانه ايله اطمئنان تام درجه سنى بولماسى سايه سنده عثمانلى اردولرينك، دونمالرينك قاج دفعه لركنديلرندن قوتلى دشمنلره قارشى پارلاق، حيرت افزا مظفريتلقازاندقلىرى هر كسجه معلوم واليوم آوروپا مورخينك تحت تصديقدهدر. الحاصل قوۋە مغويە يى اهميت لازمه ايله تلقى ايتمك بويوك

قوماندانلر ایچون پک چوق مزیتلرندن دها بویوک بر مزیت
عد اولنسه شایاندر .

شوراسی قطعاً عقلمده طوتالیدر که : معنویاتجه متین
اولمایانلر احوال و شرائط مشکله ومدهشه اورتهسندده فعلیات
ومادیاتجهده متین اوله مازلر !

روسیه آمیراللرندن « مقاروف » طرفندن یازلمش (تعیه
بحریه) مسائلی نام اترده مؤلف قوه معنویهدن کمال اهمیتله اوزون،
اوزادی په بحث ایتدیکی صردهده اساتذه حربک افکار مخصوصه سنی ده
درمیان ایلهمشدر :

بویوک پترو دیمشدر که :

« جسور و متین قلبلر بر مملکتک اکی وسائط مدافعه سیدر . »

« حربده امید موفقیتک درتده اوچی قوه معنویه، یالکز

بر ربعی شرائط سائرده وابسته در . »

ناپولیون

« بر محاربه نک ختامنده غالب ایله مغلوب آره سندده یکانه
فرق قوه معنویه نک اختلافی جهتیلهدر . مغلوب اولان طرفده
قوه معنویه متزلدر . غالبده ایسه اکی عالی درجهیه واصل اولور .
یوقسه طرفینک ضایعات مادیه سنجه پک آز فرق کورولور . »

قلادو

« حربده قوه معنویه کیفیتکی زیاده حائر اهمیتدر . بو

خاصه تدقیقات نظریه ایله قولایجه قابل تشریح اوله مامقوله برابر
 مستقبلده دماغ و قلبك احوال و شرائط عسکریه تحتده صورت
 فعالیت تعین ایده جك قوانین روحیه نك ، یعنی « علم احوال
 روح عسکری » نامی آلتنده برفك امکان کشفی انکار ایتمك ده
 شایان قبول کوريله مز. بو کون خیال محال ظن اولنان برشی
 یارین شکل حقیقت کسب ایلر؛ بوسوزك صحتی بزه هر شیدن
 زیاده تاریخ کوسترمشدر .

جنرال لیهر

ایشته بزی بودرجه تفصیلات ویرمکه مجبور ایدن خاصه
 مهمه نك قیمت فوق العاده سی بارباروس خیرالدین پاشاچه تماميله
 تقدیر اولمش ، معینك بوندن تماميله حصه دار اولدیغنی
 بیلدیکی حالد ینه بو حس اعتمادی تقویه و تزید ایچون
 غیرت لازمه صرف ایدلمشدر .

پاشا وقوعی محقق اولان بر حربی بر طاقم عوارض جزئیه نك
 حیل و لایله تأخیر ایده رك عسکری اوزون مدت دكزده یورمقلغك
 مضر اولدیغنی بیلدیکندن و برشیك اجراسنه قرار ویردیکی
 نتیجه یی موفقیتی کوردیکی حالد مقصده وصول ایچون اك
 کسدرمه یولی انتخاب ایتمك عادتیه مالك اولدیغندن صباح اولنجه
 دشمنه قاوشمق فکریله قورفویه توجه ایتدی .

دشمن عثمانلیرك تقریبی کورنجه دكزه دوغرو آچیلغنه ،

عثمانیلرده انلره توفیق حرکت ایتمکه باشلادیلر . نهایت ایکی
دوئما پره وزه اوکلرنده ساحه حربه کیردیلر . عثمانیلرک قوه
معنویه لری مکمل اولوب یالکیز بر اندیشه لری وار ایدی که :
اوده؛ اسمکده اولان خفیف روزکار جنوبی اولدیغندن اثنای
محاربه ده دشمن سفائن جسیمه سنک سهوات و سرعتله مانوره
اجرا ایده بیللمسنه سبب اوله جقدی . آنجق بارباروس احوال
ودقایق حربیه نك اك اهمیتسزلرینی بیله نظر دقتده بولندیرمق
خلقتنده یارادلش بر داهئی حرب اولدینی ایچون درعقب
اشارتله، آیات کریمه مخصوصه یازیلوب کیملرک سنجاق ، اسکله
بورده لرینه تعلیق اولماسنی و جناب واهب العطایانک عثمانیلری
معاونت جلیله سندن هیچ بر زمان محروم ایتیمه جکنی عموم دوئمایه
بیلدیردیکندن امرینه هان اطاعت ایدلش ، افرادک کوکلری
بر توکل صمیمی ایله عون الهینک ظهور ایلیمه جکنه منتظر بولمشدر .
فی الحقیقه بو ائنده حکمت علویه الهیه کندینی کوستره رک
روزکار تمامیله قالدیغندن عثمانیلرک قوه معنویه لرینی بو سبتون تزاید
وتکمیل ایده رک هجومه ابتدار ایله مشلردر . بونکله برابر اولجه
ویریان قوماندایه کوره قالیونلر طوبله ایجه ازلدکدن صوکره
هجوم ایدلیمه جکدی . دشمن قالیونلری عثمانیلر اوزرینه عمومی
بر طوپ آتشنه باشلادیلر ایسه ده بو قالیونلرک طوپلری عددجه
کثیر اولدینی نسبتده آز منزله مالک اولدقلرندن سورنا ، طبل

و نفیر صدالری و هر عصرده دشمنلر مزی محاربات بریه و بحریه میدانلرنده لرزه دار ایلهین «الله الله» آوازهلری ایله مهیب و مدهش بر فورطنه حالنده ایلر ایلهین عثمانلی دونماسنک صولاتی کسر ایتمکه، انتظامنی بوزمغه موفق اوله مامشلردی. دونمای هایون بو وجهله دشمن اوزرینه ایلرله مکده ایکن هیچ آتش اجرا ایتمه مشدی. بر آرهلق غایت جسم و فضله طوپ چکر برون دیک قالیونی (امیرال غوندولیه رونک) خط حربک خارجه چیقوب شدید آتشله خط هجومک انتظامنی اخلا ایله مک تشبشنده بولندیسده بواننده تام طوپ آتشنک ساحه مؤثره سنه کلن عثمانیلر عمومی و مدهش بر آتش اجرا ایدرک دشمنی پریشان بر حالدو دومنسز، آرمه سز براق دیلر. عثمانلی طوپچیلری بو وجهله آتدقلرینی اورده حق و اوردقلرینی پاره لایه حق بر ساحه یه داخل اولنجه موقه تعطیل هجوم ایدوب بوتون طوپلرینی برنجی دشمن خطنی تشکیل ایتش و یکدیگرینه بوردا، بوردایه صیقیشوب قالمش اولان قالیونلری تخریب خصوصنده بر سرعت و مهارت فوق العاده ایله استعماله باشلادیلر. عثمانلی قدرغه لرینک باشلرنده موضوع اولان جسم و منزلی زیاده طوپلرک قالیونلر اوزرنده وقوعه کتیردیکی تخریبات حقیقه مدهش ایدی. هر آن وندیک قالیونلرینک آغر آرمه لری عثمانلی مرمیاتیله کوکرتهلرینه دو کیلوب طوپلری بطل و طوپچیلره مشکلات

ایراث ایله مکده وصولرله وضعیات مختلفه آلان بوجسیم تکنه لر
روز کار سزلق یوزندن حرکته قادر اوله میه رق بری برینک
آتشنه مانع اولمقده ایدیلر .

«آندریا دوریا» ایکنجی صف حربده کی قالیونلرک محو
و خراب اولمقده اولدیغی کورنجه معیتده کی قدرغه لردن متشکل
فرقه ایله قالیونلری محافظه و عثمانیلری مجبور رجعت ایلمک
ایچون ایلرله دیسه ده عثمانیلرک شدید آتشنه دوچار اوله رق
تکرار قالیونلرینک آرقه سنه دوغرو چکلمکه مجبور اولدی .
انجق سابق الذکر تشبث ایچون «آندریا دوریا» قالیونلرینک
آرقه سنی ترک ایدنجه هنوز حربه داخل اولمایوب بویله برفرست
کوزتله یین (طورغود) رئیس معیتده کی احتیاط فیلوا یله ایلریلیه رک
جناحینه هجوم ایتدی . و قالیونلرک بوش قالان آرقه لرینه کچهرک
بونلری ایکی مخوف آتش ایچنده براقدی .

سفائن محاربه وضعیت مرسومه یی آلدیغی ائنده پک قیمتمدار
خدمت لر کورمسی ممکن اولان احتیاط دشمن فیلوسنک نه حرکته
بولندیغنه دائر معلومات موجود دکلدرد . بوائنده باروت دومانی
ویانان کیلرک آتشی ساحه حربی قاپلایوب کوز کوزی کورمز
اولمش و برهنکامه دهشت انکیز وجود بولمشدی . «آندریا دوریا»
بو حرکتک موجب اضمحلال اولان نتیجه سنی کلا ینجه بوقاریشق -
لقدن استفاده ایله مک فکرینه دوشوب بارباروس فرقه سنک

آرقه سنی آلق، بوجله فرقه مذ کوره بی قالیونلر ایله کندی
 قدرغه لرینک آره سنده براقق یعنی عثمانیلرک بر از اول یابدق لری
 اویونی کندی لرینه یامق فکر یله متعدد دفعه لر ایلری له مش ایسه ده
 دشمنک مقصدینی درک ایدن بارباروس هر دفعه سنده قارشیسنه
 حیقوب فکرینی اجرایه وقت بر اقامشدر . بناءً علیه بالمجبوریه
 رجعت ایدوب حال اضمه حلاله کلن قالیون و پارچه لرک اطرافنده
 شاشقنجه دولاشمغه باشلادی . قالیونلر ایسه یوقاریده بیان
 ایدلیدی و جهله یکدیگرینه قلعه کبی چاتلش و سکونت هوا سبیلله
 غیر متحرک قلش اولدیغندن آریلوب طوپلرینی قوللانه حق
 صورتده حرکات حربیه اجرا ایده بیلمله لری ممکن اوله مامقده
 ایدی . دیگر جهندن جهه ده کی اصل دونما طرفندن
 و طور غود فیلوسندن خط رجعت و جناحین اوزرینه ساعتلرجه
 طوپ آتشی اجرا ایدلمسی سفائن اعداد و رونده کی افرادی حقیقه
 مدافعه یه غیر مقتدر بر حاله کتیر مش اولدیغندن بارباروسک
 ویردیکی بر اشارت اوزرینه عثمانیلر اصل فکر لرینی اجرا
 ایتمک اوزرینه بونلره شدله هجومه باشلایوب مهابت انکیز تکبیر
 آوازه لر یله قاریشیق غایت شدید و مؤثر بر کولله یاغموری
 یاغدی ره رق انکلیز اد میرالی مشهور (نلسون) ک To break
 the line تعبی ر یله ایما ایتدیکی دشمن خط حربی یار مق مانوره سنی
 اجرا و بر چوغنی غرق و احراق ایله دکدن صو کره آرقه لرینه

صیغتمش اولان قدرغهلرله سفائن سائریه هجوم ایله مشلردر .
 ایشته محاربه بودورؤ مدهشیه کیرنجه قوجه قالیونلرک
 عددجه چوق طوپلری وجسامتلری ایله مقابله ایده مه دکلرندن
 عثمانلی ماغونه و قدرغلرینه دشمنک قدرغه فیلولری
 هیچ مقابله ایده میه جکلرینی درک ایتدکلرندن و بو ساحه
 مضیق معرکه ده عثمانلیلرک بر کره رامپه ایدوب قانجه لادقلری
 سفینه یی قوت بدنیه ، جسارت قلبیه واستعمال اسلحه ده کی
 ممارسلری سبیلله بک آز زمانده ضبط ایتدکلری بتون دشمن
 قپودانلریله افرادینک قلبنده یر طوتمش بر حقیقت اولدیغندن
 حکومات متفقہ دونماسی بیوک بر اغتشاشه دوچار اولمش ،
 کرک بری برینی ، کرک « آندریا دوریا » نک اوامرینی اکلاماز
 اولوب راه فراری طوتمشلردر . بوئانده اقشامده حلول ایتمش
 اولدیغندن « آندریا دوریا » صقالی یوله رق قاراقاو قالیونلرینی
 آتش ایچنده ، قدرغلرینک قسم کلینسی عثمانلیلرلنده بر اقه رق
 فرار ایدن چکدیرمه لرینک آردینه دوشوب دارقورتلشدر .
 آوروپا بحریونی آره سنده بک مشهور اولان بوادمیرالک
 یأس مغلوبانه سی اودرجه شدید اولمشدرکه : برچوق تاریخلر
 ایکی الینه ایکی کولله آلوب دوکوندیکنی روایت ایدرلر .
 عثمانلیلر هر نه قدر مغلوبلرک آرقه سنه دوشهرک بر قاق

قدیرغه دها ضبط ایله مشلر سده ظلمت لیلدن استفاده ایله
دیگر قسمی فراره موفق اولمشد.

میلادك ۱۵۳۸ سنه سی ایلولنده وقوعه کلن بومحاربه
قوشلق وقتندن غروبّه ، حتی دها صوکره یه قدر ممتداولمش ،
صباحلین پره وزه اوکلرینی جسیم براورمانه بکزه دن اومهیب
دونمادن اقشام اوزری دکز اوزرنده یانان برقاج تکنه ایله
برایکی سرندن بشقه نشانه قالماشدی .

حقیقهً دشمنك ضایعاتی بك عظیم اولوب ۱۳۰ پاره
سفینه حربه غائب ایله مشدی . پروزه محاربه سی زمانه وازمنه
متقدمه محارباتنه نظراً اك بیوك ، اك شانلی بر مظفریت بحریه
تشکیل ایتمکده در .

شیمدی ، یوقاریکی صحیفه لری اوقویان قاره بارباروسك
بوحرربی قازانلق ایچون اجرا ایتدیکی تدابیری ، تعیه و سوق
الحیش حرکتلرینی اولدجه ا کلامش اولق لازم کلیر .
اوحالده بونلری شیمدیکی تعیه بحریه و سوق الحیش بحری
قواعدیله تطبیق ایده یلیرز ، عجباً بارباروسك قواعد حربه سی
قواعد حاضره یه مطابقیدر ؟

اولا بارباروسك اك قطعی مانوره سی دشمنك حربی یارمق
ایدی . دیگر بعض کوچوك حرکتلر حد ذاتنده اهمیتسز اولقله
برابر بوتیجه یه وصولی تسهیل ایده جك تدبیرلردن عبارتدی .

« دشمن خط حربی یارمق » تعبیرینک فن حرب بحریده
 دلالت صریحه سی نه در؟ بوتعبیر دشمنک بزه بتون اجزاً قوتيله
 متحداً مدافعه ایچون عرض ایله دیکی جبهه یی ایکی یه ، یاخود
 دها کوچوک قسملره آیروب یکدیگرینه معاونت ایده میه جک
 برحاله کتیرمک، ومتعاقباً وبوبر برینه معاونت ایده مین طاقاری
 قوه متحده مزله برر، برر قولایجه محو و افنا ایله مکدر .
 خصوصیه آرقه سنده احتیاط فیلولری بولنمایان تک خطوط
 حربیه یی یاروب خط رجعتی کسه رک دشمنی ایکی آتش
 آره سنده براققدر . یوقاریده بسط اولنان ملاحظاتدن قولایجه
 اکلاشیله بیایرکه : بارباروسک اکثر احوالده قوللانینی قاعده
 حربیه چوق قوتله آز قوتی باصدیروب محو ایله مکدر . هیچ
 بویه عاقلانه بر قاعده حربیه متروک و منسی اولورمی ؟ الیوم
 الیزده بولنان اکصوک یازلمش فن حرب کتابلرینه باقلسه برنجی
 صحیفه ده اک قطعی المفاد ومعلوم نتیجه اوله رق بوله جغمز توصیه
 حربیه ده فضله قوتله دون قوتی باصدیروب محو ایتمکدن
 عبارت دکلیدر ؟ احوالده بعضارینک دیدیکی کبی بوندن درت
 یوز سنه اول ویلکنلی، کورکلی سفائن ایله پک چوق محاربه لر
 قزائمش اولان بارباروسک وضع ایتدیکی قاعده حربیه نک
 تأثیری، معقولیت وسالمیتی الآن ثابت بولندیغی انکارایدیله مز .
 انحق بوسوزمزی سوء تفسیر وتفهم ایده رک سرعت وسهوات

دور، سرعت سیر، اسلحه مده‌شده به مالکیت یوزندن شیمدیکی سفائن مهیه‌نک اسکی یلکن کیلریله نصل مقیس اوله‌یله جکنی صورمغه قالقیشمالیدر. ایکی مقدار معین برنسبت متساویه‌ده تزیایدایله‌سه‌لر یینلرنده‌کی فرقه خلل کلیه جکی طبعیدر. اوحالده کیلر، نه قدر تکمل ایدرسه ایتسین؛ مادامکه: هر دولت بحریه عین قواعد ترقیه کوره انشا ایدلمش دونمالر وجوده کتیریور. یینلرنده‌کی مناسبت حریبه‌ده بعض جهات مهمه‌جه ثابت قالیر. (له‌ین - پول) دیورکه:

«پره‌وزه محاربه‌سی تورکلر ایچون حقیقه‌ک پارلاق بر مظفریت ایدی. بتون دول معظمه خرس‌تیانیه‌نک یوزلرجه سفائن‌دن عبارت مهیب دونماسی قوتجه کندیلرندن پک دون اولان عثمانلی دونماسنک اوکندن قاقش ایدی! بناءً علیه قانونی سلطان سلیمانک یامبولی‌ده مظفریت واقعه‌دن خبردار اولنجه ممالک عثمانیه‌ده شهرآیین اجراسنی امرایته‌سی وبارباروس خیرالدینک مخصوصاته بیکلرجه غروش ضم‌ایله‌مه‌سی پک مناسب ایدی. بو وجهله بارباروس جهانیه بر کره ده‌ا اثبات ایتش ایدی‌که: عثمانلی دونماسی دکزلرده نامغلوبدر و سلطان سلیمانک رایتی بتون آق‌دکزده سربسهای مظفریت اولدی.»

نووه (Castel Novo) حصارینک فتح واستردادی. — پره‌وزه مظفریت عظیمه‌سنک قازانیلدیغی سنه‌ی متعاقب اولجه

دشمن طرفدن ضبط اولان قاستل نووو حصارینک استرداد ایچون خیرالدین پاشا یوزاللی پارچه تکنه ایله دکزه چیقوب طقوز یوز قرق آلتی ربیع اولنک سکزنجی کوننده اوتوز یدی پارچه طوبله حصاری محاصره و قره دن کلن روم ایلی بکلر بیکسی خسرو پاشایه معاونت ایدوب سکز بیک ایکیوز مرمی آتدقن صوکره یکر می ایکی کونده برجلی تخریب ایله مش واقع اولان هجوم ایله قلعه یی تشکیل ایدن حصارلردن بری ضبط اولنشدر . ایکنجی حصارده براز صوکره ضبط ایدلایکندن مرتباتی اسیر و قلعه تعمیر اولنوب داخلنه یکر می آلتی پاره طوب تعیه ایدلای . خیرالدین بک بوصوک بهارده دخی در سعادته غنائم عظیمه ایله داخل اولمش ایدی .

بارباروس خیرالدین نک فرانسه یه امدادی

مورخ وعالم مرحوم محترم کاتب چلبی دیرکه:

«دوقوز یوز قرق دوقوزده فرانسه قرالی فرانسیس درگاه معلایه آلچی کوندروب اسپانیا قرالی ایله آره لرنده عظیم خصومت و قتال مقرر اولمغین اول سمته دونمائی هایون ارسال ایله امداد و معاونت رجا ایتش ایدی . اول قیش ایچنده مستوفی کیمیلر

تدارکی فرمان اولنوب خیرالدین پاشا یوزپاره قدرغه دونادوب
مکمل دونما ایله طقوز یوز اللی سالی بهارنده دریاه چیقوب
فرانسه دیارینه توجه ایتدی دیه بعض مجموعه لرده مسطور
کورلدی لکن تفصیلنه ظفر میسر اولمادی.»

محرر عاجز ایسه بوراده اوزمانکی شرف و شوکت مزک
بریاد داشت مفخرتی اولق و قوجه تورکلرک غرب حکمدارلرینی
بیله قرمه ده دکرده نصل حمایه ایتمش اولدقلرینی تکرار ایله مک
وبالخاصه کنج و امید استقبالمز بحریه لیلر مزی ماضینک عظمت
ومفاخری ایله دکرلر اوزرنده وطن ایچون سعیه ، فداکاری
دها آتشین برقلبله سوق ایده بیلمک امیدیه بوسفرک تفصیلاتی
بورایه وضع ایده جکم:

کاتب چلینک سویله دیکی کبی فرانسوانک استمدادی اوزرینه
بارباروس خیرالدین یوزی متجاوز سفائنن مرکب مکمل بر
عثمانی دونماسی ایله مارسیلیا لیماننده لنکر انداز شوکت اولدیغی
زمان فرانسز قپودانلری بو جهانک اک مشهور بحریه لیسینی
مراسم بحریه اوزره سلاملا دیلر؛ فرانسز سفائننک دیرکلرندن
حضرت مریم نامنه اولان مقدس سنجا ق ماینه ایدیلوب یرینه
آل رنکلی و بجم و هلال ایله مزین عثمانی سنجاغی قالدیرلدی؛
چونکه اوزمان متفق دونمالر بریرده اولدقلری مدتجه هانکی
دولتک امیرالی عمومی قوماندانلی حائز و یاخود قدم و شهرته

مالك ايسه آنك سنجاغنى چكك برقاعده مخصوصه ايدى .
 بوتون آروپا ايسه فرانسزلرك توركلرله اولان اتحادينه صوك
 درجه قيزمشلر ايدى . بارباروس خیرالدین فرانسیه کلیر ایکن
 ایتالیا قیلسنده (رجیو) قلعه سنی تخریب و غارتله قوماندانك
 قیزینى اسیر ایتش » (تیر) نهری آچیغنده کورونوب رومانك
 اسكله سی اولان (جیوه ته وکیا) اها لیسنى مستغرق خوف و دهشت
 ایله مشدی . تموز افرنجیده (۱۵۴۳) لیون کورفزینه موصلتنده
 فرانسه قدرغه لرینك قوماندانی اولان دوق (دنکیه ن فرانسوا
 ده بوریون) پاشایه اك عالی و محتشم بر رسم قبول عرض ایتدی .
 بونكله برابر بارباروسه پك از صوكره جاتی صیقه جق
 حالاته تصادف ایله دی . برنجی فرانسوا ایمپراطورك قوای
 عظیمه سنه قارشى آچیق و قطعی حرکاتدن احتراز ایله مکده
 ایدى . حالبوکه : بارباروس ایچون بو عطالت اك جان صیقیجی
 احوال دن معدوددی . نهایت : فرانسوا بیک ترددله نهایت
 (نيس) شهرينك بومباردمانی امر ایتدی . بارباروس همان دمیر
 آلهرق ایتالیانك قایسی اولان بوموقعه دوغرولدى ؛ یاننده کی
 فرانسز دونماسی اوقدر فنا تجهیز ایدلمش وانتظامی اوقدر
 مختل ایدی که : بارباروس فرانسزلری بو خصوصده شدید آتکیدیره
 مجبور اولمش و براز صوكره فرانسزلرك باروتلرینك بیتدیکنی
 کورنجه :

— نه کوزل عسکرلر، دیمشدی، کیملرینی شراب فیچیلری
ایله دولدیره رق باروت واریللرینی کیری ده براقشدر !
(نیس) بومباردمان ایدیلوب ضبط اولندقدن صوکره
عودت ایدلمش و عثمانلی دونماسی ایچون تولون لیمانی قیشلاق
تعیین اولنمشدی .

اوروپالی مورخ دیرکه :

«ایشته اوراده غران سینیورک (یعنی عثمانلی پادشاهی) معظم
دونماسی یاتوردی؛ و فرانسه نك بواک لطیف یالسنه دهانه قدر
مدت تحکم ، تملک ایده جکنی کیم بیلیر ایدی ؟ کوکرتهلرده
وقصاره لرده صارقلی تورکلر راحتجه دولاشیر ایکن سفینه لرینک
کورکلرنده بیکلرجه خرستیان اسراسی درزنحیر ایکلرلردی!..»
بارباروس علی الدوام ، صالح و سنان رئیس قومانداسنده
کوندردیکی فیلولرله اسپانیا سواحلی یاقوب بیقدینی حالد
غریبدرکه: کرک فرانسواده و کرک خصمی شارلکنده بربرینه
مشابه ایکی ظن باطل حاصل اولمش ایدی . شارلکن آمرالی
اولان اندریا دوریانک ناموس عسکر یسندن شبهه ایدیور ،
بارباروس غرب صولرنده اولدینی حالد آنک اوزرینه هجوم
ایتمه سنه برمعنا ویره مه یوردی . دیگر جهتدن فرانسوا اوزمان
اسیراولان طورغودی بارباروسه نك جنوهی تهیدایله قورتار-
دیغنه پک اینانمایور ، آرهلرنده بر دوستلق تگون ایله مش

اولماسندن وبارباروسه نك شارلكنه متايل بولماسندن چكينيوردی؛
 حالبوكه: بوشبهلرك، ظنياتك قطعياً حقیقه مقارن اوله مایه جنی
 بوايكي طرف آره سنده آخرتده بيله ائتلاف حصوله كله ميه چكي
 كون كي آشكار اولمق لازم كليردی. سبب اصلي ايسه دونمازك
 مصارفه فرانسه مالیه سنك تحمیل ایده مه مکه باشلاماسندن
 وایمپراطوره قطعی وحصانه برپولتيقه بی حسن اداره اقتدارينك
 فرانسزلرده مفقودیتندن عبارتدی.

نهایت بارباروس در سعادته متوجه حرکت ایتدی. فرانسه
 حکومتی دونمازك تکرار استانبوله کیرنجیه قدر لزوم کوستر.
 دیکی مصارفی ویرمش؛ اللرنده کی درتیوز اسلام قدرغه اسپرینی
 قورتاروب پاشایه تقدیم ایله مشدی؛ بوندن باشقه کرک پادشاه
 نامنه، کرک کندیسنه برچوق مجوهرات ایله کرائقیمت هدیه لر
 ویرلشدی.

آوروپالی مورخ دیر، که:

«الحاصل قورصان، تام بر قورصان یچیمنده، اموال و غنائم
 ایله یوکلای اوله رق فرانسه دن آپرلدی. در سعادته کلنجیه قدر
 ايسه ایتالیا ساحلی باشند باشه تخریب و غارت ایدیلوب قدرغه لر
 صوایله برابر دمیریرلرینه کلدی لر...»

بارباروس خیرالدین فرانسه دن عودتندن اوچ سنه صوکره
 سکسان یاشنی متجاوز شانی براختیار، محتشم عثمانلی ایمپراطور.


لغتك اك محتشم قپودان پاشاسی و جهانك اك جسور و ماهر
 كميجيسى شرفيله رحمت رحمانه استغراق ايتدى (مات رئيس
 البحر) تاريخ وفاتيدر (سنه هجريه ۹۵۳ سنه ميلاديه ۱۵۴۶
 تموز) .


مشار اليه ايجون بوراده محرر عاجزك بيان محاكمه ايد بيلمك
 حدى دكلدر. اجرا آتى آينه اقتدارى، معكس عظمتناه حيتيدر.


۱۳۲۶ اغستوس ۱۰ كوزتیه

صوك














3 1761 07130441 4

2112